

دينا عماد

هل يشفع الحبيب؟



عصير الكتب للنشر الإلكتروني

دينا عماد

هل يشفع الحب ؟

(رواية)

جميع الحقوق محفوظة © عصير الكتب للنشر الإلكتروني

<http://book-juice.com>

هل يشفع الحب ؟

المؤلف : دينا عماد

نشر في : أكتوبر ٢٠١٤



هل يشفع الحب ؟ ←

(١)

عالية قاعدة ف فصل دراسي .. قدام بنات اعمارهم مختلفة من ٣ ل ٦ سنين
"وماتت ستنا آمنة ام الرسول عليه الصلاة والسلام"
تقف عالية ف الكلام... تبص للبنات
"ها قلنا نقول ايه"
يردوا البنات
"عليه الصلاة والسلام"
تكمل عالية "كان عنده وقتها ٦ سنين لما بقى يتيم من غير ام او اب... اخده جده عبد المطلب يربيه"
تسأل بنت من اللي قاعدين
"يعنى الرسول مكنش عنده ام واب زينا"
ابتسمت لها عالية
"ايوه يا جيحى كان يتيم زينا... بس ربنا كان بيحبه وقال ان كل الناس لازم تحب الايتام... بسم
الله الرحمن الرحيم واما اليتيم فلا تقهر"
سألت بنت تانية
"يعنى ايه"
عالية "يعنى ربنا قال ان اللي يزعلنا هيزعل منه والرسول عليه الصلاة والسلام"
ردوا البنات
"عليه الصلاة والسلام"
كملت عالية "قال ان اللي بيحبنا ويخلي باله مننا بيدخل الجنة معاه"
اتفتح باب الفصل... دخلت هدير
"ياللا يا عالية نزلى البنات الجنية"
عالية "ياللا يابنات كل واحدة تمسك ايد اختها"

فى الجنية... بنات كتير اعمار مختلفة بيلعبوا
هدير وعالية قاعدين جنب بعض وعينهم على البنات
"مالك يا عالية... سرحانة ف ايه"
"مفيش يا حبيبتى... بس كل ما افتكر اننا هنبعد عن بعض بخاف"

"نبعد عن بعض... هو انا ليا غبرك يا عالية... فاكرة يوم كتب كتابي"

ردت بأسى "فاكرة"

وضحكت عالية وهى بتغير نبرة الاسى

"كنتى زى القمر والله يا هدير"

ابتسمت هدير بأسى

"قمر بالستر... كل ما افكر والقاعة فاضية ومفيش حد... كل الموجودين ميجوش ١٠ انفار"

"واحنا هنعمل ايه بالناس بس.. مش بيقولوا العروسة للعريس"

"مناسبة العروسة للعريس... امبارح بعد مانتى عصام كلمنى وقال قدامه شقتين وهروح معاه النهاردة"

نختار واحدة منهم"

"مبروك... بقاله كتير بيدور"

"الحمد لله لقي دول ايجارهم معقول"

شافوا ثريا مديرة الحضانة بتقرب منهم... ابتسموا لها بحب

قعدت معاهم

"صباح الخير يابنات"

ردوا هدير وعالية

"صباح النور"

هدير "ابلة ثريا عندى ليكى خير حلو"

ثريا "ايه ياهدير فرحيتي"

هدير "عصام لقي شقتين ايجارهم معقول وهنروح العصر نشوفهم"

ثريا "الف مبروك"

ردت عالية بسرعة

"العصر؟؟ النهاردة الاثنين ياهدير عندى درس تحفيظ"

هدير "ااه صحيح... طيب لما تيجى نبقي نروح"

عالية "ابلة... عايزة اقولك حاجة"

ثريا "خير؟"

عالية "عايزة ادور على شغل"

ثريا "شغل ايه يا بنى ... انتى مش ماسكة فصل البنات الصغيرين هنا ف الدار وتروحي دروس
التحفيظ... كفاية عليكى"
عالية "المدارس قربت يا ابلة ومش هيبقى فيه غير الصغيرين يعنى ممكن يقعدوا مع سعاد ولا وجيدة"
ثريا بتفكر "بس هتشتغلى ايه؟"
عالية "اهو هدور وان شاء الله الاقى"

عالية ماشية ف الشارع ... صوت اذان العصر
عالية حسست بدوخة... وقفت لحظات وكملت طريقها

طه ف عربيته... جنبه خالد صاحبه
"نزلنى هنا يا طه... شكرا ع التوصيلة"
"العفو... استنى اما اركن"
"ليه رايح فين"
"اصلى العصر بالمرة هنا"

ركن طه... نزل هو وزميله بعد ما ركن جنب سور الجامع
عدت عالية من جنبهم... داخت تانى
سندت على سور الجامع ووقفت
لخوها طه وخالد
خالد "مالها دى شكلها تعبانة"
راحوا ناحيتها
خالد "خير يا انسة... تعبانة ولا حاجة"
ارتبكت عالية من احراجها وردت
"لا كويسة... شكرا"
طه "نوصلك اى حنة طيب؟"
عالية "شكرا"
قربت منهم ست كبيرة كانت رايحة الجامع

"عالية!!؟ مالك يا بنتي"
عالية"مفيش يا حاجة زينب دوخت شوية بس"
فتحت زينب شنطتها وطلعت زجاجة مياه
"خدى اشربي شوية مياه"
عالية"صائمة يا حاجة شكرا"
مسكتها زينب من ايدها
"طب امسكى فيا تعالى...الف سلامة عليكى"
حطت عالية ايديها ف ايد زينب
التفتت زينب لظه وخالد
"شكرا يا ولاد..ربنا ما يرميكم ف ضيقة"
ردوا "العفو...اى خدمة"

مشيت عالية مع زينب ودخلوا الجامع
ومشى طه عكس الاتجاه ودخل الجامع يلحق الصلاة

بعد الصلاة خرج طه من الجامع... وهو يبص على مكان مصلى السيدات والمصليات خارجين منه
ركب العربية... واول ما ركب سمع موبايله بيرن
"الو"

صوت بيزعق
"ايه ياطه... عشرتلاف مرة بتصل بيبك"
"كنت بصلى يا ماما والموبايل ف العربية"
"مش تقولى قبلها بدل ماتسيينى اتصل كده"
"معلش ياماما"
"انت جاي امتي؟؟ وروحت جبت الفلوس ولا لسه"
"لسه ياماما...هروح اهو وساعة بالكثير اكون عندك"
"طيب متتأخرش... بقولك ايه اخدت اجازة بكرة"
"لا ياماما معرفتش"

"ازاي معرفتش...انا مش قايلالك من امبارح"
"عندنا شغل ومش هينفع حد ياخذ اجازة الاسبوع ده"
"يعنى شغل الحكومة يمشى وشغلنا احنا يقف ومناقيش ناكل بقى علشان معرفتش تاخذ اجازة"
"ماما...ممكن نكمل كلامنا لما اجى...ومتقلقيش شغلنا مش هيقف ولا حاجة"
"طيب مستنياك... انا متغديتش لسه..متأخرش"
"حاضر يا حبيبتي مش هتأخر...مع السلامة"
"مع السلامة"
قفل طه مع مامته...وبص على باب مصلى السيدات...لقى ان كل الناسى خرجوا...مشى بالعربية

عالية قاعدة ف الجامع...بعد الصلاة
زينب"ايه يا عالية هتقعدى برضه؟"
عالية"اه هحضر الدرس علشان بعده فيه بنات جاية درس التحفيظ"
زينب"يا بنتي شكلك تعبان"
عالية"لا والله انا كويسة انا دوخت بس علشان الصيام والحر"
زينب"ما تطفى هو احنا ف رمضان"
ابتسمت عالية لزينب علشان تغير الموضوع...حست بيها زينب
"قوليلي يا عالية...هدير مجتش معاكي ليه"
"رائحة تشوف شقة مع خطيبها"
"ربنا يصلح حالهم...قوليلها تظمن انا كلمت مجموعة اصحابي وزمايلي ف الشغل على اول الشهر
هنلم مبلغ كده وانزل معاكم نشوف الحاجات المهمة اللى ناقصاها"
عالية بفرحة"بجد يا حاجة...ربنا يكرمك يارب...ده احنا كنا شايلين الهم علشان مش عارفين
هتجهز مينين"
زينب"سيبيها ع الله"

صوت الشيخ ف الميكروفون
"السلام عليكم ورحمة الله وبركاته... درس النهاردة هنكمل فيه نفس موضوع الدرس اللى فات"

فاتن واقفة ف المطبخ... دخلت لها بنتها ميار

"ماما"

"نعم"

"الشامبو خلص"

فاتن "مفيش ولا كيس؟؟ دورى كويس"

ميار "مفيش والله اخر مرة كنتى جاية ٤ اكياس وخلصوا"

فاتن "هجيلك بكرة وانا جاية م الشغل"

ميار بتردد "اتصل بابا اقوله؟"

فاتن "اتصلى... يمكن يجيب"

خرجت ميار من المطبخ... وكملت فاتن قلية البتنجان

رجعت ميار بعد اقل من دقيقة... بصت لها فاتن

"ايه؟؟ قالك ايه؟"

ميار باستسلام "قالى اغسلى بالصابون او استنى امك تجييلك بكرة"

فاتن ساكنة ومبتعلقش... سألتها ميار

"اعمل ايه؟"

"هجيلك بكرة"

"ياماما كيس شامبو برقع جنيه ميرضاش يجيبه ليه"

فاتن ساكنة وتقلب اللى ع النار

"ياماما... انتى ليه ساكنة كده"

ردت بنفاد صبر

"هعمل ايه... عملت كل اللى ممكن تخليه خلاص لحد ماتعبت... ابو كى مش هيتغير الحمد لله انه

بيجيينا اللقمة"

"ياماما انا مطلبتش حاجة كبيرة"

"عارفة... وهجيلك اللى انتى عايزاه.. انا عمرى حرمك من حاجة"

"لا... بس انتى هتعملى ايه ولا ايه بس"

"اهو بعمل اللي بقدر عليه"
"الدروس هتبدأ... اصحابي كلهم حجزوا... وانا لسه"
"احجزى"
"عايزين فلوس مقدم"
"طب استنى عليا شوية"
"حاضر ما انا مستتية اهو"

فاتن وميار وعبد الحميد ع الغدا...بعد ماتقوم ميار
فاتن بابتسامة "بقولك ايه يا عبد الحميد...ميار عايزة تحجز الدروس"
عبد الحميد وهو بياكل "ما تحجز"
"المدرسين عايزين الفلوس مقدم"
"مقدم ولا مؤخر انا مالى"
"ادفع لها بس اول شهر وانا اكمل"
"لا ده مش اتفارقنا...انتى صممى تدخليها ثانوى وقلتى مش هكلفك حاجة خليكى قد
كلامك...قلتلك تدخل صنايع ولا تجارة و٣ سنين ونخلص"
"ده اسمه كلام برضه...فيه حد دلوقتى بيقول الكلام ده... وبعدين هبقى انا معايا بكالوريوس واقعد
بنى بدبلوم"
"ماله الدبلوم ياحتى... حوش حوش اخدتى الدكتوراة"
"والله ما اقصد حاجة...انا بتكلم على ميار"
"فلوس معايش فلوس... انتى فاكرة البيت ده بيصرف ايه ورق كوتشينة"
قام عبد الحميد...قامت وراه فاتن
"الشهر ده بس يا عبد الحميد"
"منين...عايزة فلوس روى خدى من اخوكى انما انا مفيش عندى فلوس"

طه داخل المحل "محل مفروشات"...مامته قاعدة ع المكتب...راح قعد قدامها وعليه علامات الاجهاد

"اتاخرت ليه ياطه؟"

"جبت فلوس البضاعة الاخيرة من سالم"

"ومقالش على طلبية تانية"

"قال"

"وان شاءالله مين هيسافر يجيها"

"انا ياماما حاضر"

"مش قلت مش عارف تاخذ اجازة"

"بكرة ولا بعده بعد الشغل هروح اجيب بضاعة جديدة...متشيلش هم انتى بس"

"طيب"

قامت نرجس...دخلت ورا ستارة ورجعت بصينية فيها اكل

"يالا ... قوم اغسل ايدك وتعالى نتغدا قبل ما امشى"

"ونرمين فين؟"

"ف البيت...هنبقى نجعلك بالليل علشان لما تقفل المحل تيجى معانا بالعربية نجعلها هدوم المدرسة"

هدير راجعة من الحمام...بتصحى عالية

"عالية عالية"

قامت عالية بخضة

"ايه... فى ايه"

"مالك...قومى يالا"

"كويس انك صحتينى....استغفر الله العظيم يارب"

"ايه مالك"

"كنت بحلم حلم وحش اوى"

"كابوس؟"

"لا حلو وحش استغفر الله العظيم يارب... اعوذ بالله من الشيطان الرجيم"

"بتستغفرى على ايه"

"الحلم"

"ماله"

"هقولك ومتضحكيش عليا... انا اول مرة تحصل لى والله"

"هو ايه ده؟"

"حلمت بواحد... استغفر الله العظيم يعني... انه بيحضني"

"بتضحكى عليا ياهدير... الله يسامحك"

"عادی یا بنتی هو حقیقی... ده حلم... هو حد حقیقی"

"ماهو اللى انا مستغربه باله ان الشخص ده شفته فعلا...بس معروفش والله ولا فكرت فيه ولا حاجة"

هدیر باهتمام "مین ده؟؟؟ وشفتیہ فین"

عالية وهى بتاخذ فوطة وقبل ماتخرج من الاوضة

"شفته وانا رايحة الدرس يوم الاثنين ف الشارع لما دوخت"

خرجت عالية بسرعة من الاوضة وهى محرجة وهى بتحكى

(٢)

عالية وهدير داخلين اوضة مديرة الدار
هدير "حضرتك عايزانا يا ابلة"
ثرىا "اه اقعدوا يا بنات"
قعدوا... وهما يبصوا لبعض على تردد ثرىا
ثرىا "انتم طبعا عارفين انا بحبكم قد ايه... وعارفة انكم بتحبوني"
هدير "طبعا يا ابلة... احنا مشفناش راحة ف حياتنا الا لما جينا الدار هنا وده كله بسبب حنانك
علينا"
عالية "اه والله... ده احنا اتعذبنا اوى من يوم ما وعينا ع الدنيا... محسناش ان القلوب فيها رحمة الا لما
جينا الدار هنا"
ثرىا "انا يعز عليا انى اسبيكم... بس انا طالعة معاش الاسبوع الجاى وقلت لازم اعرفكم علشان
مشيش فجأة"
عالية وعنيها مدمعة "معاش؟؟ وهدير هتمشى؟؟ وانا هبقى لوحدى"
قامت هدير حضنتها والدموع ف عينيها
"احنا مش ممكن نتفرق ابدا يا عالية... احنا مالناش الا بعض... ده انتى كل عيلتى"
ثرىا بتحاول تخفف عليهم
"جرى ايه يا بنات... انتوا عايزين تعيطوا وخلاص... مين قال بس اننا هنتفرق... هو المعاش هيمعننى
انى اجى ازوركم"
عالية وهى بتمسح دموع هدير
"انتوا بس هتوحشوني... وبعدين بتعيطى ليه احنا ما صدقنا ان فرحنا قرب تقومى تعيطى"
هدير "هو مينفعش يا ابلة عالية تيجى تعيش معانا"
ثرىا "مينفعش يا هدير"
عالية بتبتسم علشان هدير مترعلش
"ومين قال انى هوافق ابقى عزولة"
هدير "عزولة ايه بس... هو انتى غريبة على عصام"

ثريا"هو عصام كان معاكم ف الدار زمان"
هدير"اه... كان ف الدار اللي كنا فيها قبل ما يفصلونا البنات لوحدها والولاد لوحدهم"
ثريا"دى قصة حب قديمة بقى"
ضحكت هدير بكسوف...كملت ثريا
"المهم بقى...انا عايزة اوصيكم...ايا كان مين اللي هتيجى مكانى...تطلع كويسة تطلع وحشة انتم
مبقتوش صغيرين... محدش يقدر يدوس لكم على طرف... اللي جاية دى مجرد موظفة وانتم
اصحاب الدار...محدش له فضل عليكم فاهمين... اى حاجة تضايقكم تليفون صغير ولا تيجوا لى
وانا اتصرف"

طه ف المحل واقف بيرص علب على الارفف
نرجس قاعدة ع المكتب
"طه...انت بترص البضاعة الجديدة؟"
"ايوه ياماما"
بتبص ف الفواتير اللي قدامها
"ايه الاسعار دى"
"مالها"
"بدوى ضحك عليك ياطه...انا قلت له هاخذ بالسعر القديم"
"ده قالى انه اتفق معاكى ع الاسعار الجديدة"
"تصدق عايز يتهزأ"
ورفعت السماعة من التليفون اللي جنبها
"هتعملى ايه ياماما"
"هبهدل اللي خلفوه"
قاطعها طه بحزم
"ميصحش انا اجى من عنده بعد ما اتفقنا ع السعر الجديد وانتي تصغرين ياماما"
"اصغرك...ماعاش ولا كان"
"يبقى معلش اعتبريها غلطى انى مسألتكيش الاول...لو على فرق الفلوس هدفهم"

"انت بتقول ايه ياطه... هو انا عاملة ع الفلوس ولا عاملة ان محدش يضحك علينا... انا فلوسى
وحالى ومالى لمن مش ليك انت ونرمين... انا مش عايزة حد يضحك عليكم انا مش عايشة لكم"
"متقوليش كده ياماما... ربنا يخليكى ويديكى الصحة"

فاتن ف الشغل... ماسكة ورقة وبتكتب
لبس المدرسة
جزمة
شنطة مدرسة
مصاريف المدرسة
حجز دروس وملازم
بتتكلم ف سرها
"نقول اللبس والجزمة والشنطة من ٢٠٠ ل ٢٥٠.. طب والمصاريف هتعملها ٦٠ ولا ٧٠... نقول
٥٠ ونوفر من الهدوم... طب الدروس هيطلبوا مقدم... اخليها تحجز ٤ مواد بس دلوقتى... طب
وبعدين... يارب افرجها يارب... اجيب منين كل ده"
سابت القلم والورقة وهى سرحانة ومش شايفة مركزة مع كل الموجودين حوالها على مكاتبهم...
فجأة خطرت لها فكرة

قامت من مكتبها... وخرجت الطريقة وراحت مكتب سكرتارية المدير
راحت سلمت على واحدة ف سنه تقريبا
"ازيك يافاتن.. مالك"
"ازيك يا عبير... انا جاية قاصداكى ف خدمة"
"أو مرى"
"عايزة اتنقل"
"ليه؟؟ ده انتى ملكيش مشاكل مع حد... حصل حاجة؟"
"لا الموضوع مش كده"
وسكتت شوية وكملت وهى مترددة

"بصى انا هجيلك م الاخر... انا محتاجة فلوس وكنت عايزاكى تشوفى لى اى حته تبع الوزارة بس
تكون حوافرها زيادة شوية ولا فيها اى دخل تانى اكبر من اللى باخده هنا"
سكتت عبير شوية بتفكر
"كويس انك جيئى... لسه المدير العام باعتلى على كذا مكان عايز ارشح ناس ليهم"
"اهم حاجة الحوافز"
"طب والمواعيد يافاتن؟"
"لا عادى مش مهم المواعيد...حتى لو فترتين مش مشكلة"
فتحت عبير ورق قدامها
"بصى اللى موجود قدامى ويناسب درجتك... مكتب فرعى وحضانتين ودار ايتام"
"الحوافز يا عبير...ايه اكرت حاجة"
"دار الايتام... بس هتقعدى طول النهار تقريبا وتبقى مستعدة ف اى وقت ف الاجازة تتزلى لو
حصل اى حاجة"
"حوافرها حلوة؟"
"اه...فيها حوافز ومكافات وكويسة لانك هتروحي مديرة للدار"
"طيب خير... اطفال ولا كبار"
"بنات اعمار مختلفة... المدير طالعة معاش وعلشان كده عايزين حد مكانها"
"استلم امتى؟"
"هبقى اكلمك اقولك...انتى رقمك زى ماهو ولا اتغير"
"لا زى ماهو البيت والموبايل"

عالية ف الجامع...قايمة من ع الارض وكل الناس قايمين
زينب "عaaaaاالية"
عالية "نعم يا حاجة"
"هاتى رقم تليفونك علشان هبقى اكلمك لما نلم الفلوس نزل نجيب حاجة هدير"
"انا معايش تليفون... بس معايا رقم هدير"
"هاتيه"
فتحت عالية شنطتها... وطلعت ورقة صغيرة

"اتفضلى...اصل انا مش حافظاه"
"طب معاكى قلم انقله"
"لا...حضرتك خدى الرقم وانا هبقى اخليها تكتبهولى"
"طيب...هبقى اكلكمم تتقابل ونروح نشترى اللى يقدرنا عليه ربنا"
"ربنا يخليكى يا حاجة"
"وعقبال ما اجييلك ياعالية"
ردت عالية بصوت واطى بلا امل
"ان شاءالله"

عالية وهدير رايجين اوضة ثريا
بيخبطوا ع الباب المفتوح وييدخلوا
ثرىا قاعدة على مكتبها... وقدامها فاتن
ثرىا"تعالوا يا بنات... مدام فاتن اللى هستلم الدار مكان...هدير وعالية دول مقيمات هنا ف
الدار... وبيراعوا اخواتهم الصغيرين...عالية ماسكة سن من ٣ ل ٦ وهدير من ٦ ل ١٠"
فاتن"اهلا يا بنات"
ردوا البنتين"اهلا بحضرتك"
فاتن لثرىا"هو مفيش رضع هنا؟"
ثرىا"لا مفيش...احنا عندنا من ٣ سنين وانى طالعة لحد الاعدادية... انا عرفتك على عالية وهدير
لوحدهم لان شغلهم هنا متطوعات... اما باقى المشرفات والاحصائيات هعرفك عليهم مع
بعض...موصكيش عليهم علشان دول بناتى"
ابتسمت فاتن"ف عنيا"
ثرىا"اتفضلوا يا بنات"
خرجوا البنات من المكتب...وسألت فاتن
"مقيمات؟؟"
"اه... يتيمات الاتنين..اول ماجيت كانوا ٤ بس ٢ اتجوزوا وهدير مكتوب كتابها وهتجوز قريب
ولسه عالية... البنتين دول متريين ف الملاجئ من واحد للتانى من وهما رضع"
"هما ماهومش اهل خالص؟"

"لأ... لقيطات...هتلاقى صورة المحضر اللي جت بيه كل بنت ف ملفها لو عايزة تعرفى التفاصيل"
"لا حول ولا قوة الا بالله"

هدير وعالية ماشيين ف الشارع بيتفرجوا على المحلات
زينب وقفت قدام محل نرجس
"تعالوا نجيب الفرش من هنا مرة واحدة"
دخلت زينب والبنات وراها
زينب "سلامو عليكمو"
قامت نرجس من مكانها
"وعليكو السلام"
"بقولك ايه يا مدام... انا عايزة شوية حاجات لجهاز عروسة...ملايات على فوط على كوفرات"
نرجس "عيونى...وعندى بطاطين ولانجيريها كمان...مين العروسة ف القمرات"
شاورت زينب على هدير
نرجس "ربنا يتمملها بخير وتشيلى ولادها...عقبال اختها"
رن موبايل نرجس... جابت من ع الرف كتالوج ملايات
"طب نقى من دول اللي يعجبك... كل اللي فيه عندى.. ثوانى ارد ع التليفون"
"الو... ايوه يانرمين... زمانه جالك يابنتى مشى من عندى من بدرى... بتهزرى؟؟ ده وقته... هاتى
اخو كى.. ايوه يا طه... يالا وصلها ومتأخرش عليها... اه فيه شغل وانا لوحدى...مع السلامة"

طه بيركن العربية قريب من المحل
نرجس بتلف المشتروات ف شنتط كبيرة

طه رايح ع المحل...دخل
"سلامو عليكمو"
بيردوا كلهم السلام

شافته عالية... قبل ما يشوفها... ارتبكت لما افتكرت الحلم
نرجس "تعالى لف باقى الحاجات دى لحد ما اعمل الحساب"

عالية قربت من هدير وحطت ايدها ف ذراعها
طه بيلف الحاجات ويبص قدامه... شاف عالية
افتكرها... لحظات يبص لها وهو مبتسم لها.. ارتبكت زيادة

شاف طه ارتباكها... محبش يزوده فكملة شغله
حست هدير بارتباك عالية... مالت عليها وشوشتها
"مالك؟"
عالية بهمس "مفيش"

طه بيختلس نظرات لعالية... وخطر على باله سؤال مين فيهم العروسة... وفجأة وهو بيلف اخر
حاجة
"مبروك"
ردت هدير بتلقائية "الله يبارك فيك"

زينب خلصت دفع الحساب
"شكرا يامدام... حاجتكم اسعارها حلوة"
"العفو... وعقبال ماتيجوا تاخدوا حاجة النونو"
"ان شاء الله... هدير... شو فيلنا تاكسى نخط فيه الحاجة"
هدير خرجت من المحل... وعالية معاها

طه بيتصنع الهدوء... راح ناحية الباب يبص عليهم

هدير وقفت تاكسى... وعالية ماشية وراها بتحاول تدارى ارتباكها بانها مش عارفة تتكلم ولا
تتصرف

راحت زينب قعدت ف التاكسى
طه عايز يكلم عالية...بيفكر بسرعة وهما بياخدوا الحاجة يحطوها ف التاكسى
"اسألها عن اسمها ولا عن رقم تليفونها... هيبقى منظرى ايه لو سألتها كده.... اقولها ايه قبل ماتمشى"
وهو بيفكر شاف اخر لفة كبيرة...اخذها وراح يوصلها...كانت عالية راجعة تاخذها...
وقف قصاها يناولها اللفة... اخذتها منه
"ابقى تعالى نورينا"
"شكرا"

اخذت منه الحاجة بسرعة ورجعت للتاكسى بسرعة...مشى التاكسى وهو واقف يبص عليهم
وهو يقول لنفسه
"انت اهيل...فيه حد يقول لواحدة ابقى تعالى...طب قولها بتدرسى ايه ولا ساكنة فين ولا حتى
اسمك ايه... غبي"

عالية وهدير ف اوضتهم ف الدار
هدير عمالة تضحك
"هو يقولك تعالى نورينا انتى تقويله شكرا...ده مش رد ده خالص"
عالية متغظة"اعمل ايه انا اتلخبطت اول ما شفته... حسيت انى مش مجمعة...انا كويس ان صوتى
طلع اصلا"
"وانا اقول البت ماها لزقت فيا كده ليه"
"انا اول ما شفته وافتكرته وانا حسيت بالاحراج"
"ايه يابنتى...احراج ايه ده كان حنة حلم...يعنى هو ميعرفش حاجة عنه"
"معرفش بقى...الحمدلله اننا مشينا...لو كنا فضلنا شوية كمان مش عارفة كان ممكن يحصل ايه"
"ايه الحكاية يالولو... هو القلب دق ولا ايه"
"بتقولى ايه يا هدير..انا بتاعة الكلام ده...استغفر الله العظيم"
"هو انا قلت انتى بتعملى حاجة غلط...بس لخبطتك دى يعنى.."
"ميعنيش حاجة... احراج مش اكتر...نامى نامى"

فاتن قاعدة مع ميار بالليل
"ماما المدارس الاسبوع الجاي"
"بكرة هنترل نجيب لبس المدرسة ياميار متفلقيش"
"والدروس"
"احجزى وعلى تانى حصة اكون قبضت المرتب"
"قبضتى فلوس الشغل الجديد"
"لا لسه بدرى عليها مش اقل من شهرين"
"اومال هتصرفى منين"
"هبيع الدبلة واجيب واحدة صينى...ومش هتبان"
"هتبعى دبلتك ياماما"
"هبقى اجيب غيرها ان شاءالله...مش هيحصل حاجة يعنى...المهم انتى تذاكرى ومتفرحيش ابو كى
فيا"
"حاضر ياماما والله مش هتندمى ان شاءالله"

(٣)

جرس الباب رن

قامت فاتن تفتح...لقيت طه قدامها
ابتسمت بترحيب وهى بتوسع له يدخل
"طه... اهلا وسهلا...ايه المفاجئة الحلوة دى"
دخل طه وسلم عليها وباسها
"ازيك يافاتن عاملة ايه"
"الحمدلله...خطوة عزيزة"

قامت ميار تسلم عليه
"ازيك يا خالو...واحشنى"
"ازيك انتى يا حبيبى...عاملة ايه"

قعد طه وقعدت معاه فاتن وميار
"ازيك يا طه وازى نرمين"
"الحمدلله بخير...انتى عاملة ايه...مبتصليش تسأل خالص كده قلت اسأل انا"
"فيك الخير طول عمرك احسن منى... قومى اعملى شأى لخالك ياميار"
طه "مفيش داعى انا نازل على طول"
شاورت فاتن لميار انها متسمعش كلامه...دخلت ميار المطبخ
"طميننى عليكى يافاتن اخبارك ايه؟؟"
"الحمدلله ف نعمه...ربنا يخليك يا طه انك بتودنى وتسأل عليا"
"ان مكتتش اود اختى الكبيرة...لولا انى مش عايز اكبرك كنت قلت اللى مريانى"
ردت فاتن بضحك
"ما انا مريبك فعلا...ولا هتنكر"
"لا يا ستى مقدرش انكر ابدا...اخبار الحاج عبد الحميد ايه"

ردت باقتضاب "بخير...نحمده"
قام طه "طب هقوم انا علشان ارجع المحل"
"وانت لحقت...نرمين عاملة ايه ف الدروس"
"ما انتى مبتسألش عليها"
ردت بانكسار "مانت عارف نرمين وابلة نرجس مبيحبونيش فمبحش اكون ثقيلة"
طه بيحاول ينفى الحقيقة اللي عارفها
"لا ازاي متقوليش كده... هي مشاغل بس"
فاتن بترد عليه بصدق
"انا مش زعلانة منهم...وعارفة ان كل واحد عنده مشاغل...كفاية انك كل فترة بتجيلي وتسال
عليها"
"انا كنت هعدى عليكى الصبح ف الشغل بس مفضيتش"
"اه صحيح انا سبت الشغل"
"ايه؟؟ليه؟؟"
"لا اتنقلت يعنى...قصدي اني سبت هناك وروحت دار ايتام"
"مرتاحة هناك؟"
"الحمد لله"
حط طه ايده ف جيبيه...وطلع فلوس كان محضرها
مسك ايد فاتن وحط ف ايدها الفلوس
"خلي دول معاكي"
فاتن وهى بتبعد ايديها عن الفلوس
"لا والنبى يا طه..خيرك سابق"
طه وهو بيديها الفلوس ويسيبها ف ايديها
"متقوليش كده...هو انا غريب"
جت ميار بالشاى
"الشاى يا خالو"
"معلش ياميار..مستعجل...سلامو عليكو"
فتح طه الباب وخرج...وفاتن بتدعيه
قفلت الباب وراه...فتحت الفلوس

"يا حبيبى...ربنا مايرميك ف ضيقة ابدًا"

"اذاكى فلوس؟"

"الحمد لله ربنا فرجها"

"الحمد لله...سبحان الله ياماما خالو طه غير نرمين ومامته خالص...بحس انه طيب زيك كده انما هما

اعوذ بالله"

"وانتى شفتى ايه من نرجس ... انا اللى شفت منها المر كله...ماعلينا ربنا يسهلها...ويرضيك

يا اخويا"

عالية فى اوضتها ف الدار...دخلت عليها هدير

"ايه ده؟؟جيتى امتى"

"من ساعة كده.. وانتي عملتى ايه"

"شكلنا كده يا لولو مش هنعرف نجيب غير اوضة نوم بس"

"وماله... اللى يقدر عليه يجيبه وبعدين يبقى ربنا يكرمكم"

"والله انا مش طالبة اى حاجة...انا عارفة انه بيتعب اوى علشان نعمل البيت...بس كان نفسنا

نجيب انتريه مع الاوضة"

"يا ستي المهم يكون لك بيت"

"معاكى حق...واحنا يعنى مين هيچيلنا...لا لينا اهل ولا معارف ولا حد خالص...يوه خدتك ف

الكلام ومساءلكيش .. عملتى ايه؟"

"ولا حاجة... مش لاقية شغل مناسب"

"هى دروس التحفيظ خلصت؟"

"اه من يوم ما الدراسة بدأت ومبقاش فيه تحفيظ...بحضر الدروس بس"

"مشفتيش حد هناك"

قالتها هدير وهى بتضحك...ومخدتش عالية بالها من قصدها

"لا بشوف كل اللى بيحضروا عادى"

"لا مش قصدى...انا اقصد بتاع الحلم"

ردت بحزم"لا"

"ومالك بتتكلمى كده ليه"

"علشان متضايقه من نفسى ياهدير...حاسة انى بعمل حاجة غلط"
"ايه اللي غلط؟"

"انه بييجى على بالى كتير...مش قادرة اتحكم ف تفكيرى ده"
"عادى يا عالية مفيهاش حاجة...بتتمنى تقابليه تانى مش كده"
سكتت عالية وهى عايزة تقولها آه... فهمتها هدير
"ما تيجى نعمل اننا رايجين نتفرج على اى حاجة ف المحل وتشوفيه"
"اخص عليكى ياهدير...انا اعمل كده...الله يسامحك"

نرمين ف المحل مع نرجس وطه
طه"يالا يانرمين اوصلك"
نرمين"مستنية مها هتجيلى هنا"
نرجس"اتصلى بيها شوفيه اتأخرت ليه"
اتصلت نرمين بمها
"الو...انتى فين يا جزمة... يالا متتأخريش.. شغالين عند اهلك احنا... يالا سلام"
نرجس بتضحك"هههههههه يوه جتك ايه...قوية يابت"
طه بيص لنرجس باستغراب...وبيوحه كلامه لنرمين
"ايه يانرمين الاسلوب ده...فيه حد يكلم صحابه كده"
نرمين"اسلوب ايه ياطه...صاحبتى وبنهزر مع بعض...دماغك والنبي"
طه"ماما...مش تفهميه ان كده غلط"
نرجس"وايه الغلط ف كده...بتقولك صاحبته وبتهزر معاها"
طه باستسلام"ماشى"

بعد ٥ دقائق...وصلت مها..واول مادخلت
"ازيككم...ازيك يا طنط"
وسلمت على نرجس وباستها
نرجس"ازيك يا حبيبتي وازى ماما"
مها"الحمد لله"

مها بتسلم على طه

"ازيك"

طه "الحمد لله"

مها بتبص لنرمين "اما انتي زبالة ولا اسلم عليكى ولا اعيرك"

نرمين "حوش حوش مستنية سلامك... يالا هنتأخر"

اخذت نرمين مفتاح العربية وايدها ف ايد مها

"يالا ياطه... حصلنا"

فاتن ف مكتبها... وقاعدة معاها هدير وعالية

هدير "والنبي يا ابلة ابقى تعالى اتفرجى على شقتي"

فاتن "طبعاً يا هدير... وهاجى احضر الفرع وباركلك ف بيتك وكل حاجة"

هدير بحزن "فرح!! احنا مش هنعمل فرح... احنا بعد ما عصام يكمل فلوس الاوضة ونستلمها هبقى

اروح معاه وخلاص"

عالية "مش مهم الفرع يا هدير المهم انك تبقى ف بيتك"

هدير "يالا الحمد لله على كل حاجة... من وانا صغيرة كنت بحلم بفستان الفرع زى اى بنت... بس

يعنى هى جت ع الفرع... ما احنا طول عمرنا محرومين من كل حاجة اشمعى دى اللى هنحققها"

فاتن بتأثر "انتوا هتوجعوا قلبى ليه... ياريتنى ما سألت"

هدير "اسفة يا ابلة... بس اصلك متعرفيش احساسى ايه دلوقتي... كان نفسى يبقى لى اهل... بلاش

اهل... ام بس تبقى معايا ف فرحتي"

فاتن بدموع "قلبي عليا المواجه يا هدير... مين قال بس انى مش عارفة احساسك... انا كمان كنت

يتيمة زيكم"

بصوا لها هدير وعالية... بتساؤل ف عينيهم

وسألتهما هدير بتردد

"يعنى حضرتك كنتي ف ملجأ زينا"

فاتن "لأ... انا امى ماتت وانا عندي ٨ سنين ولان اهل امى واهل ابويا محدش فيهم استحملني

عنده... كان لازم ابويا يتجوز.. واتجوز واحدة مكنتش عندها رحمة ورتني العذاب اشكال والوان"

عالية "وباباكي"

فاتن "الله يرحمه كان طيب ويصدقها وهي كانت بتقنعه انها بتعاملني عادى وانها زى اى ام بتربى بنتها وتعلمها"

هدير "يعنى كانت بتعمل ايه"

فاتن "كان عندها محل ومتمسكة بالشغل بيه ومرضتش تقعد ف البيت فكان شغل البيت كله عليها مع المدرسة ده مع المعاملة السيئة منها واهمالها ليا لا تجيب لى لبس ولا تتكلم معايا ف فترة اى بنت بتبقى محتاجة حد يكلمها"

عالية "ربنا احن من اى حد"

فاتن "اه والله يا عالية... كنت حاسة ان ربنا مش سايبني كان ليا واحدة صاحبتى مامتها حنينة اوى وكانت بتحبني وتحن عليا... كنت محتاجة الحنان اكتر من الاكل والشرب واللبس والفسح اللي كنت محرومة منهم طبعاً... مامه صاحبتى دى اللي كانت بتديني الحنان كله كنت بحبها اوى... هي اللي كانت دايماً تصبرني وبتقولى ان اكيد ربنا زى ما بيحرمننا من حاجة بيعوضنا بحاجة تانية... وده قبل ما نتفرق ف الكليات انا وصاحبتى والدنيا تشغلنا"

هدير "الحمدلله... ربنا عوضك بيايه يا ابلة؟"

فاتن "كنت متفوقة اوى ف دراستي... ورغم اني كنت شغالة ف البيت ودادة لاخويا اللي هي خلفته كنت دايماً بحب درجات عالية طول سنين الدراسة"

عالية "ماشاءالله ربنا بيعوض فعلاً"

فاتن "وشوفوا حكمة ربنا.. وانا ف الكلية اتقدم لى عريس وهي اقنعت بابا الله يرحمه اني لازم اوافق والعريس مكش عايزني اكمل دراستي وهما وافقوا ومحدش اهتم برفضى وكنت هموت ان تعبي هيضيع"

هدير وعالية ف نفس الوقت باهتمام

"وبعديينيين"

فاتن بابتسامة راحة

"مرات ابويا اكتشفت انها حامل والحمل ده كان ف مصلحتي... حامل وبتشتغل ببقى محتاجة حد يراعيها ويراعى البيت وبابا واخويا وفركشت الخطوبة الحمدلله"

ضحكوا الاتنين

"الحمدلله... ربنا كبير"

فاتن "الحمدلله على كل حال... لولا اني كملت دراستي مكنتش اشتغلت ودى نعمه كبيرة اوى الحمدلله"

هدير "واكيد ربنا عوض حضرتك بزوج احسن من الاولانى"
سكتت فاتن ووشها اتغير لما افتكرت انها اتجوزت عبد الحميد الاكبر منها ب ١٧ سنة علشان بس
تبعد عن عيشتها مع نرجس
وردت على هدير بابتسامة تدارى بيها حزنها
"الحمد لله على كل شئ"
قامت عالية من ع الكرسي وقربت من فاتن
"ابلة...عايزة احضنك ممكن؟"
خدتها فاتن ف حضنها..وعيطت عالية كتير
هدير ودموعها نازلة
"طيب بتعيطى ليه دلوقتى...المفروض انا اللي اعيط"
عالية وهى بتمسح دموعها
"كنت خايفة اوى بعد ابلة ثريا ما طلعت معاش وانتي هتمشى بعدها انى ابقى لوحدى...ربنا بعت
لى ابلة فاتن اللي حسيت انها اطيب واحن حد قابلته"
فاتن "ربنا يعلم يا بنات انا بحبكم قد ايه انتم وكل بنات الدار...بحس انى كان ممكن ابقى مكانكم
فبعتبركم كلكم بناتى"

رن موبايل فاتن...
"الو...ايه ياميار مالك؟؟ مفيش درس؟؟ طب تعالى ونبقى نروح مع بعض...ياللا مستنياكى"
قفلت فاتن مع ميار
"هقوم امر على البنات لحد ميار ما تيجى...واهو فرصة تتعرفوا عليها"
هدير وعالية قاموا وراها
"هنقعد نستناها ف الجنية"
"طيب هخلص واجيلكم"

نرمين ومها ف المدرسة مع بعض
"ما تروحي معايا يا مها وبعدين نروح الدروس مع بعض"
"ماشى...بس قوليلى هو اخوكى هيوصلنا برضه؟"

"اه"

"أففف بقى"

"ليه؟"

"ليه ايه؟... واحنا صغيرين اننا نروح ونيجى لوحدنا... يا شيخة انا زهقت دى ماما وبابا مش خنقنى

كده... اكيد مبيثقش فيكى"

"لا طبعا بيثق فيا"

"او مال ليه رايح جاى معاكى... وانا بقيت مربوطة بىكم وانتم بتجرونى وراكم"

"هو بيخاف عليا بس... بدل ما اركب مواصلات ولا تاكسيات وحد يضايقنى"

"بذمتك انتى مصدقة؟"

"قصدك ايه"

"مقصدش... بصى لو اخوكى هيفضل يودينا ويحبنا كده هبقى اقبالك ف الدروس... مش معقول

تبقى خنقة ف كل حنة كده... ياستى نمشى لوحدنا فيها ايه"

"وافرضى حد عاكسنا"

"ماتسيى اللى يعاكس يعاكس... هيخطفنا يعنى"

فاتن مع ميار وعبد الحميد ف البيت بيتعشوا

عبد الحميد "امتحاناتك امى يا ميار"

ميار "لسه متحددتش يا بابا بس اكيد قريب مش هتبعد عن النص الاولانى من يناير"

عبد الحميد "صعبة الدراسة عليكى؟"

ميار "لا الحمد لله... اهو الدروس والمدرسة ماشية"

عبد الحميد "وقلة تواجد امك ف البيت... مش مأثر عليكى"

فاتن "انا مستعدة ارجع تانى للشغل اللى بخلصه بدرى... بس ادفع انت فلوس الدروس"

عبد الحميد "هو انا كل كلمة اتكلمها فلوس... فلوس... فلوس... انتى ايه فاكرانى قاعدلك على بنك"

فاتن "لا حول ولا قوة الا بالله... مش انت اللى بترمى كلام على شغلى... هو انا يعنى فرحانة وانا

طول اليوم بره"

عبد الحميد "الواحد ميتكلمش كلمة الا تعملى منها حكاية ورواية... انتى ايه يا شيخة فاضية"

قام عبد الحميد... وميار بتبص لفاتن وتشاور لها على راسها... وبتقول بهمس

"طنشى"

وحدفت لها بوسة وهى بتكمل عشا...ضحكت لها فاتن وردت ببوسة ثانية

طه ونرجس ونرمين داخلين شقتهم

وقبل طه ما يدخل اوضته

"طه... استنى...عايزة اسألك سؤال"

التفت ليها طه

"نعم؟"

نرمين"انت ليه مبتتشش فيا"

طه باستغراب"نعم؟؟ مبتتشش فيكى؟؟ مين قال كده"

نرمين"اومال ليه على طول ملازم خطواتى كده ورجلك على رجلى ف كل حته"

نرجس"اخوكى ويوصلك ويخلى باله منك"

نرمين"اشمعى انا...ماكل البنات مش كده...على فكرة انت خليت شكلى وحش اوى...بنات كتير

بقوا فاكرينى وحشة من كتر مانت مراقبنى كده"

طه"بنات مين...ومالنا احنا بالناس...الى يفتكر يفتكر المهم انا نيتى ايه"

نرمين بزعيق"اسمعوا بقى... انا مش صغيرة...كلها كام شهر وهدخل الجامعة... لو فضلت تودينى

وتجيبنى كده زى عيال الحضانة مش رايحة مدرسة ولادروس ولا امتحانات كمان"

نرجس"يا خرابى...وتضيعى مستقبلك"

نرمين"ماهو انا مش عيلة صغيرة اخوها بيراقبها"

نرجس"خلاص... كله الا تعليمك"

طه"ايه ياماما...مش فاهم يعنى ايه الى حصل وبعدين هى بتهددنا"

نرمين وهى داخلة اوضتها بتزعق

"اخر كلام عندى قلته"

بعد ما دخلت اوضتها

طه"شايغة طريقتها"

نرجس بضحك وبتطبطب عليه

"اختك الصغيرة وبتدلج عليك...سيبها براحتها وهى هترجع تقولك ابقى وصلنى"

"انا خايف عليها"

"من ايه...ماهى مبتقتش صغيرة وليها حق تتكسف من صاحباتها... يالا هغير هدومي واحضر العشا

وانت غير هدومك وادخل راضى اختك وخليها تيجى تتعشا معانا"

طه وهو مستنكر كلام مامته

"تتعشا متتعشاش هى حرة...تصبحى على خير انا داخل انام عندى شغل بدرى"

طه ف اوضته على السرير...ويفتكر عالية يوم ماشافها ف المحل

بيتسم وهو بيفتكر ارتباكها وهما ف المحل

وافتكر يوم ما شافها عند الجامع

بص ف النتيجة...شاف اليوم الاربعاء

وخطرت على باله فكرة

"يارب اعرف اشوفك تانى"

(٤)

فاتن خارجة من مكتبها... راحت الجنية لعالية وهى قاعدة مع البنات قدام المراجيح
قعدت جنبها
"عالية انتى لسه بتدروى على شغل"
"اه يا ابلة... ومفيش اى شغل مواعيده تناسب شغل الدار هنا"
"بقولك ايه... اول السنة بيتزل عقود ف الوزارة عندنا وانا كده كده هطلب حد للدار علشان هدير
هتمشى... ايه رأيك؟"
"بجد؟؟ ياريت"
"بس العقد بيبقى ضعيف اوى... يعنى ب ١٥٠ جنيه تقريبا"
"ماشى مش مهم احسن من مفيش... مش عارفة اقولك ايه يا ابلة ولا اشكرك ازاى ربنا يخليكى
يارب"
"تشكرينى على ايه بس... يالا العصر قرب قومى علشان تلحقى معاد الدرس"
"مفيش درس النهاردة... الشيخ مسافر عمرة وأجل الدروس لحد ما ييجى"

طه ف عربيته ومعاه خالد
"يا عم طه والله ما كان له لزوم توصلى"
"انا كده كده كنت جاى الناحية دى"
خالد وهو بيتزل
"طب متشكر ع التوصيلة... سلام"
"اى خدمة... مع السلامة"
نزل خالد... وركن طه على سور الجامع وفضل قاعد ف العربية
عينه بتدور ف الشارع شوية يبص قدامه وشوية فى المראה وراه
سمع صوت الاذان... فضل مستنى يمكن يشوف عالية جاية
ولما سمع الاقامة... نزل بسرعة يلحق الصلاة

بعد الصلاة قعد مستنى ف العربية نص ساعة...ولما فقد الامل مشى

طول الطريق وهو ماشى بيفكر ف عالية

"هو علشان قابلتها مرة هنا...يبقى هتيجى تانى ف نفس المعاد ونفس اليوم...مش شرط
طبعاً...يمكن جت صدفة... يارب ارزقنى بصدفة تانية زى صدفة المحل كده...وساعتها مش هفوت
الفرصة دى تانى ابدأ"

نرمين ومها رايحين المدرسة

شدت مها نرمين على مدخل عمارة...على السلم...فتحت مها شنطتها...طلعت روج وماسكارا
ومرايا

"امسكى لى كده المرايا يا نرمين"

"انتى هتعمللى ايه"

"رتوش خفيفة كده بس تطبط وشى"

"ف المدرسة!!"

"وايه يعنى...ده روج خفيف كأنه زبدة كاكاو...مش اول مرة احط يعنى"

"مكنتش باخد بالى"

"احطلك؟"

"اخاف"

"عبيطة وجبانه"

خلصت مها...ورجعت الحاجة ف شنطتها تانى وقالت لنرمين

"يالا بينا"

طه بيلبس...دخلت له مامته

"انت لسه مترلتش ياطه...هتتأخر؟"

"راحت عليا نومة ياماما"

"مالك يا حبيبى... بقالك كام يوم كده مش طبيعى...سرحان كتير...تكونش بتحب"

قالتها نرجس وهى بتضحك له...ضحك طه
"تفتكرى؟"
"ياريت ده يبقى يوم المني...شاور انت بس"
"لو لقيتها مش هشاور انا همسك فيها واقولها هاتى عنوانك"
"انا مش فاهمة حاجة"
"لو قعدت احكيلك مش هروح الشغل"
"ف داهية الشغل..مش هتتحرك الا لما تحكىلى"
طه كان بيخلص لبس...وكمل كلامه وهو خارج من الاوضة
"الحكاية تتلخص ف انى شفتها مرة صدفة ف الشارع...ومرة تانية انا جيت المحل لقيتها هى ومامتها
واختها بيشتروا جهاز لاختها...وبس..لاعراف اسمها ولا عنوانها ولا حتى بتدرس فين؟"
نرجس كانت وراه وهو رايع يفتح الباب
"انا بيورد عليا كتير...انهى واحدة فيهم"
"مش هتفتكرىها اكيد...الكلام ده كان من بيعى ٣ \ ٤ شهور كده...يالا انا نازل...ادعيلى"
"ربنا يكرمك يا حبيبى ويرزقك ببنت الحلال اللى تريخ قلبك"

هدير داخله على فاتن مكتبها
"صباح الخير يا ابلة"
"صباح النور يا هدير"
"بعد اذنك هستأذن عايزة اروح بس انضف الشقة عشان الاوضة جاية النهاردة العصر"
"الف مبروك يا حبيبتي...روحي"
"واقولك حاجة كمان"
"خير"
"عصام اتصرف ف مبلغ كده وهيشترى انتريه مستعمل...اصل حسينا ان الشقة هتبقى فاضية اوى"
"معلش اهي خطوة وبعد كده تجيبوا كل حاجة"
"ان شاءالله...انا هبتدى افرش وتوكل على الله يوم ٢ \ ٢"
"كويس يعنى بعد ٣ اسابيع تقريبا...هتوحشنا يا هدير"

"ربنا يخليكى يا ابلة... وانتوا كمان هتوحشونى بس متقلقيش انا مستغناش عن عالية وهتلاقينى كل

شوية عندكم"

"تنورى...ربنا يسعدك يارب"

"بعد اذنك يا ابلة"

فاتن وميار ماشيين ف الشارع

ميار حاضنة كتبها وماسكة ف ايد فاتن ويتمشوا

"ماما عايزة آيس كريم"

"ف الشتا كده"

"حلاوته ف الشتا انتى مسمعتيش عمرو دياب ولا ايه...ايس كريم ف ديسمبر ايس كريم ف جليم"

"هههه ماشى...هاتى ايس كريم...مناسبة ان بكرة اخر يوم امتحانات"

وفتحت فاتن شنطتها اديتها فلوس

"انا هقف اتفرج ع المحلات هنا مش هبعد"

راحت ميار تشتري ايس كريم...على مرمى بصر فاتن

ومشيت فاتن بخطوات بطيئة ووقفت قدام محل...وسرحت

ميار جت بالاييس كريم

"اتفضللى ياماما...ايه سرحانة ف فستان فرح ليه؟ عايزة عريس ولا ايه"

"تعالى كده"

ودخلت فاتن المحل...جت البنت اللى بتشتغل ف المحل

"اهلا وسهلا...اوامرى حضرتك"

"الفساتين دى تأجير مش كده؟"

"اه عندنا تأجير وتفصيل وبيع"

"التأجير بكام"

"مش كله زى بعضه...حسب موديله او حالته"

ميار واقفة مستغربة ومش عارفة تسأل فاتن

فاتن كملت اسئلة
"يعنى ف حدود من كام لكام"
"طب حضرتك يامدام قوليلى طلبك وانا اقولك...عندى حاجات من ٤٠٠ ل ١٠٠٠...بس ابو
الف ده اول لبسة"
فاتن وهى بتشاور على ست قاعدة على مكتب...
"المدام تبقى صاحبة المحل"
ردت البنت وهى مستغربة وخايفة
"اه"

راحت فاتن على صاحبة المحل وميار وراها مش فاهمة

طه ونرجس داخلين البيت
شافوا مها ونرمين قاعدين مع بعض بلبس البيت
ارتبك طه من احراجهم...وهما فضلوا قاعدين زى ماهما
دخل على اوضته بعد ما سلم عليهم
غير هدومه... وفضل مستنى ف اوضته وهو سامع صوت البنات بره ... لحظات والباب خبط عليه
كان مستنى نرجس تدخل...الباب خبط تانى
قام فتح....لقى مها قدامه
"ياللا ياطه...العشا جاهز"
قالتها ومشيت وهو فضل واقف مستغرب من اللى بتتعامل معاه كأنها واحدة من البيت وكل اللى
كان بينهم كلام عابر

فاتن بترتب اوضة ميار
"ياللا نامى يا حبيبى وهصحيكى بدرى تذاكرى قبل الامتحان"
ميار وهى ع السرير بتتغطا

"ماما...انتي فكرتي امتي ف حكاية فستان الفرع دي"
"والله ولا فكرت ولا حاجة...لما روحتي تجيى الايس كريم ولقيت الفساتين قدامى...وافتكرت كلام
هدير قلبي وجعنى...فجت الفكرة ف دماغى ودخلت وزى ما شفنى كده"
"متكسفتيش وانتي بتحكى لصاحبة المحل"
"اتكسف من ايه...انا كل اللى طلبته انما تعمل تخفيض كبير لبنت يتيمة تفرحها يوم جوازها...
ومعتقدش يعنى ده هيخسرها حاجة"
"بس قالت لك النص بالنص...هتدفعى منين"
"اهو اللى هنوفره من الدروس ف اجازة نص السنة ينفع ف فستان هدير"
"ماما...انتي شايلة همها اوى كده ليه"
"حاسة بيها وصعبانة عليا...مالهاش حد خالص ونفسى افرحها...ياللا نامى انتى تصبحى على خير"
قربت فاتن من ميار باستها وغطتها وقفلت النور وخرجت م الاوضة

طه خارج من اوضته الصبح
سمع صوت نرجس ف المطبخ...راح لها
"صباح الخير ياماما"
"صباح النور يا طه"
"ماما...هى مها بايئة هنا ليه؟ انا معرفتش اسألك امبارح"
"عادى...بتذاكر مع اختك"
"واهلها فين؟"
"فين ايه...انا استأذنت امها..مالك؟"
"لا ابدأ بس مستغرب...عموما لو قالتك ان نرمين تروح هى كمان تبات... متخليهاش تروح"
"طيب...هتفطر"
"لا هفطر ف الشغل...سلام"

طه رايح ناحية الباب... شاف مها رائحة المطبخ
"صباح الخير يا طه"
طه وهو مش يبص لها "صباح النور"

مها وهى واقفة قصاده
"توانى"
وقف قدامها بص لها
قربت منه...مسحت على خده بايديها
رجع لورا فجأة..ضحكت
"ايه مالك... كان فيه حطة من منديل مبلول على وشك"
مسح طه على وشه بايديه...عشان يمسخ اى اثر للمنديل بارتباك
"شكرا"
ومشى طه بسرعة وخرج ومها واقفة تضحك على ارتبائه

فاتن مع هدير وعالية ف المكتب
هدير بتعيط وعالية بتحضنها
فاتن"وانا اللى بقول هتفرحى تعيطى كل العياط ده"
هدير"مش مصدقة يا ابلة والله...ربنا يخليكى لينا يارب"
فاتن"مش انا لوحدى على فكرة"
هدير"مش فاهمة"
فاتن"مدام ثريا اتصلت بيا من شوية... وسألت عليكى حكيت لها انك فرشتى وحددتى معاد الفرح
وحكيت كل اللى فات...قالت انها هتجزلك كوافير تقوط فرحك...ابسطى يا ستى وهنعملك
احلى هيصة وانتي بالفستان الابيض والطرحة"
زادت هدير ف العياط...وهى بتقول
"انا مش مصدقة كل ده.... شكرا يا ابلة...شكرا اوى...اشكرك يارب"

فى شقة هدير... هدير قاعدة جنب عريسها
ومعاها عالية وميار وفاتن وثرى وزينب
واصحاب عصام جايين طبله ويغنوا ويرقصوا

رن موبایل فاتن...قامت فاتن خرجت ترد
"الو...ازيك يا طه...الحمد لله بخير...انت عامل ايه؟... لا مش ف البيت انا ف مشوار كده... تنور
ای وقت...متحرمش منك ابد... هبقى موجودة ف البيت يوم الجمعة مش نازلة...والنبي ماتكلف
نفسك...كفاية انك بتسأل عليا بس.. ربنا يخليك..مع السلامة"
رجعت فاتن... وكانوا اصحاب عصام خلصوا طبل ورقص

سلموا على العروسين... ونزلوا
بعد ما نزلوا...وقفت فاتن وميار وزينب وثرىا وعالية يسلموا على بعض ف الشارع
زينب " تعالى يا عالية معايا اوصلك الدار ف سكتى...علشان متركيبش تاكسى لوحدك"
"حاضر"
وقفت زينب تاكسى...ركبت قدام وعالية ورا

فى الطريق... وهما ماشيين
كان الطريق للدار ممكن يمر من عند محل طه
فضلت عالية تدعى ف سرها ان السواق يعدى من قدام المحل مش من طريق تانى... وفعلا مشى
السواق ف نفس الشارع

عالية كان قلبها بيدق بشدة وهى بتقرب من المحل وجواها تساؤل
"ياترى هشوفه ولا لأ؟"

(٥)

طه ف المحل... نرجس قاعدة ع المكتب

"ماما يالا... الساعة ١١"

"طب هقفل حساباتي واقوم... ٥ بس"

"طيب"

راح طه وقف على باب المحل... لحد نرجس ما تخلص

عالية بتقرب بالتاكسي... ولما لحت حد واقف على باب المحل وهى مش مفسرة مين... بقى قلبها

يدق بشدة

قرب التاكسي... وعالية اتأكدت ان اللي واقف طه

قرب التاكسي اكرت لحد ما بقى قدام طه... شافته... وعينيها جت ف عينيها... شافت نظرة مفاجئة

سريعة وابتسامة

طه وهو على باب المحل... فجأة شاف عالية ف التاكسي

اتفاجئ... وابتسم لها بفرحة من المفاجئة

عالية مقدرتش تبعد عينيها عنه.. كأنها بتحاول تشبع من نظراته... ولما التاكسي عدا... التفتت براسها

كلها تبص له

طه فضلت عينيها على عالية... حتى بعد ما التاكسي مشى فضلت نظراتهم متعلقة لبعض... وشافها

وهى ملتفتة ليه... اتقدم خطوات على الرصيف وهو بيودعها بعينيها لحد التاكسي ما اختفى

رجع طه دخل المحل... نرجس قامت وقفلت المكتب

"يا لا خالصت... طه... طه"
"نعم ياماما... خلاص؟؟"
"اه خلاص...مالك مسهم كده ليه"
"البت اللي قتللك عليها شفتها معدية ف تاكسى دلوقتي مع مامتها...عارفة ياماما كل ما اقول
خلاص مش هشوفها تاني ولا اعرف اوصلها ازاي اشوفها صدفة...مبعرفش انساها"
"محدث عارف يا بني النصيب فين... لو ليك نصيب معاها هتشوفها هتشوفها"

عالية ف اوضتها ف الدار
بعد ما غيرت هدومها وراحت تنام
كل ما تغمض عينيها تشوف نظرة طه ليها...تفرح انه شافها وفاكرها...وترجع تحس بالذنب من
تفكيرها فيه
"استغفر الله العظيم... يارب... يارب يكون من نصيبي"

طه قاعد بيخطر لوحده
جت مها وقفت جنبه
"اجييلك حاجة من طنط"
"لا شكرا"
قعدت معاها ع السفارة
"هو انتي زعلان مني ف حاجة"
"انا؟؟ ليه"
"بتتكلم معايا جد اوى كده يعني"
واستغرب طه من كلامها
"لا انا بتكلم معاكي بطريقتي العادية...مش متعمد طريقة معينة"
"بالراحة عليا شوية طيب وبلاش الجداوى ده... ده انا زى اختك"
قامت مها من جنبه وسندت على رجله وهى بتقوم
بعد ما مدخلت المطبخ...

قعد طه مستغرب مسكتها ليه
"هى البت دى قليلة الادب ولا عبيطة ولا ايه"
جت نرجس وقعدت معاها
"ايه يا طه"
"ايه؟؟"
"مها جت المطبخ ومكسوفة انها لما بتتكلم معاك عادى انت بتصدها"
"لا بصدها ولا حاجة ... انا عادى"
"هى اتكسفت منك وبتعتبر نفسها زى نرمن وواحدة م البيت... ابقى خلى بالك من كلامك معاها
لأنها حساسة شوية"
"حاضر... لو انا شايف ان ميصحش وجودها كثير ف البيت كده"
"ششش لتسمعك... اهى بتونس اختك واحنا مش موجودين.. كتر خير امها انها سايباها مع اختك"

طه عند فاتن ف البيت
"والنبى يا طه تتغدا معانا"
"معلش يافاتن... مش هقدر"
"مش عايز تتغدا معانا ليه... انت موراكش حاجة النهاردة"
"معلش... النهاردة اليوم اللى بتغدا فيه ف البيت... طمنين بس عليكى انتى عاملة ايه... وميار عاملة
ايه"
"الحمد لله.. ميار راحت تجيب حاجة وزمانها جاية.. هتفرح لما تشوفك"
"ان شاء الله... يوم ما كلمتك كنت جاي لك... الحمد لله انى اتصلت الاول"
"كنت ف فرح عقبالك"
"يارب... فرح مين؟"
"واحدة من الدار عندى... والله ياطه البنات والولد ايتام بس اتعمل لهم ليلة ع القدر كده بس كانت
جميلة"
"ربنا يسعدهم عقبال ما تفرحى بميار"
"وانت مش ناوى تفرحنا"

"ادعيلي"

"ربنا يراضيك يارب"

وطلع طه فلوس من جيبه

"خلى دول معاكى يا فاتن"

"ليه بس...ربنا يكرمك يارب"

"هو انتى ف المملجأ بتقبلوا تبرعات؟"

"اه طبعا"

طلع فلوس تانية

"طب دول للملجأ"

اخذت منه الفلوس...

"والله يا طه الايتام دول بيحتاجوا المشاعر والحنية اكتر من الفلوس...دول بيستنوا يوم اليتيم من السنة

للسنة علشان الناس بتروح تسأل عليهم وتقعدها معاها"

سكت طه شوية وبيفكر

"هو يوم اليتيم قدامه شهرين تقريبا...هما اللى عندك اطفال؟"

"اه بنات صغيرين"

"يوم اليتيم هاجى واعملهم مفاجئة حلوة ان شاءالله"

"بجد يا طه... ربنا يفرح قلبك على قد نيتك الحلوة دى"

فى الدار... وفى الجنية... بعد صلاة الجمعة

بنات الدار كلهم فى الجنية... وناس تانيين موجودين

فاتن بتمر بينهم والاطفال مبسوطين

هدير جت هى وعصام...وعلى باب الدار راحت عالية تستقبلهم بفرحة...وبعد ما سلمت عليهم

هدير"ياللا يا عالية...جايبين بالونات...شدى حيلك وتعالى اتفخى معانا"

عالية"شكلنا كده نَفَسْنَا هيتقطع النهاردة"

هدير"فين ابلة فاتن"

عالية"تعالى...هى وميار هنا"

راحوا يسلموا على فاتن...وبعدها راحوا يقعدوا مع البنات الصغيرات

عالية كانت واقفة مع فاتن لما رن موبايلها
"الو...ايوه ياطه انا ف الدار...انت فين؟؟ هقابلك ع الباب حاضر...ايه المفاجئة دى؟؟ ماشى
هصبر...هتلاقيني حالا"
بعد ما قفلت
"اخويا بيقول عامل مفاجئة للاطفال...هروح استقبله"
"وانا هروح انفخ البالين"

فاتن واقفة ع الباب... شافت عربية طه بيركن
نزل سلم عليها
"افتحى الباب الكبير يا فاتن...فيه عربية عايزها تدخل"
"عربية ايه؟"
"دى المفاجئة"
قالت فاتن للبواب يفتح الباب...ودخلت عربية ربع نقل
"ايه ده يا طه؟"
"ده dj ومسرح عرايس وارجوز للاطفال"
"الله... هيفرحوا اوى "
"هقف معاهم لحد ما ينصبوا حاجتهم واجيلك"

راح طه للناس وهما بيتزلوا حاجتهم
اتلموا عليهم بعض الاطفال وهما فرحانين
طه بيدور بعينه على فاتن.... شافها من بعيد...راح لها

عالية مع هدير وعصام وحواليهم اطفال كثير
"انا تعبت...هروح اشوف ابلة فاتن وارجعلكم"

طه ماشى... وعالية ماشية... واتقابلوا قصاد بعض
بينهم ٣ امتار... متقابلين... المفاجئة وقفتم
لحظات يفوقوا من المفاجئة... طه يتقدم ناحية عالية وهو مبتسم بفرحة الصدفة... عالية ثابتة مكانها
لما بقى بينهم خطوات... مد ايده يسلم عليها
"ازيك"
مدت ايدها تسلم عليه... واول ما ايديهم تلامست
سحبت ايديها بسرعة لما حسنت ان قلبها بيرتجف
"دائما كانت بتجمعنا صدف... بس احلى صدفه صدفه النهاردة... على الاقل هعرف اسمك ايه... انا
طه"
عالية بتحاول تتكلم... صوتها طلع همس
"عالية"
"الله... اسمك حلو اوى يا عالية"
"شكرا... بعد اذنك"
خطت خطوات تبعد... راح وراها
"انتى رايحة فين؟؟ انا ماصدقت قابلتك وعازير اتكلم معاكى... انا مكنتش اعرف ان ليكى ف العمل
الاجتماعى... انتى هنا لو حدك ولا مامتك معاكى؟"
اتفاجئت باستنتاجه... وحسنت ان الكلام صعب عليها... فضلت ساكنة
جه واحد من العمال
"يا استاذ لو سمحت... حاسب السواق قبل ما يمشى"
التفت له طه "حاضر ثوانى"
بص لعالية "ثوانى هحاسب السواق وارجعلك... انتى قاعدة لامتى؟"
ردت باستلام لقدرها وتواجدها فالدار
"قاعدة"
"هرجعلك"

راح طه يحاسب السواق... وراحت عالية قعدت جنب هدير
عالية ماشية مغيبة... فرحتها انها شافت طه تانى راحت لما افكرت وضعها ووضعها الاجتماعى

عالية سرحانة وهدير جنبها بتكلم الاطفال

التفتت لها هدير

"مالك"

"بصى"

وبصت عالية ناحية العربية وطه بيحاسب السواق

"ابص على ايه؟؟"

"طه هنا"

"طه مين؟ مالك يا عالية انتى بتخرفى ولا ايه"

"طه اللي حكيت لك عنه"

"بتاع المحل"

"هو"

"وايه اللي جابه هنا...وبدل ماتفرحى تعملى كده"

وهما بيصموا عليه...شافوا ميار بتسلم عليه وتبوسه

هدير برقت عينيها

"ايه ده؟؟ ميار بتبوسه؟؟ هو قرييها ولا ايه؟"

"اخو ابلة فاتن"

سكتت هدير هي كمان لما عرفت وهى مستغربة من الصدف اللي جمعتهم...والفرق الكبير بين عالية وطه

طه واقف عينيها على عالية وهو بيكلم ميار...ولما جت فاتن واخذته يقعد على ترايزة معاها...

وكان ال dj بيبدأ

عالية شايفاه قاعد مع فاتن...عينيها غصب عنها بتيجى ف عينيها...تبعدها عنه بسرعة

طه بيتكلم مع فاتن عن الدار وفرحة الاطفال وبييجوا الاطفال يسلموا عليه...وكل ده وعينيها مش

بتفارق عالية اللحظات

وتوقع انه موجودة مع اختها وجوز اختها اللي كان شافها معاها

هدير بتابع نظراتهم من غير ما ياخذوا بالهم وهى قلقانة من الجأى

جت طفلة "ابلة عالية... ابلة عالية... نورا وقعت واتعورت وبتخر دم"

جريت عليها عالية... شافت البنت واقعة

"مالك يانورا... تعالى يا حبيبتى متخافيش"

شالتها عالية... وراحت بيها الحمام

غسلت لها الجرح... وطببت عليها

"رجلى بتوجعنى يا ابلة"

"معلش يا حبيبتى تعويرة صغيرة... هنروح نلفها وهتبقى كويسة... علشان تلحقى تتفرجى على

الاراجوز"

ضحكت البنت ولسه الدموع ف عينها

راحت عالية على اوضة مكتب فاتن... كان فيها صيدلية صغيرة

اخذت منها ميكروكروم وشاش وبلاستر وقعدت البنت قدامها

وفجأة دخل طه... اتفاجئت عالية... وتماسكت وكملت لف الجرح

طه واقف ساكت... لحد ما عالية خلصت

"اروح العب يا ابلة؟"

"روحي يا حبيبتى"

خرجت البنت من المكتب... وقامت عالية تحط الادوات ف الصيدلية

"عالية مالك؟؟؟ انا كنت فاكرك هتفرجى لما تشوفينى"

"اه طبعا... فرصة سعيدة"

"انا عايز اتكلم معاكى ومحببتش اكلملك واختك وجوزها معاكم... ممكن نتكلم هنا علشان

مسبيلكيش مشاكل"

"لا ابدا مفيش مشاكل ولا حاجة"

"هى مامتك جاية؟"

"استاذ طه...حضرتك فاهم غلط... اللى شفتها قبل كده مش امى... انا مليش ام ولا اب ولا

عيلة... انا من فتيات الدار هنا"

وقف طه جامد للحظات...بدون اى رد فعل...من المفاجئة

لاحظت عالية تغير تعبيرات وشه

قالت ف سرها"كنت متوقعة"

وبصوت مسموع

"عن اذنك اروح اشوف البنات...دى مسئولية وشكرا على تعبك والحاجات اللى عملتها"

"استنى هنا رايحة فين"

"ماشية"

"مش بقولك عايز اتكلم معاكى"

"اتفضل"

"احنا اتقابلنا مرات قليلة...ومع ذلك مغبتيش عن تفكيرى ابدأ...وكنت بدعى ربنا انى اقابلك تانى

واعرف اتكلم معاكى...وبعد ما لقيتك مش هضيع وقت...عايز اخطبك...موافقة؟؟؟؟"

(٦)

المفاجئة عقدت لسان عالية و شلت تفكيرها
فرحة وقلق واستغراب خلوها مفيش اى تعبيرات على وشها
سألها طه بقلق وحزن
"انا غلطت؟؟ انتى مخطوبة ولا حاجة؟؟ اتسرعت صح؟"
ردت عالية بابتسامة طمنتها
"انا اتفاجئت بس"
قالتها وقعدت... قعد طه قصاها
"عندى كلام كثير واسئلة وحكايات وحاسس انى نسيت كل حاجة لما شفتك"
احمر وشها... متكلمتش... كمل
"فاكرة يوم ماشفتك ف التاكسى"
هزت عالية راسها
"يومها حسيت ان دار بيننا كلام كثير... اللحظات اللى شفتك فيها قالت لى انك فاكراى وعارفانى
زى ما انا فاكرك وعارفك ... كنت بروح ادور عليكى عند الجامع اللى شفتك فيه اول مرة بس
مكنتش بلاقيكى"
"انا بروح"
"مشفتكىش هناك... انتى بتروحي كل يوم؟"
"لا"
"يبقى انا كنت بروح ف ايام غير اللى انتى بتروحي فيها... احكى لى عن نفسك يا عالية"
"معنديش حاجة احكيها... زى ما انت شايف .. حياتى هنا"
"انتى هنا من زمان... قصدى يعنى اهلك توفوا امي؟؟ وايه اللى جابك هنا ملكيش قرايب تانيين"
قبل ماترد عليه... دخلت فاتن المكتب
استغربت اثم قاعدين مع بعض
"مالكم... فيه حاجة... قاعدين هنا ليه وسايين الحفلة"
عالية وهى بتقوم من مكانها مكسوفة

"نورا وقعت واتعورت وكنت بربطلها الجرح...انا رايحة اشوف البنات"
طه حس بكسوفها...محبش يكسفها اكثر...سكت
بعد ما خرجت عالية...بص طه لفاتن
"اقعدى بقى اما احكيك الحكاية من اولها...وشك حلو عليا يافاتن"
فاتن شافت فرحته...فرحت لفرحته لانها بتجبه...وقعدت تسمعه

نرمين ومها قاعدين ف الاوضة بيذاكروا
"انا جعت يامها...هقول لماما تحضرلنا الغدا"
"لا استنى شوية...مش الجمعة بتتغدوا كلكم مع بعض..استنى طه"
"قوليلى بقى...ايه حكاية اهتمامك بطه؟"
ردت مها وهى بتضحك بجرأة
"باين عليا اوى يعنى"
"اه"

"اومال هو مش فاهم ولا يستعبط"
"انتى قصدك ايه"
"قصدى انه عاجبنى...عينى فيه بصراحة"
"بتجبيه يعنى...انتى مش كنتى بتجى واحد جاركم السنة اللى فاتت"
"اه بس لقيته مش ف دماغه قلت اشوف حد تانى"
"اللى اعرفه ان اللى يحب حد بيفضل يجبه"
"عبيطة... انتى فاكرة الحب ده كلمتين وتنهيدتين وخلاص"
"اومال ايه"

"الحب انك توقعى عريس مناسب يجييلك اللى نفسك فيه ويفسحك ويدلحك وتمنظرى بيه على
صحابك"
"يا سلااااام"

"اومال ايه يابنتى...انتى فاكرة حب الافلام القديمة ده حب...اسكتى اسكتى احنا زمن تانى
خالص...قومى اتصلى كده بطه شوفيه جاى امتى"
"هو كان قايل رايح ملجأ علشان يوم اليتيم"

"يوم يتيم .. طيب ... بقولك ايه انتى مش صاحبتى والمفروض تساعدين زى ما ساعدتك وخليت
مامتك توافق اننا نروح درس مستر محمود علشان تبقى قريبة منه"
"يعنى هو اخد باله منى اساسا"
"المهم انى ساعدتك... صح ولا لا"
"صح... يبقى ساعدين وخلى طه ياخذ باله منى"
"ازاى"
"بينى له انى مهمة بيه ... ولحى له وشوفى رد فعله ايه وابقى قوليلى"
"طيب"
"قومى اتصلى بيه بقى"

طه قاعد مع فاتن... فاتن ساكنة
"ايه يا فاتن... مالك وشك اتقلب ليه كده... انتى تعرفى حاجة عن عالية تعلق؟"
"عالية مفيش زيها دلوقتى... انا دايمًا بضرب بيها المثل ف كل حاجة... تدين .. اخلاق... حنان"
"او مال ايه بقى... سكوتك ده قلقتنى"
"كل اللى حكيته حلواوى ليكم انتم الاتنين... مفكرتش بقى ف مامتك؟"
"ماما نفسها اخطب واتحوز... وحكيته عنها عن عالية وانى نفسى اشوفها تانى علشان اقولها انى عايز
ارتبط بيها"
"بس الكلام ده على ان عالية بنت عادية... تفتكر ظروفها دى مش هتأثر على رد فعل مامتك؟"
"لا مش هتأثر"
قالها طه بثقة... بصت له فاتن بعدم تصديق... كمل
"حتى لو اعترضت يا فاتن... هقنعها وانتي عارفة ان ماما كل همها انها تسعدنا"
ابستمت فاتن بسخرية
"ياريت... انت وعالية مناسبين لبعض فعلاً... انا متأكدة انك مش هتلاقى زيها ولا هى هتلاقى
زيك... بس لسه قلقانة من مامتك وهتشوف"
"انتى بس اللى شايفها وحشة"
قالها طه بدون تفكير... اتضايقت فاتن
"الله يسامحك يا طه"

حس طه ان فاتن زعلت
"انا اسف يافاتن... بس بجد انا مش عارف انتم ليه كده مع بعض... يعنى لو على انها كانت
بتتعصب عليكمى زمان فزى اى ام بتتنرفز على ولادها"
"سيبك منى وخلينا فيك انت وعالية... هتعمل ايه"
"هكلم ماما لما اروح طبعا"
"ماشى ياطه... بس فكر ف كلامى واعقله قبل ماتتصرف"

هدير وعالية قاعدين على جنب لوحدهم بعيد عن عصام
"مبروك يا عالية... ربنا يعوضك خير"
"انا قلقانة يا هدير... لما يسألنى عن اهلى هقوله ايه"
"زى ما متغيرش لما عرف انك من الدار مش هتفرق معاه ليكى اهل او لأ"
"قلقانة اوى... متنسيش كلام ابلة فاتن عن مامته"
"بقولك ايه... هو لو راجل بجد ويستاهلك هيعمل المستحيل علشانك... اما لو طلع عيل يبقى
ميلز مكيش... احنا شفنا كتير ومش ناقصنا وجع قلب"
"ياخوفى من وجع القلب"
"اهو جاي مع ابلة فاتن... هروح انا لعصام واسيبكم تتكلموا براحتكم"
قامت هدير... وراحت فاتن تشوف الاطفال... وقرب طه لعالية وقعد معاها
"اتاخرت عليكى؟"
"لا"

"كنت بحكى لفاتن عنك"
اتكسفت عالية وابتمت... كمل طه
"قبل ما انسى... ادينى رقمك علشان ابقى اطمن عليكى"
"معيش تليفون"
"بجد ولا مش عايزة تدينى الرقم؟"
"لا والله بجد"
"طب مش مهم... هعرف اطمن عليكى برضه... احكى لى يا عالية عنك... عايز اعرفك اكر واکتر"
"احكى ايه... احكى لى انت طيب"

"حاضر... شوفي يا ستي... انا طه"

"بجد؟"

اتفاجئ طه ان عالية بتهزر... اكتشف حاجة جديدة فيها... ان سكوتها وقلة كلامها كان من

كسوفها... وانهم فعلا بدأوا يقربوا من بعض

طه داخل البيت... شاف نرmin ومها قاعدين

"سلامو عليكمو"

قالها وهو داخل... غمزت مها لنرmin

قامت نرmin وراه وهو داخل اوضته

"اناخرت ليه ياطه... احنا متغدناش مستنيينك"

"استنتوني ليه كل ده"

"مها صممت انما تستناك وانا قلت استنى معاها"

"وماما؟"

"ماما لما لقت محدش هيتغدا دخلت نامت لحد ماتيجي"

"طيب انا داخل اصحبها وسخني انتي"

"ماشى"

راحت نرmin لمها... دخلوا الاتنين المطبخ

"ايه قلتيله ايه"

"قلت له انك انتي اللي قلتى نستناه"

"طيب"

"حقا يا بت يامها لو صحيح تبقى مرات اخويا ونبقى على طول مع بعض"

"شدى حيلك معايا يا اختي... ساعتها بقى عايزين نخرج ولا نروح ولا نيحي محدش يقولنا

حاجة... خلينا نشم نفسنا شوية"

طه داخل لنرجس يصحبها

"ماما... ماما"

"انت جيت يا طه"

"اه قومی نرمین بتسخن الغدا"

نرجس بتقوم من ع السرير...قعدت

"ماما عايز احكيلك على حاجة"

شافت الفرحة ف عينيه...ضحكت

"شكلك قابلت البنت اللي بتفكر فيها"

"اے یاما ما... شفتہا واتکلمت معاہا"

نرجس باہتمام

"هاااا... احکی لی ...عرفت ہی مین..وقابلتها ازای... اسمها ایه واهلها مین... وبتدرس ولا

مختصة"

اسئلة نرجس... فکرت طه بکلام فاتن... وبعد ماکان هیحکي کل حاجة... قرر انه یحکي جزء

ویبلی جزء

"هي اسمها عالية... وخلصت دراسة.. هي بتشتغل ف دار ايتام وانا قابلتها صدفة هناك النهاردة"

"طیب خیر... ابوہا بیشتغل ایہ؟؟ امہا بتشتغل؟؟ لیہا اخوات؟؟ مستواہم ایہ؟"

"ماما... انا معرفتش كل حاجة عنها كده من اول مرة... لسه لما ابقى اعرف هبقى اقولك"

"طيب... حلوة؟"

"اجمل واحدة ف الدنيا"

"هههههههه ايوه ايوه...مين يشهد للعروسة"

"المهم انا قتلها انى عايز اخطبها"

"خبط لرق كده... مش لما نتعرف عليها وعلى اهلها الاول"

"ماما جیبتی... المہم ہی مش مہم اہلہا"

"لا ازای... الجواز مش واحد وواحدة دی عیلة بتناسب عیلة"

"يا ماما ما احنا عيلتنا كبيرة بس مالناش علاقة بيهم اوى"

"ماشى... ۛ الاقل امها وابوها يکونوا کويسين... احنا مش عايزين نسب يعر ولا يتعبنا"

"ان شاء الله... طب انا عندي فكرة"

"ايه"

"ايه رايك تشوفيها هي الاول وتقولى رايك فيها لوحدها بعيد عن اى حاجة"

"و مالہ... اشوفہا"

دخلت عليهم نرmin

"يالا الاكل جاهز"

تالى يوم... فائن ف مكتبها...لقت طه داخل عليها

"صباح الخير"

"صباح النور ياطه...ايوه ايوه كده هبقى اشوفك كثير"

ضحك طه لفائن اللى كانت بتضحك وهى بتكلمه...قعد

"عاملة ايه"

"انا الحمد لله كويسة...انت ايه اللى جابك"

"الهوا رمانى"

"يا سيدى يا سيدى... ربنا يسعدك ياطه زى ما بتسعد كل اللى حواليك"

"هى فين؟"

"ف الفصل"

"ينفع اشوفها"

"الا ينفع... طبعا ده انت اخو المدير"

"مش حكيت لماما"

"وبعدين؟"

"افتكرت كلامك...حسيت ان معاكى حق...فمقلتش كل التفاصيل"

"وبعدين"

"بصى عالية امبارح حكى لى كل حاجة...ودى حاجة هى مالمش ذنب فيها... فانا مش عارف

بقى هقول لماما ولا لا"

"مينفعش تخنى الحقيقة"

"بس ممكن اقول نصها"

"انت ادرى بمامتك"

"انا فكرت انما تتعرف على عالية الاول..ولما تحبها تبقى تتقبل ظروفها"

"مش عارفة ده حل ولا لأ...ومعرفش عالية هتوافق ولا لأ"

"هتكلم معاه واشوف"

"طيب...استناها ف الجنية وهبعت حد يناديها...علشان تتكلموا براحتكم"

عالية نازلة الجنية...شافت طه قاعد...فرحت

راحت له...قام طه...سلم عليها

"ازيك يا عالية"

عالية وهى بتسحب ايادها ببطء وبدون ارتباك

"الحمد لله...ازيك انت"

"الحمد لله"

قعدت معاه...مد علبة كانت معاه قدامها

"اتفضلنى"

"ايه ده"

"موبايل وخط"

"لا شكرا مش محتاجه"

"بس انا محتاج اكلمك واطمن عليكى...وبعدين بترفضى ليه"

"متعودتش حد يجيبلى حاجة"

"من هنا ورايح لازم تتعودى...انتى هتبقى مراتى ومسئولة منى ومحدث هيجيبلك غيرى"

ترددت عالية لحظات...ومدت ايدها اخدت العلبة

"شكرا"

"العفو...كنت عايزك ف موضوع كده"

"خير"

"انا كلمت ماما عنك...بصى..زى ما انتى صريحة معايا من اول لحظة فانا هكون صريح معاكى

وعايزك تتقبلى كلامك ومتزعليش منى"

عالية بقلق "خير"

"انا عايزك تقابلى ماما الاول قبل ما تعرف حقيقة ظروفك...وف المقابلة متجيبش سيرة ظروفك

خالص...ممكن؟"

هل يشفع الحب ؟ ←

(٧)

سكنت عالية... مفيش اى رد فعل منها... سألها طه

"زعلتى؟"

"انا عارفة ان مش من حقى ازعل... بس ف نفس الوقت مبحبش الكذب"

"ليه مش من حقك تزعلنى"

"علشان انا عارفة ان اى حد مش هيقبلنى اكون من عيلته وانا نفسى معرفلش عيلة"

"لا يا عالية متقوليش كده... انتى اى حد يتشرف بيكى"

ابتسمت عالية بسخرية ودموع محبوسة ف عينيها

"ربنا يخليك"

"انا مش بجاملك ولا انا بقولك اى كلام... يمكن انا لسه مش عارفك اوى بس انا متأكد من

اخلاقك... ده غير الكلام اللى قالته عليكى فاتن وهى اكيد عارفاكى كويس"

حست عالية بصدق كلامه... فرحت... ارتاحت... قالت له

"مامتك لازم تعرف الحقيقة"

"هتعرف طبعاً... بس تتعرف عليكى الاول"

"ولما تسألنى عن اهلى اقولها ايه"

حس طه ان كلام عالية موافقة ضمنية... ارتاح

"متقلقيش... هنبقى نقول اى حاجة عايمة كده لا منها نكذب ولا منها نقول الحقيقة لحد ما اعرف

رايها فيكى"

"انا خايفة"

"متخافيش"

"افرض مامتك رفضتني بعد ماعرفت الحقيقة"

سألته وهى مرعوبة من رده... وعينيها ف عينية... رد بدون تردد

"انا اختارتك انتى وحببتك انتى... مفيش حد ولا حاجة هتخلينى اغير رأيى"

ابتسمت عالية بفرحة... حس طه بيها وفرح اكثر لما شاف فرحة عينيها

عالية عند هدير فى بيتها
هدير بتقدم لعالية عصير... وبتقعد معاها
"متتعبيش نفسك يا هدير"
"فين التعب ده بس... انتى تعالى لى كل يوم وملكيش دعوة"
"ما انا بجيلك كثير اهو"
"تنورى يا عالية... انتى عارفة انا مليش غيرك... احكيلى بقى عاملة ايه مع طه"
وابتسمت عالية وهى بتحكى
"بيكلمنى كل يوم... لا مش كل يوم كل شوية... وبيجلى الدار كل كام يوم... طلب منى اكر من
مرة نتقابل بره بس انا محبيتش نتقابل ونخرج ولسه مفيش حاجة رسمى"
"ومامته؟؟ هتقابلها امتى"
"انا خايفة من المقابلة دى اوى... وبحمد ربنا اها بتتأجل"
"وليه بتتأجل"
"هى مبتقاش فاضية غير الجمعة بس... فيه جمعة جت كان لازم طه يسافر يجيب بضاعة وجمعة تانية
كانت بنتها تعبانة ورايحة معاها للدكتور وجمعة تالته مش فاكرة حصل ايه"
"طب خلى بالك من التآجيلات دى"
ردت عالية بقلق
"ليه؟"
"يعنى... انتى تعرفى طه منين انه مش بيكذب ولا يلعب بيكى ويعلقك بيه ع الفاضى"
"معقول؟؟"
"ليه لأ... احنا ف زمن وحش واى حد ممكن يطمع فينا علشان عارف ان مالناش اهل ولا لينا حد
يقف جنبنا لو حصلنا اى مشكلة"
سرحت عالية وهى بتفكر... وقالت بصوت واطى كأها بتكلم نفسها
"بس هو هيعوز منى ايه واحنا كل اللى بيننا كلام وبس"
"معرفش يا عالية... انا بقولك خلى بالك بس مبقولش هو وحش"
"وابلة فاتن.. معقول هتضحك عليا"
"لا طبعا.. بس ابلة فاتن هتعرف نيته منين اللى ربنا وحده هو العالم بيها"

سكنت عالية...كملت هدير كلامها
"اوعى تزعلى منى ..انا خايقة عليكى"
"ازعل منك ازاي..لا طبعا كويس انك نبهتيني"

نرمين ومها ف البيت...مها بتتكلم ف التليفون
نرمين بتشااور لها خلصى
"طيب...انا لازم اقل دلوقتى... لالا مينفعش طبعا انا داخلة على امتحانات... طيب بعد الدرس
وصلنا انا ونرمين صاحبتى... هبقى ارن عليك...باى"
قفلت مها...وقعدت جنب نرمين
"مين ده يامها"
"ده مصطفى"
"مين مصطفى...عرفتية امتى وازاي يعنى"
"لما كنت مروحة من عندك اول امبارح ركبت معاه ف التاكسى واتعرفنا"
"تاكسى؟! سواق تاكسى يا مها"
"التاكسى بتاعه يا بت... وبعدين قمر قمر قمر حاجة كده مش موجود منها دلوقتى"
"بس سواق تاكسى برضه"
"انا مالى بالتاكسى... هو ابن ناس وخريج اداوب والتاكسى ده باباه جاهوله كده لحد ما يلاقى
شغل"
"انتى بتقوليله ايه بعد الدرس؟"
"هيجى ياخدنا...ومتقلقيش هبقى اقله يشوف واحد صاحبه يجيبه معاه"
"لالالا ياخى انا مصدومة بعد ما المستر خطب"
"هههههههه مصدومة ايه يا عبطة انتى...شوفى حد غيره ينسيكى على طول"
"انتى ازاي بتجى وتنسى بسرعة كده"
"عادى... اهو بدور على الحب لحد ما الاقى واحد يتقدم لى ويخطبنى ونتجوز...يعنى بعد ما قلت
اخوكى هيخطبنى بقى ويبقى هو وخلاص طلع مظبط وعايش حياته عادى وهيخطب... اتصدم بقى
واقعد اسمع عبد الحليم واعيط"
"لا بس..."

"بقولك ايه... عايزة تفضلي ف خيبتك دى انتى حرة... محدش لاقى عرسان دلوقتى ومش عيب اننا ندور على عريس"

"يا بنتى احنا لسه بدرى على ما نخلص"

"لا والننى ايه... اللى قدنا ياماما ف الفلاحين والصعيد بتبقى متجوزة ومخلقة عيل ولا اتنين...وانا مبقولش هقوم اتجوز دلوقتى... نقضيها خطوبة سنتين ولا حاجة وبعدين انا نفسى اتجوز ف الكلية واروح الكلية كده وانا متجوزة ولا حامل وامشى اتنظر بجوزى"

نرمين سرحانة ف كلامها...كملت مها

"هاا اقول لمصطفى يشوف لك واحد صاحبه ولا ملكيش مزاج"

نرمين وهى بتتصنع اللامبالاة

"بس يكون ابن ناس بلاش سواق"

طه عند عالية ف الدار... ييفتح علبة أكل

"بدل انتى مش عايزة اعزملك ع الغدا بره قلت اجيب الغدا وتغدا مع بعض هنا"

"لا شكرا...انا باكل مع البنات ف الدار"

ساب طه اللى ف ايده... وبص لها شافها مكشرة

"مالك يا عالية؟"

"احنا داخلين على شهر من ساعة ما اتقابلنا وبصراحة شكلى بقى وحش قدام الموظفين والبنات هنا"

"شكلك وحش ليه...احنا مبنعملش حاجة غلط"

"معلش يا طه... مقابلتنا كل يوم والتانى كده غلط"

قامت عالية

"استنى يا عالية...ايه اللى غيرك كده؟"

"بصراحة انا مش شايفة اى خطوة...انت قلت مامتك تشوفنى الاول معترضتش...انما فين المقابلة

دى مبتجيش ليه...يا طه انت لو غيرت رأيك مش هزعل...اللى يزعلنى انك تضحك عليا"

"اضحك عليكى !!طب استنى...اقعدى من فضلك"

قعدت عالية...طلع طه الموبايل من جيبه

"الو...ازيك ياماما...انتى فىن...طب بصى ايه رايك تقابلى عالية دلوقتى...اه دلوقتى ايه المشكلة...
لا متفعلش ولا حاجة انا هجيها لك لحد عندك... لو فضلنا نستنى الجمعة اللى فاضية فيها مش

هنخلص...نص ساعة ونكون عندك...مع السلامة"

عالية كانت مستغربة تصرف طه

"قومى يالا"

عالية بارتباك "اقوم فىن؟"

"انتى مش سمعتى المكالمه... قومى هنروح لماما"

"فجأة كده"

"عالية...انتى هتحريرى ليه... لا عاجبك نستنى ولا عاجبك نروح دلوقتى...قوليلى اعمل ايه علشان

اثبت حسن نيتى"

فرحت عالية ان كل شكوكها ف طه كانت غلط

قامت وقفت

"هروح استأذن ابلة فاتن واجى"

"هستنامى ف العربية... انا كنت عند فاتن من شوية"

عالية قاعدة جنب طه ف العربية...مكسوفة

وقفوا قبل المحل بشارع

"انا بركن هنا كل يوم"

هزت عالية راسها

"ايه مالك؟؟"

"خايفة ومكسوفة ومتلخبطة ومش عارفة اتلم على نفسى"

"هههه ليه كل ده"

"مش عارفة هقول ايه ولا اتكلم ف ايه ولا ممكن مامتك تسألنى على ايه"

"متخافيش انا معاكى اهو...ومش هنطول"

نرجس قاعدة ع المكتب وفاتحة التلفزيون

دخل عليها طه... ووراه عالية ماشية بخطوات مترددة"
"ازيك ياماما... تعالى يا عالية"
شاوړ طه لعالية...الى قربت من نرجس تسلم عليها
"ازيك ياطنط"
نرجس بتبص لها من فوق لتحت نظرة متفحصة
"اهلا يا حبيبتى"
جاء طه كرسى لعالية وشد كرسى لنفسه وقعدوا قدام المكتب
نرجس "شوف عالية تشرب ايه وابعت هات م القهوة"
عالية بتبص لطه... بتتمسك بيه انه ميقومش
"لا لا... شكرا...متجيش حاجة"
نرجس "ليه يا عالية...هو احنا بخلا"
عالية "لا العفو ياطنط...بس مش عايزة شكرا"
نرجس "معلش انى مش فاكراكى زى ما انتى شايعة انا كل يوم بيعيلى زباين اشكال والوان ومش
بفتكرهم كلهم"
عالية "ولا يهم حضرتك...ربنا يعينك"
نرجس "وازى ماما واختك العروسة اتجوزت ولا لسه"
ارتبكت عالية...بصت لطه... نرجس بتبص لها مستنية رد...ردت عالية بارتباك
"الحمد لله"
نرجس "شكلك صغيرة...انتى عندك كام سنة"
عالية "٢٠"
نرجس "اومال مخلصه وبتشتغلى ازاى"
عالية "معايا دبلوم تجارة"
بصت نرجس لطه وهى بتردد
"دبلوم تجارة...آآآه"
طه بيعااول يبرو مميزات عالية
"عالية كمان غير شغل الدار بتدى دروس تحفيظ قران ف الجامع وحافظة القران ومتدينة واخلاقها
عالية جدا"
نرجس "ماهو باين عليها"

لحظات صمت بينهم

طه "طب يالا يا عالية اوصلك عايزة حاجة ياماما"

نرجس "متتأخرش"

طه وعالية ف العربية... ساكتين... وقبل مايوصلوا للدار

"على فكرة... انا معجبتيش مامتك"

"ليه بتقولي كده"

"مش محتاجة ذكاء يا طه"

"لا بيتهيا لك"

"هتشوف ان معايا حق لما ترجع وتقولك رأيها فيا"

"انتى غلطانة"

"يارب اكون غلطانة"

وقفوا قدام باب الدار

نزلت عالية... وهى بتقفل الباب

طه "شوية وهكلمك"

عالية هزت راسها وهى مبتسمة... وتقول ف سرها

"يارب متكونش اخر مرة اشوفك فيها"

طه داخل المحل... شاف زباين

وقف يساعد نرجس ف البيع

خلصوا وخرجوا الزباين

رجعت نرجس ع المكتب... مسكت الريموت وقعدت تقلب ف قنوات التلفزيون... طه مستغرب

انها معلقتش على عالية خالص

راح قعد قصادها... وسألها

"ها... ايه رأيك"

"ف ايه"

"ف عالية ياماما"

"من ناحية ايه يعنى"

"من كل النواحي"

واتعدلت نرجس وسندت ظهرها ع الكرسي

"شكلها بنت غلبانة"

"يعنى عجبتيك؟"

"لا طبعا معجبتنيش"

"ليه"

وفقدت نرجس هدوئها اللي كانت بتحاول تظهره

"لا لبس ولا شكل وباين اوى ان اهلها غلابة وكمان شهادة اى كلام"

"اولا شكلها مش وحش وطالما انا شايفة حلوة خلاص...ثانيا اللبس ممكن يتغير وابقى اجيلها

احسن...الشهادة بقى انا هتجوزها مش هوظفها عندي"

"ابوها بيشتغل ايه"

"ميت"

"وامها"

"ميتة"

"وعايشة مع مين"

"ف دار ايتام"

نرجس وهى بتجز على سنانها

"لو مكتتش ف المحل كان زمانى رقعت بالصوت الحياى جبت التايهين"

"ليه يعنى ياماما... هى شخصيا مالها"

"متنفعكش"

"حببتها"

"وماله...حبها...امشى معاها شوية لحد ماتزهق منها"

"لا انا ولا هى بتوع مشى مع بعض والكلام ده"

"لما تيجى تتجوز لازم تناسب عيلة محترمة وعروسة تشرفك مش تعرك"

"انا شايف ان عالية تشرف اى حد"

"وانا مش شايفة كده"

"والحل"

"معرفش...المهم انك مش هتتجوزها"

"اسف ياماما... انا اللي هتجوز مش انتي"

"هتتجوزها غصب عني مثلاً؟"

"انا جيت اخد رأيك وبحكيك كل حاجة م الاول اهو...انما لو رفضتي علشان اسباب مش مقنعة

زي اللي قلتيهالي...فانا هتجوزها برضه ...انا اللي هعيش معاها مش انتي ياماما"

سكتت نرجس...بتفكر...وتصنعت ابتسامة كذابة

"طيب...سيبي افكر كام يوم كده واشوف هنعمل ايه"

(٨)

فاتن قاعدة ف المكتب...عالية قصاها
عالية بتبص ف الارض وساكنة
فاتن بتتنهد وبتقول
"استغفر الله العظيم يارب...انتى هتقدرى البلا قبل وقوعه ليه بس"
بصت لها عالية وهو بتبتسم علشان تمنع الدموع اللى ف عينها من التزول
"باينة يا ابلة"
فاتن بتحاول تطمنها وغير مش مقتنعة باللى بتقوله
"ردودها دى مش مقياس انما رافضاكى"
"بلاش ردودها...احساسى بمقابلتها بيقول انى معجبتهاش"
"لا اله الا الله...يا بنى مقابلة ايه اللى مكملتش ١٠ دقائق اللى خللك تحسى وتنبأى بالقرار"
"يارب اكون غلطانة"
"غلطانة ان شاءالله...شوية كده واتصل بطه واشوف"
"لا بلاش يا ابلة الله يخليكى"
"بلاش ليه"
"مش عايزة اخرجك"
"انا اللى هتصل مش انتى"
"بس هيبقى واضح انك بتسأليه علشان...بلاش علشان خاطرى"
"طيب... انا لازم امشى...متفقة مع ميار هروح بدرى النهاردة شوية"
"طيب يا ابلة...هى عاملة ايه"
"الحمدلله... امتحنت وخلصت والنتيجة ظهرت ونجحت"
"مبروك"
فاتن وهى بتقوم بتلم حاجتها وتاخذ شنطتها... وعلى باب المكتب
"لو كلمك ابقى طميننى"

عالية ف اوضتها...بتصلى وبتعيط
رن الموبايل... رن رنات طويلة لحد ما خلصت صلاة
اول ما قامت...جريت ع الموبايل بلهفة
"الو"

طه فى العربية...بيتصل بعالية...اتأخرت لحد ما ردت
"الو... ايه يا عالية مردتيش ليه على طول"
"كنت بصلى يا طه معلش"
"تقبل الله"
"منا ومنكم"

لحظات صمت...مرت بسرعة...قطعها طه
"مالك؟"

"خايفة م اللى هسمعه"
"ليه متوقعة هتسمعى ايه"
"زى ما قلت لك...مامتك رفضتني"
"لدرجة دى مش واثقة فيا"
"مش فاهمة"
"مش واثقة انى بحبك... مش واثقة انى قد كلمتى لما قتلتك هنتجوز"

عالية بتضحك ودموعها نازلة
"بجد؟؟ يعنى مامتك مش معترضة"
"لا يا ستي... هى كل اللى قالتها عايزة شوية وقت تفكر نشوف هنعمل ايه"
"براحتها المهم انها مرفضتنيش"

"لا طبعا... هاا قوليلى بقى...بتحبيني زى ما بحبك"
عالية بتدارى فرحتها وبترد عليه مؤنة
"طه...وبعدين"
"بعدين ايه...مش خلاص كلها حاجة بسيطة وتبقى مراتي"
عالية وهى مكسوفة

"لما ابقى"
وغيرت الموضوع
"انت بتكلمنى منين؟؟ انت ف الشارع"
"انا ف العربية... رايح اجيب فلوس من تجار"
"ربنا يسلم طريقك"
"ربنا يخليكى ليا...بقولك عايزك يوم كده نزل مع بعض نشترى شوية حاجات"
"حاجات ايه...وانت عارف رايي ف الخروج مع بعض يا طه"
"ياحبيبتى هنتزل نجيب لك لبس علشان المناسبات اللى جاية لنا ان شاءالله"

نرجس خارجة من اوضتها الصبح
شافت مها ونرمين
"انتوا منتمتوش"
نرمين"لا لسه...شوية وهننام ونقوم نكمل مذاكرة"
نرجس"واحدة فيكم تعملى كوباية شاي قبل ما انزل"
مها"مالك ياطنط...شكلك مقريفة كده ليه"
نرمين"هنتزلى بدرى ليه"
نرجس بعصبية"هروح للهبابة اللى لايفة على اخوكى علشان اخليها تتلم وتبعد عنه"
مها بفرحة بتتابع الكلام
نرمين"هتروحي لها فين"
نرجس"ف الملجأ اللى عايشة فيه...وقعت طه ف الكلام وعرفت العنوان"
مها ونرمين ف وقت واحد
"ملجأ!!!"
نرجس"آآه شفتوا الخيبة"
مها"يعنى اهلها فين"
نرجس"ميتين"
مها"لو ليها اصل من اصله"
بصت لها نرجس بتساؤل...ردت مها

"مش ف اللي بيلاقوه ف الشارع بيودوه ملجأ"
سكتت نرجس بتفكر ف كلام مها
"ياللا الحقونى بكوباية شاي قبل دماغى ما تضرب لحد ما ادخل الحمام والبس"

راحت نرجس دخلت الحمام... ودخلت مها ونرمين المطبخ

نرجس على باب الملجأ... بتتكلم مع بتاع العامل
العامل يبشاور لها على الجنية

نرجس ماشية ناحية الجنية اللي بيلعبوا فيها الاطفال
عالية ضهرها ليها ووشها للاطفال... نرجس بتقرب ناحيتها
وقفت وراها
"عالية"

التفتت عالية... اتفاجئت

"اهلا يا طنط"

الف سؤال بيدور ف راس عالية... طه كان بيتهرب من انه يحكى لها تفاصيل الكلام اللي دار بينه
وبين مامته

ياترى هي عارفة ايه... الحقيقة ولا انها بتشتغل ف الدار

فاجأها نرجس

"اتضايقتى لما شفتينى ولا ايه"

"لا ابدأ... اتفضلى حضرتك"

قعدت معاها نرجس... وهى بتبص حواليتها

"انتى عايشة هنا بقى"

تلعثمت عالية... مش عارفة ترد

"طه حكاالى... بس عايزة اعرف منك حكايتك ايه"

"حضرتك عايزة تعرفى ايه"

"انتى مين اللي جابك هنا وملكيش اى قرايب خالص"

عالية وهى حاطة وشها ف الارض والكلام بيطلع بصعوبة
"انا كل اللي اعرفه انهم لقونى ف مستشفى حكومى وكان عمرى يوم ... الى لقونى سلمونى ف
القسم ومن القسم للملجأ للتانى للتالت لحد ما جيت هنا"
نرجس متفاجئة... بتحاول تسيطر على اعصابها
"لو انتى مكاني... هترضى تجوزى ابنك لبنت ح.. قصدى يعنى لبنت مالهش اهل"
الدموع نازلة من عين عالية ومش بترد

ف نفس الوقت... فاتن خارجة من مكتبها رائحة لعالية
شافت واحدة قاعدة معاها... شكلها مش من الدار
قربت منهم تشوف مين دى وجاية ليه

قربت فاتن... على بعد خطوات... اتواجهت مع نرجس
فاتن المفاجئة عقدت لسانها
نرجس لما شافت فاتن... قامت واقفة بعصبية
"انتى بتعمللى ايه هنا؟"
"ازيك يا ابلة نرجس... انا مديرة الدار"
فاتن بتمد ايدها تسلم على نرجس... نرجس مسلماتش
"آآآآآآآآآآآآ... قلتووووولى ... هى الحكاية كده بقاآآآ"

قامت عالية وقفت مذعورة من نرجس اللي تحولت فجأة
فاتن بتبص لها بابتسامة خفيفة... لانها عارفة طريققتها كويس
"انتى مديرة الملجأ... تبعنى لى واحدة صايعة تلوف على ابني علشان تنتقمى منى... طول عمرك
غلاوية وبتكرهينى"
عالية بتبص حوالها على الموظفين اللي بيبصوا من شباييكنهم واللى خرجوا من مكاتبهم على مصدر
الصوت
فاتن "واكرهك ليه بس... اهدى وتعالى مكتبى نتكلم"
نرجس "مكتب... مكتب ايه يا ام مكتب... ده انا لولا فلوسى مكتيش كملتى تعليمك"
فاتن بترد بضيق

"بابا الله يرحمه هو اللي علمني وجوزني قبل ما يموت...محدث له فضل عليا"

نرجس بترد بصوتها العالي

"اسمعي بقى انتي وهى... خطتكم دى مش هتعدى عليا... سامعيني"

وبصت لعالية

"وانتي... اوعى تفتكري ان ممكن اجوز ابني لواحدة زيك لا ليها اصل ولا فصل ولا حد عارف

جيتي من اهي داهية"

وبصت لفاتن "اوعى انتي كمان"

زقت فاتن ف كتفها وهى ماشية وخارجة من باب الدار

عالية منهارة من العياط... فاتن بتبص حوالها

بتطبطب على عالية

"روحي اغسلي وشك وتعالى...متعيطيش"

"انا مش قتلتك يا ابلة... انا كنت حاسة...الله يسامحك يا طه"

"طه ذنبه ايه بس"

"مقاليش الحقيقة انها مش عايزاني... ولما هو حكى لها كل حاجة عني مقاليش ليه... ليه يسيني

اتفاجئ بيها هنا كده ليه"

عالية بتعيط... فاتن نادت لواحدة من العاملات

"خلي بالك من البنات...روحي يا عالية اغسلي وشك وتعالى المكتب"

عالية قاعدة قدام فاتن... بتحط كوباية عصير خلصت قدامها ع المكتب

"شكرا يا ابلة"

"العفو"

دخل طه المكتب عند فاتن ملهوف

"في ايه يافاتن... عالية حصل لها حاجة"

اتفاجئت عالية بطه... بصت له بغضب وقامت

فاتن "استني يا عالية"

طه مش فاهم حاجة "فى ايه"
فاتن "انا اتصلت لظه علشان لازم يعرف اللى حصل...واللى انا متأكدة انه ميعرفش حاجة عنه"
انفجرت عالية ف العياط تانى... وقعدت مكانها
طه مش فاهم ولا عارف يوجه كلامه لمين
"فيه ايه فهموى"
وحكت فاتن لظه اللى حصل بالظبط
طه لعالية "وانتى متخيلة انى كنت اعرف حاجة زى دى وسكت؟؟"
عالية "وهى عرفت كل حاجة منين"
طه فكر "انا مقلتلهاش حاجة غير ان اهلك متوفين... وف وسط الكلام سألتنى انتى ساكنة
فين؟؟على مكان الدار يعنى قتلها"
فاتن "مامتك مش غيبه يا طه... عرفت توقعك بالكلام وتوقع عالية بالكلام وربطت كله ببعضه"
طه وهو قايم "بصى يا عالية... انتى موافقة عليا ايا كانت ظروفى ولا لأ؟"
عالية "يعنى ايه ايا كانت ظروفك؟"
طه "يعنى لو اخدتك وروحنا بدأنا حياة بسيطة... موافقة ولا لأ؟"
عالية "شايفنى زى ما مامتك شايفانى...انى عايزة استغلك؟"
طه "كل اللى قصده هتقدرى تتحملى معايا اى ظروف"
عالية "ايوه"
طه وهو رايع ع الباب
"لو ماما فضلت رافضة...هنقل شغلى اى محافظة بعيد عن هنا ونكتب الكتاب واخذك معايا"
خرج طه من المكتب وعالية مستغربة
فاتن بتبص لها ومبتسمة
"مخيش ظنى فيه... غير امه خالص...ربنا يحميك يا اخويا... مبروك يا عالية"

نرجس بتفتح الباب وتدخل
شافت مها ونرمين قاعدين
نرجس "هو فين؟"
نرمين "ف اوضته"

دخلت نرجس مندفعة وفتحت اوضة طه
"فى ايه؟؟؟ مجيش المحل ليه زى كل يوم؟"
"علشان الكلام اللى لازم نقوله مينفعش يكون ف المحل"
"كلام ايه"
"روحى لعالية ليه"
"آآآآ... ودودتلك وقومتك عليا... قالتلك ايه الكذابة دى"
"فاتن اللى حكى لى اللى حصل"
"يا بنى فوق... دول عاملين عصابة مع بعض... فاتن وزت بنت الحرام دى عليك علشان عارفينك طيب"
"ماما لو سمحتى متكلميش عنها كده... هى مالهش ذنب ف اى حاجة حصلت... مش ربنا قال لا تزر وازرة وزر اخرى... عايزة تاخديها بذنب ناس هى متعرفهمش ليه"
"العرق يمد لسابع جد... زى ما امها رمتها قبل كده هى مش هيبقى لها امان"
"مش شرط... وبعدين ايه دخل فاتن بالموضوع كله"
"هى اللى مخططة كل حاجة"
"مش صحيح انا شفت عالية قبل ما اعرف ان فاتن تعرفها"
نرجس بتقعد على طرف السرير
"يا بنى فكر... انت شفت البت دى ف المحل اللى فاتن عارفة مكانه كويس... وشفتها تانى ف الملجأ اللى اكيد فاتن هى اللى قالتلك تروح"
"اولا انا شفت عالية اول مرة خالص ف الشارع وهى رايحة الجامع... هنعدى مرة المحل ويوم اليتيم انا اللى قلت لفاتن انى رايح"
نرجس بنفاد صبر "الموضوع منتهى... جواز من البت دى مش هيحصل"
طه وقف لحظات... وفتح الدولاب طلع شنطة وبدأ يحط فيها هدومه
"تمام... الموضوع فعلا منتهى"
نرجس باستغراب وقلق
"انت بتعمل ايه"
"هسيبك كل حاجة علشان تطمنى ان عالية وفاتن مالهش دعوة... لا هسكن ف الشقة اللى جيتهاى ولا هاجى المحل بتاعك... هقعد ف اى فندق لحد ما انقل شغلى واكتب كتابى على عالية واحدها ونبعد خالص"

هل يشفع الحب ؟ ←

(٩)

سكتت نرجس لحظات... وعيظت
"عايز تسيننا... عايز تسيب امك واختك لوحدهم... ده انت راجلنا وسندنا... عايز تسيننا علشان
واحدة منعرفهاش... فحون عليك يا طه"
واتأثر طه بدموعها... قعد جنبها وحط ايده على كتفها وبايده التاني مسك ايدها وباسها
"ياماما انتى اللى اضطرتى لكده... انتى اللى صغرتى وانتى اللى مش عاملة اى اعتبار لمشاعرى وانتى
اللى قررتى انى متجوزش اللى اخترتها"
"يااااااه... معى منى للدرجة دى"
"ياماما انتى على عينى ورأسى بس برضه انا مقدرش اتخلى عن وعدى للانسانة الوحيدة اللى حبيتها"
"اشمعى هى؟"
"معرفش... هى اللى حبيتها دونا عن الناس كلها"
"مش مطمئنة لها"
"ادى فرصة لنفسك تعرفيها... واديهها فرصة تثبتلك انها كويسة"
"مش قابلاها"
"لو مش عايزة تشوفيها بلاش... بس مترفضيش جوازنا"
"بتلوى دراعى"
"بالعكس انا بطلب منك الموافقة... رغم اللى حصل ف الدار بس كله يعدى مش مشكلة"
"اوعى تفتكر انى ممكن اعتذرلهم"
"مش مهم تعتذرى لهم.. المهم انك توافقى وتباركى جوازى"
"عملت فيك ايه البت دى"
"ولا حاجة... ارجوكى ياماما انا مش عايز ازعلك ولا عايز اسيب عالية... متحطيش ف الاختيار
ده"
"لما اتخيرت اختارتها هى"
"اخترت انى استقل يا ماما... لاني حسيت انك بتتحكمى فيا... مترعيلش منى ... لو لسه عند رأيك
انا هفضل على كلامى"

قامت نرجس وهى بتعيط وبتبعد عينيها عن طه

"رجع هدومك الدولاب وروح افتح المحل"

"وعالية؟"

"قطيعة متجلبش سيرتها... اسمها بيعصبني"

"يعنى ايه"

"اتجوزوا ولا اتنيلوا...الى ييشيل قربة مخرومة بتخر على دماغه لوحده"

طه ف المحل بيتكلم ف التليفون

"خلاص يا عالية...ماما وافقت اخيرا"

"بجد ولا بتضحك عليا زى المرة اللى فاتت"

"انا ضحكت عليكى؟"

"ايوه انت قلت لى وافقت ولقيتها جت بهدلتنى"

"هى جت من ورايا...وبعدين خلاص يا عالية ماما استنتجت ان فاتن مرتبة كل ده"

"ابلة فاتن!! وتهعمل كده ليه"

"ماما وفاتن مبيحبوش بعض من زمان...خلافات بقى مالناش دعوة بيها"

"يعنى مامتك وافقت بجد اخر كلام"

"ايوه والله...بصى بقى هرتب يوم كده ونترل نجيب الشبكة"

عالية بفرحة "شبكة!!"

"اه طبعا...انتى مش عروسة ولا ايه...وبعدين اوريكى الشقة ونبتدى نجيب العفش"

"طه"

"نعم"

"انت فرحتى الوحيدة اللى حسيتها ف حياتى...ربنا يخليك ليا"

"الله الله... ايه الخلاوة دى"

عالية سكنت من كسوفها

"ايه...سكتى ليه...كملى"

"انت اخرجتنى على فكرة... المهم عايز اطلب منك طلب"

"أو مرينى"

"ممكن هدير تبقى معانا ف الشبكة والتجهيزات والفرش وكده... هدير هي عيلتي"

"طبعاً يا حبيبتي... اى حد بتحببيه يبقى على عيني وراسي"

"تسلم لى عينيك"

سكت طه... لحظات صمت

"الو... طه انت فين"

"مش عايز اقاطعك علشان تكملى الكلام الحلو ده"

ودخلوا زباين للمحل... وطا طه صوته

"عالية هقفل معاكي وابقى اكلمك لما اخلص... سلام يا حبيبتي"

طه داخل البيت... شاف نرمين قاعدة

"ماما ف اوضتها برضه؟"

نرمين "اه... مها روح و سابتني وماما ف اوضتها طول اليوم عيانة من ساعة كلامك معاها"

قالتها نرمين وهي بتحاول تحسسه بالذنب

تجاهل كلامها ودخل لمرجس

طه يفتح الباب... يبص على مرجس... كانت صاحبة

قعد جنبها على طرف السرير

"مالك يا ماما... مش هتترلى الحل تانى ولا ايه"

"اللى فيا مكفيني... صدمتي فيك كبيرة"

"لو تعبانة اجييلك دكتور"

"تعبي مش عايز دكتور... تعبي من جوازة الندامة"

طه وهو قائم

"سلامتك يا ماما... لو احتاجتي حاجة انا ف اوضتي"

راح ع الباب... سمع مرجس

"هو مفيش امل تفكر تانى"

"لا خلاص... وهنتزل نجيب الشبكة لو هتقدرى تيجي معانا قوليلي لو مش هتقدرى اروح انا

وعالية نجيبها"

نرجس بغيط

"مش لما اختك تخلص امتحانات... ولا مش عايزنا نفرح بيك"
"مفيش مشكلة... نرmin هتخلص كمان يومين... لما نرmin تخلص... تصبى على خير"

مها ونرmin خارجين من الامتحان
شافوا مصطفى ف التاكسى
مها "مصطفى ومعتز اهم... تعالى تعالى"
راحوا على التاكسى... سلموا عليهم وركبوا
ركبت مها جنب مصطفى قدام
ونرmin جنب معتز ورا

مصطفى "نقول ميروك"
مها "اخيرا خلاص... ده احنا طهقنا من المذاكرة"
معتز لها "عملتى ايه"
مها "الحمد لله"
مصطفى "احنا لازم نحتفل بيكم بالاجازة... هنزكم عزومة حلوة"
مها بفرحة "هنروح فين"
مصطفى "لا دى مفاجئة بقى"

مشى مصطفى بالتاكسى... وكل مها ولا نرmin ما يسألوا يردوا الاتنين
"هتعرفوا"

وقفوا قدام عمارة... وركن مصطفى
ونزل معتز وفتحوا لهم الباب
نرmin بتبص لها بتساؤل
مها "انت ركنت هنا ليه"
مصطفى "مش قلنا هنحتفل بيكم... اصحابنا مستنييننا فوق هنطلع نقعد معاها شوية"

نرمين "نطلع فين... انا مش هطلع عند حد"
مها ساكتة بتبص لمصطفى ومعتز
معتز "ليه مش هتطلعى... هنقعد شوية مع بعض ونترل مش هنتأخر"
ومسك ذراعها
"يالا بدل وقفة الشارع كده"
مها فجأة وهى بتشاور على بعييد
"بابا يا نرمين... بابا شافنا"
التفتت نرمين تبص حواليتها... وارتبك مصطفى ومعتز
مها شدت نرمين
"تعالى قبل ما يشوفنا... ابعدوا انتوا"

وقفت مها تاكسى... ركبت فيه هى ونرمين بسرعة
واول ما التاكسى اتحرك
"بابا كى فين يا مها؟؟"
ضحكت مها
"الحمد لله... فلتنا"
"انتى بتضحكى على ايه... بابا كى فين اصلا هو بابا كى جه من بره"
"بابا ايه... انا اخر مرة شفت بابا من سنين"
"اومال"
شاورت مها على سواق التاكسى...
"ف البيت نتكلم"

نرمين داخلة البيت ووراها مها... دخلت مها تبص ف الاوض وباقى البيت ورجعت لمها
"مفيش حد هنا... فهمينى بقى ايه اللى حصل"
"انتى مشفتيش كنا هنتدبس ف ايه... شفنى كان بيشدك ازاي... ولاد الكلب فاكرينا من بتوع
الشقق"
"كان ممكن نصوت ونلم عليهم الناس"

"اه ياخيتى ونكبر الموضوع ونتفصح... لما قلت بابا هما كمان خافوا"
رن موبایل مها... بصت فيه... وقفلته
"اهو بيتصل... بقولك ايه انا هجيب رقم تانى علشان اريح دماغى وانتى خلى طه يجييك خط جديد"
"وبعدين دول عارفين البيت هنا والبيت عند مامتك"
سكتت مها لحظات تفكر
"ميتهأليش يقدرُوا يعملُوا لنا حاجة"
نرمين برعب حقيقى
"بصى بقى... انا مش هكلم حد تانى ولا ادى لحد رقمى ولا عنوان البيت... انا هموت م الرعب
وافرضى مكناش عرفنا نتصرف كانوا عملوا فينا ايه... لا يا ستي توبة"
ردت عليها مها وهى بتقعد وببرة حزينة
"انا بحب الاهتمام يا نرمين... انا بحب احساس الحب نفسه"
"كنا هنروح ف داهية"
"انتى بتتكلمى كده واحنا ف نفس الظروف... ما انتى كمان راميينك لوحدك طول اليوم زى ما امى
مشغولة بجوزها والجري وراه ونسيانى"
"ايوه محدش بيهتم بينا...ايوه الحب والاهتمام حلو ونفسنا فيه... بس انا كل ما اتخيل كان ممكن
يحصلنا ايه اترعب... بصى المرة دى ربنا ستر منضممنش يحصل ايه بعد كده"
"ماشى اهو بتتعلم... احنا بس ننجح والكلية هتبقى مجالها اوسع كل واحدة فينا تلاقى النص التانى
بقى ونرتاح"

عالية قاعدة عند هدير ف البيت
عالية مظهرها اتغير بقت اشيك
هدير بتحط صينية شاي وبتقعد
"منورة يا عالية"
"ربنا يخليكى يا هدير... بصى بقى انا عايزة اقولك حاجة ومتتكسفيش"
"خير"
"لو انتى تعبانة من الحمل ومش هتقدرى تيجى تفرشى معايا بلاش تتعبى نفسك"
سكتت هدير وحست عالية انها زعلت

"انتى زعلتى منى...والله انا خايفة عليكى"
"خايفة عليا ولا حماتك مش عايزانى"
"لا والله ماجابت سيرتك خالص...وطه عارف انتى بالنسبة لى ايه ومش بيتضايق من وجودنا مع بعض ابدا...بالعكس ده جابنى وقالى اقعدى براحتك وابقى كلمينى لما تخلصى"
"يوم ما كنا بنجيب الشبكة كانت نظراتها ليا مش حلوة ابدا"
"مش ليكى لوحدك...وليا انا كمان"
"وبعدين؟؟ انا خايفة عليكى يا عالية منها...هتعرفى تتعاملى معاها ازاي...انتى نسييتى ابلة فاتن كانت حكّت لنا ايه عنها"
"منسييتش...بس انا ممكن استحملها علشان طه...انتى مش متخيلة انا بحب طه قد ايه وممكن استحمل ايه علشانه"
"معقول؟؟"
"ايوه... اكرت كمان ما تتخيلى..انا مبقتش قادرة اتخيل حياتى من غيره...هو يستاهل الحب ده واكرت... قبل ما اقول نفسى ف حاجة بيحبها لى...حنيتة وخوفه عليا ميتوصفش... الكام شهر اللى فاتوا دول حاسة انه عوضنى عن حرمان السنين"
"يا بختك يا عم طه...ايه ده يابنتى ولا كان بيان عليكى"
"يا بختى انا بيه"
"بس برضه حماتك شكلها شرانية...ولا بنتها شكلها زيبها بالطبط"
"مش مهم...المهم طه عندى"
"ربنا يسعدكم"
"المشكلة بقى دلوقتى اللى محيرانى"
"ايه"
"يوم كتب الكتاب عايزة اعزم ابلة فاتن وخايفة من حماتى بعد الحناقة اياها"
"بقولك ايه...ابلة فاتن عاقلة وطيبة...خرجى نفسك من المواضيع دى خالص"
"ازاي"
"هما عيلة ف بعض...اخوها يعزمها ميعزمهاش ملكيش انتى دعوة"
"انتى شايفة كده يعنى... طيب"

عالية قاعدة مع طه ف العربية...واقفين قدام الدار

"عالية"

"نعم"

"عايزة نكتب مؤخر كام"

"مؤخر؟؟ انت بتفكر تطلقني ولا ايه"

"لاقدر الله لا طبعاً... انا مش عايز احسك اني ضيعت اى حق ليكى"

"مش عايزة حاجة يا طه...ولو فكرنا ف الحقوق ما كان فيه حاجات كتير المفروض اني اجيها

وانت متخلتنيش اجيب حاجة خالص"

"علشان مفيش فرق بيننا"

"يبقى ليه فاكرني انا عاملة فرق ف دماغى"

"زعلانة علشان مش هنعمل فرح...والله لو كنت اقدر كنت عملتلك احلى فرح"

"يا طه انت فرحتى...وبعيدن هنعمل فرح وتعزم اصحابك ومعارفك ويلاقوا عروستك من غير

اهل؟؟...خلينا مداريين كده احسن"

"مقصدش والله..انا بس تجهيز البيت بسرعة كده اخذ كل اللي حيلتي وماما ساعدتني ومش عايز

اطلب منها تاني"

"انا عارفة كويس انك متقصدش...ياطه انا فاهمك من غير ما تتكلم... وزى ما قلتلك انت فرحتى

مش الفرحة والهيفة"

"ربنا ما يخرمنيش منك... ان شاءالله هنكتب الكتاب واسبوعين ثلاثة بالكثير ونتجوز"

"ان شاءالله...عايزة اسألك على حاجة كده"

"اسألى"

"هتعزم ابلة فاتن ولا لأ؟؟ يعنى علشان اللي حصل بينها وبين مامتك ف الدار"

"لازم اعزمها ان شاءالله"

"طب مش تقول لمامتك الاول"

سكت طه لحظات يفكر

"شايفة كده؟"

"اه علشان مامتك متفاجئتش وتعمل مشكلة"

هل يشفع الحب ؟ ←

(١٠)

طه داخل البيت... نرجس بتحط العشاء السفره
"يا لا ياطه... اغسل ايديك وتعالى"
"البنات فين"
"جوه ف الاوضة"
"ماما... انا هعزم فاتن ف كتب الكتاب"
التفتت له واتغيرت ملامحها
"لأ... متعزمهاش"
"ماما انا بقولك هعزمها مش بقولك اعزمها ولا لأ"
وزعقت نرجس
"جرى ايه يا طه... هو انت يابني شريك مخالف وخلاص مش كفاية الجواز اللى غصب عني
كمان... كمان هتجيلي فاتن اللى بتكرهني"
"اصول ولا مش اصول... يعني احتى الكبيرة متحضرش كتب كتابي؟؟ ويعدين الحكاية كلها ساعة
هنكتب الكتاب وخلاص"
نرجس بنرفزة وهى ماشية
"اعمل اللى انت عايزه"

في قاعة كتب الكتاب
قاعة بسيطة... واسعة فيها كراسي على شكل صفوف
وفي المقدمة ترايزة طويلة... وعلى يمين القاعة كنبتين جنب بعض للعروسة والعريس
عالية قاعدة... لابسة تاير بيح وطرحه ملفوفة لفة بسيطة وميك اب بسيط... رغم بساطته الا ان
النور اللى بيشتع من وشها زادها جمال على جمالها

هدير واقفة جنبها... لابسة عباية سودة مطرزة

نرجس ونرمين ومها قاعدين ف الصف الاول من الكراسى
ال ٣ لابسين فساتين وطرح سواريه وميك اب يناسب ملابسهم

طه واقف بيسلم على اصحابه وزمائه ف الشغل اللي بيباركوله بعد كتب الكتاب

دخلت فاتن وميار القاعة... وراحوا على طه وعالية

سلمت فاتن على طه وباسته

فاتن "مبروك يا طه"

طه "الله يبارك فيكى اتأخرتى كده ليه"

فاتن "كنت جاية من بدرى والله بس حصلت ظروف كده عطلتنا"

طه "خير"

فاتن "لا خير مفيش حاجة... ميار بنطلونها اتقطع فرجعنا البيت غيرت وجينا"

ميار "مبروك ياخالو"

طه "الله يبارك فيكى يا حبيبى عقبالك"

سلمت فاتن على عالية وهدير اللي فرحوا لما شافوها

نرمين لما شافت فاتن مالت على نرجس

"الحرباية اهى"

مها "هى ادى اختك؟"

نرمين "خوت يَخوتها...هى"

نرجس بتبص بعيد عن فاتن

نرمين وهى بتغمزها ف ذراعها

"جاية علينا"

بصت نرجس شافت فاتن جاية

وقفت فاتن قصادها... مدت ايدها تسلم

"مبروك"

نظرة خاطفة بصت فيها نرجس لظه... لما شافته يبص لها

مدت ايدها ببرود

"الله يبارك فيكى"

سلمت ميار على نرجس من غير ماتتكلم... وسلمت عليها نرجس بنفس البرود

سلمت فاتن على نرمن وباستها... وراحت قعدت على كرسى بعيد عنهم ف صف تاني

نرمن مكشرة وبتسلم بنفس الطريقة اللي سلمت بيها نرجس

قربت ميار من نرمن... وبكل ود وابتسامة واسعة

"ازيك يا نرمن... عامله ايه"

"كويسة"

"اتغيرتى كثير عن اخر مرة شفتك فيها... بقيت زى القمر"

نرمن بسخافة

"والله؟؟ وانا الاول كنت وحشة مثلاً"

ارتبكت ميار

"مقصده انا..."

"خلاص خلاص... روى اقعدى"

حست ميار بالاحراج... راحت بسرعة جنب فاتن

واول ما وصلت مقدرتش تمسك دموعها لحد ما ترجع البيت

مها ونرمن يبصوا عليها ويتوشوشوا ويضحكوا

فاتن "بتعيطى ليه"

"نرمن بتكلمنى بطريقة وحشة اوى ياماما.. والله ماقلتلهما حاجة"

"معلش ماهى طالعة لامها.. متعيطيش معلش علشان عالية وطه"

حاولت ميار تسيطر على نفسها... مقدرتش

"احنا قاعدين ليه... قومى نمشى"

طه وعالية قاعدين على ترايزة ف كازينو

الترابيزة ف جنب بعيد عن الزحمة
قاعدین جنب بعض على كنبه والجرسون بيشيل الاطباق
طه ماسك ايد عالية
"مبسوطة؟"
"اوى اوى"
وبصت عالية ف الساعة
"طه الساعة بقت ١ مش كفاية كده"
"زهقى؟"
"لا طبعا... انا مش ممكن ازهق وانا معاك"
"خلاص خلينا قاعدین شوية كمان"
"خلينا... بدل هتبقى مبسوط... يبقى خلاص"

طه داخل البيت... الساعة ٣
اول ما قفل الباب سمع صوت نرجس
"ما لسه بدرى"
اتخض من صوت نرجس اللى طلع فجأة
"ماما!!!!!!"
"ايوه ماما او مال عفريت... كنت فين ياطه كل ده"
"كنت بتعشا انا وعالية"
"عشا ده ولا سحور"
ضحك طه
"مش معقول تكونى هتزعقيلى علشان اتأخرت"
"لا... انا متغاضة من اللى احدثك مننا من اول يوم دى... اللى ما قلت تعالى يا ماما انتى واخيتى
اتعشوا معانا"
"انا اسف... فاتتني والله... حقاك عليا ملحوقة.. بكرة نتعشا كلنا مع بعض"
"مش لما تقول للهانم اللى مرضتش تخليك تاحدنا معاكم النهاردة"
"والله ولا جنبنا سيرتكم خالص"

"طبعاً من لقي احبابه نسي اصحابه"
قرب منها طه وهو بيحضنها واخذها وداخل على اوضتها
"هو فيه حد يقدر ياخدني من احلى ام ف الدنيا... كل اللي انتي عايزاه هعملهولك... ايه اللي
يرضيكي"
وصلوا على باب اوضتها
"متبعدش عني"
باس راسها
"انا مقدرش ابعد عنك... هو انا عندي كام نرجس يعني... يالا ادخلي نامي علشان عندك شغل
الصبح... تصبحي على خير"
"وانت من اهلك... بقولك يا طه"
"نعم"
"انت اديت لها مفتاح؟"
"اه"
"وانا؟؟؟"
"عايزة مفتاح ليه"
"ليه يعني ايه... افرض عايزة اجيب حاجة واوديها هناك ولا مليش حق ف بيت ابني"
"لا طبعاً ليكي... ثواني"
وطلع طه ميدالية مفاتيحه
"اتفصلي"

عالية وهدير بيفتحوا باب الشقة
دخلوا لقوا مها ونرمين قاعدين على الاترية وشايلين من عليه الورق وبياكلوا شيبسي وشيكولاته
وحاطين كائنات على ايد الكنب
استغربوا الاتنين... ودخلوا
عالية "اهلا يا نرمين... اهلا بكم منورين"
نرمين "هو طه عارف انك جاية؟"
عالية "اه... ليه؟"

نرمين "بسأل...بلاش؟"
عالية "لا عادى...بس انتم جيتوا هنا ازاي"
مها "مع طنط...اصل معاها مفتاح وجينا نساعدكم"
اتلون وش عالية من الضيق
وجت نرجس من الاوضة
"انتى فىن هدومك؟؟"
عالية متفاجئة "هه"
نرجس "فىن هدومك...الدولاب فاضى"
عالية "لسه مجبتش"
مها ونرمين ضحكوا...بصت لهم عالية مستغربة
ردت هدير عليهم "كده عيب على فكرة"
نرجس "بتقولى لمين عيب؟؟"
هدير "حضرتك اسألينى بقول عيب ليه الاول"
نرجس "نعم ياحتى... هتقوليلى اقول ايه ولا مقولش ايه...انتى مين اصلا ولا تقربى لنا ايه علشان
تتكلمى"
عالية "هدير احتى"
نرجس "اختك منين... والله ما انا عارفة ارميتوا علينا من الهى داهية"

هدير عيطت...وراحت ع الباب...راحت وراها عالية ونزلوا

هدير وعالية ف ميكروباص
هدير بتعيط وعالية بتهديها
"انا اسفة يا هدير...انا السبب... متزعليش علشان خاطرى"
"وانتى ذنبك ايه...هما اللى قلالة الادب ومعهدهمش تربية"
"هو انتى قلتى لهم عيب على ايه؟"

نرجس بعد ماعالية وهدير نزلوا
مسكت التليفون واتصلت بطة

"الو... ايوه يا طه... شفت مراتك عملت فينا ايه؟؟ البت دى مش سهلة... مش هي لوحدها دى
التانية كمان صاحبته دى ولا اختها ولا ابصر ايه... انا عارفة تلاقيها هتتصل بيك وتترها دمعيتين
علشان تتسهوك عليك... وانا اللي قافلة الحبل علشان اساعدها... متستاهلش والله... والله يا طه لو
ما جبتلى حقى لا تبقى ابني ولا اعرفك ولا دخلة لك بيت... ابقى اشبع بيها بقى واخسر اهلك
علشاهما"

قفلت نرجس مع طه وبعبصية
"يالالا...لموا زياتكم دى وقوموا هنمشى"

عالية وهى ماشية مع هدير
النتين ماشيين بدموعهم... ومكسورين
وصلوا عند العمارة اللي فيها هدير
"اطلعي معايا"
"لا هرجع الدار"
"مش هتكلمى طه تحكى له"
"مش عايزة اعطله وهو ف الشغل.. لما يخلص هيتصل بيا واحكى له"
سلموا على بعض... حضنوا بعض اكر... دمعوا تاني
"متزعليش منى يا هدير... انا مليش غيرك"
"مش زعلانة منك... انا خايفة عليكى منهم يا عالية... مستقويين اوى"
"ربنا موجود"

عالية قاعدة مع فاتن ف المكتب... وبتعيط
"متزعليش يا عالية... انتى عارفة انها صعبة... اكيد طه هيجيلك حقك"
رن موبايل عالية... ردت بسرعة وهى بتقول لفاتن انه طه
"الو... انا ف الدار... طيب مستنيك... مع السلامة"

سألتها فاتن "ايه؟؟"

عالية باستغراب

"صوته متغير وسألني انا فين قلت له وقالى جايلك وقفل على طول"

فاتن ف سرها

"ربنا يستر ومتكونش نرجس قلبته عليها"

دخل طه المكتب عند فاتن...وباندفاع قبل ما يقعد ولا يسلم

"ايه اللي حصل ده يا عالية... انتى زعلتى ماما ونرمين ليه بالطريقة دى وهدير ازاي تتدخل فى اللي

مالهاش فيه"

عالية باستغراب وارتباك

"انت فاهم ايه؟؟ اسمع منى الاول"

قعد طه

"سمعيني"

قامت فاتن وهى بتطبطب على كتف طه

"هبعثلك لمون يا طه وهستناكم فى الجنة"

خرجت فاتن من المكتب...بدأت عالية تحاول تجمع كلامها

"الاول...انت مقلتلش ليه ان مامتك رايحة"

"مقالتلش...ومهباش محتاجة تاخذ اذن منك يا عالية"

"مقلتش اذن...انا بس اتفاجئت"

"المفاجئة متسمحلكيش انك تتعاملى معاهم على انك صاحبة البيت وهما مالهمش فيه"

"والله ما عملت كده... مع انى اول مادخلت لقيت اختك وصاحبته قاعدين ياكلوا ويشربوا حاجة

ساقعة وحطينها على الانتريه... متكلمتش والله بالعكس رحبت بيهم"

"وبعدين"

"مامتك جت من جوه...ومن غير لا سلام ولا اى حاجة لقيتها بتقولى فين هدومك"

"كانت عايزة ترتب الدولاب لانها اخدت جزء من هدومى ورتبته هناك... هدير ترعق مع نرمين

ومها ليه"

"مها دى ايه اللي جايبها طيب يا طه"

"بصى...مها ونرمين مبيفارقوش بعض ودى حاجة مش هتغيريها"
"حاضر...مش مهم... بس المهم ان اختك لما مامتك سألتنى على الهدوم وانا قلت لسه مجبتش قامت
قالت لصاحبيتها قال يعنى هى هتجيب حاجة...فهدير ردت عليها قامت مامتك مزعقة لها"
"والمفروض انى اصدق ان كل اللي حصل علشان الهيافة دى"
اتفاجئت عالية
"يعنى انت مش مصدقنى؟"
"بقولك ايه يا عالية... انا مش من اول يوم هلاقى مشاكل بينكم... مهما حصل متنسيش ان دى
امى واللى يرضيها يرضيني واللى يزعلها يزعلنى"
"والله ما زعلتها...ده هى اللي طردت هدير"
"هى ليها ف بيت ابنها انما صاحبك ليها ايه عندنا"
عالية بتبص له كأنها شايفة واحد تانى...كمل طه كلامه
"قومى معايا تروحي تراضى ماما وتخلصى المشكلة دى وهدير اللي هتعمل مشاكل... بلاش منها"

(١١)

سكنت عالية وهى بتبص له... شافت علامات الغضب على وشه

"ايه...مش هتقومى معايا"

"حاضر يا طه...هقوم معاك واجى لمامتك اراضيها علشان خاطرك مش علشان انا غلطت"

قام طه وقف

"ياللا"

"ممكن اطلع اغير هدومى"

"وكده ماله؟"

"مالوش...عايزة اغير هدومى ممكن"

"متأخريش"

خرجت عالية بسرعة... تلحق دموعها اللى هتترل

فاتن قاعدة ف الجنينة بعيد...وشافت عالية وهى طالعة بسرعة من المكتب...راحت فاتن لظه..

"ايه ياطه اللى حصل...عالية مالها"

"مفيش...طلعت تغير هدومها علشان تيجى معايا ماما"

سكنت...مترددة...تتكلم وتبقى بتدخل ولا تسكت علشان متدخلش

حسنت ترددها بسؤاله

"انت شايف مين غلطان يا طه؟"

"عالية طبعا"

"ليه"

"ليه ايه؟؟ هى محكتكيش"

"لا...حككت انا بس عايزة اعرف غلطانة ليه"

"هو يصح تقابل ماما وحش وترد عليها وتقولها ان ده بيتى وبيت اخى على هدير وهدير تزعق"

لنرمين"

"هدير وعالية يقولوا كده ويعملوا كده...دول اغلب م الغلب"

"قصدك ايه يافاتن...ماما هتكذب يعنى"

حاولت فاتن اختار كلامها كويس وردت
"بص يا طه... انت مكنتش صغير ساعة ما انا اتجوزت... كنت واعى وشايف اللى بيحصل... لما
كانت مامتك تشتكى لبابا منى كانت بتقول المواقف بالظبط ولا كانت بتزود شوية من عندها
وكنت انت بتشهد الحق دائما"
سكت طه بيبتكر ويفكر... كملت فاتن
"خليك حقانى يا طه ومتظلمش عالية"

عالية اول ما دخلت اوضتها ف الدار
قعدت تعيط... عياط بحرقة وهى بتكلم ربنا
"يارب... بعد ماقلت خلاص الدنيا ضحكت لى... اتظلم كده... يارب انت شايف انى
مغلطتش... حنن قلب طه عليا"
بدأت تهدا... غيرت هدومها بسرعة .. راحت غسلت وشها ونزلت لطة

طه وعالية ف العربية... ساكتين... محدش فيهم اتكلم
لكن كل واحد جواه كلام كتير... مقالش منه ولا كلمة
ركن طه قبل المحل بشوية... نزلت عالية ونزل طه
بعد ما قفل العربية... لف مشى جنبها... مسك ايدها
التفتت له عالية... كانت فاكره مخاصمها
الامان اللى حسنت بيه لما مسك ايدها... طمنها وهما داخلين المحل

اول ما دخلوا... كانت نرجس قاعدة ع المكتب... لما شافتهم كشرت زيادة
"ماماااا"

نرجس "عايز ايه... ايه اللى جاها هنا بعد ما طردتنا"
عالية "انا طردتكم؟؟ ازاي وهو بيتك"
نرجس "انت مشفتيش وشك اتقلب ازاي اول ما شفتينا... ولا صاحبتك بتزقق لبنتى... على اخر
الزمن بنات الشوارع هيعلموا بنات الناس الادب"

طعنة تلقتها عالية من نرجس... وجعتها... الالم بان ف عينيها وهى بتبص لطفه تستنجد بيه
طه مش متوقع الكلمة القاسية دى... وجعته زى ما وجعت عالية
نرجس ندمت لما انتبهت ان كلامها ف وجود طه

نرجس "انا طبعا مقصد كيش انتى ... انا اقصد صاحبك ان مالهش حق تيجى بيتنا وتعيب فينا"
طه "موضوع صاحبها ده انتهى ياماما خلاص... لو عايزة تساعدى عالية ف الفرش روحى انتى
وهى بس"

نرجس "يعنى ايه انا وهى بس... قصدك اختك لأ... مليتك من جبهة اختك"
عالية ساكتة مش عارفة تتكلم ولا تدافع عن نفسها
طه "عالية متكلمتش خالص بدليل انما كانت جاية تراضيكى... بس اللي انا شايفة انك عايزة تطلعها
غلطانة وخلاص"

نرجس باستعطف "انا يا طه... الله يسامحك يابنى"
طه "دلوقتي انا مش عايز كتر مشاكل من اولها... انا مش كل يوم هاجى اخلاص خناقات... انتم
الأتنين ايه اللي يرضيكم"
نطقت عالية بتلقائية صادقة
"انا مش عايزة غير رضاكم"
طه بص لنرجس مستنى ردها

ردت بتصنع البراءة وهى بتبص لعالية من تحت لتحت
"وانا هعوز ايه م الدنيا غير انى اشوف ولادى مرتاحين وبيحبوا بعض ومحدث يفرقهم"

طه "طيب عايزانى ف حاجة"
نرجس "رايح فين"
طه "كام مشوار كده هجيب حاجات مع عالية واوصلها واجى"
عالية وهى بتسلم على نرجس
"انا اسفة لو لسه زعلانة منى ف حاجة"
هزت نرجس راسها ببرود وابتسامة مصطنعة

خرجت عالية ورا طه...فتح لها العربية وقعدت ولف جنبها

وهما ف العربية... عالية بتبص قدامها... طه ببص لها نظرات مختلصة بطرف عينيه

"على فكرة... انتى النهاردة كبرتى ف نظرى اوى"

"ليه"

"انك استحملتىنى وانا متنفز... انا عارف انى جيت عليكى شوية بس لازم تعرفى ان دى امى

ومقدرش ازعلها وخصوصا انها وافقت على جوازنا وساعدتني كمان... مش معقول يبقى جزائها انى

اجى معاكى ضدها"

"وانا مش ممكن اساعدك على انك تغضبها ابدأ"

"علشان خاطرى متزعليش منها على اى كلمة... متزعليش الا منى"

"وانا مقدرش ازعل منك ياطه"

كانوا واقفين ف اشارة... قرب منها وباس راسها

"طه... الناس"

"واحد بيصالح مراته... محدش له عندنا حاجة"

ضحكت عالية... ضحكة فرحة بانها حسست ان اللى معاها دلوقتي طه اللى حبته مش اللى جالها وهو

متضايق وبيكدها

فتحت الاشارة... ومشى طه

"بصى يا عالية... احسن حاجة متقابليش انتى وماما الا لو انا معاكم"

"ياريت"

"ياريت ليه"

"بصراحة بخاف منها"

ضحك طه "ليه ببيع"

"لا شديدة قوى ومبعرفش اتكلم معاها... بحس ان اى كلمة هقولها هبقى غلطانة فيها"

"لا متخافيش... بقولك ايه... مش كفاية علينا اسبوع تخلصوا البيت بقى ونتجوز"

عالية بفرحة "ياريت... انا نفسى يبقى لى بيت"

طه "خلاص... ومعلش اى حاجة ماما تعملها ف البيت سيبها براحتها ولما نستقر ابقى غيرى اللى

انتى عايزاه"

"حاضر... بس ممكن طلب"

"اطلبي"

"هدير"

اتغيرت ملامح طه... وقَلَب وشه لما جت سيرتها

"يا طه انا مليش غير هدير... احنا مع بعض ع الحلوة والمرة من يوم ما وعينا ع الدنيا... هي كل اهلي وانا كل اهلها... مقدرش ابعدها عنها وهي اكيد هتبقى محتاجي الايام الجاية... انت عارف انها حامل ومفيش غيري يقف جنبها وزى ماهقف جنبها هي كمان مش هتسييني لما احتاج لها... انا مليش غيرها ارجوك يا طه متحرمينش منها لانك لو صممت انا مش هقدر اقولك لأ بس تبقى بتقهرني"

صوتها كان مخنوق بدموع لمعت ف عينها وقت كلامها عن هدير

بدأ طه يلين لما حس بيها

"خلاص يا عالية... خلاص"

سألته بعد فهم "خلاص ايه"

"انا مقلتش قاطعيها... بس بلاش اليومين دول ف الفرش علشان ماما وميحصلش مشاكل

...ماشى"

فرحت عالية انها مش هتبعده عن هدير

فاتن داخله على ميار اوضتها

"هااا... خلصتي"

ميار وهي بتستعرض فستانها وبتلف قدام فاتن

"حلو؟؟"

"قمر"

"كان نفسي ف فستان سواريه مش فستان عادى"

"هنجيب السواريه على ساعة ونرميه... وبعدين ده مش فرح كبير يعني... دى زفة بسيطة كده

هيتزفوا ويتصوروا ويروحوا"

"نفسى اشوف عالية وهي عروسة"

فاتن وهي خارجة من الاوضة

"طب يالا علشان تروحي تشوفيها"

دخلت فاتن اوضتها...وهي بتصحى عبد الحميد بصوت واطى

"عبد الحميد...عبد الحميد"

"أمممم"

"مش جاي الفرحة معانا برضه"

"لا عايز انام"

"طب احنا نازلين"

"فين ميار"

"عايزها؟"

"اه"

نادت فاتن على ميار

دخلت لهم ميار

"نعم ياماما"

"كلمى ابو كى"

اتعدل لها عبد الحميد وبص لها شوية

"نعم يا بابا"

"مفيش كنت عايز اشوفك قبل ماتتلى"

بصت ميار لفاتن مستغربة

عبد الحميد "تعالى ياميار"

فتح حضنه ليها...قربت منه ميار حضنته

"انتى زعلانة منى علشان زعقتلك امبارح وقلت لك الاكل شايط"

"لا يا بابا...ماهو كان شايط معاك حق"

فاتن "ياللا يا ميار...عايز حاجة يا عبده"

عبد الحميد "متأخروش...خدنى علشان تركبوا"

سحب عبد الحميد المحفظة من تحت المخلدة...طلع منها ٢٠ جنيه

بيناولها لفاتن...وقعت الفلوس من ايده ع السرير

"ايدى منملة شكللى كنت نايم عليها"

اخذت فاتن الفلوس

"شكرا يا عبده...مش هنتأخر ساعتين بالكثير"

عالية لابسة فستان الفرحة عند الكوافيرة...بتبص لنفسها ف المراية مش مصدقة نفسها
هدير جنبها..نظراتهم اتقابلوا ف المراية...ابتسموا لبعض بحب

دخلت نرجس وهى مبهرجة زى عروسة المولد وشخبطت ف عالية
"انتى هتسيينا ملطوعين كتير...ياللا"
خافت عالية...وردت بسرعة
"خلاص...خلصت اهو"

خرجت عالية ووراها هدير...واول عينيها ما جت فى عيني طه
نسيت نرجس وسخافتها ونسيت كل اللى حواليتها

طه اول ما شاف عالية...حس انه اول مرة يشوفها
اتقدم ليها وهو مبتسم بخطوات سريعة
عالية بتتقدم ناحيته...عينيهم بتتكلم من غير صوت
واول ما مسك ايديها...قالت له بكل ثبات وصدق بهمس
"بحبك اوى"

مكنش سامع غير صوتها رغم كل الاصوات اللى حواليه
قرب من ودنها
"انا بحبك اكرتر"

ابتسمت بفرحة وهى بتبص له ف عينيها

مصور الفيديو بيصورهم
ومصور الفوتوغرافيا بيلقط ليهم صور وهما مش شايفين غير بعض

هدير واقفة مع فاتن وميار...فرحانين بيهم وليهم

نرجس واقفة مع مها ونرمين
مها"انا مش عارفة عاجبه فيها ايه"
نرمين بتضحك"دول ف دنيا تانية خالص"
نرجس متغاظة...راحت ناحيته ب غل
شدت طه ناحيتها وكلمته ف ودنه
"ايه مش قادر تصبر لما تروحوا...مش تحترموا نفسكم شوية"
صوتها كان مسموع لعالية... حست بالاحراج ومبصتش ناحية طه تاني لحد الزفة ما خلصت

ميّار داخلة سابقة فاتن...فاتن بتدخل وراها وبتقفّل الباب
"عقبالك ياميّار"
"انا نفسى ف فرح كبيير ياماما"
"مش بشكل الفرّح ولا مكانه...بالراجل اللى هتعيشى معاه عمرّك كله"
"معاكى حق...هغير هدومى واجى نرغى شوية"
"طيب "

دخلت فاتن اوضتها تغير هدومها
فتحت النور وهى عارفة ان عبد الحميد هيزعقلها علشان فتحت النور وهو نايم

عبد الحميد مزعقش...بصت عليه حسّت انه معووج وهو نايم
قربت منه وهى قلقانة
"عبد الحميد... عبد الحميد"
مردش عليها...بدأت تهر فيه وتعلّى صوتها
"عبد الحمييد"
جت ميّار تجرى على صوتها...وقفت ع الباب
"ماله بابا"
فاتن بترد عليها بفزع وهى بتهز ايده
"مبيتركش ومبيردش عليا"

قربت ميار وهي بتعيط

"بابا...باباااااااااا"

فكرت فائن بسرعة تتصرف ازاي... اتطمنت انه عايش لما لاحظت نفسه... واتصلت بالاسعاف

(١٢)

فى المستشفى...ميار قاعدة بتعيط وساندة على كتف فاتن

فاتن مسحت دموعها قبل ما ميار تشوفها

"وبعدين ياميار... ان شاءالله هيبقى كويس"

"انا خايفة اوى على بابا"

"متخافيش... لما يخلصوا الاشعة هنطمن ان شاءالله"

خرجوا المرضى بالسريـر المتحرك من الاشعة للعناية المركزة

سألت فاتن الدكتور بلهفة

"ماله يادكتور"

"جلطة ع المخ"

شهقت فاتن وزاد عياط ميار...سألهم الدكتور

"اول مرة؟؟"

فاتن "ايوه"

الدكتور "بياخد علاج للضغط والكوليسترول؟"

فاتن "لا"

الدكتور "مش ماشى ع العلاج مطبوط يعنى؟"

فاتن "لا هو مبيحبش يوهـم نفسه بالمرض ولما بيتعب مش بيكشف"

الدكتور "الضغط العالى وارتفاع الكوليسترول ف الدم واهماله ليهم سبب الجلطة"

فاتن ومقدرتش تمسك نفسها

"يعنى حالته خطيرة؟"

الدكتور "لا.. ان شاءالله متسيبش اثر...وكويس انكم اكتشفتموها بسرعة وقدرنا نلحقه... هيفضل

ف العناية المركزة وانتوا تقدرؤا تتفضلؤا وتيجؤا ف مواعيد الزيارة"

فاتن بتبص للدكتور...وهو شاب صغير... ترددت وسألته

"معلش يا دكتور... متأخذنيش يعني... مش احسن انقله ف مستشفى خاص؟؟ انا اسفة بس خايفة
اوى"

ابتسم لها يطمئنها

"متخافيش... الدكاترة هنا ممتازين والمستشفى الخاص مش هيعمل ازيد م اللى هيتعمل هنا...
والتكاليف هنا عالية مش بسيطة والخاص هيبقى اضعاف"
فاتن "شكرا يادكتور"

طه فتح عينيه من النوم... بص جنبه ملقاش عالية
بص ف الساعة... او نص الضهر

قام طه يدور على عالية اللى مش سامع لها صوت
دخل المطبخ... فاضى
راح عند الحمام... الباب مفتوح وفاضى
راح اوضة الاطفال... وقف على باب الاوضة ساكت

عالية كانت واقفة تصلى وضهرها ليه
وقف مكانه من غير ما تحس بيه
فضل يراقبها لحد ما خلصت صلاة... بعد ما خلصت فضلت قاعدة ورافعة ايديها للسما وبتدعى
بصوت مش متفسر لطه

لما خلصت دعاء وفضلت قاعدة سرحانة
قرب منها طه... مسك كتفها وباس راسها وقالها بكمس
"تقبل الله"
التفتت له وهى بتقوم وهو بيمسك ايدها يساعدها تقوم
"منا ومنكم... صحيت امتى؟"
"من شوية صغيرين"
قلعت الاسدال وطبقته وحطته على طرف السرير هو والمصلية

قعد طه على الكنبه الموجوده ف الاوضه
"احضر الفطار؟"
"لا تعالى اقعدى جنى"
قعدت جنبه...حط ايده على كتفها وسندت راسها على كتفه
"قوليلى كنتى بتدعى لى ولا لا؟"
"طبعاً يا حبيبى... هو انا ليا غيرك ادعى له"
"ربنا يخليكى ليا... عارفة انا من يوم ماشفتك تانى مرة وانا بدعى بيايه؟"
"بيايه؟"
"انى اشوفك تانى وانك تبقى من نصيبى وام ولادى"
"وانا كمان كنت بدعى تكون من نصيبى بس بصراحة مجبتش سيرة ولادى دى "
"ليه...اوعى تكونى مبتحبيش الاطفال"
"لا طبعاً بحبهم ... انت نسيت انى عايشة معاهم"
"عارفة يا عالية... نفسى يبقى عندنا ولاد وبنات كلهم شبهك"
"لا يا سيدى انا عايزاهم شبهك انت"
"المهم انى عايز كتييير... متقوليليش تعبت ولا زهقت"
"ازهق ايه بس... انا كمان نفسى احلف كتير علشان يبقى ليا عيلة واللى اتحرمت منه اعوضه ف
ولادى"
"ان شاءالله..ربنا يقدرنى واعوضك عن كل اللى فات"
رن موبایل طه ف الاوضه الثانية
"دى اكيد ماما"
قام طه يرد عليها ودخلت عالية تحضر الفطار

نرجس ونرمين ومها قاعدين بيتعشوا
نرمين"تصدقى ياماما غياب طه عامل اثر برضه"
نرجس"طبعاً ..ربنا ميحرمناش منه"
مها"وهو رجع المحل ولا لسه يا طنط؟"
نرجس"لا ياخيتى لسه...اسبوع وقاعدلى جنب الهانم بتاعته"

نرمين "انا مش عارفة بيحبها على ايه"
مها باستنكار "اذواق"
نرجس "هى النتيجة بتاعتكم امي؟"
مها "كمان اسبوع بالكثير"
نرجس "ربنا يستر...يا عالم كنتوا بتذاكروا ولا بتتدلعوا"
نرمين وهى بتضحك مع مها
"الاتنين"

فاتن بتفتح الباب بالمفتاح... جريت عليها منار
"بابا ازيه؟"
"خشى جوه حطى حاجة عليكى... الجيران مطلعينه"
دخلت ميار اوضتها... وظهر ٢ شباب مسندين عبد الحميد... كأثم عكاز لانه غير قادر على
المشى لوحده

دخلوه على السرير...
فاتن "شكرا يا ولاد ربنا يخليكم"
الشباب "العفو... ان شاء الله يبقى احسن... سلامو عليكو"

بعد ما مشيو... قربت منه فاتن وعدلت قعدته
بص لها بدموع ف عينيه... ولاول مرة تحس بضعفه
"ايه يا عبد الحميد... وحد الله... ان شاء الله هتبقى كويس"
دخلت ميار وحضنته

"حمد الله ع السلامة يا بابا... نورت البيت"
حضنها وهو بيعيط... عيطت ميار لما لاحظت اعوجاج بؤه
فاتن شاورت لميار انها متعيطش... غيرت هدومها
"تعالى ياميار ساعدينى اعمل اكل لبابا"

ميار لعبد الحميد "هساعد ماما واجيلك اقعد معاك... مش هسيبك تقعد لوحذك يا بابا"

باست ايده وراحت لفاتن المطبخ

اول ما دخلت المطبخ

"مينفعش كده ياميار... لازم نتحكم ف نفسنا شوية الدكتور قال نفسيته مهمة واى زعل هيتعبه
اكثر"

"هو بابا ماله... مش هيتكلم تانى؟"

"يارب يرجع يتكلم وبمشى تانى"

"هو ايه اللى حصل بالظبط"

"الجلطة عملت شلل نصفى للجنب اليمين كله"

"ياحبيى يا بابا"

"انا دلوقتى ويلي ويلين... خدمة ابو كى مش سهلة وانا بقعد طول اليوم ف الشغل... غير مصاريف
البيت والعلاج مش عارفة اتصرف منين ولا ازاى"

"هو لسه فيه مصاريف علاج"

"كثير يا ميار... كتييير"

"حلقى ودبتلك اللى بعيتهم مكفوش"

"الاسبوع اللى قعده ف المستشفى اخد كل حاجة... بس يالا المهم حسه ف الدنيا ربنا يشفيه
يارب"

فاتن قاعدة جنب عبد الحميد... وميار بتأكله

بعد ما خلص... اخدت ميار الصينية

بص عبد الحميد ل فاتن... وبصعوبة نطق

"متسيينيش"

استغربت فاتن من تفكيره

"اسيبك؟؟ الله يسامحك يا عبده"

شاورها بايده انه ميقصدش اللى فهمته

"او مال قصدك ايه؟؟"

وبنفس الصعوبة وبصوت متقطع

"الشغل"

حاولت تفهم بعد ما كررها مرتين

"عايزنى مروحش الشغل؟؟"

هز راسه انه يقصد كده فعلا

"بس يا عبد الحميد انا لازم اروح الشغل... هنصرف منين انا اتصرفت ف فلوس المستشفى بس

معنديش صرفة ثانية"

شاور لها بأيده اشارة بمعنى الفلوس منين

"اتصرفت... اخدت حلق ميار ودبلى"

دمعت عينيه تانى

"لا حول ولا قوة الا بالله....يعنى اكذب عليك علشان متزعلش"

شاور لها على الدولار... واشارة بمعنى مفتاح

"عايز مفتاح الدولار؟؟"

شاور لها بالنفى

"عايز حاجة من الدولار"

شاور لها بالايجاب...قامت فتحت الدولار

"عايز ايه؟؟"

شاور لها على الهدوم... وبيشاور بمعنى مفتاح

"هدومك؟"

شاور لها بالايجاب...ونطق بصعوبة واضح انه جاهد علشان يقدر يقولها

"مفتاح المحل"

جابت مفاتيحه من جيب بنطلون ف الدولار...وقعدت جنبه

"انت تعبتي؟"

شاور لها بالايجاب

"اجييلك ورقة وقلم وتحاول تكتبلى بالشمال؟"

شاور لها بالايجاب

دخلت ميار "ماما انا غسلت المواعين وخلصت المطبخ"

"هاتى ورقة وقلم ياميار بسرعة"

راحت ميار ورجعت... بورقة وقلم
وكتب عبد الحميد بخط متعرج
"افتحى المحل وجيى كل الفلوس اللى فى الدرج"

طه ف المحل بيرتب بضاعة ... نرجس ع المكتب
"عامل ايه مع مراتك... زهقت منها ولا لسه"
استغرب طه وبص لها
"ازهق منها ليه؟"
"زى ما اى حد ييشبط ف حاجة جديدة"
ساب طه اللى ف ايده... وراح قعد قصاها
"عالية مراتى اللى بحبها واتحوزتها عن اقتناع... مش لعبة هلعب بيها وازهق منها... انا عايش سعيد
جدا مع عالية... مش عايز انى مبسوط؟"
"وهما الاسبوعين يخليك تحكم انك سعيد؟"
"ع الاقل لحد دلوقتى مشفتش منها اللى يضايقنى او يخلينى احس انى اخترت غلط"
"بكرة تشوف"
"هنشوف السعادة دايما ان شاء الله"
"يارب"
ورن موبايل نرجس... قام طه يكمل ترتيب البضاعة
"الو... ايسيسيه... بجد مش معقول"
"ايه ياماما اللى حصل"
"اختك فححت... مبروك يا حبيبى الف مبروك... ومها عملت ايه؟؟ مبروك ليكم ... اه طبعا الهدية
الى انتى عايزاها... فكرى لحد ما ارجع... خدى اخوكى عايز يباركلك"
اخذ طه السماعة وبفرحة

"ميروك يا نونا... الف ميروك يا حبيبتي... ليكي هدية كبيرة طبعاً... اجيب انا على ذوقى... ماشى
يا ستي وهجيبلك الهدية بكرة... يالا سلام"

"ميروك ياماما... عقبال البكالوريوس"
"يارب... عقبال ما افرح بعوضك"
"اه... ربنا يخليكى... خليكى ف الدعوة الحلوة دى وبلاش الكلام الوحش بتاع من شوية ده"
"هتيجى بكرة؟"
"ان شاء الله"
"هتجيبها معاك؟؟"

"الى يريحك؟؟ لو هيحصل مشاكل خلى كل واحد ف حاله احسن"
ردت وهى بتدور وشها بعيد
"هاقما وتعالوا... نحتفل بنجاح اختك"

عالية بتلبس الطرحة... جه طه وقف لها
"لسه يا عالية"
"خلاص اهو"
"ايه القمر والشياكة دى"
بصت عالية لنفسها ف المراية
"يجد؟؟ شكلى حلو يجد؟"
قرب منها ووقف وراها وهما بيصبوا لبعض ف المراية
"قمر طبعاً... انتى مش شايفة ولا ايه"
"اقولك سر"
"قولى"
"انا ساعات بقول لنفسى البنات كتير واحلى منى الف مرة... اشمعنى انا حبتنى كده"
"واشمعنى انا حبتنى كده"
"معرفش"

"ولا انا اعرف... الحب مالوش اى مقاييس... هو بيحصل كده... ربنا عايزنا نحب بعض فحبينا

بعض...من غير امتى وليه وفين وازاى"

"جوزى حبيى فيلسوف"

"مش فيلسوف... بس بيحب"

لفها ناحيته

"وبعدين...لو فضلنا كده مش هنروح لماما...ياللا هنتأخر"

"هنجيب ايه لنرمين"

"هجيلها سلسله دهب...ايه رأيك"

"فكرة حلوة اوى"

طه بيضرب الجرس...وعالية ماسكة ف ايده وهى خايفة من لقائها بـرجس..زمن غير ما تبين خوفها

لطه

نرمين فتحت الباب...اخذت طه بالحضن

"حبيى وحشتنى اوى"

"وانتى يا حبيبتى...الف مبروك"

سلمت عليها عالية... وقربت منها تبوسها

نرمين شايقة ان طه بيشوف رد فعلها

سلمت على عالية وباستها وهى مبتسمة ابتسامة صغيرة

"مبروك يا نرمين"

"الله يبارك فيكى...ادخلوا"

مال طه على نرمين

"مين جوه؟"

"دى مامة مها...جاية تحتفل معانا"

بعد العشا...قامت عالية هى اللى تشيل الاطباق وتغسل المواعين

دخلت لها نرجس

"بتعملي ايه"

"مفيش دى حاجة بسيطة علشان متتعيش"

"طب تعالى كفاية كده... انتى عايزة تبينى قدام طه اننا بنشغلك"

"لا ابدأ... انا بعمل كده بحب والله... قربت اخلى خلاص اهو"

"بت انتى... انتى طيبة ولا بتستعيطى ولا ايه"

"والله العظيم انا بحبك... بس مش عارفة انتم ليه مش بتحبونى"

"بايدك انتى... هنجبك او مش هنجبك بايدك انتى"

سمعوا صوت اغاني وتصفيق...

"سيى اللى ف ايدك وتعالى علشان نقطع التورته"

"حاضر... ثوانى وهاجى وراكى"

خرجت نرجس من المطبخ... وبعد ١٠ دقائق

خرجت عالية من المطبخ... شافت مها بترقص

بمنتهى الجرأة والدلع والاهتمام ب طه

(١٣)

عالية شافت طه محرج...والكل حواليه بيصقف عادى
حست بالغيرة...وقفت مكانها مش عارفة تتصرف

ردود افعال كثير بتيجى ف دماغها
خافت تبين ضيقها لانها متأكدة ان نرجس هتكون ضدها

بهدوء راحت قعدت على كنبه...وقاومت ضيقها وارتابكها بابتسامة صغيرة لطفه...الى قام وقعد
جنبها لما رجعت من المطبخ

مها كانت بتراقب تصرفات طه وعالية
لما قام قعد جنب عالية...بطلت رقص وقفلت الاغنية
"كفاية انا تعبت...وبعدين عالية شكلها اتضايقت"
بصوا كلهم لعالية مستنيين ردها
ابتسمت عالية بهدوء
"ابدا...هتضايق ليه"

مها"علشان برقص...لو عايزة تقومى ترقصى قومى"
عالية"لأ انا مبعرفش ارقص...انا بتفرج بس...كملى خلينا نتفرج"
طه اتضايق من جرأة مها...ومها اتغاظت من رد عالية
نرمين مش اخدة بالها من حرب الكلام
نرجس حست بالتوتر اللي بين عالية ومها..وعلامات الضيق اللي بدأت تظهر على طه...ولانها
خافت على زعل طه...قاطعتهم كلهم
"هقطع التورته...كفاية اغالى...صدعت"
قامت لها عالية ووقفت جنبها
"خلينى اساعدك"

طه داخل الاوضة...وعالية بتعلق هدومهم
طه قعد على طرف السرير وهو يبص لعالية بحب وهى بتحط الهدوم ف الدولاب
بعد ما خلصت قعدت جنبه ع السرير...سألته وهى مبتسمة
"ايه مالك؟؟ بتبص لى كده ليه"
"خايف تكونى زعلانة"
"من ايه"
"من كلام مها البايع"
"اللى كنت خايفة منه مامتك...والحمدلله محصلش منها اى حاجة تضايقنى...بالعكس كانت طيبة
معايا"
"ماما طيبة والله"
"طبعا... كفاية اها ام حبيبى"
"اى حد يزعلك قوليلى...ماشى"
حضنها وهو بيطمئنها..حست بالامان اللى عمرها ما حسته غير وهى معاه
"طول ما انت معايا...يبقى مش ممكن ازعل ابدا...ربنا يخليك ليا"

مها ونرمين بيصوا لنفسهم ف المراية
مها"لالا مش حلو الفاتح..فين الروح النبى اللى اشتريناه الاسبوع اللى فات"
نرمين"عندك ف اللعبة"
مسكت مها مندبل ومسحت الروح اللى كانت حاطاه ودورت على الروح التانى...حطت منه
وبصت لنفسها
"اه...كده احلى"
نرمين"هنتأخر يا مها يالا بقى"
مها"ياختى مستعجلة على ايه هو احنا ورانا معاد"
"بقالنا ساعتين بنلبس ونقلع ونغير ف شكلنا...احنا رايعين كلية مش رايعين فرح"
"الانطباعات الاولى تدوم"
"يعنى ايه"

"يعنى نروح كده متأتكنين على سنجة ١٠ علشان من اول يوم نلقت النظر لينا... ماهو احنا لو
مخرجناش من الكلية دى كل واحدة فينا بجوازة حلوة يبقى يا خسارة تعبنا وكنا اخدناها من قاصرها
وقعدنا ف البيت بدرى بدرى"
"ايه يامها...معقول كان ممكن تقعدى ف البيت"
"اه ياخيتى...لو كان اخوكى اتجوزنى ودلعنى زى ما بيدلع مراته كده كنت سبت الكلية وقعدت ف
البيت أدلعه وبس"
"بس اخويا مبيدلش مراته...انتى عرفتى منين"
مها وهى بتضحك
"انتى مبتشوفيش ولا ايه...البت المصدية اللى جاها م الملجأ بقت بتلبس واحلوت ووشها بتتط منه
السعادة يبقى كل ده ومش مدلعا...اسكتى اسكتى هتفضللى خايفة"
"انتى بتعرفى كل ده منين"
"م الدنيا ياخيتى"
"يكونش عندك ١٠٠ سنة وانا معرفش"
وقفت مها وقفة حكيمة وحطت ايدها على كتف نزمين
"نزمين يا بنتى... انا كنت بقعد مع امى وجيرانها واسمع حكاياتهم وهزارهم وحتى كلامهم عن
نومهم مع اجوازهم من وانا صغيرة.. كانوا فاكرينى عيلة صغيرة مش فاهمة حاجة..بس على مين انا
كنت بسجل كل اللى بسمعه ف دماغى علشان استفيد"
"واستفدتى"
واتنهدت مها وهى بتبص لنفسها ف المراية
"هستفيد... مسيرى استفيد"

طه ف المحل... واقف مع زباين
موبايله رن... شاور لئرجس تكمل معاهم لحد ما يرد

رد على عالية
"الو.. ايه مالك؟؟ لا استنى متترليش انا جاي لك... مسافة السكة...مع السلامة"
قفط طه... ونرجس بتبص له عايزة تسأله

استنى لما الزباين دفعوا ومشوا
"ايه يا طه؟؟ فى ايه"
"هدير صاحبة عالية بتولد واتصلوا بيها وعازرة تروح"
"وانت هتروح ليه؟؟"
"اوصلها وابقى ارجعلك"
"روح وصل النونو...الى هتتخطف لو مشيت لوحدها"
ضحك طه
"نفسى اعرف انتى لسه مش طايقاها ليه"
"انا مش طايقاها؟؟... مش كنتم عندى الاسبوع اللى فات وكنت شايلاكم ف عنيا"
"ما انا مستغرب"
"خلاص يا طه...روح انت هتفتح لى محضر...متأخرش بس"

عالية مع طه ف العربية...واقفين قدام المستشفى
"اجيلك امي؟؟"
"طه...ينفع اروح ابات معاها...علشان خاطرى متقولش لأ"
"تباتى ازاي يا عالية... وانا هتسييني لوحدي؟؟"
"انا مقدرش ابعد عنك يا حبيبي والله بس هدير معهاش حد غير ربنا... ولازم اكون معاها ع الاقل
اول يوم بس تشد حيلها وبعد كده هبقى اروح لها زيارات"
سكت طه...متضايق
"علشان خاطرى يا طه...متقولش لأ... انا كمان لو احتجتها هي مش هتسييني"
"ماشى يا عالية... بس هتنامى فين وجوزها هيبقى فين؟"
"متقلقش...لو لقيت مفيش مكان او ينفع اروح هتصل بيبك وابقى اجيلها بكرة...اتفقنا"
"ماشى...بس اول واخر مرة تباتى بره البيت"
"حاضر يا حبيبي...ياللا سلام"
"انا هروح مع ماما ابات هناك...بس اى وقت ممكن اجى اخذك لو كلمتيني"
"خلاص اتفقنا...سلام"

طه داخل البيت مع مامته...وزى ما توقع لقي مها قاعدة مع نرمين
اول ما نرمين شافته...جريت عليه
"طه راجع مع ماما بالليل زى زمان"
طه "ازيك يانرمين..ازيك يامها"
مها "الحمد لله انت عامل ايه"
نرجس وهى داخلة
"حضروا العشا يابنات...هدومك ف الدولاب ياطه...غير وتعالى اتعشا"
بصت مها ونرمين لبعض مستغربين
نرمين "طه هيبات ليه؟"
مها "اكيد متخانق مع مراته"
طه وهو ماشى ورا مامته رايح على اوضته
"لا مش متخانقين ولا حاجة...هما العيال دى حشريين ليه ياماما"
نرجس "سيبك منهم هما كده على طول"

مها ونرمين ف الاوضة...
نرمين "مها متنسش تعملى موبايلك فيبريشن علشان لما احمد يكلمك طه ميسمعش رنة الموبايل
بالليل"
مها "متخافيش متفوتنيش حاجة زى دى"
نرمين "هااا مقالكيش هيخطبك امتى"
مها "لما يخلص طبعاً... على فكرة محمود صاحبه عايز رقمك وانا قلت اسألك الاول"
نرمين "لالا خلاص توبة... انا كنت هموت المرة اللي فاتت"
مها "هتفضلى جبانة كده...انتى حرة"
نرمين "ايوه جبانة... احسن ما يحصلى مصيبة وارجع اقول ياريتنى"
مها "ما انا قدامك اهو... عارفة ان محدش يقدر ياخذ منى حاجة غصب عنى"
نرمين "يا ستى انا غيرك... انتى بتعرفى تلحقى نفسك انا لأ"

[illegible]

طه مع نرجس بيخطر ... ويبتكلم ف الموبايل
 "حمدالله على سلامتها... بخطر اهو ونازل... لا هجيلك اخذك مترجعيش لوحذك... بعد
 الشغل...نبقى نتغدا ونروح"

نرجس قاعدة قدامه تبص له وتسمعه... لما شافها .. كمل
"ولا اقولك... هتغدى مع ماما ف المحل وابقى اخذك بالليل"
شاف ابتسامة نرجس ... فهم انها فرحت... وكمل مع عالية
"يالا هبقى اكلمك تانى... مع السلامة"
بعد ما قفل مع عالية
"انا قلت اقعد معاك انت يا جميل النهاردة"
"يخليك ليا يا حبيبى... صاحبته ولدت؟"
"اه"
"عقابلكم"
"ان شاء الله"
"لسه مفيش حاجة؟"
"ربنا يكرم"
"انتوا بقالكم ٦ شهور يا طه... انتوا مطمئنين كده ليه"
"نعمل ايه يعنى ياماما... دى حاجة بتاعة ربنا"
"ايوه مقلناش حاجة... بس برضه ٦ شهور كتير"
"مش كتير ولا حاجة"
"ماهى صاحبة مراتك اهى خلقت على طول"
"نصيب ياماما"
"مش انت ومراتك طبيعين يعنى ف حياتكم"
اتخرج طه من تلميحها... قام
"الحمد لله... هبقى اجيب غدا وانا جاى م الشغل"
قامت وراه
"استنى... مجاوبتنيش ليه؟؟ هو فيه حاجة؟"
"حاجة ايه بس... مفيش حاجة"
"او مال ليه محبتش لحد دلوقتى"
"معرفش"
"يبقى لازم توديهها تكشف"
"ماما... لسه بدرى ع الكلام ده"

"مبدريش ولا حاجة... انا كل ما اسألها ولا اسألك تقولى لسه... نروح نشوف لسه ليه"

"ان شاءالله"

"محجز انا عند دكتور كويس ونوديتها"

"ان شاءالله"

طه مستنى عالية تحت بيت هدير

نزلت... ركبت جنبه

"ازيك يا طه"

"وحشتيني"

"وانت كمان وحشتنى اوى"

"بصى بقى... مفيش بيات بره تانى ابد"

عالية وهى فرحانة بحب طه ليها

"حاضر يا حبيبي"

"اكلتى ونمى كويس"

"الحمدلله... بس البيت وحشتنى اوى"

"نتمشى شوية بالعربية تغيرى جو... ونتعشا ونروح"

عالية مش لاقية كلام تقوله لظه... الى بيعبر عن حبه ليها بالكلام والافعال... نظراتها ليه بتنطق

بالحب والشكر

رن موبايل طه وهما ف العربية... بص ف الموبايل... استغرب

"دى ماما... ياترى خير؟ ما انا لسه سايبها"

"طب رد بسرعة شوف مالها"

طه بيرد "الو... مالك يا ماما... انتى لحقتى؟؟... طيب طيب... خلاص هقولها انا... ماشى... مع

السلامة"

عالية بتبص له بقلق

"خير؟"

"ماما حجزت لك عند الدكتور"

عالية بتساؤل

"دكتور ايه"

طه وهو محرج من موقفه وتدخل مامته...بيتحاشى انه يبص لها

"اصل سألتنى اتأخرنا ليه ف الخلفة... وقالت انها قلقانة وحجرت لك عند دكتور كويس"

عالية سككت...مستغربة المفاجئة... اول مرة يقولها طه انهم اتأخروا... ويفاجئوها بمعاد الدكتور

مع كل الافكار اللى ف دماغها...كانت ساكتة

عالية...وطه...ونرجس...قاعدين قدام الدكتور

ماسك اشعات وتحاليل يبص فيها

نرجس"خير يا دكتور؟؟ ليه خلتها تعمل كل الاشعات والتحاليل دى"

الدكتور بيحط الحاجة اللى ف ايده ع المكتب...وبيكلمهم

"نفس اللى استنتجته الزيارة اللى فاتت...المدام عندها مشاكل كتير وهتحتاج علاج طويل... ويبقى

الامل ضعيف"

عالية بدأت دموع صامته تنزل من عينيها...وطه المفاجأة ألجمت لسانه

سألته نرجس

"يعنى ايه ممكن تخلف ولا مفيش امل خالص؟؟"

الدكتور"والله يا مدام دى حاجة بتاعة ربنا... هى حاليا مستحيل تخلف طبعاً...انما فيه امل ضعيف

ف العلاج على المدى الطويل"

(١٤)

نزلوا من عند الدكتور ومحدث بيتكلم مع حد
كل واحد اكتفى بحزنه جواه وساكت
عالية دموعها كانت اقوى منها...بتعيط بصمت

راحوا على العربية...فتح لهم طه
ركبت نرجس جنبه...وعالية ورا
وهما ماشيين... طه يبص قدامه وغصب عنه نزلت دموعه
شافت نرجس دموعه
"استهدى بالله يا طه... متزعش نفسك بس"
مسح طه دموعه بسرعة
"مفيش حاجة ياماما... امر ربنا وانا راضى بقضاؤه"
"يا عيني عليك يا بى... كل ما تفرح فرحتك مش كاملة... لا فرحت ف جواز ولا خلفه"
"مين قال بس انى مفرحتش... انا الحمد لله مبسوط مع عالية... صح يا عالية"
بص لها ف المراية... شاف دموعها اللى مبتوقفش
ردت نرجس
"هى اكيد مبسوطه معاك لانها مكنتش تحلم بربع الاملة اللى هى فيها... المهم انت ازاي مبسوط
معاها كده"
عالية دموعها مبتقتش صامته... زاد عياطها وبقي بحرقه
رد طه "مبسوط معاها علشان بحبها... وراضى بكل ظروفها"
وفرمل قبل ما يخبط ف عريية قدامه... وكمل بعصبية
"مامااا... ممكن متجيبيليش سيرة كلام الدكتور ده تانى... هنبقى نروح لدكتور واتنين وتلاتة
ونشوف... مش يمكن ده حمار وميفهمش حاجة"
ردت نرجس "ده دكتور كبير وشاطر"
طه "مفيش حد مبيغلطش... هيطلع غلطان ان شاء الله... انتهينا بقى"

سكنت نرجس بحيرة... وكلام طه أحيا الامل ف قلب عالية
بدأت تمدا ودموعها تقل

وصل طه قدام بيت نرجس...نزلت...رزعت الباب وراها من غير ما تكلم حد فيهم
التفت طه بابتسامة حزينة لعالية
"تعالى اقعدى جنبى"

طه وعالية اول ما وصلوا البيت...دخلوا اوضتهم يغيروا هدومهم
واتكلمت عالية بعد تفكير طول الطريق
"طه... مامتك معاها حق ف اللى قالتة"
بص لها طه
"مش فاهم؟"

قعدت على طرف السرير وهى بتتجنب انما تبص له
"انا مكنتش احلم بربع حياتى معاك...انما انت هتبقى مبسوط بايه؟؟ هى مغلطتش هى قالت الحقيقة"
"والحب اللى مجبها لك ده ايه؟؟ انا محدش ضربنى على ايدى علشان اتجوزك"
"ودلوقتى؟؟ انا عارفة قد ايه انت بتحب الاطفال ونفسك فيهم...وانا.."
قاطعها طه

"انتى ايه... الدكتور قال فيه علاج وبعدين انا قلت مش واثق ف كلامه...لما بقى نروح لدكتور
واتنين...لو قالوا نفس الكلام بقى نشوف"
"لو قالوا نفس الكلام ببقى حقا..."
وعيطت ومقدرتش تتكلم...قرب منه طه وحضنها
"لو قالوا نفس الكلام ببقى نبدأ العلاج ونتوكل على الله وهو اللى بيرزق... انا مجبك ومش هسيبك"
ابدا مهما حصل

نرمين ومها فى كافيتريا الجامعة...قاعدين وسط شلة كبيرة
هما الاتنين قاعدين جنب بعض...نرمين عينيها بتدور على حد

مالت عليها مها
"مش معانا خالص انتي"
"السنة هتخلص ولحد دلوقتي ولا كلمني ولا كلمته"
"ماهو انتي مش عايزة تبدأي معاه واللى زى ده ميحيش بطريقتك القديمة دى بتاعة تقعدى تستنى هو
اللى يكلمك"
واترسمت ابتسامة واسعة على شفائيف نرمين
"اهو... طارق جه هناك اهو"
وكملت بزعل
"ورايح على الشلة بتاعته"
مها بتضحك
"بتغيري؟"
"مش شايفة البنات اللي حواليه قد ايه"
"بت يا نرمين... انا هقوم لك بالمهمة دى"
"هتعملى ايه؟؟"
"هوصل له كلام... من حد لحد انك بتحببيه من اول السنة وساكته"
"لا اتكسف"
"انا هوصله الكلام بطريقة متخليكيش تظهرى ف الصورة خالص... بصى لو اهتم ييقى هيكلمك
والباقي عليكى انتى بقى... لو مهتمش خلاص ييقى مش ف دماغه"
"طيب... وانتي ايه الاخبار انا ممكن اصالحكم على بعض"
"لالالا خلاص زهقت... يخربيت الارتباط وقرفه انا كده حلوة اوى مش عايزة ارتبط تانى... ع الاقل
دلوقتي"

نرجس ف المحل... طه بيتكلم ف الموبايل
"اجهزى يا عالية... جاي لك... مسافة السكة وهكون عندك... هرن عليكى تتزلى على طول... مع
السلامة"
طه لنرجس "انا ماشى ومش هرجع على هنا اكيد هنتأخر... عايزة حاجة منى قبل ما امشى؟"
نرجس "وبعدين بقى"

"وبعدين ايه"
"هتفضل من دكتور للتاني كده"
"...الدكتور ده كويس وهنمشي على علاجه"
"وبعدين يعنى"
"والله انا تحت امر ربنا...اللى رايده هيكون"
"بص يا طه... انت اتجوزتها وانا سكتت ..انما تحرموني من حنة حفيد ينلا علينا الدنيا يبقى لأ"
"مش بايدينا"
"مش بايدها هي...انما انت تفضل قاعد جنبها ليه"
"علشان مش ذنبها"
"مقتلكش ذنبها...انما حرام عليك عليك تحرم نفسك وتحرميني من انك تخلف"
طه وهو خارج من المحل
"مش هسيبها ياماما.. سلامو عليكمو"

فاتن ف البيت...داخلة بصينية اكل لعبد الحميد
حطت الاكل على ترايزة صغيرة...وساعدت عبد الحميد يتعدل
عبد الحميد بيتكلم احسن
"هي ميار فين؟"
"لسه مرجعتش م المدرسة"
"مش كنا نستناها"
"انا قلت اغديك الاول علشان تاخذ الدوا"
"انا تعبتك معايا الشهور اللى فاتت دى"
"ربنا يشفيك ويخليك لينا..متقولش كده"
"بقولك ايه... انا بقول ناجر المحل علشان يساعدنا شوية"
"اول مرة تاخذ رأيي ف حاجة تخصك"
رد عليها وهو مكسوف
"انا كنت غلطان... حاجات كثير كنت فاهمها غلط بس انتي معدنك اصيل يافاتن ..انا محقوقلك"
"متتعيش نفسك بالكلام الكثير ويالا علشان تنغدا... وحلوة فكرة تأجير المحل"

"تقدرى تتلى بالليل تروحي للسمسار وتكلميه"
"لا النهاردة دكتور ايمن جاى علشان عندك جلسة...خليها بكرة"
"مش عارف قلقان من الدكتور ده ليه"
"ليه؟؟"
"حاسس انه صغير ومعدوش خبرة"
"صغير بس شاطر...مش الدكتور هاشم هو اللى رشحه ليك وقال كويس...وبعدين انت اتحسنت
فعلا معاه... بطل وسوسة بس ويالا الاكل هيرد"

صوت جرس الباب... صوت هدير
"عaaaaaaaaاالية... افتحى الباب"
تجرى بنت صغيرة (٥ سنين) تفتح الباب
"خالتيو عالية يا مامااا"
عالية الكبيرة تحضن عالية الصغيرة
تيجى هدير من جوه...وهى ماشية بالعافية من الحمل
عالية بتدى لعالية الصغيرة كيس حاجات حلوة
"خدى يا لولو... فين هنا؟؟"
هدير وهى بتسلم على عالية
"نامت...نوم الظالم عبادة"
عالية"متقوليش كده دى عسل"
هدير"عسل اسود مهبب دى جنتنى...مبتسكتش ابدا...طول النهار بيضربوا ف بعض لما قرفونى"
عالية وهى بتقعد وحاضنة عالية الصغيرة
"ربنا يخليهو ملك يارب"
هدير بتقعد معاها
"يارب...عقبالك يا عالية"
عالية بانكسار "يارب"
هدير"طمينى عملتى ايه عند الدكتور"
"بيقول هنجرب حقن مجهرى..ويا آه يا لاء"

"جربى يا عالية وان شاءالله يبقى خير"

"ماهى التجارب دى مش ببلاش... ده عايز ٢٠ الف جنيه غير المتابعة"

"ياااااه كتير اوى"

"طه تعب مصاريف...بقالنا ٥ سنين فى علاج وعمليات وفلوس بتترمى فى الارض ومفيش فايدة"

"ربنا كبير ومش هيضيع تعبكم ايدا"

"يارب ياهدير... انا مليش عين اقوله نجرب...وانا عارفة انه معهوش فلوس...انا هسيب الموضوع

كله فى ايده وهو اللى يقرر... وربنا يكتب لنا الخير"

طه داخل المحل... وشكله مهموم

نرجس بلهفة

"ايه عملتوا ايه؟؟"

"الحمدلله...قال هيعملها حقن مجهرى... ب ٢٠ الف"

"ومضمون ده يعنى؟؟"

"مفيش حاجة مضمونة"

"يبقى كفاية الفلوس اللى اتصرفت طول السنين اللى فاتت"

"انا ما بصدق بتعلق بأمل"

"انت اللى معلق نفسك ع الفاضى...قتلتك ١٠٠ مرة طلقها واتجوز"

"وانا قتلتك ١٠٠ مرة برضه مقدرش اسببها"

"هتفضل طول عمرك كده فى متاهات الدكاترة والعمليات"

"نصينا كده"

"ايه الاستسلام اللى انت فيه ده...انت بقيت ولا اللى عنده ١٠٠ سنة من الهم اللى انت

شايه...يابنى حرام عليك نفسك"

"هتقدرى تسلفين؟؟"

نرجس وهى بتدور وشها

"كفاية اللى اخدته... اختك على وش جواز وهتحتاج ومش معقول كل اللى حيلتى يروح على

مراتك اللى مفيش منها رجا"

طه وهو ماشى

"خلاص ماشى...انا ماشى"
"انت زعلت؟"
"لا..هروح اشم شوية هوا...مخنوق"

طه واقف على الكورنيش... سرحان
بيفكر ... مين صح ومين غلط
هو صح لما كل شوية يتعلق بأمل
مامته صح لما بتقوله يطلق عالية

كل الفلوس اللي صرفها دى اترمت صحيح زى مانرجس قالت
هيجيب مين ال ٢٠ الف جنيه للعملية

رن الموبايل...شاف انها عالية
"ايوه يا عالية... لا مش ف المحل...ف الشارع... مبعملش حاجة... قبل ما اجيلك هتصل
بيكى...مفيش حاجة انا كويس...مع السلامة"

عالية وطه ف اوضتهم
"اطفى النور يا عالية لو مش هتنامي"
"انت هتنام من غير ما تتعشا"
"شبعان مش قادر"
"مالك ياطه...انت بتكلمني كده ليه النهاردة"
طه وهو منفعل
"بكلمك ازاي؟؟ انا عملت لك حاجة"
"انا عارفة انك شايل هم فلوس العملية...مش مهم"
"انا مشتكيتش يا عالية"

"مش لازم تشتكى انا حاسة بيك...لو كان معايا فلوس مكنتش هأخرها عنك... حتى اللي باقى من الشبكة ميحييش حاجة"

وزعق طه

"عايزة تفكرينى انى بيعت لك شبكتك... انا كمان مبقاش حيلتى حاجة يا عالية... انا مش مستخسر فيكى انا مش لاقى بجد"

وعيطت عالية

"مقصدش...والله ما قصدى"

"ومش كل شوية تعيطى لى... انا هفضل لحد امتى كده...اراضيكى من ناحية واشد مع ماما من ناحية تانية...هو محدش حاسس بيا ليه"

عالية وهى بتعيط اكر

"انا عارفة انك استحملت معايا كتير... وخلاص يا طه انا مش طالبة منك حاجة... بس متزعلىش... انا حاسة بيك والله... انت مش ذنبك...اعمل اللى يرضيك...عايز تطلقنى طلقنى...عايز تتجوز

اتجوز... انا عارفة انى مش من حقى افرح ابدا...الدنيا مستخسرة فى الفرحة"

خرجت عالية من اوضتها وهى منهارة...دخلت اوضة الاطفال وقفلتها عليها...وقعدت تعيط

نرمين فى اوضتها...قاعدة ع الكمبيوتر وحاطة السماعات فى ودائها وفاتحة الكاميرا

"هفضل لحد امتى كده يا طارق... قتلنى لما تتخرج واتخرجت بقالك ٣ سنين... قلت لى لما اشتغل ولما اشتغلت مبقتش تستقر ف شغل... قلت لى لما تستقر ف شغل... واستقرت بقالك سنة

...هتيجى تخطبنى امتى"

"اجى اقول لاهلك ايه... لا عندى شغل ثابت ولا شقة ولا حيلتى فلوس اجهز"

"تعالى اخطبنى الاول وكل ده بيعى على مهله"

"انتى اللى هامك خطوبة وخلاص"

"ماهو انا مش ضمناك... كل شوية الاقى واحدة عمالة تتمرقع معاك فى كومنتات الفيس واخلص من واحدة يطلعلى غيرها"

"قلتلك قبل كده اصحاب عادى...انتى المفروض يكون عندك ثقة فىا"

"طمنى...تعالى اخطبنى علشان اطمن انى مش زيههم"

"انتى عارفة انى بحبك انتى..ومن ايام الكلية وانا ليا اصحاب بنات كتير وانى غيرهم"

"قلقانة برضه"

"انتي مكتتيش كده انتي من ساعة ما خلصتي وانتي فضيتي لي بقي"
"هو ليه محدش حاسس بيا ابدأ...ماما ف شغلها واخويا ف همومه وانت ف شغلك...حتى مها من
ساعة ما اتخطبت ومبقتش قاعدة معايا زى الاول...هو محدش بيحبني ليه؟"
"هو الحب انك تفضلتي تكلميني كل شوية..وان مامتك تسبب شغلها وتقعّد جنبك؟"
"لا...افضل انا لوحدي على طول...بص بقي يا طارق... ياتيحي تخطيني يا اخر كلام بيني وبينك
...كفاية اوى ال ٥ سنين اللي فاتوا...سلااااااام"
قفلت نرمين مع طارق.... واتصلت بمها وهي بتعيط
"الو... انا اتخانقت مع طارق... قلت له يا يخطيني يا مفيش كلام تاني بيني وبينه... ايه؟؟؟ معقول؟؟
طيب...طيب.. هستناكي بكرة...مع السلامة"

(١٥)

طه بيقوم قبل ما المنبه يرن
يفتح باب اوضته...يشوف عالية ف المطبخ
يدخل الحمام وبعد ما يخرج يروح يلبس
وهو مستعد للتزول يشوف الفطار ع السفرة زى كل يوم

تقوله عالية بانكسار
"الفطار يا طه"
يروح يقعد ع السفرة... تقعد معاه
"مش هتاكلى؟"
تمسك العيش وتبدأ تاكل ببطء واضح انها علشان تراضيه
يبدأ هو كمان يفطر... ببطء ومن غير نفس

يسيب الاكل ودموعه ف عينيه
"انا مقصدتش ازعلك... انا حاسس بالعجز انى مش عارف اتصرف"
اندفعت الدموع من عينين عالية
"بس الحقيقة انى انا اللي عاجزة عن انى اكون ام وبسببى انت محروم تكون اب"
"مفيش انتى وانا... احنا الاتنين واحد يا عالية... مش معقول بعد العشرة دى ومنفهمش بعض
ويبقى بين حساسية ف الكلام البسيط ده"
"انا امبارح مقصدتش انك بيعتنى الشبكة زى ما فهمت.... بالعكس انا عارفة انك اتكلفت كتير
اوى ومش هطلب منك حاجة تانى... انا خلاص راضية بقضاء ربنا ومش عايزة اروح لدكاترة"
"ان شاءالله كل حاجة هتتحل وهتصرف ف الفلوس"
"هتتصرف منين"
"مفيش غير انى اشوف اجراءات القرض ايه واعمل قرض يكفى العملية ومتابعته"
"لا يا طه... القرض حرام وانا مش عايزة اخلف بفلوس حرام"
"طب والعمل"

"مش عارفة...يجد مش عارفة... بس بلاش القرض"
طه بعد ما قام من ع السفارة
"ربنا يفرجها يا عالية...محاول افكر ف اى حل تانى"
قامت عالية وراه
"مش هتفطر طيب"
"مليش نفس خالص"
قربها منه وحضنها
"متزعليش منى بقى"
ردت وهى ف حضنه
"انا مقدرش ازعل منك ابد... انت كمان متزعلش منى... انا حاسة انك من ساعة ما تجوزتنى وانا
منكدة عليك"
مسك كتفها وبعدها عنه علشان تبقى قدام عينيه...وابتسم لها
"اهو انتى كده بتنكدى عليا بكلامك ده"
ابتسمت ابتسامة كلها ألم وطبطبت على صدره
"خلاص...مش هنكد تانى"
راح ناحية الباب... وقبل ما يفتح
"ادعى ربنا يفرجها ويرزقنا بالفلوس والذرية الصالحة"
"مش محتاجة توصية... انا طول الليل والنهار مبطلش دُعا"

نرمين ومها ف المطبخ...بيعملوا نسكافيه
مها"هو ايه الحظ اللي احنا فيه ده"
نرمين"انا مش مستوعبة اللي بتقوليه والله"
مها"اهو ده اللي حصل...خناقة كانت كبيرة وقالى مش عايزك قمت طلعت له القديم والجديد خليته
يتزل مش شايف قدامه"
"ومش زعلانة عليه"

"ازعل على ايه بس... ده انا كل ما اقوله خرجنى يقولى مش فاضى... اقوله زهقت وعازية لتفسح
ياخدنى يقعدنى ع الكورنيش ونشرب حاجة ساقعة ونروح... ايه اللي سكتنى عليه سنة مش عارفة...
ده نتن يابنتى"

"بس هو م الاول قال انه بيجهاز كل حاجة لوحده وانتي كنتى بتحكى لى ان فلوسه بيحطها ف
الشقة"

"يافرحتى... يحطها ف الشقة واولع انا من غيظى... فاكرة ايام الكلية لما كنا بنتفسح ونروح ونيجى
براحتنا... من ساعة ما اتخطبت وهو رايحة فين وليه وعلشان ايه لما خنقنى... اسكتى يا شيخه انا عازية
اشم نفسى"

سألتها نرmin بفرحة

"يعنى هترجعى تقعدى معايا زى الاول"

"اه طبعا... هو احنا لينا الا بعض"

خرجوا من المطبخ وكل واحدة ماسكة المج بتاعها

دخلوا اوضة نرmin... بصت نرmin ع الكمبيوتر

"مبعتش حاجة ولاظهر النهاردة"

"ابعتيله انتى"

قعدت نرmin جنبها

"يمكن يحس بغياي ويتأثر... انا زهقت يا مها كل السنين دى على امل وكل ما اقول خلاص هانت

الاقيه يتحجج لى بحجة جديدة... مرة اما يتخرج ومرة لما يشتغل"

"خلاص كبرى دماغك منه"

"بحبه يا مها... بحبه ومقدرش استغنى عنه ابدًا"

"وبعدين"

"مش عارفة... هستنى يمكن يكلمنى ولا يبقى اون لايين... لو مظهرش هتصل بيه واصالحه واحاول

معاه تانى"

طه داخل المحل... بيحط فلوس قدام نرجس

"دى كل الفلوس اللي لميتها م التجار... فيه ناس اجلوا جزء وفيه دفعوا"

نرجس بتاخذ الفلوس... وورقة مكتوب فيها اسماء التجار

"وهتروح تجيب بضاعة جديدة امتي"

"تخدت اجازة الاربع والخميس...هروح الخميس علشان ابقى اجازة بعدها"

سكت طه وراح قعد على كرسى بعيد عنها...مسك الريموت وفضل يقلب ف التلفزيون

نرجس بتبص له نظرات مختلصة...صعب عليها

"مالك؟"

"مفيش"

"نتعمل ايه ف حكاية العملية؟"

"لسه مش عارف...بس هنعملها ان شاءالله"

"اتصرفت ف فلوس يعنى"

"لا هتصرف منين"

سكتت لحظات

"امرى لله... هديلك الفلوس"

قام طه من مكانه مش مصدق انها اتحلت بالسهولة دى

"بجد يا ماما...بجد هتديلى الفلوس؟"

"اه...بس بشرط؟؟"

قلق طه من كلام نرجس

"شرط ايه؟"

"دى اخر محاولة يا طه... لو نفعت يبقى خير وبركة...لو منفعتش يبقى تطلقها وتشوف حالك

بقى"

"لا مش هطلقها"

"خلاص...وانا معنديش فلوس الا بالشرط ده... وتبقى هى كمان عارفة بيه علشان يبقى كل حاجة

على عينك ياتاجر"

"كفاية اللي هى فيه...مقدرش اجرحها اكر من كده"

"انت ايه يا بنى... خايف على شعورها ومش هامك نفسك...حرام عليك اللي بتعمله ف نفسك

وفيا...انت ليه قاصد توجع قلبى"

"انا؟؟"

"ايوه... نفسى اشوف ولادك ويجروا ويتنططوا حواليا كده زى بقية خلق الله"

"يعني انا منفسيش... ما انا كمان نفسى بس ربنا مبيتعاندش"
"هو ربنا مش حلل الطلاق والجواز علشان الظروف اللي زى دى... يبقى تحرمه على نفسك ليه"
"ياماما عالية مالهش حد غيرى... انتي ليه مش حاسة انها مالهش حد... مقدرش اخلى
بيها... مقدرش"
"بقولك ايه... انا قلت اللي عندى وروح واتكلم معاها وهاتولى رد... وعلى ايه استنى... انا هكلمها
واقولها"

فاتن قاعدة مع عبد الحميد... وجنبه عكاز سانده ع الكنبه
يبص ف الساعة
"هى ميار فين؟؟ نامت ولا ايه"
"بتذاكر"
"ما تنادى لها تقعد معانا شوية"
"حاضر"
قامت فاتن دخلت اوضة ميار

شافتها قاعدة ع الكمبيوتر
"ابوكى عايزك"
ميار باستياء
"دلوقتي"
"اه ياميار... ده مش هيطير"
بصت لها ميار برجاء
"حاضر... بس لو ملحققوش هينام"
"ابوكى اهم"
"حاضر"

خرجت فاتن من الاوضة... ووراها ميار
قعدت ميار جنب عبد الحميد

"كنت عايزنى يا بابا"
عبد الحميد "كنت عايزك تقعدى معانا شوية"
ميّار "اه... اصل كان عندى مذاكرة"
عبد الحميد "قومى ذاكرى متعطّيش نفسك"
فاتن وهى بتبص لها بتحذير
"المذاكرة مش هتطير"
ميّار "اه طبعاً"
فاتن "دلعتها اوى يا عبده"
ميّار "ايه ياماما.. يعنى الاول كان احسن"
عبد الحميد "قوليلها يا بنتى... لا كده عاجب ولا كده عاجب"
ميّار "انت خليك كده... بس الله يخليك لما اطلب حاجة متقوليش قولى لما ما"
عبد الحميد "معلش لازم اقولك كده علشان هى اللى ماسكة المصروف كله"
قامت فاتن "وانا بستخسر فيكى يا ميّار"
ميّار "اهى هتزعل بقى"
قامت ميّار وراها باستها
"بهرز ياماما... بهزر"
وبصت لباباها
"بابا عايز حاجة منى"
عبد الحميد وهو بيقوم ويبسند على عكازه
"لا هدخل انا... تصبّحوا على خير"
دخلت ميّار اوضتها تجرى .. وفاتن بتساعد عبد الحميد يدخل اوضته

طه داخل البيت بالليل... وهو شايل هم مواجهة عالية بعد الكلام والشرط اللى شرطته عليهم نرجس

اتفاجئ بعالية بتستقبله بحب وفرحة
"حمد الله ع السلامة يا طه"
طه افتكر ايام جوازهم الاولى من مظهر عالية ولبسها وابتسامتها

قبل المموم اللي ملات جياقم
"الله يسلمك...ايه الجمال ده"
"ربنا يخليك ليا...ياللا غير هدومك وتعالى نتعشا انت بقالك كام يوم مبتاكلش خالص"

عالية وطه قاعدين بيتعشوا...طه بيص لها ومستغربها
"عالية"
"نعم"
"انتى عاملة كل ده ليه"
سابت الاكل اللي ف ايدها... حاولت تدور على كلام تقوله...سبقها طه
"انا متوقع اجى الايكي زعانة"
"طه...مامتك معاها حق..انا طول اليوم بفكر فى اللي قالته بس هى فعلا معاها حق...دى اخر
فرصة لينا"
رغم ابتسامتها مقدرتش تمنع دمعته اللي نزلت غصب عنها
قام طه حضنها
"متقوليش كده... انا مقدرش استغنى عنك"
مسحت دموعها بسرعة...وقفت قدامه
"مامتك هتساعدنا المرة دى...لو ربنا رايد لى اخلف هيرزقنا...لو مش رايد يبقى انت لازم تسمع
كلامها...بس.."

"بس ايه؟؟ انتى ازاي متخيلة انى ممكن ابعد عنك"
"ماهو ده طلبى الوحيد منك...متطلقنيش"
قالتها وجريت دخلت اوضة الاطفال وقفلت عليها وهى بتعيط بحرقة
طه فضل واقف مكانه...بيصارع قلبه وعقله
قلبه اللي بيقول انه يتقبل ظروف عالية ف كل الاحوال
وعقله اللي بيقول انه يسمع كلام مامته
قعد مكانه يفكر...فى الرد اللي هيرد بيه على نرجس
موافقين على شرطها ولا لأ

میار واقفہ علی باب اوضہ نوم فاتن
بتشاور لها تقوم وهي بتتنطط
فاتن بتشاور لها عایزة ایه
میار تشاور لها تعالی

قامت فاتن وقفلت الباب وراها على عبد الحميد وهو نائم
 "ايه يا بنتي حرام عليكى ما صدقت ارتاح شوية"
 ميار وهى بتتنطط وتنبوس فاتن
 "لااااااااااااااا خير ميستناش ابدًا للصبح"
 فاتن بتقعد وتتدعك ف عينيها
 "خير"

"ایمن جای اجازة بعد الامتحانات"

"نعم يا ختی... مصحیانی علشان کده.. ماهو بقاله ۳ سنین بیتزل اجازة ف شهر ۶"

"الجديد بقى انه كلم اهله بيعجى يُخطبني الاجازة دى"

لحظات... كانت فاتن فيها ثابتة... لا فرحانة ولا زعلانة ولا اى رد فعل خالص

"ايسيسيه... مش فرحانة ليه"

ضحكت فاتن

"مش مصدقة ان الايام بتجرى بسرعة كده... مبروك يا حبيبتى الف مبروك"

حضنتها وهى فرحانة بيها

"علشان كده كنتى مش عايزة تقعدى مع ابو كى ومستعجلة"

"هو قالى هقولك مفاجأة لما ارجع من الشغل بالليل وكنت مستياه... ودى بقى المفاجئة"

"احلى مفاجئة يا حبيبتى ربنا يسعدك"

"تفتكرى بابا هيقول لأ ولا حاجة؟"

"انتى عارفة ابو كى بيعبه من ايام ما كان بيعجى يعمل جلسات العلاج الطبيعى... وبعدين ابو كى اهد

خالص ومبقاش بيعترض على حاجة ربنا يهديه"

نرمين ومها ف البيت... تتصل نرمين بطارق وفاتحة الاسبيكر علشان مها تسمع

"الو...ازيك يطارق"

"لسه فاكرة تسألني"

مها تشاور لنرمين على دموع تنزل من عينيها

نرمين تتصنع العياط وتسمع كلام حفظته من مها

"انا برضه اللي مسألتش...انت لو كنت بتحبني كنت اثبتلي الحب ده... وانت عارف اني عايزاك

وهقف جنبك"

"هتقفى جنبى هتعمليلي ايه يعنى"

"مش هطلب منك حاجة...بس لازم اللي بينا يبقى رسمى حتى بديلة وانا ممكن اسلفك لو مش

معاك"

"واهلك؟؟ ما انا خايف اجي يدبسوني"

نرمين بتبص لمها بفرحة...مها بتشاور لها تشجعها على الكلام

"لا محدش هيطلب منك حاجة زيادة... انا هتكلم معاهم واقولهم اننا بنحب بعض"

"طيب سيبيني افكر"

"هى لسه فيها تفكير يطارق...هو ده الحب...بقولك انا قابله بكل ظروفك"

"طيب مهدى لهم وفهميهم كل ظروفى وشوفى ردهم ايه وقوليلي"

نرجس فى المحل الصبح وطه مش موجود...بتتكلم فى التليفون

"ايوه كده يا عالية...عين العقل... ربنا يديكم... اتفقوا مع الدكتور وانا جاهزة بالفلوس...مع

السلامة"

١٦

عالية قاعدة وماسكة التليفون بتتكلم

"ايوه موافقين...شكرا ياماما ربنا يخليكى ... حاضر هقولك اكيد... مع السلامة"

قفلت معاها...رفعت ايديها للسما

"يارب انت عالم بحالى...يارب ارزقنا ولو بطفل واحد بس... مش طالبة اكتر من كده... يارب انا

مش معترضة على حكمك...انا خايفة على بيتي وجوزى يروحوا منى...يارب مليش غيرك"

اخذت نفس سيطرت بيه على اعصابها... حاولت ترسم ابتسامة علشان حزنها ميانش ف صوتها
واتصلت بظه

"الو... عامل ايه؟؟ مش هعطلك كتير... انا كلمت مامتك وقولتلها اننا موافقين وقالت نحجز مع
الدكتور وهى جاهزة... ان شاء الله خير... ماشى يا حبيبى متتأخرش... مع السلامة"

قعدت عالية مكانها تبص لبيتها حوالها... ولصورتها هى وطه اللى على الحيط... ابتسمت وهى
بتفتكر يوم فرحهم

قاطع تفكيرها صوت جرس الباب... قامت تشوف مين؟

عالية بتفتح الباب... ابتسمت بفرحة وترحيب

"ابلة فاتن... اهلا وسهلا"

سلمت عليها فاتن وهى داخلة

"ازيك يا عالية... عاملة ايه"

دخلت فاتن وقعدت هى وعالية

"الحمد لله... الله ع المفاجئة الحلوة"

"كنت بعمل كام مشوار كده وخلصتهم بدرى قلت اعدى عليكى اسأل عليكى"

"ده انتى نورتيينى والله... تشرى ايه"

عالية وفاتن قاعدين وقدامهم فناجين القهوة فاضية

"وده معقول يا عالية... توافقى على شرط زى ده بنفسك"

عالية وهى بتتصنع اللامبالاة

"الحوجة مُرة وخلاص هى معاها حق.. ده اخر امل لينا"

"يعنى ايه؟؟ هتتطلقوا"

ردت عالية بسرعة

"لا... لوعايز يتجوز يتجوز بس ميطلقنيش"

وعيطت عالية

"انا مقدرش اتخيل حياتي من غير طه"

نرجس داخله البيت... اول ما مها ونرمين يسمعو صوت الباب من الاوضة... يطلعوا يجروا عليها

نرمين "حمدالله ع السلامة ياماما"

مها "ازيك يا طنط"

نرجس "الحمدلله"

نرمين "هضرلك العشا وتتشا مع بعض"

نرجس بتبص لهم

"مالكم... مش على بعضكم ليه؟"

مها ونرمين يبصوا لبعض ويضحكوا

وهما الاتنين "مالنا... عاديين اهو"

نرجس "طيب... يارب دايم عاديين كده"

مها بتغمز لنرمين. بمعنى اتكلمى... شافتها نرجس

"جرى ايه يا بت منك ليه... مالكم... انطقوا"

نرمين "قوليلها يا مها... مكسوفة"

مها "مكسوفة... من امى يا ختى"

تضربها نرمين وهى بتضحك... تتنرفز نرجس

"هنقضيها مياعة ولا هتنطقوا فيه ايه"

مها "اصل يا طنط... كان لينا واحد زميلنا ف الكلية... بس اكبر مننا يعنى... من زمان وهو بيعحب

نرمين وعايز يتقدم لها"

قعدت نرجس وسألت بأهتمام

"مين ده؟؟ ويشتغل ايه وابن مين"

قعدت نرمين جنبها

"هو يشتغل ف مصنع حاليا وباباه موظف عادى ومامته ست بيت... ناس عاديين يعنى ياماما"

نرجس "كحيان يعنى"

نرمين "مش كحيان ولا حاجة... شاب عادى لسه بيدأ حياته"

نرجس وهى قائمة

"وايه اللي يرمى الرمية دى... انتى كده قاعدة لما يجيلك اللي يستاهلك"

نرمين شاورت لمها.. والأتين مشيوا وراها

مها"ياطنط بس هو بيحبها... وهى كمان"

نرجس بتلتفت لنرمين

"هى كمان ايه؟"

مها بتلحقها"يعنى هى كمان عايزاه... مش احسن ما تتجوز واحد مبتحبوش وبعد الشر

يتطلقوا... انما لما تتجوز واحد بتحبه اكيد هيقوا مبسوطين مع بعض"

نرجس"هياكلوا ويشربوا حب... هيسكنوا بالحب... هيفرشوا بيتهم حب"

نرمين بتعيط"علشان خاطرى ياماما وافقى... انا وهو بنحب بعض وبعدين انه عايز يتقدم مش احسن

ما نفضل نحب بعض من وراكم"

مها"صح ياطنط... يعنى بترفضوا الصح وتدفعوهم للغلط"

كانت نرجس ف اوضتها وهما لسه وراها

"سيبوني افكر مع نفسى واحد رأى طه"

نرمين"طه ماله.. المهم انتى"

نرجس بشخط"اخوكى الكبير وراجل البيت والكلمة كلمته... مش معنى انى مكنتش بخليه يمشى

كلامه عليكى انك تنسى انه راجل البيت"

سكتت نرمين... وقالت بصوت واطى

"المهم كلامك هو اللي هيخليه يوافق او يرفض"

نرجس"بس نخلص من عملية مراته وبعد كده ربنا يحالها"

طه ونرجس قاعدين مع طارق

طه"يعنى برضه مش فاهم... ناوى على ايه"

طارق"ما انا بقولك انى لسه بادئ شغل قريب ومرتبى ٩٠٠ جنيه اول عن اخر"

طه"ماشى... هتجيب شبكة امتى... هتجيب شقة امتى... جاي تتجوز ازاي يعنى"

طارق"انا جاي وعارف انترمين فهمتكم كل حاجة"

مها ونرمين ف المطبخ واقفين ع الباب ووداهم بره
عالية بتحضر صينية الجاتوه

مها"اخو كى شكله هيبوظ الدنيا"
اتضايقت عالية من كلام مها وسكتت على مضض
عالية"خدى يانرمين طلعى الصينية"
نرمين وهى بتاخذ الصينية
"هاتى...علشان ألحق طه"
اخذت نرمين الصينية وراحت تقدم لطارق
كانوا بيتكلموا

طه"ازاى تتخطبوا وربنا يسهل بعد كده...لما نرمين قالت هتيجى لوحدك تتفق الاول مكنتش فاكر
انك لسه تحت الصفر كده"

نرمين"طه ثوانى لو سمحت"
طه"بعدين يانرمين"
نرمين"لا دلوقتي ياطه"

قام معاها...نرجس استأذنت من طارق وقامت وراهم
راحوا يتكلموا ف الطريقة قريب من المطبخ
ولما قربوا مها راحت لهم
نرمين"انت عمال تكلمه كده ليه...زى ماتكون بتتلكك له"
طه"انتى شايفاه ينفعك؟"
نرمين"ماله؟"

طه"ده محيلتوش اى حاجة...ده عايز يخطبك كده بدبلة من غير ما تتفق على اى حاجة"
"ايه المشكلة يعنى"

"ايه اللى ايه المشكلة... ده مايناسبكيش يا نرمين... فيه فرق كبير بيننا وبينه"
واتكلمت نرمين بعصبية وهى بتعيط
"والله؟؟ ومقلتش الكلام ده لنفسك ليه وانت اتجوزت واحدة من ملجأ"

اتنرفز عليها طه...ورفع ايده يضربها
"اخرسى يا قليلة الادب"
جريت عليه عالية تحوشه...وشدت نرجس نرمين بعيد عنه
نرجس"انتوا اتجنتوا...هتفضحونا قدام الراجل"
طه وهو يبعد عالية عنه
"خلاص...مش انتى عايزاه...مترجعيش تعيطى وتشتكى"

راح طه بعصية وقعد مع طارق
"انا مراتى هتعمل عملية الاسبوع الجاى ومش ضامن ظروفى بعدها... خلال يومين ثلاثة بالكثير
هات اهلك ونقرا الفاتحة"

عالية داخله البيت...وطه يبسندھا
ووراهم نرجس شايلة شنطة هدوم

سبقتهم نرجس ع الاوضة... عدلت السرير لعالية
طه يبسند عالية وهى بتنام على السرير

نرجس"ربنا يكملك على خير... واسمعى كلام الدكتور ومتتحركيش كثير"
عالية"حاضر"
طه بيقول لنرجس

"ماما...انا مش هعرف اجى المحل زى الاول... مش هينفع اسيب عالية طول اليوم"
نرجس"اه طبعا...مش مهم...هعمل اعلان اشوف اى بنت تيجى تساعدنى ف المحل وعلشان كمان
ابقى اجى اطمئن عليها او لو عايزة حاجة اعملها لها"
عالية مش مصدقة اللى بتسمعه
"شكرا ياماما...مش عايزة اتعبك"
نرجس"احنا اللى مش عايزينك تتعبى ولا تتحركى زى الدكتور ما قال...كفاية اوى المتابعة اللى
هتروحيها له"

رن جرس الباب
طه "هروح اشوف مين"

راح طه يفتح الباب
كانت هدير وبناتها قدامه
"سلامو عليكمو"
"اهلا وسهلا... اتفضلى"
هدير وهى ع الباب
"انا رocht لكم المستشفى قالوا لى لسه ماشيين"
طه وهو بيوسع لها تدخل
"اه فعلا لسه جاين... اتفضلى عالية جوه"

هدير دخلت على اوضة عالية.. شافت نرجس قاعدة... خافت من اللى ممكن تسمعه من

نرجس... وبانكسار
"سلامو عليكمو"

نرجس "اهلا وسهلا... اتفضلى"

هدير برقت من الاستغراب والمقابلة الحلوة اللى بتقابلها نرجس

سلمت عليها ذوقيا

"ازى حضرتك ياطنط"

نرجس "الحمد لله يا بنتى... ماشاء الله مين القمرات دول"

هدير وهى بتبص لعالية وعازية تقولها مين دى؟ نرجس ولا واحدة شبهها

هدير "عالية وهنا بناتى"

نرجس "ربنا يخليهو ملك ويقومك بالسلامة"

هدير "ربنا يخليكى... وان شاء الله عالية ربنا يكملها على خير"

قعدت هدير جنب عالية بعد ما سلمت عليها... واتكلموا كلهم ف مواضيع عادية.. ولما حكوا ان

الدكتور قال متتحر كشر كثير وان طه هيقعد معاها وميرو حش المحل

هدير "والصبح متشيلوش همه... انا هجيلها كل يوم الصبح شوية"

نرجس "وبيتك وجوزك وعيالك"

هدير "عيالى معايا وجوزى بيرجع بالليل من الشغل...يعنى انا لو جيت لعالية ساعتين تلاتة الصبح

اشوف طلباتها مش هياثروا على بيتي ف حاجة"

نرجس "ربنا يقويكى ويديكى الصحة...صاحبك جدعة اوى يا عالية"

عالية وهى بتبص بحب لهدير

"هدير اختي واكثر من اختي"

هدير وهى بتبص لعالية

"احنا مالناش غير بعض"

طارق ونرمين قاعدين مع بعض ف كافيه

طارق مكشر ونرمين بتكلمه

"مالك يا طارق...كل ما اكلمك ترد عليها بغلاسة كده"

"يعنى انا غلس؟"

"كلامك وطريقتك معايا وحشة جدا"

"واللى حصل من اخوكمى كان حلو"

"ايه اللى حصل ماهو نفذ اللى احنا عايزينه واتخطبنا"

"بعد ما حسسني انه مش طايقني لا انا ولا اهلي"

"اخويا معملش حاجة لاهلك بالعكس هو استقبلهم بكل ذوق"

"لا كان مبوز ف وشنا"

"هو عنده ظروف شاغللاه ومراته كانت رايحة تاني يوم تعمل عملية...يعنى مكش كبوز لكم انتم

مخصوص...وبعدين يعنى هنفضل نتكلم على اخويا ولا نتكلم عن نفسنا"

"ما انا متضايق...اعمل ايه"

"معلش علشان خاطري متتضايقش...خلينا نفرح ببعض مش نعكن على بعض"

طارق بيرد عليها بالعافية

"طيب"

طه داخل الاوضة وعالية ع السرير قدامها التلفزيون
"حبيبتى ... انا اسف انى اتأخرت عليكى"
بيقرب منها ييوسها من راسها
"حمدالله على سلامتك"
قعد قدامها
"الله يسلمك... ها عاملة ايه؟"
"الحمد لله كويسة"
"هدخل اخد دش سريع واجى اغير هدومى علشان نلحق معاد الدكتور"
"طه... انت لسه جاي من السفر... نام ساعة ولا حاجة ونأجل معاد الدكتور لبالليل متأخر"
"لا نروح نطمن وبعدين لما نرجع ابقى اناام براحتى"
"انا مش عارفة اقولك ايه"
"على ايه"
"طول الشهر ونص اللي فاتوا وانت ومامتك وهدير شايلنى على كفوف الراحة... انا حاسة انى
تعبتكم كلكم"
"متقوليش كده... احنا بنحبك وبنخاف عليكى وياما انتى عملتى لنا كلنا... المهم بس ان ربنا
يكملك على خير ويرزقنا باللى نفسنا فيه"
"يارب... انا كل ما بصلى او وانا قاعدة بدعى ربنا ان يرزقنا الذرية الصالحة ويكملنى على خير"

عالية وطه ونرجس عند الدكتور
عالية على سرير الكشف والدكتور بيعمل السونار
طه ونرجس عينيهم على الشاشة
عالية عينيها على الدكتور اللي لاحظت انه كثر فجأة
عالية "فى ايه يا دكتور"
الدكتور "للاسف... الجنين مش بينمو فهاى"
طه بصدمة "يعنى ايه"
الدكتور "ربنا يعوضكم ان شاءالله... الجنين لازم يتزل"
قام الدكتور وراح قعد على مكتبه

بصت عالية لظه... وهى بتعيط بحرقة وبصوت على
ظه بيحاول يدور على كلام يقوله لعالية...مطلعش منه كلام...نزلت دموعه
نرجس بتعيط من غير ما تتكلم
عالية وهى بتعيط
"كان نفسى اخلف يا ظه...كان نفسى ابقى ام ولادك... كده خلاص اخر امل لينا راح"
ظه بيحضنها
"متقوليش كده...ان شاءالله ربنا هيعوضنا"
"انا بحبك اوى...واللى انا فيه ده غصب عني"
"انا عارف...قدر الله وماشاء فعل...هنحاول تاني الحياة مبتقفش"
التفتت لهم نرجس
"تحاول تاني ف ايه... ربنا مش رايدلكم خلفه من بعض وربنا مبيتعاندش... ومعدش ييجى منه
محاولات تانية...انا ذنبي ايه تحرموني من ابي اشوف ولاد ابني... احنا اتفقنا اتفاق ولازم يتنفذ"
ظه وهو بيضطرب على عالية
"انا مقدرش اسيب عالية ابدا...ابدا يا ماما"

(١٧)

عالية على السرير بتعيط...ضهرها لظه
طه ع الناحية الثانية...دموعه نازلة
يمسح دموعه...ويتعدل يقعد
"عالية... انتى لسه منمتيش"
عالية بتعيط ومبتردش عليه
"عالية وبعدين... مينفعش اللى بتعمله ده.. وانا اللى فاكر ايمانك اقوى من كده"
بترد عليه عالية وهى ف مكانها
"غصب عنى حزينة ع الفرحة اللى مكملتش وحياتى اللى بتتدمر قدام عينى ومش قادرة اعمل حاجة
ولا عارفة هعمل ايه ف اللى جاى"
"هتعملى ايه ف ايه"
واتعدلت عالية وقعدت جنبه وهى بتتصنع القوة
"لما تطلقنى...مش عارفة هروح فين واعمل ايه"
خانتها دموعها...كل ما تفكر انها هتبعد عن طه مبتقدرش تتحمل مجرد الفكرة
طه مستغرب من كلامها
"اطلقك ايه...مين قال كده...مش هيحصل طبعاً"
عالية وهى بتعيط
"انا عارفة ان ده حقك...انت بقالك ٣ ايام قاعد تراعينى بعد العملية وانا عارفة انك مش عايزنى
احس انك زعلان...او عى تكون فاكر انى مش حاسة بياك... انت ذنبك ايه تفضل عمرك كله مع
واحدة زبي"
"يا عالية انتى حبيبى ومراتى وان شاء الله هتبقى ام ولادى...ايه يعنى محصلش نصيب مرة ياما ناس
حصلها كده"

"كلامك يوجعني اكثر من انه يخفف عني... انا عارفة ان جواك كثير ومحببه... متشيلش كل ده جواك لوحدك... اتكلم معايا زى ما بتكلم معاك... بين حزنك اللى محبيه وشايفاه ف عنيك وسامعاه ف صوتك... متفضلش تخفف عني وتشيل كل الالم جواك لوحدك"

دموعه نزلت غصب عنه

قربت منه عالية وحضنته وهى بتطبطب عليه وتعيط

"انا مش زعلان منك... انا زعلان على اللى بيحصل لنا ده... استغفر الله العظيم انا راضى بقضاء ربنا بس..."

"انا فاهمة... متخبيش جواك يا طه... متشيلش همك وهمى وتخبيه... متحاولش تخفف عني وانت متلقاش اللى يخفف عنك"

"انا بحبك انتى يا عالية... لازم تفهمى كده انى بحبك اكثر من طفل لسه ف علم الغيب"
"واتفاقنا مع مامتك"

"معرفش... انا مقدرش استغنى عنك ده كل اللى اعرفه"

طه ف المحل... قاعد سرحان وحزين ع المكتب

ونرجس واقفة مع الزباين... بعد ما يمشوا يتصل طه بعالية

"ايه الاخبار... عاملة ايه؟؟ قلقان تكونى تعبانة ولا حاجة... هرجع بالليل... لو فيه حاجة كلمينى... مع السلامة"

راحت نرجس قعدت قدامه

"صحتها عاملة ايه"

"الحمد لله احسن"

"انت بقالك اسبوع قاعد جنبها بعد العملية... وانا قلت استنى لحد ما تشد حيلها"

"ماما... انتى اجبرتينا على الموافقة على كلامك... بس بجد مش هقدر... مش هقدر اطلق عالية ابدا"

سكتت نرجس... بتفكر

"ماشى ياطه... انا مقلتش لازم تطلقها"

"ولا ينفع..."

"لأبقى... ربنا حلل الجواز الثانى وخصوصا ف حالتك دى... ذنبك ايه انك تفضل طول عمرك جنبها وهى مفيش منها رجا... بتحبها ومش عايز تسيبها ماشى... بس كمان متقولش متتجوزش واحدة تانية وتخلف منها"

طه ساكت... بيتخيل الفكرة

"لا لا لا... مينفعش... مقدرش اتجوز عليها واجرحها الجرح ده"

"يعنى مشكلتك انك خايف عليها"

"اللى بيعب حد مقدرش يجرحه"

سكتت نرجس... وقالت بصوت واطى

"معاك حق"

عالية بتروق اوضتها الصبح بعد ما طه نزل

جرس الباب یرن... تتوقع انها هدير

تروح تفتح... تتفاجئ بنرجس قدامها

"اهلا يا ماما اتفضلى"

"ازيك يا عالية... عاملة ايه؟"

"الحمد لله"

نرجس بتدخل تقعد... تروح عالية تقعد معاها وهى مش مطمئة للزيارة

"اعملك شأى ولا قهوة"

"لا مش عايزة اتعبك... انا جيت اطمئن عليكى"

قعدت عالية وهى مستغربة

"ايه صحتك عاملة ايه دلوقتى"

"الحمد لله كويسة"

سكتوا الاتنين... اللحظات بتمر بتقتل عالية بالبطى من خوفها من سبب الزيارة

"بتحى طه؟؟"

اخر حاجة كانت تتوقعها عالية انها تتسأل السؤال ده... وردت من غير تفكير

"طبعا"

"اللى بيحب حد بيخاف عليه وعلى مصلحته... كده ولا لأ"

"طبعا"

"طه كمان بيحبك وخايف على زعلك علشان كده رفض الاتفاق اللى اتفقناه"

سكتت عالية... مش عارفة ترد تقول ايه؟

كملت نرجس

"بس لو كنتى بتحبيه كنتى حبيتى تشوفيه فرحان مش تشجعيه انه يفضل جنبك كده"

فهمت عالية سبب الزيارة... بكل وضوح مبقاش فيه مجال للشك

"عايزانى اقله يطلبنى... ازاي وانا مقدرش ابعد عنه... والله العظيم بحبه وهو كل حياتى... تفتكرى

انا ممكن اعيش من غيره... طب هعيش ليه ولمين"

"ان كان هو متمسك بيكى دلوقتى... متضمنيش بعد كام سنة لما يحس ان العمر فات هيحس

بياه... ساعتها ممكن يكرهك ويلعن اليوم اللى اتجوزك فيه"

عالية بتحاول تتماسك مش قادرة... بتعيط ومش عارفة ترد

"بصى يا عالية... انتى بتحبيه صحيح وعايزة تفضلى معاه طول العمر؟؟"

"ايوه طبعا"

"خلاص... انا هساعدك وانتى تساعدينى"

عالية بعدم فهم

"مش فاهمة؟؟"

"اقنعيه انه يتجوز واحدة تانية... من غير ما يطلقك... وان كان على فتح بيتين انا مش هسيبه منها

يبقى انتوا مبعدتوش عن بعض ومنها كمان ميتحرمش من الخلفة"

"يتجوز!!"

فكرت عالية ان الكلام ده قالته قبل كده لطه... بس مكنتش تتخيل انه بيوقع اوى كده لو اتنفذ

بجد... ساعتها كان مجرد كلام... دلوقتى مطلوب منها انها تقنعه بالتنفيذ

"صعب اوى... اللى طلبتيه ده صعب اوى"

"تبقى انانية ومبتحبيش طه... مبتحبيش الا نفسك"

"والله ابدأ... انا بحبه وغيرتى عليه غصب عنى"

نرجس وهى قائمة

"فكرى ف كلامى كويس وردى عليا... عايزاكي بس تعرفى ان لو فضل مصمم على موقفه كده

مسيره يفوق... وان كان مستحمل دلوقتى مسيره يزهق... ومتنسيش انه استحمل وحاول معاكى

كثير وانه مبقاش حيلته حيلة لعمليات وعلاج تانى...وانا كده بح خلاص انسوا انكم تطولوا منى
جنيه...اعقلى الكلام كده ف دماغك واعرفى انه مش هيفضل العمر جنبك...وان مكنش دلوقتي
بمزاجك فهيبقى غصب عنك ...لو اقتعتيه اوعدك انه مش هيطلقك وهتفضل على ذمته الا لو انتي
الى عايزة تطلقى...اما لو رفضتي فوحياة ولادى لاحرمك منه واخليه يطلقك زى ما انتي واقفة لى
كده وحرمانى انى اشوف ولاده... واياكى يعرف انى جيتلك النهاردة"

خلصت نرجس كلامها وخرجت ورزعت الباب وراها
قعدت عالية بعد ما اتجمدت دموعها وهى بتفكر بجد ف كلام نرجس

طه قاعد بيتفرج على التلفزيون
تيجى عالية تحط له شاي قدامه وتقعده جنبه وتحط ايدها ف ايده وهو قاعد
"ها... فكرت"
طه ببص لها ويشيل ايدها من ايده
"انتى بقالك كام يوم مش طبيعية...فيه واحدة تطلب من جوزها يتجوز...ايه اللى حصل؟؟ شكلك
محبية عليا حاجة"
عالية بتقرب منه اكتر وبلهجة عادية وابتسامة
"فكرت...ولقيت ان بما اننا نفسنا ف طفل هيحصل ايه لو انت اتجوزت وخلفت وابنتك بيقى ابني
برضه وهنفرح بيه كلنا"
"ده كلام يعقل"
"طبعا يعقل...بذمتك منفسكش ف ببى حلو كده شبهك"
قالتها وهى بتضحك...سرح طه لما الامل داعب خياله...واتنهد
"نفسى طبعا"
"خلاص...يبقى ليه نستنى"
"وانتى؟"
"انا هفضل مراتك حبيبتك برضه...ولا ايه"
حضنها طه
"طبعا...انتى مراتى وحبيبتى لحد ما اموت"

"بعد الشر عليك"

عالية وهى ف حضنه بتجز على سناها علشان تفضل متحكمة ف اعصابها اطول مدة ممكنة قبل ما

حزفها يهزمها وتستسلم لدموعها اللي بتحاول تفتح عينيها

سألته وهى ف حضنه

"ها...موافق؟"

"الفكرة صعبة...مش متخيلها"

"بس ده الحل الوحيد اللي قدامنا علشان نفرح بطفل...ماشى"

طه ساكت متردد

"انتى بجد مش هتزعلى؟"

"لا طبعاً...بالعكس لما اشوفك فرحان انا كمان هبقى فرحانة"

كانت اكثر حاجة بتخليهم يتكلموا براحتهم

اهم حاضنين بعض...وعيونهم مش متواجهه

عالية بتكلم نرجس ف التليفون

"ازيك ياماما... انا خلاص اقنعت طه... اتصرفى انتى انا مش هقدر اتكلم ف الموضوع ده اكر من

كده... لا زى ما اتفقنا ميعرفش حاجة هو فاكر ان الكلام منى انا... مش هتفرق مين انا معرفش

حد ... مع السلامة"

قفلت عالية مع نرجس... وسابت دموعها تنزل براحتها وهى قاعدة لوحدها ومحدث شايفها

طه داخل الحل...شايف الفرحة ف عيون نرجس

بعد ما مشيوا الزباين اللي كانوا معاها...قعدت معاها

"كنت بكلم عالية الصبح وقالتي انكم اتفقتوا"

رد بلامبالاة "آه"

"ومالك بتقولها كده"

"قلبي مش مطاوعنى اتجوز عليها وف نفس الوقت ده الحل الوحيد علشان كلنا نرتاح"

"ده عين العقل يا طه وبعدين لا انت اول ولا اخر واحد يتجوز على مراته"

"فكرة انى اتجوز واحدة معرفهاش علشان بس عايز اخلف مش قادر اقتنع بيها... شايفها عيب اوى"
"ما عيب الا العيب.. من امتى الجواز كان عيب"
"لما يكون له سبب غير ان الاتنين بيحبوا بعض"
"المال والبنون زينة الحياة الدنيا... مش عيب ولا حرام انك تتجوز علشان نفسك ف حنة عيل"
"وفين بقى اللى ترضى بيا... مين هتوافق تكون زوجة تانية"
"اللى يدور يلاقى... انت متعرفش حد؟"
"معرف مين"
"حد من عندك ف الشغل مثلاً"
"اللى معايا كلهم متجوزين ومعرفش حد"
"طيب انت دور من ناحية وانا هدور من ناحية"
"ربنا يسهل"
"واد يا طه... احنا هنروح بعيد ليه"
"ليه... مين"
"ايه رأيك ف مها"
"مها... دى اختى الصغيرة"
"اختك ايه... مها حلوة وصغيرة وبنت ناس وعارفينها ... بس هى توافق"
"انتى قولتيها اهو بنفسك... واحدة حلوة وصغيرة زيها ايه اللى يخليها توافق على واحد زي"
"وانت ايه اللى يعيبك... لولاش بس انت متجوز ودى بقى نحاول نقنعها بيها... انت ايه رأيك"
"مش عارف"
"يعنى اجس نبضها"
"ماشى"

نرجس راجعة البيت... واول ما دخلت
"نرميسيين... مهاااااااااا"
جت نرمين من الاوضة تجرى
"نعم ياماما"
"فين مها"

"روح"

"روح!! يعنى اليوم اللي عايزاها فيه الاقيها روح"

"عادى ياماما... ماهى قالت جاية تانى بكرة بالليل... انتى عايزاها ف حاجة"

وقعدت نرجس

"اه... كنت عايزة اجس نبضها كده ممكن توافق على طه"

"طه؟؟!!"

"ايوه... بدور له على عروسة ومفيش اقرب من مها"

قعدت نرمين... وهى بتضحك

"بتضحكى على ايه"

"تعرفى ان مها كانت عينها على طه من زمان من قبل ماتظهر عالية"

"بيجد؟"

"اه والله... ولما ظهرت عالية فهمت مها انه مبيحبهاش فكبرت دماغها"

"تفتكرى ممكن توافق"

"اهو لما تيجى نكلهما... وانا من ناحية وانتى من ناحية ونقنعها"

طه وعالية قاعدين بيتعشوا

"ماما قالت لى انكم اتكلمتوا الصبح"

عالية مش عارفة نرجس قالت له ايه بالظبط على اتفاقم

"اه اتكلمنا عادى... هى قالت لك ايه؟"

"قالت يعنى انها هتدور على واحدة"

عالية وهى بتحاول تتقبل الامر الواقع

"طب كويس... ولقيت حد"

"لأ... لسه"

"طيب ابقى عرفنى الاخبار"

"هو انتى مش هتكونى معايا ف كل خطوة"

"مش لازم اكون موجودة... بس انا موافقة على اى حاجة ممكن تسعدك"

قامت عالية بسرعة... بعد ما فكرت ف حجة

"شكلى نسيت البوتاجاز مفتوح"

دخلت المطبخ وهى بتحاول السيطرة على نفسها

حست بظه وهو داخل وراها

"مالك"

"مفيش يا حبيبى"

"عالية... انتى زعلانة... صح؟"

عالية بعد ما مسحت دموعها... وبنبرة هادية

"بص يا طه.. انا موافقة ومفكرة ومقررة بعقلى... انما غصب عنى بتضايق... ارجوك متحملنيش فوق

طاقتى ولا تطلب منى انى اكون مبسوفة وسعيدة وانا بجوز جوزى"

"مش انتى اللى طلبتى"

"ايوه ومش هرجع ف كلامى... بس كمان متطلبش منى مزعلش"

مها ونرمين ونرجس فى اوضة نرمين

نرجس "ها... ايه رأيك يامها؟"

مها "انا عارفة ان واحد زى طه تتمناه الف واحدة وانا اولهم بس الكلام ده كان قبل ما يتجوز"

نرجس "يعنى ايه"

مها "متزعليش منى ياطنط... ايه اللى يخلينى اتجوز واحد متجوز"

نرجس "انتى عارفة طه ابني طيب وحنين واخلاقه عالية وراجل مفيش زيه دلوقتى... ده غير ان طلباتك

كلها هتجاب زى اى عروسة... يعنى هجيلك شبكة وعفش جديد واعملك فرح... المهم انتى

توافقى... ولو انتى وافقتى معتقدش مامتك هترفض لما نقولها"

"ومراته"

"مالها"

"هترضى؟"

"ملكيش دعوة بيها... انا اللى بقولك وهى هتوافق ع اللى بقوله"

"طيب كل الكلام ده كويس... بس نسييت اهم حاجة"

"ايه هى؟"

"طه نفسه..عايزنى ولا انا مفروضة عليه"

"عايزك طبعاً"

"خلاص اقعد معاه ونتكلم وبعدها اقرر"

(١٨)

نرجس بتفتح المحل... اول ما دخلت...فتحت الراديو على القران
واتصلت بطه
"الو...صباح الخير ياطه"
"صباح النور ياماما..عاملة ايه"
"انا كويسة الحمد لله...انت ف الشغل"
"اه ف الشغل"
"كويس...انا واختك اتكلمنا مع مها امبارح...وبعد اخذ ورد علشان حكاية جوازك دى... تقريبا وافقت"
"يعنى ايه تقريبا...يا آه يا لآ"
"هى بتقول عايزة تقعد معاك الاول لانها خايفة تكون مفروضة عليك"
"يعنى اعمل ايه"
"يعنى تقعد معاها وتتكلما...بس تخلى بالك انما زى اى بنت عايزة تفرح بعريسها...يعنى اوعى تفضل تقولها بحب مراتى ومش عايز ازعلها والكلام ده خالص"
"هبتدى معاها بكذب؟"
"هو ده كذب... متجيش سيرة مراتك خالص معاها كأفها مش موجودة... ايه لازمة سيرتها
يعنى...بقولك ايه مها مفيش زيتها وقابلة ان تفضل عالية على ذمتك بس تحسسها انك عايزها"
"طيب ماشى"
"مها عندنا النهاردة هترجع م الشغل ع البيت عندى ولا نبقى نروح بالليل بعد المحل"
"مش عارف..بس اصل عالية مبتغداش لوحدها"
"هى لازم تتعود ع الوضع الجديد...بس اسمع اوعى تقولها حاجة غير لما ناخذ الموافقة النهائية من
مها...ربنا يجعلكم نصيب يارب"
"طيب...بالليل هبقى ارجع معاكى...نبقى نقفل بدرى ساعة"
"طيب مش مشكلة نقفل بدرى...ربنا يجعله بفائدة"

مها قاعدة قدام المراية... بتحط ميك اب
"شكلى كده حلو؟"
"يعنى هو طه مش عارفك؟"
"عارفنى حاجة والنهاردة حاجة تانية... قوللى شكلى كده حلو"
"زى القمر طبعا هى حاجة جديدة يعنى"
تبص مها لنفسها ف المراية بإعجاب
نرمين "مش لو كان طه متجوزش الزفة دى كان زمانك مراته من زمان"
"والله يا نرمين لحد دلوقتى مقررتش.. لسه لما اقعد مع طه واشوف دماغه ايه ومشاعره من ناحيتى"
"انتى مش بتحبيه من زمان... يعنى المفروض تفرحى"
"لا يا حبيبى زمان حاجة ودلوقتى حاجة... زمان كنت انا اللي عايزاه... دلوقتى هو اللي
عايزنى... تفرق"
"تفرق ف ايه مش فاهمة"
"متاخدش ف بالك... المهم بس هما جاين امتى"
"زمانهم جاين ماما كلمتى كانوا قفلوا الحبل وجاين"

طه ونرجس داخلين البيت... طه بيدخل بتردد
"ماتدخل هو انت داخل بيت غريب"
"شوفيهم فين الاول طيب"

سبقت نرجس... ونادت عليهم
خرجت لها نرمين... سلمت على طه
"ازيك يا طه... تعالى ادخل مها جوه ف الاوضة"

دخل طه قعد فى الصالون... نرجس وراه
"اचना هندخل ونناديها لك... زى مافهمتك ياطه"
طه يهز راسه باستسلام

قعد... بيفكر هيقول ايه ويتكلم ف ايه
سمع صوت خطوات مها
جت مها... قام وقف
سلمت عليه... سلم عليها
"ازيك ياطه"
"الحمد لله... عاملة ايه... اتفضلى"
قعدت مها... وقعد طه
طه ببص ف الارض... بيفكر يتكلم ف ايه
مها ساكتة... بتبص له نظرات خاطفة ومستتياه يتكلم

لما طال الصمت... قامت مها وقفت
"طيب واضح ان مفيش كلام عندك عايز تقوله... بعد اذنك"
استغرب طه من رد فعلها... غير متوقع
وقف
"استنى"
"استنى ايه... هنفضل ساكتين"
"بصراحة انا محرج"
"مخرج ولا جاى غضب عنك؟"
"مخرج"
ابتسمت مها
"كده يبقى نقعد"
قعدت تاني وقعد طه
"مش ماما اتكلمت معاكى... ومتهيألى انتى عارفة كل ظروفى"
"اه عارفاه... وراضية بيها لو انت عايز تتجوزنى بجد"
"او مال بهزر؟"
"مقصده... قصدى عايز تتجوزنى علشانى مش علشان مامتك قالتلك عليا"
ارتبك طه... مش عارف يرد... وافتكى تحذيرات مامته

"اه طبعاً...بس احنا لسه مقربناش من بعض يعنى علشان كده هتلاقيني مخرج شوية...معلش
استحلميى وبعد كده اكيد هناخد على بعض اكثر"
"استحمل...علشان خاطرك هستحمل حاضر"
رن موبايل طه... طلعه من جيبه
ارتبك لما شاف ان اللى بتتصل عالية
لاحظت مها ارتباطه...فهمت...وبابتسامة عادية
"لو مراتك رد...انا فاهمة طبعاً انى لازم اتعود على وجودها"
حس براحة من رد فعلها...رد وهى قاعدة
"الو... اه شوية وجاى...اجيب ايه وانا جاى....ماشى مع السلامة"
قفل مع عالية...وهو بيصص لمها بارتياح
"شكرا يا مها انك مقدرة ظروفى... يمكن مكناش قريين اوى بس ان شاءالله شكلنا هنكون
متفاهمين"
"ان شاءالله"
وبدا يتكلم بارتياح اكثر
"قلتي لمامتك ولا لسه"
"كنت مستنية لما نتكلم مع بعض الاول"
"وبعدين...دلوقتي ايه رأيك"
ابتسمت مها بكسوف وهى بتحط وشها ف الارض ورجعت بصت له
"لو ممكن توصلنى هاروح النهاردة واقولها"
طه "مممكن"
قامت مها "هجيب شنطتى حالا"

دخلت مها بفرحة.... كانت نرجس ونرمين مستنيتينها
نرجس "طمينين؟؟اتفقتوا"
مها بفخر "تقريباً...هو هيوصلنى علشان اكلم ماما واتفق معاها"
نرجس "بجد؟؟ يا الف بركة...اما ارواح اشوفه"
خرجت نرجس من الاوضة
نرمين وهى بتبصص لمها

"اتفقتوا بجد؟؟ وهو صلك البيت"

"طبعا يا بنتى بستقللى بيا"

"يا بنت اللذينة... انا قلت طه مش هيتكلم كلمتين على بعض من كسوفه"

"مين ده يا بنتى... هو فيه راجل بيتكسف... هو كان محتاج انكشه بس وجاب نتيجة اسرع ما كنت

اتخيل"

"انتى بجد فرحانة بيه"

"طبعا"

"مش متضايقه انه متجوز"

"الصبر حلو... بكرة مش هيشوف غيرى... يالا بقى علشان متأخرش عليه"

نرجس لما طلعت لظه

"ايه الاخبار ياطه"

"شكلها طيبة اوى ياماما... واحسن حاجة فيها انها متقبلة وجود عالية ومش متضايقه"

"طب الحمد لله... ربنا يوفقكم ويتمم بخير يارب"

عالية قاعدة تبص ف الساعة... اتصلت تانى بظه

رن الموبايل لحد ما فصل... بعدها سمعت الباب بيتفتح

راحت تجرى ع الباب

"طه... اتأخرت كده ليه"

"مفيش... بس اصلى بعد ما وصلت ماما مسكت فيا اطلع معاها"

"طيب احضرلك العشا"

"معلش يا حبيبتي... ماما مسكت فيا واتعشيت معاهم هناك... لو لسه مأكليش هقععد معاكى"

عالية بعد ما حسست بتغيير طه

"لا... انا مكنش ليا نفس بس قلقت عليك"

"متقلقيش"

دخل الاوضة... دخلت وراه عالية

قعدت على طرف السرير... بتبص له وهو بيغير هدومه ومش يبص ناحيتها... شكله

متغير... احساسها انه مخي عليها حاجة مش قادرة تفسره... وبكل هدوء سألته

"فيه جديد؟"

"بالنسبة لايه؟"

"العروسة"

ارتبك وقعت من الشماعة وهو يعلق عليها الهدوم

قامت شالتها عالية

"ولا يهمك... سيب هعلقهم انا"

"شكرا"

"ها..مقلتيش فيه جديد؟"

"لا... لما يكون فيه جديد هقولك اكيد"

طه صاحى ببص لعالية... عالية نائمة

"بحبك يا عالية... بس غصب عني اني كذبت عليكى... مش عايز اضايك كل يوم بالموضوع ده...

وانتي اللي ضغطتي عليا اوافق على اقتراح ماما... انا كنت راضى علشان مجر حكيش... بس انا نفسى

ابقى اب... نفسى اشوف ابن ليا يكبر قدام عينى... سامحيني يا عالية"

رن موبايله... اخده بسرعة من الكومودينو

شاف رقم.... وافكر ان وهو مع مها ف العربية... اخدوا ارقام بعض ومسجلوش خوفا على شعور

عالية لو شافته

بس اللي فاكره ان اول رقمين هما نفس اول رقمين عنده

كل ده فكر فيه ف ثواني... وعمل الرنين صامت

وقام اتسحب من جنب عالية وخرج من الاوضة

راح البلكونة... رد على مها

"الو.. نمت ولا لسه؟"

"لا لسه"

"انا سببت لك مشكلة ولا حاجة"

"لا عالية نايمة"

"انا بس حببت اقولك اني اتكلمت مع ماما وهي كانت رافضة ف الاول بس انا اقنعتها"

"كويس"

"مفرحتش؟"

"ليه بتقولى كده"

"يعنى حسيت"

"لا طبعا...اكيد فرحت...بس اصل انا لسه مقولتش حاجة لعالية فعلشان كده بتكلم من غير"

ماتعرف"

"ماشى براحتك...المهم انا قلت لماما انكم جاينين يوم الجمعة علشان انا عارفة انك بتلبقى اجازة من"

المحل والشغل"

"تمام"

"واضح انك مش عارف تتكلم...لو عايز نأجل ولا نلغى عادى"

"لا زى ما اتفقى مع مامتك"

"ماشى...ابقى عرف طنط"

"تمام...مع السلامة"

قفلى طه...بص وراه اطمئن ان عالية مش واقعة...رجع للاوضة يتسحب كانت عالية لسه

نايمة...اطمن...ونام

فاتن قاعدة مع عبدالحميد وميار بيتغدوا

ميار عمالة تغمز لها...شاورت لها فاتن بكرة راسها

قامت بعدها ميار

ميار"الحمدلله...تسلم ايدك ياماما"

بعد ما مشيت ميار

فاتن"عبد الحميد...فاكر دكتور ايمن"

عبد الحميد بعد ما سرح شوية

"بتاع العلاج الطبيعى ولا مين"

فاتن "اه هو"

"ماله"

"مامته اتصلت بيا وعايزين ييجوا يزورونا"

"مامته؟؟ وجابت رقمنا منين؟"

"يا سلام ياعبدہ... وهى دى مشكلة يعنى... هتسبب المهم وتمسك ف الهايفة"

"يعنى عايزين يزورونا ليه؟"

"ابنهم شاب وعندنا بنت... بدمتك انت يبقى ليه"

وضحك عبدالحميد

"هى البت كبرت بجد... انا لسه شايفها عيلة صغيرة"

"انت تشوفها عيلة انما هى اسم الله عليها بقت عروسة والخطاب بيدقوا بابها"

"انتى شايفة ايه يعنى"

"انا شايفة ان ايمن ابن حلال وهو بقاله ٣ سنين بيشتغل ف السعودية ولسه نازل اجازة من اسبوع

... مامته اللى قالتلى"

"السعودية... يعنى بنتنا هتتغرب؟؟؟"

"ايه؟"

وانتبعت فاتن لسؤال عبدالحميد اللى مفكرتش فيه قبل كده

وردت كأفها بترد على نفسها

"لا طبعاً... بنتى الوحيدة متتجوزش غير جنينى... ولازم يعرفوا كده من قبل ما ييجوا"

هدير قاعدة مع عالية ف بيت هدير

"انتى هتنقطينى يا عالية"

"بعد الشر عليكى ليه بس"

"دلوقتى جوزك راح يخطب وانتى قاعدة معايا بالبرود ده"

عالية بابتسامة لا مبالة

"هعمل ايه يعنى؟"

"لو مش راضى بقضاء ربنا ومستعجل اوى كده ع الخلفة سيبه انما ميتجوزش عليكى"

طه ونرجس ونرمين قاعدين مع مها ومامتها وجوز مامتها
مها وطه يبتادلوا نظرات اعجاب
ام مها "والله يا نرجس احنا عشرة سنين وانا اتشرف بنسبكم...ومها بدل مقتنعة ومش متضايقه ان
مراته على ذمته هقول ايه بس"
نرجس "نقرا الفاتحة بقى"
ام مها "لا قبل ما نقرا الفاتحة لازم نتفق على شوية تفاصيل"
نرجس "مها بنى وهعملها زى اى عروسة جديدة...شبكة وعفش وفرح"
طه "فرح لأ...معلش بلاش فرح"
ام مها بتبص لنرجس
نرجس لطه "وليه لأ؟؟"
طه "معلش.. اى حاجة انتم عايزينها بس فرح لأ... مش هينفع؟"
مها "علشان مراتك؟؟"
طه وهو وشه ف الارض
"كفاية انى هتجوز ومعملتلهاش فرح..واساسا انا بتخرج من الدوشة والحاجات دى...معلش يامها"
ام مها "طب والشقة...بنى هتعيش فين؟"
نرجس "هاجر لهم شقة"
ام مها وهى بتبص لمها اعتراضا
"يعنى مراته الاولانية تبقى قاعدة ف شقة تمليك وبنى تدخل ف ايجار وميتعملهاش فرح...مش كفاية
راضية بانها تدخل على ضرة...لا يا ام طه مكنتش فاكراكى شايفة مها قليلة اوى كده"
نرجس "قليلة؟؟ اخص عليكى ده انا بقولك مها بنى"
ام مها "وانتى ترضى ده لبنتك"
سكنت نرجس...وبصت لمها
"ايه يامها؟ما انتوا عارفين يا جماعة الشقق نار وانا مقدرش اشترى شقة وافرشها"
ام مها "خلاص...انا عندى فكرة تريح الكل"

(١٩)

رن موبایل جوز ام امها... قام يرد وساهم... كملوا كلام
نرجس "الحقينا بالفكرة اللي عندك"
ام مها "قبل بس ما اقولها... لازم طه يعرف انه لولا مها ضغطت عليا انا مكنتش وافقت على جواز
بالظروف دى ابدًا"
طه "عارف والله مها قالت لى"
ام مها "طيب اقل حاجة تقدر بيها بنيتي انما تتجوز ف شقتك"
طه باستغراب "مع عالية؟؟؟!!!"
ام مها "لا طبعا كفاية انما هتتجوز على ضرة عايزها تسكن معاها كمان"
نرجس "قصدك يعنى ياخذ الاولانية ف ايجار"
ام مها وهى بترمى الخيار ف ايديهم
"والله ياخذها ف ايجار... ياخذها ف اى حته دى مشكلتهم"
مها "بس ياطه لو اخدتها ف ايجار هتبقى قاعدة لوحدها فترات طويلة يا عيني وهى مالهش حد
ومحمدش عارف الوحدة تعمل فيها ايه... تصعب عليا برضه"
ام مها "يا حبيبتي يا بنيتي... شايلة هم ضررهما... بدمتاك يا طه كنت هتلاقى واحدة كده"
طه "لا طبعا... الحمد لله ان ربنا اكرمى بمها... بس برضه مش فاهم ازاي اطلع عالية من بيتها"
نرجس "بيتها ده ايه هى عرفت البيوت الا لما اتجوزتك"
مها "الاحسن انما تروح تعيش مع طنط ف بيتها"
نرجس باستغراب "ايه؟؟؟ معايا؟؟؟ ليه هو انا بطيقها؟"
مها "يا طنط حضرتك بره طول اليوم وهى هتاخذ اوضة طه... وبعدين مش انتى اولى بفلوس الايجار"
نرمين "يا سلام هتجيبوها لى انا بقى"
مها "وانتى مالك بيها... اهى وجودها هيرجك ويونسك وكلها حاجة بسيطة وتتجوزى"
طه ساكت بيسمع كلامهم... واول ما تكلم
"لالا... مش هينفع اقولها تخرج من البيت علشان اتجوز فيه"
ام مها "براحتك"

وبصت لها
"انا من الاول قتللك راجل متجوز مالوش امان واهى بانث عايز ياخذك ف ايجار علشان لما يزهدق
منك يرميكى"
وعيطت مها... وارتبكوا كلهم
نرجس "ازاى بتقولى كده"
طه "لا طبعا احنا مش ممكن نكون بنفكر بالطريقة دى"
ام مها "والله القرار دلوقتى ف ايديكم... احنا عمالين نتنازل نتنازل وانتوا مش عايزين تعملوا لنا
الحاجة الوحيدة اللى تأمن لها حياتها معاها"
نرمين "ماتيجى انتى يا مها تعيشى معانا ف البيت"
مها بتعيط "الحكاية مبقتش اعيش فين... الحكاية باينة من اولها ان طه اخدنى احتياطى ومش مقدر
التنازلات اللى تنازلتها علشانها"
طه "والله ابدأ مش كده خالص"
ام مها "معلش يا طه... احنا قلنا اخر كلام عندنا والقرار ف ايدك"

ام مها بتقف الباب وراهم بعد ما نزلوا... بصت لماما بابتسامة انتصار
مها "تفتكرى ايه؟"
ام مها "كل حاجة مشيت اهى زى ما اتفقنا... وبدل امه مقتنعة وهو متردد كده يبقى اطمنى"
مها "نفسى اعرف بي فكر ف ايه دلوقتى"
ام مها "استنى لما يروحوا وابقى كلمى نرمين وهى تحكيك ساعتها بقى هتعرفى ... ولو لسه متردد
دقى ع الحديد وهو لسه سخن"
مها "اكلمه يعنى واتصعب"
ام مها "طبعا... وشوية حنية من بتوع الايام اللى فاتت على اللعب بحلمه بالخلفة هيبقى عجينة طرية
ف ايدك"

مها بتضحك باطمئنان وهو بتفكر ف كلام مامتها

طه واقف بالعريية قدام بيت نرجس

نرجس جنبه ونرمين ورا
طه "مش هقدر اعمل كده ياماما والله"
نرجس "هو انا طول الطريق عمالة اتحايل عليك على ايه... هي كلمة يا تقولها انت بطريقتك يا اقولها
انا بطريقي... خلصت كده"
طه "ماما... لا بلاش تقوليلها الله يخليكي"
نرمين "طه... انت عايز معاها ولا لأ؟؟... دى قالت لى ان الايام اللي فاتت كنتوا بتتكلّموا كثير ...
معرفش هي قالتلك ولا لا انها بتحبك من زمان ... وباريتك اتجوزتها م الاول والله مكناش وصلنا للى
احنا فيه ده"
طه وهو بيلتفت لنرمين
"من زمان ازاي؟؟"
نرمين "من قبل ما تشوف عالية... وشوف النصيب انت اتجوزت وهي اتخطبت واتجمعتوا تاني...
متعاندش بقى علشان حاجة هايفة قصاصد اللي هي وافقت عليه"
سكت طه بيفكر
نرجس "وبعدين صحيح عالية هتكون ف وسطنا هنا علشان تبقى مطمئن عليها وانت مع معاها"
طه "مش عارف ياماما... صعب اوى"
نرجس "مش احسن ما كنت طلققتها... انا ماصدقت انى افرح بجوازة عليها القيمة هتطلعلى الست
عالية"
طه "خلاص ربنا يسهل... هحاول اقولها"

طه على السرير... ضهره لعالية
بيفكر يتكلم معاها ازاي
يرن موبايله... عالية تصحى على صوت الموبايل من غير ماتلفت
طه يعملها صامت بسرعة... يبص على عالية اللي وشها الناحية الثانية... يلاقىها متحركتش فيعرف انها
نايمة
يقوم يتسحب من جنبها... يخرج البلكونة يرد
"ايوه ياماما... بتعطى ليه"

"كنت فاكراك هتتمسك بيا اكر من كده...ليه علقتنى بيك لما انت مش عايزنى وعند اول موقف

بعتنى بسهولة"

"اهدى بس ومتعيطيش...مين قال انى بعتك"

"يعنى شارينى زى ما انا شارياك"

"اه طبعا"

"بجد يا طه"

"ايوه طبعا"

"ليه مكلمتنيش طيب؟"

"كنت هكلمك الصبح اول ما انزل"

طه واقف وضهره لباب البلكونة

عالية واقفة تسمعه ودموعها نازلة

"كل حاجة هتمشى عادى...انا بس معرفتش اكلها النهاردة"

"هتقولها امى"

"بكرة بالكثير"

"ماشى ياطه...وابقى خلى مامتك تكلم ماما"

"ماشى يالا تصبحى على خير"

مسحت عالية دموعها بسرعة قبل ما يشوفها طه

التفت طه وشاف عالية واقفة بتبتسم له ببساطة

"انتى هنا من امى"

"لما حسيت انك قمت من جنبى"

طه بارتباك "دى...اصل..."

"مالك؟؟ اذا كنت عارفة انك هتتجوز هزعل انك بتكلمها ف التليفون"

دخلت عالية ودخل طه وراها

قعدت على السرير..وقف قصاها

"مش انتى اللى طلبتى اتجوز"

خلاص يا طه... مش كل يوم هتيرر اللي حصل... خرينا ف الامر الواقع من غير ما نفسر ليه
وعلشان ايه"

سكت طه... قعد على السرير وهو يبص ف الارض

سألته "هاا مقلتلش... ايه اللي هتقولهاولى بكرة"

طه وقف الكلام على لسانه

مش عارف يبدأ منين

"لدرجة دى اللي هتقوله صعب؟؟ انت عايز تطلقنى؟"

قالتها بصوت مخنوق ودموعها نزلت غصب عنها

حضرها طه

"ابدا... لا يمكن ابدا اطلقك... انتى حبيبى يا عالية مقدرش استغنى عنك"

"الحمد لله... بدل مش هتطلقنى يبقى اى حاجة هتقولها اهون بكثير... اتكلم يا طه من غير ما تزوق

الكلام"

"انا مش عايز اعمل اى حاجة ترعلك... دول حتى طلبوا منى فرح وانا رفضت خالص"

"ايه اللي مش قادر تقوله؟؟"

"كل الموضوع ان وقفت قصادنا مشكلة الشقة"

عالية ساكنة مستنوية يكمل كلامه

طه ساكت مبيتكلمش... مش عارف يقولها ازاي

"هااا يا طه... وبعدين"

"يعنى الاقتراحات كلها اجمعت ان اسكن انا ومها هنا"

"هنا؟؟ عموما براحتك لو هيربحك نبقي كلنا مع بعض اللي تشوفه"

"لا.. ما هو... اصل يعنى... هتضايقى لما نكون هنا كلنا"

"اومال اروح فين"

"عند ماما... اوضتى هناك موجودة هننقل فيها اوضتنا... وتعدى هناك"

سكتت عالية... مش عارفة ترد

"اصل طبعا مش هتهونى عليا تعدى ف شقة لوحذك فقلت تعدى مع ماما ونرمين يونسوكى

ومتبقيش لوحذك ف الايام اللي هبقى فيها معاها"

عالية وهى بتنام

"مفيش مشكلة... اللي شايفة اريح لنا اعمله... تصبح على خير"

فاتن وعبد الحميد...قاعدين مع ايمن واهله
الجو العام كله ود ومحبة وترحيب من الجانبين
ابو ايمن "احنا اتشرفنا بمعرفتكم يا حاج وفعلا ايمن يا زين ما اختار"
عبد الحميد "الشرف لنا...منورين والله"
ابو ايمن "طيب طلبات حضرتك ايه علشان عايزين نعمل قرابة الفاتحة والشبكة قبل ما يرجع
شغله...فلو عايزين تسألوا علينا شوفوا البيانات اللى عايزها كلها بس خلى بالك م الوقت"
عبد الحميد "ايمن دخل بيتنا كتير وانا عارفه كويس ومش محتاج اسأل عليه"
ابو ايمن "على خيرة الله...نقرا الفاتحة"
فاتن بتبص لعبد الحميد ... بص لها...فهم
عبد الحميد "ام العروسة كان عندها كلمتين بس عايزة تقولهم"
ايمن "اتفضلى ياطنط...خير؟"
فاتن "ميال بنى الوحيدة... ومش هقدر ابعدها...يعنى سفر بعد الجواز لأ"
ايمن "بس ازاي...وانا محبش انى اكون ف حته ومراتى ف حته"
ام ايمن "والله خدتى الكلام من على لسانى...بلا غربة بلا قرف"
ايمن "بس الشغل هناك احسن"
فاتن "انا مليش غيرها ومش هقدر انما تتغرب"
ابو ايمن "خلاص يا ايمن... الحاجة معاها حق... الغربة وحشة يا ابنى...انت اقعد سنة ولا اتنين كمان
وتيجى تستقر هنا خالص وتتجوزوا"
عبد الحميد "حل كويس اوى"
فاتن "ياريت"
ايمن "خلاص...ماشى... نقرا الفاتحة بقى"
فاتن زغرطت وبعدين نادى على ميار

هدير قاعدة ساكنة...وعالية اخدة هنا ف حضنها وساكنة
"وبعدين...هيتجوزوا امتى؟"

"الاسبوع الجأى"
"وانتى نقلتى عند امه بقالك يومين...على كده هيلحقوا يفرشوا"
"طبعاً يلحقوا...مش كلهم مع بعض"
"وباقي عفشك فين"
"فيه حاجات اتباعت وحاجات زى ماهى"
"طبعاً انا لو اتكلمت هتزعلى"
"لا براحتك...معدش عندى طاقة للزعل على حاجة بعد اللى حصل"
"وطه معاكى ايه الاخبار"
"حنيتة وحب زى ماهما بس غصب عنه انشغل"
"يعنى ايه انشغل"
"يعنى بيروحوا يشتروا حاجات ناقصاهم...بيروحوا يظبطوا حاجات ف الشقة...مبقاش فاضى"
"وانتم مع بعض ايه؟؟"
"بقولك مشغول ومش فاضى ويرجع بالليل تعباً"
"يامرارتى يا انااااااااااا"
"لازم اتعود"
"وان شاءالله هيبقى مع كل واحدة يوم ولا اسبوع واسبوع ولا شهر وشهر"
"متكلمناش ف كده خالص"
"انتى عبيطة يابنتى"
"لا مش عبيطة... انا عاجزة ووحيدة وبحبه يا هدير"

مها وطه فى الشقة... بتفرجه على الستائر
"ايه رأيك بدمتك مش ذوقى حلو"
"حلو"
راحت وقفت عند الدولار... وشاورت له
"اوعى تفتح الدولار ده... علشان جايبه شوية حاجات تحفة وعازاها تبقى مفاجأة"
ضحك طه وهو بيقولها
"حاضر مش هفتحه"

راحت وقفت قصاده وحطت ايدها على صدره وهي تبص له
"عارف يا طه... انا هخليك تنسى كل حاجة زعلتك قبل كده... هدلعك دلع عمرك ما شفته قبل
كده... بتحبني؟"
مسك ايديها وشالها من عليه
"مامتك بره"
"مش عريسي حبيبي"
قربت منه اكثر
"خايفة تكون مبتحبينيش"
تأثيرها الانثوى عليه كان اقوى من تفكيره... واستسلم لاحساسه كرجل بين ايديه انثى

(٢٠)

سمعوا صوت ام مها بتنادى عليها
كانوا لسه واقفين قصاد بعض ... فاقوا من نشوة احساسهم
ارتبك طه
"مامتك"
مها وهى بتجيب منديل من شنطتها بتمسح له شفايفه
"استنى فيه روج"
اخذ منها المنديل ... مسح شفايفه
"طب روحى شوفها عايزة ايه ... لتكون شافتنا والباب مفتوح"
"حتى لو شافتنا يعنى ... كلها كام يوم وهبقى مراتك فأكيد مش هتدقق على حاجة بسيطة زى دى"
خرجت مها من الاوضة لما مامتها نادت عليها تانى
قعد طه ... وهو محرج وحاسس بالذنب وف نفس الوقت بيستعيد احساس اللحظات اللى فاتت فى
خياله

نرمين قايمة من النوم الضهر ... بعد ما غسلت وشها
سمعت صوت ف المطبخ ... دخلت المطبخ
كانت عالية واقفة بتطبخ
"انتى بتعملى ايه؟"
"بعمل الغدا"
"كويس ... طابخة ايه بقى"
"عاملة بامية و..."
"بامية ايه مبحبش البامية ... مش تسألى الاول يا عالية"
"سألت والله .. انا مكملتش كلامى ... انا عاملة جنبها صينية بطاطس"
"ايوه كده مبحبش البامية انا"
"نرمين ممكن ننظم مع بعض البيت علشان انتى بتصحى متأخر وانا بصحى بدرى"

"يعنى ايه مش فاهمة"

"يعنى لو مش هيضايقك ابقى اطبخ انا وامسك المطبخ علشان اخلص بدرى"

"يضايقنى ايه... لا ميضايقنيش طبعا... خدى المطبخ ببقية البيت وسيبلى اوضتى انا هبقى اعمالها"

"ماشى مفيش مشكلة... بس ممكن نبقى نتفق من بالليل هطبخ ايه؟؟ علشان النهاردة بقيت مش

عارفة اتصرف واتصلت بماما سألتها"

"طيب ماشى"

نرمين وهى بتتكلم مع عالية... حطت براد الشاى ع النار

وعملت ساندويتش وحطته ف طبق... وحضرت كوباية شاى ف الصينية... وخرجت من المطبخ

والشاى ع النار

دخلت نرمين اوضتها... قعدت ع الكمبيوتر... فتحته وفتحت الفيس

قعدت تقلب ف اكونت طارق

بانت على وشها علامات الغضب... والغليان

ف نفس اللحظة اللى جت فيها عالية بصينية الفطار

نرمين بصوت مسموع كأنها بتكلم الكمبيوتر

"يا وسخ يا ابن الكلب"

اشتمزت عالية من سماع الشتيمة من نرمين... واستغربت

دخلت وحطت الصينية على كرسى

"مالك يا نرمين بتشتكى مين"

نرمين وهى قائمة وبتاخذ الموبايل من ع السرير

وهى بتصرخ فيها

"مفيش حاجة... سيبنى لوحدى"

خرجت عالية من الاوضة بسرعة وهى مستغربة

وسمعت صراخ نرمين ف الموبايل

"انت مفيش فايدة فيك ابدأ.. هتفضل طول عمرك وسخ ومش هتنضف ابدأ... اشتهم كمان ماهو ده
الى انت فالخ فيه...خدوهم بالصوت ... انت زبالة اصلا وتحمد ربنا انى مستحيلة قرفك... غور
ف ٦٠ داهية"

عالية واقفة ف الطرقة مستغربة اسلوب الكلام
افتكرت الاكل اللى ع النار...جريت ع المطبخ
وهى ف المطبخ بتفكر تسأل نرمين مالها وتتكلم معاها ولا تسكت ومتدخلش... وبعد تفكير قررت
انها متدخلش اسلم

بعد ما خلصت وهى قاعدة مستنية طه..سمعتة بيفتح الباب
جريت عليه تستقبله
"حمدالله ع السلامة يا طه... غير هدومك لحد ما اسخن الاكل"
"الله يسلمك.. لا يا عالية مش قادر اكل دلوقتي"
عالية بانكسار
"ليه؟؟انت اكلت بره"
"لا بس مليش نفس... هريخ شوية وبعدين صبحين كمان ساعتين اتغدا وانزل.. اتغدى انتى لو
عايزة"

دخل الاوضة ودخلت وراه
"لا هستناك لما تقوم من النوم"
"ماتتغدى انتى ونرمين... لازم تتعودى تاكلى من غيرى"
قالها من غير ما يفكر... حس بالندم بعدها...حست بيه عالية...ردت بسرعة قبل ما يتضايق
"نرمين لسه فاطرة من شوية... هستناكم نبقى نتغدا كلنا مع بعض"

غير طه هدومه... ونام من غير ما يقولها اى حاجة

خرجت من الاوضة وقفلت الباب وراها

عالية حضرت الغدا... وراحت تصحى طه

وراحت علشان تقول ل نرمين تيجى تنعدا
نرمين متوقعة تلاقى نرمين منهارة من اللي حصل وانهم سابوا بعض هي وخطيها...وقررت انها
هتتقبل منها اى كلام لانها اكيد ف صدمة

خبطت عالية ع الباب خبطة خفيفة وفتحته
لقيت نرمين قاعدة قدام الكمبيوتر...وبتكلم
الى لفت نظر عالية وخلاها مش تتكلم انها شافت نرمين لابسة بادي بحمالات وقاعدة تتكلم
وفاتحة الكاميرا

استجمعت عالية صدمتها واستغراها...اللى مقابلوش اى ارتباك ولا خوف ولا قلق من ناحية نرمين
"نرمين الغدا جاهر"

هزت لها نرمين راسها... وكملت كلام
"طارق انا هروح اتعدا وارجع اكلكم...سلام يا حبي"

عالية واقفة بتبص لها... ومتحركتش من مكانها
"ايه يا عالية...واقفة متخشبة كده ليه؟"
"انتى كنتى بتكلمى طارق؟"
"انتى مش سمعتين بقوله طارق...يبقى طارق"
"اصل من شوية سمعتك بتزعقنى"
"لا خلاص...صالحنى واحنا اصلا مبستغناش عن بعض"
"ربنا يسعدكم بس...."

نرمين بنفاد صبر
"بس ايه...عايزة ايه يا عالية"
"حببتى انتى قاعدة بتكلميه وهو شايفك صح؟"
"هاااااا يعنى عايزة ايه"
"اصل لبسك يعنى"
وزعقت نرمين

"نعم... يا حتى... ماله لبسى ان شاء الله... ثم ان انتى مالك تتدخلى ف حياتى ليه... اسمعى يا عالية
انتى قاعدة هنا.. ماشى... مستحملكى علشان خاطر اخويا.. ماشى... انما تتدخلى ف حياتى
لأ... فاهمة"

"مش قصدى اتدخل بس انا حبيت انصحك"
"انصحى نفسك وخليكى ف حالك"

جه طه على صوت نرمين
"فى ايه... مالكم"
نرمين "ادى اللى قتلولى معلىش تونسك... جاية تقرفنى وتتدخل ف كل حاجة بعملها"
طه اتنرفز "اتكلمى كويس يا نرمين واحترمى نفسك"
نرمين "ما تقولها هى مالهش دعوة بيا"
عالية حسست بالاهانة... عيطت من غير ماترد
طه "متزعلىش يا عالية حقك عليا"
نرمين "ياسلام... هى نزلتها دمعتين هتقوم مزعقلى انا"
طه بيشخط فيها "انتى مش عاملة احترام لحد"
عالية وهى بتشد طه بعد ما مسحت دموعها
"خلاص يا طه... حصل خير خلاص... يالا نتغدا يا نرمين"
نرمين "مش عايزة"
طه "ان شالله عنك ما كلتى... يالا يا عالية"

طه وعالية وهما بيتغدوا
"هو ايه اللى حصل"
"مفيش حاجة ياطه... متشغلش بالك انت سوء تفاهم بس"
"معلىش متزعلىش من نرمين ومن طريققتها... حقك عليا انا"
"انا ميهمنيش حاجة ف الدنيا غير رضالك عليا... ربنا يخليك ليا"
"ويخليكى ليا يا حبيبى"

فرحت عالية بكلامه... حسست بصدق احساسه وهو بيقولها يا حبيبى ودى كانت اكرت حاجة ممكن
تفرحها

عالية قاعدة بتتكلم ف التليفون

"الو...ازيك يا هدير... عاملة ايه.. انا كويسة الحمدلله... قاعدة لوحدى اهو قلت اطمئن عليكى ...
نرمين مع خطيبها وطه ومامته بره... اه بكرة هيتجوز... مليش دعوة ميسألش.. الحمدلله على كل
حال... كل ما احس انى متضايقه اوى ومخنوقة اقوم اتوضا واصلى وافضل اقرا قران وادعى ربنا لحد
ما احس ان نزل ف قلبى صبر عجيب... والله الصبر ده من عند ربنا... مفيش جديد... اه متغير
طبعاً بس معذور هيعمل ايه... لا مليش دعوة بيها من ساعة المشكلة اللى حصلت... الكلام عادى
ف حدود بس... مامته بتزل الصبح وبترجع بالليل وحرام مش محسسانى انى ضيفه ومش بتضايقنى
... بالعكس محسسانى كأتى ف بيتى.. اول كام يوم كنت بسألها اعمل ايه ف الاكل وكده كانت
بتقولى... بعد كده قالت لى اتصرفى انتى كأنك ف بيتك ومتسألينش.. اهو ربنا كريم مش هيبقى من
كله... اه يا هدير بالله عليكى ادعيلى كتير يحن قلبهم كلهم عليا... سيك منى بقى وقوليلى
صحتك عاملة ايه؟؟ المرة دى شكلك تعبانة اكثر من المرات اللى فاتت... هتروحي له امى؟؟... ابقى
قوليلى قبلها بيوم اجى معاكى"

وسمعت صوت الباب بيتفتح

"ماشى يا هدير... مش عارفة مين منهم جه... هقفل معاكى دلوقتى.. هبقى اكلملك بكرة... سلام"

دخلت نرمين وطارق

طارق "سلامو عليكو"

عالية وهى متفاجئة... جريت على باب البلكونة اللى معلقة عليه طرحة... لبستها بسرعة

نرمين "مالك متلخبطة كده... مفيش حد غريب"

عالية "اهلا وسهلا"

طارق مد ايده يسلم عليها

"اهلا بيكى"

سلمت وهى مرتبكة... وخطفت ايدها بسرعة

بصت له... كان مركز نظره عليها وهو بيص لها بابتسامة ضايقتها

نرمين اول ما دخلت... دخلت على اوضتها تخط الحاجات اللى اشترتها.. ورجعت لهم تانى

"انتوا واقفين ليه... اقعد يا طارق"

استغربت عالية... ومقدرتش تسكت

عالية "هو هيقعد وطه مش موجود؟؟"

نرمين "نعم؟؟ هو مفيش فايده برضه بتدخل ف اللى ملكيش فيه"

عالية "لو طه جه دلوقتى واحنا قاعدين كده هيتضايق... انا اسفة يا طارق معلش متزعلش من بس الاصول اصول"

ارتبك طارق وهو مش متوقع

طارق "لا عادى ولا يهمك... استأذن انا"

نرمين وهى بترقع "تستأذن مين؟؟ والله ما انت قايم... هى مش عاجبها تدخل تقعد ف اوضتها"

عالية "ميصحش يا نرمين انا ادخل واسيكم لو حدكم"

نرمين "يااااااربي انت جيت لى انا ... انا كان مالى هما يتجوزوا واقعد انا ف القرف ده"

عالية "الله يسامحك"

نرمين "انتي مستغرة اوى على فكرة... وباردة كمان"

طارق "اهدى يا نرمين... هبقى اجى مرة تانية"

نرمين "لا... مش هتمشى كلامها علينا ف بيتنا... اسمعى طارق يبجي ف اى وقت بدل انا مش لوحدي يبقى عادى"

عالية وهى مستغربة "هو كان بيعيلك وماما ف المحل"

نرمين "قصداك ايه... عازية تشكى فينا... روحى اجرى قوى لطه علشان توقعى الدنيا"

طارق "مينفعش كده بقى هتفضلوا تتخانقوا بسيى"

ووجه كلامه لعالية

"خلاص يا سنى انا اسف... بس لو عايز اجى ازور خطيبتى ابقي استأذذك الاول؟"

عالية "وتستأذى انا ليه؟؟ استأذن راجل البيت"

نرمين بتضحك "راجل البيت مين... طه ههههه"

عالية متضايقة علشان طه

"ايوه طبعا"

نرمين "لا ياما.. طه عمره ماكان فاضى لى وانا مش همشى بأمره"

عالية "خلاص ..ابقى استأذن مامتھا وانا مليش دعوة ...اللى هتقول عليه صاحبة البيت هو اللی هیمشی"

طارق "ماشى... سلام يا نرمين"
نرمين وهى بتبص لعالية شذرا... راحت ورا طارق ع الباب
"حبيى متزعلىش علشان خاطرى... ربنا بلانى بواحدة متخلفة ومعقدة تطلع عقدها عليها"
"بصى لو مامتك موقتهاش عند حدها انا مش جاى تانى"
"لا متقلقش انا هتصرف... متزعلىش انت بس"
"ماشى... البت مها كانت سكرة مش دى"
"وانا مين يكفرنى ف عيشتى... مها سابتنى للعقد دى"

عالية بعد ما خلصت كلامها معاهم وشافتهم رايجين ع الباب
دخلت اوضتها وفكرت تقول لظه ولا لأ
وقررت انها متقولوش علشان ميحصلش مشاكل بسببها

ظه نايم صاحى... وعالية نايمه صاحية
"عالية"
"نعم"
"صاحية؟"
"ايوه عايز حاجة"
"اه"
قامت قعدت
"نعم يا حبيى عايز اجييلك حاجة"
قام قعد جنبها
"انتى مسامحانى بجد... مش زعلانة منى"
"ايوه"
"ليه حاسس انك محببة عليها احساسك"
"علشان مليش حق انى ازعل... انا اهم حاجة عندى انك متبعدش عنى وتسيبنى"
وبدأت دموعها تتزل

"انا بحبك اوى يا طه... انا عندى اتعذب وانا شايفاك بتتجوز ارحم من انى اموت وانت بعيد
عنى... انا بس عايزة اعرف انت لسه بتحبني"
اخدها ف حضنه وهو ييططب عليها
"طبعاً بحبك"
"حاسة انك مبتتش تحبني زى الاول"
"بالعكس... انا مقدرش اتخيل حياتي من غيرك... انتى حبيبتي يا عالية... وحشتيني اوى"

نرمين قاعدة قدام الكمبيوتر... رن موبايلها
"الو...ايوه يامها ازيك...مبروك يا عروسة"
"بلا عروسة بلا زفت... طه فين"
"مالك فى ايه... دخل نام من شوية"
"والزففة فين"
"مخمودة"
"لا واضح اوى اناهم ولا نايمين ولا نيلة... البيه كنسل عليا وقفل التلفون بعدها"
"هههههه"
"بتضحكى يا نرمين وانا والعة"
"طب اعمل ايه"
"روحي خبطى عليه خليه يكلمنى"
"لا اتكسف افرضى يعنى"
"ماهو علشان انا متأكدة اناهم صاحيين بقولك قومي خبطى عليه خليه يكلمنى...قومي يانرمين
متترفرنيش"
قامت نرمين..وراحت بتردد خبطت على الباب
نرمين "طه انت صاحى؟"
طه"ايوه...عايزة حاجة"
نرمين"مها ع التلفون عايزاك"
طه"طيب قوليلها هكلمها كمان شوية"
نرمين"طيب"

بعدت عن الباب... وكملت كلامها
"يقولك هيكلماك كمان شوية"
"اخوكي ده معندوش دم ومستفز... يحرق دمي كده انا غلطانة انا راضية بالوضع ده"
قفلت مها ف وش نرمين... نرمين استغربت
نرجس خارجة من الحمام
"واقفة كده ليه"
"تعالى بقى علشان احكيك على كل اللي حصل النهاردة لحد دلوقتي علشان تتصرفي... اخويا
هيتجوز اتنين علشان يطلعوا عيني انا"
نرجس وهي داخلة اوضتها ونرمين وراها
"تعالى احكي لي"

(٢١)

نرجس وهى قاعدة ع السرير ونرمين قصاها
"ايه ساكنة ليه؟"
"هو طارق كان بيعجى غير يوم الجمعة"
"ساعات وبظروفها ومش دائما ومكنتش ببقى لوحدى"
"مكنتش بتقولى يعنى"
"يعنى لما بيعجى نص ساعة وانتى بترجعى بالليل مهدودة هحكيلك ايه...ايه المهم فيها"
"وانتى مش عارفة انه ميصحش"
"ميصحش لو انا لوحدى...انما كانت مها بتبقى معانا...ماهو لما بيعجى الجمعة بتكونى انتى لوحداك
اللى معانا ف البيت"
نرجس ساكنة وبتفكر...كملت نرمين كلامها لما شافت نرجس ساكنة
"مالك؟"
"اوعى يكون حصل حاجة كده ولا كده"
انفعلت نرمين وهى بتدافع عن نفسها
"والله ابداء...وبعدين ياماما انتى على طول ف المحل ... لو انتى مش واثقة فيا اقعدى معايا"
"انا عايزة اطمن عليكى بس"
"متخافيش...انا بحافظ على نفسى كويس"
"وحكاية مها ايه دى كمان...هايتهاالى ع التليفون"
"هتقوليلها ايه"
"اطلبيلها بس"
واتصلت نرمين بمها بالموبايل اللى لسه ف ايدها
اخذت منها نرجس الموبايل قبل ما ترد
مها قاعدة بتغلى... اول ماشافت اتصال نرمين ردت بعصبية
"عايزة ايه يا زفتة"
"ايه يا مها اللى حصل فيه ايه؟"

مها "سورى ياطنط افتكرتك نرمين... انتى يرضيكى اللى بيحصل ده"

"ايه اللى بيحصل غريب يعنى"

مها بعصية" لما هو نايم ف حضنها هيتجوزنى ليه... واتصل بيه بكل جرأة يقفل التليفون يعنى مش

هامه"

نرجس "خلصتى خلاص"

مها"انتى شايفة حرقه الدم دى عادى"

"تكونيش اتفاجئت انه متجوز"

واتفاجئت مها ان نرجس مش معاها... اتكلمت بطريقة اهدا

"يعنى يرضيكى... انا مش ممكن اسكت له على فكرة"

نرجس بهدوء

"طب بصى يا مها.. طه بيحب عالية ولازم تفهمى كده كويس... زمان لما رفضت جوازهم كان

هيسينى علشانها... حظيت جزمة ف بوى وسكتت علشان محسرش ابني... طول السنين اللى فاتت

بتحاييل عليه يتجوز وكان بيرفض ولما هى اللى قالت له سمع كلامها... بعاملها كويس ومستحملها

ف بيتى وانا مبجهاش علشان خاطره... م الاخر كده لو خيرتية بين اى حد وبينها هيختارها

هى... روى بقى اتخانق معاها وفركشى الجوازة اللى كل الناس عارفة انها بكرة... اعقلى الكلام

ف دماغك وانتى حرة... مع السلامة"

قفلت نرجس الموبايل واديته لنرمين

"ماما... هو صحيح طه بيحبها كده"

"مش شايفة يعنى"

"تفتكرى طارق بيحبني كده"

"او مال يعنى خطبك ليه؟"

وافتكرت نرمين تحاييلها على طارق علشان ييجى يخطبها

"المهم... قوليلها مالهاش دعوة بيا ياماما ولا تتدخل بينى وبين طارق تانى"

"طيب... قومى انتى واطفى النور عايزة انام"

قامت نرمين وخرجت م الاوضة

مها بعد ما قفلت مع نرجس قاعد تعضعض ف شفايفها من الغيظ ومامتها معاها

"احمدى ربنا انما قالت لك كده"

"ليه بقى ان شاءالله"

"علشان حذرتك قبل ما تنترفرى على طه وكان ممكن ساعتها تخسرى كل حاجة"

"المفروض انى بعد كل ده ابقى عادى"

"مش عادى وبس..انتى متتكلميش ف الموضوع ده خالص"

"باردة انا؟"

"الست جابتها لك على بلاطة...وقالتلك المقارنة دلوقتى خسرانة"

"وانا ايه اللى يجبرنى استحمل"

"استحملى لحد ما تخلفى العيل اللى نفسهم فيه"

"وبعدين؟"

"وبعدين كل حاجة هتتقلب لصالحك انتى...ساعتها هتبقى انتى الاقوى"

"ولحد ما اخلف اطق م الغيظ"

"لا...بس عندك مليون طريقة تخليه ميقدرش يبعد عنك... وانى وشطارتك بقى"

طه على السرير... محاوط عالية بدراعه وحاضنها

عالية جنبه ساند راسها على صدره العارى

كل واحد فيهم سرحان ويفكر من غير ماينطق

"ياترى يا عالية زعلانة منى؟"

"خايفة اوى تبعد عنى"

"انا كاره ضعفى اللى خلاق اوافق على الجواز... كاره ضعفى اللى مخلينى استسلم لرغبتى ف انى

اشوف طفل منى"

"ياترى هتفضل تحبى حتى بعد ما تخلف ولا مع الوقت هتنسان وتحبها هى؟"

همت عالية انما تقوم...حط طه ايده عليها

"رايحة فين"

"قايمة"

"لا خليكى ف حضنى... مش عايزك تبعدى عنى"

"انا خايفة انك تبعد عني وتنساني يا طه"

"معقول اللي بتقوله ده"

"ايوه... انا عارفة ان الظروف دائما بتكون اقوى من الانسان... عارفة وفاهمة ده كويس...بس انا

ممكن استحمل اى حاجة الا انك تبعد عني وتنساني"

"اطمني... انا متخيلش حياتي بعيد عنك...وان كان قصدك على انى ممكن اتجوز وانساكى ده

مستحيل... انتى روحى يا عالية...بس يمكن ف الاول شوية هبقى معاها وبعد كده هبقى هنا وهناك

اطمني"

"انا مطمئنة طول ما انت بتحبني"

"كنت عايز اقولك حاجة ومتردد"

"قول يا حبيبى"

"مش هتكونى معايا...بكرة"

ردت عالية بحزم

"لأ... ومن غير شرح اسباب"

نرمين داخله المطبخ لنرجس وعالية

"ماما انا نازلة علشان معاد الكوافير... مها قالت لى ان طه هيوصلها"

نرمين بتتكلم وعينيها على عالية علشان تغيظها

نرجس "طيب مش هيعدى عليكى ليه"

نرمين "قال لى مش فاضى... بس طبعا لمها مقالهاش لأ"

عالية سامعة الكلام ومتجاهلاه تماما

نرجس "طيب انزلى وانا هبقى اجيلكم على هناك"

نرمين "ماشى...متتأخروش بقى..مش انتى جاية يا عالية"

عالية من غير ما تبص لها

"لأ"

شدتها نرجس بره المطبخ

"ماتسكتي"

"في ايه انا بتكلم عادى"

"طب يالا انزلى مش عايزة مشاكل النهاردة...وقوليلي متعرفيش مها وطه عملوا ايه امبارح"

"اه..كلمها بالليل ومتفتحش معاها اى كلام خالص...شكلها خافت من كلامك"

"احسن... انا هلاقيها منين ولا منين...يالا انزلى وابقى كلميني لما توصلى"

عالية قاعدة...بتبص ف الساعة...حاسة بضربات قلبها سريعة

ونفسها بيضيق وبتتخنق كل لحظة بتعدى اكر من اللي قبلها

سمعت صوت باب الاوضة بيتفتح

وخرج طه ومامته وراه من الاوضة

طه لابس بدلة سودة جديدة ووراه نرجس بتزغرط

التفت طه لنرجس...خلالها قطعت الزغروطة

قامت عالية وقفت وهى بتبص له... وبتحاول بكل قوتها انها تتحكم ف رد فعلها

راح ناحيتها...سلم عليها

"مش عايزة حاجة قبل ما انزل"

حست عالية ان روحها بتتسحب منها وهى شايغة طه رايح يتجوز واحدة تانية... مش عارفة ترد

عليه ولا صوتها بيطلع

هزت راسها بالنفى

"هتوحشيني... لو فيه اى حاجة كلميني اى وقت"

نرجس "ايه يا طه...انت سايبها ف غابة ماهى قاعدة معززة مكرمة"

طه وهو بيلتفت لنرجس

"خلي بالك منها...اوعى حد يزعلها"

نرجس بترد باستعجال

"متخافش مش هناكلها...يالا بقى"

باسها طه من راسها...وراح ورا نرجس

راحت وراه عالية لحد الباب
سلموا على بعض تانى عند الباب
خرجوا...وقفلت وراهم الباب
ولحظة ما قفلت الباب
مقدرتش تمشى خطوة واحدة
قعدت ع الارض ورا الباب وهى بتعيط بحرقة

نرمين ومها فى الكوافير
مها لابسة ومخلصة ونرمين كمان خلصت ومستنيين طه
تشاور مها لنرمين
"قوليلى... الزفتة عملت ايه النهاردة"
"ولا حاجة"
"ولا حاجة ازاى...انتى مغيظتيهاش زى ماقتلك"
"ياختى دى باردة برود...ايه ده مشفتش كده"
"انا مش عارفة بيعحب فيها ايه...طب بقولك ايه موصكيش بقى النهاردة لما تروحى... وبكرة
كلمينى قدامها ونقعد نغيظ فيها شوية"
"ماشى...ده انا مش طايقاها من الاول وحت حكاية تدخلها بينى وبين طارق دى خلتنى مش
طايقاها اكتر"
"طارق فىن صحيح؟"
"هيجى كمان شوية...مستلف عربية من واحد صاحبه وهنعملكم احلى زفة"
مها بتبص على نفسها فى المراية...بأعجاب وفرحة

عالية بتصلى وهى بتعيط... وصوت عياطها على
بتدعى ف سجودها بالصبر

يرن الموبايل.. تخلص صلاة يكون الموبايل سكت

تروح تشوف الاتصال... تتصل وهي مستغربة

"الو... عصام؟؟"

"ازيك يا عالية"

"الحمد لله...مالك؟"

"هدير تعبت اوى من شوية...وسبت البنات عند الجيران واخذتها للدكتور"

عالية قاطعته من القلق

"مالها؟؟مش لسه معادها عند الدكتور الاسبوع الجاي"

"ايوه...بس تعبت فجأة... والدكتور قال ان المرة دى صعبة ولازم يفتح قيصرى"

"يا حبيبتي... انتم عند الدكتور"

"اه"

"وهى فين"

"دخلت اوضة العمليات"

"طيب يا عصام...شوية وجاية...بس البنات"

"متخافيش البنات عند الجيران...ف امان يعنى...انا بس خايف اوى وهى قالت لى قبل ما تدخل

العمليات انها عايزاكي"

"طيب...مسافة السكة ان شاءالله"

قفلت مع عصام... وفضلت مترددة

"انزل...ولا اتصل بطه... لو اتصلت هيتضايقوا كلهم...ومقدرش انزل من غير ما اقوله"

حسنت التردد...واتصلت وهى متخوفة من رد الفعل اللى ممكن تتسبب فيه وخصوصا لما نرجس

ترجع ممكن تبهدلها وهى لوحدها

قبل ما تسمع الجرس قفلت...وقررت انها تتصل بنرجس

نرجس فى العربية مع طارق ونرمين

وقدامهم عربية طه وفيها العروسين

نرجس بتفتح الشنطة... بصت ف الموبايل
"وطى يا طارق الاغانى دى اما اشوف عايزة ايه الست عالية"
وطا طارق الكاسيت... وردت نرجس وطارق مركز مع المكالمه
"ايوه يا عالية... خير... طيب ما تروحي... لا كويس انك متصلتيش بطه واوعى تتصلى بيه اليومين
دول... روحى طيب... لو اتكلم هبقى اقله ان انا اللي قتلتك... مع السلامة"
قفلت معاها... بصت لها نرمين
"عايزة ايه؟"
"صاحبيتها بتولد وعايزة تروح لها"
"واحنا مالنا"
"بتستأذن قبل ما تترل"
"اووووف... هايفة اوى... قال تستأذن قال... على ياطارق خلىنا ندخل المود تانى اللي فصلتنا منه
الكثيبيه دى"
طارق بص لها بضيق... وهو بيعلى الكاسيت ويدور وشه بعيد عنها

(٢٢)

عالية وعصام قاعدين قدام اوضة العمليات
عالية ف حضنها المولود...عصام كل شوية يقوم بمشى شوية ويرجع يقعد تانى
عالية رغم قلقها بس فرحتها بالمولود اللي بين ايديها كانت مخففة القلق شوية

اتفتحت باب اوضة العمليات
خرجت هدير...راحوا وراها لحد الاوضة
وقبل الممرضة ما تخرج
عالية"هى ما فاقتش ليه؟"
الممرضة"لا هى كده يعتبر فاقت...دقايق بس وهترد عليكم"
عصام"يعنى هى كويسة"
الممرضة"اه كويسة...الدكتور هيمر على اللي ولدوا الصبح وبعدين يبجي لها"
خرجت الممرضة...راح عصام وقف جنب هدير
"هدير...هدير سامعانى"
هدير مبتردش...مسك ايديها
"هدير"

سابت عالية المواد على السرير...وجت بقلق وقفت جنب هدير
اول ما نطقت هدير كانت بتتألم
اطمنوا الاتنين...وبالتدريج بدأت ترد عليهم

مها وطه طالعين شقتهم
واهلهم وراهم...ام مها ونرجس ونرمين

وصلوهم وهما بيزغرطوا وفرحانين
وقبل ما يمشوا... نادت مها على نرمين
"مش هوصيكي بقي...عايزاها تولع"
نرمين "حاضر...من غير ماتقولى "

طه شافهم يتوشوشوا وهما ع الباب قرب منهم وسأل مها
"ايه فى حاجة"
مها "لا ابدا كنت بسلم على نرمين بس"
نرمين "ياللا...مع السلامة...ابقى كلمينى يا مها"
نزلت نرمين وقفلت مها الباب وراها وهى بتبتسم لطفه متصنعة الكسوف

هدير ع السرير وعصام واقف جنبها
عصام "هدير...هروح اطمن على البنات وارجعلك"
عالية "متخليش البنات يياتوا عند حد...بات معاهم وانا هبات مع هدير"
هدير "اه ياعصام...اطمن عالية معايا"
عصام "خلاص اللى تشوفوه...هجيّب البنات واجيلكم بدرى ان شاءالله"
عالية "وتجيّب البنات ليه...مش الدكتور قال هنمشى بكرة بدرى...خليهم وابقى تعالى خدنا الصبح"
عصام "ماشى...تصبحوا على خير"
قرب عصام من عالية...وباس المولود اللى شايله...ومشى

عالية بعد شوية...
"هدير...حاسة بإيه دلوقتى؟"
"تعبانة اوى والله...مكنتش اعرف ان القيصرى متعب كده"
"الحمدلله انك قمتى بالسلامة...كله يهون علشان عيون القمر ده...ربنا يبارك فيه"
"عقبالك يا عالية"
ابتسمت عالية بحزن...حست بيها هدير
"انا اسفة انى تعبتك معايا"

"تعبتني ف ايه بس.. شايفاني يعني بنحت ف الصخر ما انا قاعدة اهو"
"مش قصدي... بس اني اجيبك ف مستشفى ولادة وممكن ده يتعبك اكثر"
حست هدير بالندم انها اتكلمت كده... كملت
"انا ايه اللي بقوله ده... هو البنج بيخلي الواحد معندوش احساس للدرجة دي"
ضحكت لها عالية لما فهمت ان هدير خافت على زعلها
"ايه يا هدير... انتي خايفة ازعل منك؟ هو احنا بيننا كسوف ف اى حاجة... ده انا كل اللي جوايا
بحكيهولك انتي زي ما بتحكيلى كل اللي جواكى"
"ربنا يعوض صبرك خير"
"انت تعرفي اني النهاردة حسيت ان ربنا راضى عني"
"النهاردة!! وجوزك رايح يتجوز"
"ايوه... انا من كام ساعة بس كنت بموت لوحدي ف البيت... مكتتش عارفة لحد ما يرجعوا
هياقوني لسه عايشة ولا اكون مت م القهر اللي انا فيه... صليت ودعيت ربنا يصبرني... قبل ما
اخالص كان عصام بيتصل بيا ويقول اجي لك... ربنا مخذلنيش واراد اني ابعد عن البيت خالص
وانشغل معاكي وبيكي... شفقي ربنا حنين علينا ازاي"
"ونعم بالله... ده علشان انتي صابرة يا عالية"
"مفيش قدامي حل غير اني اصبر... ربنا كريم... مقلتلش هتسموا النونو ايه؟"
"محمود ان شاءالله"
"اسم جميل زيه... وانت حاولي تنامي اتكلمنا كثير وانت مش قادرة... انا سهرانة مع محمود"

نرمين داخله على نرجس اوضتها بتصحياها

"ماما... ماما"

نرجس بخضة "ايه ف ايه"

"الساعة ٥ الصبح"

"اعمل ايه يعني"

"عالية مجتش لحد دلوقتي"

"ايوه ما انا عارفة"

"عارفة ايه"

"كلمتني وقالت هتبات عند صاحبته"
"من اول يوم طه يغيب كده هتروح تبات بره...لو طه عرف مكنش سكت لها"
اتعدلت نرجس وقعدت
"بقولك ايه...ولا تقوليله ولا تجييله سيرة خالص"
"ليه يعنى...مش لازم يعرف مراته بتروح فين"
"ياختى اتوكسى...هتروح فين يعنى"
"ياسلاااااام...ده ايه الثقة دى كلها"
"لو كانت وحسة كان بان عليها...سيبك انتى بس منها"
قامت نرمين بغيظ
"طيب...حضرة الشريفة حضرتمنا وانا امبارح تشكى فيا وتسأليني حصل حاجة بينك وبين طارق"
واتكلمت نرجس بلهجة تحذيرية
"شوفى يا نرمين...انا مبحبش الامخاخ الوسخة...لو بيتاخذ بالمظاهر كانت الناس اتكلموا عليا بعد
ابوكى ما مات...وكان الناس اتكلموا عليكى علشان اخدة حريتك بتخرجى وتدخلى اى وقت
وبتقعدى طول اليوم لوحدهك...متجيش بقى للى لا بتروح ولا بتيجى وتشكى فيها"
"مش عارفة عملت لك ايه خللتك تدافعى عنها كده"
"من جهة عملت فهى عملت"
"ايه بقى"
"كفاية انما نفذت كل اللى قلت لها عليه من غير ماتقول لظه...ومكرهتش ابني فيا طول السنين اللى
فاتت...مش معنى انى مبجهاش انكر اللى هى عملته"
نرمين بغيظ
"ماشى...انتى حرة...بس برضه مش طايقاها"

طه صحا من النوم...مها نايمة
قام من جنبها همدوء...بيدور ع الموبايل بشويش قبل ما تصح
ملقاهاوش ف الاوضة...خرج يدور عليه فى كل حنة ف البيت
قامت مها م النوم...شافته ف الانتريه

"صباح الخير يا حبيبي"
"صباح النور"
"مصحتنيش ليه"
"لا ابدأ انا لسه صاحي"
"طيب انا داخلة الحمام.. وانت حضر الفطار"
"احضر الفطار !!؟!"
"اه... مش انا عروسة ولازم عريسي يدلعي"
وقربت منه وحضنته بدلع
"مش انا كمان بدلعك"
ضحكت بصوت عالي وراحت ناحية الحمام... نادى عليها
"مهااا... مشفتيش الموبايل"
"عايزه ف ايه"
"عايز اكلهم ماما واطمن عليها"
"ماما برضه؟"
"مش فاهم ايه المشكلة... هكلمهم كلهم اكمين عليهم"
"لا يا حبيبي... احنا عرسان... انا اخدت موبايلي وموبايلك وقفلتهم وخبيتهم والحمدلله ان تليفون
البيت مرفوع ... انا عايزة نبقي انا وانت وبس من غير اى ازعاج خالص"
"يعني منطمنش على اهلنا... ازاي ده؟"
"كده... ومتقلقش مش هتزهق خالص"

فاتن مع ميار وايمى بيشتروا حاجات
ايمى "طنط... كده لسه فاضل نحجز الجاتوه"
فاتن "خلاص نمشى احنا وكمل مشاويرك انت"
ايمى "طيب ممكن ميار تيجي معايا"
فاتن "ماشى... انا هروح اعمل كام مشوار كده وابقوا كلموني لما تخلصوا"
ميار "رايحة فين"
فاتن "هروح اعزم خالك"

ميّار "ماتكلمهم ف التليفون"
فاتن "لا ميصحش مش كفاية انا من زمان مسألّتش عليهم... لازم اروح اعزمهم واديهم الكارت
بنفسى"
ميّار "وهو خالو هيبقى ف البيت دلوقتى"
فاتن "هسيب الكارت مع عالية... يبقى اسمى اهتميت وروحت بنفسى"
ايمن "ناخد تاكسى نوصلك وبعدين نكمل انا وميّار"

فاتن واقفة بتضرب الجرس
مها وطه يسمعوا جرس الباب... يقوم طه
مها "مين؟؟"
طه "يمكن مامتك رجعت تاني لاي سبب... هشوف مين"
طه بيفتح الباب... شاف فاتن قدامه
طه مستغرب.. وف نفس الوقت رحب بيها قبل ما تاخذ بالها من استغرابه
فاتن "...اهلا وسهلا"
فاتن وهى بتسلم عليه وتبوسه
"ازيك يا طه... ايه ده انت مش ف المحل النهاردة"
طه بيوسع لها تدخل وهو مرتبك
"اتفضلى"
دخلت... قفل الباب وراها
جت مها م الاوضة... لابسة قميص نوم وروب
فاتن كانت لسه هتقعده... اول ما شافتها قامت تاني من الخضة لما شافت واحدة تانية غير عالية
كل اللى فكرت فيه ان طه جايب واحدة البيت ويبخون عالية
فاتن "مين دى؟"
مها وهى رايحة ناحية فاتن
"انتى اللى مين؟"

طه "دى فاتن اختي"
مها "آآآآه... اهلا وسهلا... اتفضلى"
فاتن باستغراب ونفس الفكرة ف دماغها
"مين دى؟؟"
طه بصوت واطى...
"مراتى"
فاتن "مراك!! وعالية فين؟"
مها "اتفضلى الاول اقعدى وقوليلنا ميروك بدل كل الاسئلة دى"
فاتن برقت عينيها من الطريقة اللى مها بتتكلم بيها
طه "اتفضلى اقعدى يافاتن"
فاتن حسست انها مش عارفة تتكلم ولا تقول ايه
قعدت على طرف الكنبه... وقعد معاها طه
"مها لو سمحتى اعملى حاجة لفاتن تشرها"
مها "انت عايزنى امشى علشان تتكلم من ورايا... اللى عايز تقوله قوله قدامى"
قعدت مها معاهم متجاهلة كلام طه
طه اتفاجئ برد فعل مها اللى تجاهلت كلامه واتصرفت زى ماهى عايزة
فاتن "انا عايزة افهم حاجة بس... انت وعالية اتطلقتوا؟"
طه "لا... عالية عند ماما"
فاتن مستنكرة "وانت اتجوزت هنا"
مها "مش ملاحظة انك لسه مقليلناش ميروك... ده حتى احنا عرسان بقالنا يومين واستغربنا مين جاي
لنا من غير معاد"
فاتن "انا اسفة جدا انى جيت من غير معاد... اصل انا لما كنت باجى لعالية مكنتش باخد مواعيد
قبلها"
طه "انتى تنورى ف اى وقت يافاتن"
فاتن وهى قائمة... فتحت شنطتها طلعت كارت
"خطوبة ميار يوم الخميس وكنت جاية اعزمك انت وعالية... انا هتصل بعالية واعزمها... هستناكم"
مها "ميروك... هنيجي ان شاء الله"
فاتن وهى بتبص لها

"انا شفتك قبل كده"

مها"اه...اتقابلنا.. انا صاحبة نرمن من زمان"

فاتن متعمدة تغيطها

"اه شفتك ف كتب كتاب طه وعالية ويوم الفرح كمان"

اتعاضت مها... وحبب ترد الغيط لفاتن

"ياترى عزمى نرمن وطنط ولا لأ...مش نرمن حالة العروسة برضه ودى اصول"

فاتن مكنتش ناوية تعزمهم... واضطرت ترد على مها

"اه هعزمهم طبعاً...انا هبقى اودى الكارت لابله نرجس ف المحل... استأذن انا"

راحت فاتن ع الباب...راح طه يوصلها ومها واقفة مكانها

نزلت فاتن من عند طه وهى متضايقة وموجوعة علشان عالية

"يا حبيبى يا عالية...هو الغلبان ياربى مبيشبعش غُلب... احص عليك يا طه تتحوز عليها وتسيبها

مع العقارب"

اول حاجة عملتها وهى ف الشارع... اتصلت بعالية تطمن عليها وتواسيها

"الو...ازيك يا عالية...عاملة ايه يا حبيبى"

"الحمدلله...وحشانى يا ابله والله"

"وانتى يا حبيبى... انا جيتلك البيت وعرفت اللى حصل"

"نصيب يا ابله...الحمدلله"

"لو مكنتيش ف بيت نرجس كنت جيتلك...ابقى تعاليلى يا عالية وخطوبة ميار يوم الخميس

والكارت مع طه"

"الف مبروك يا ابله ربنا يتمم لها بخير...على فكرة هدير بتسلم عليكى"

"هى عندك؟"

"لا انا اللى عنها...هدير ولدت من يومين وانا قاعدة معاها"

"والله؟؟ طيب انا جاية لكم شوية"

"اهلا وسهلا يا ابله تنورى...مستنينك"

مها قاعدة تحط ميك اب... وطه قاعد ع السرير
"ليه كلمتي فاتن بالطريقة دي مش عيب"
"انا عملت حاجة؟ انا بس حسستها اني بقيت مراتك زى عالية"
"وهتيجي معايا الخطوبة؟"
"اه طبعا...هنروح كلنا... انا وانت وطنط ونرمين وطارق اكيد"
قال طه مؤكدا "وعالية"
ردت مها وهي بتنفخ
"وعالية"

(٢٣)

فاتن قاعدة جنب سرير هدير
عالية بتقدم لها حاجة ساقعة وبتقعد
فاتن "معقول يا ولاد كل ده يحصل"
عالية "حقه يا ابلة"
هدير بانفعال "كسر حقه... لا مؤاخذه يا ابلة... متزعزعيش يا عالية بس بتنترفز... منها لله اللي كانت
السبب"
فاتن "نرجس برضه؟"
هدير "تخلي يا ابلة... تخليها هي اللي تطلب انه يتجوز... انا مش عارفة ازاي فيه ناس بالجبروت ده"
فاتن "ليه وافقتي على كلامها يا عالية؟؟... ليه مرفضتيش"
عالية "علشان طه... علشان عارفة انه نفسه يخلف ومعدوش اللي يمنعه من الخلفة غيرى... علشان
طه صرف عليا كتير علاج وعمليات وكل ده من غير فائدة... علشان خفت يزهدق مني ويطلقني
واترمي في الشارع... انا كده احسن كتير"
هدير "احسن ف ايه... بالذمة ده اسمه كلام... دي حتى الشقة خرجك منها"
عالية "وانا ليا فيها ايه... طه اخدني بطولي حتى هدومي هو اللي جاها لي... انا راضية باللي حصل"
فاتن "معاكي حق"
هدير "معلش يا ابلة... هو بس علشان اخوكي مش قادرة تغلطيه"
فاتن "لا مش علشان اخويا بس... علشان حاسة بظروف عالية اوى ومريت بنفس ظروفها... مش
قلتلكم قبل كده ظروفكم شبه ظروفى"
هدير "ازاي؟؟ جوزك اتجوز عليكى"
فاتن بتضحك "لا مش قصدى"
عالية "قصدك ايه يا ابلة"
فاتن "مش انا حكيت لكم اني اتجوزت جوزى اول ما خلصت علشان ابعد عن نرجس... وكان اكبر
منى ب ١٧ سنة وولا بحبه ولا حاجة... لما اتجوزنا اكتشفت انه بخيل... بخيل اوى الا ف
الضروريات بس... قلت مش مهم معيش وخلاص ولما حملت ف ميار قلت اكيد هيتغير لما يبقى له
طفل.. واتعشمت ع الفاضى وبعد ما خلفت ولا اتغير... بقيت ادعى ربنا يحلها من عنده لحد

ما جالى التعيين واتوظفت وبقيت اصرف على نفسى وعلى بنتى ف اللى مبيرضاش يجيبه... ياما
زهقت واتخنقت وفكرت اطلق... بس قلت لو اطلقت هروح فى بنيتى وكان بابا مات وقتها... يعنى
استحالة نرجس هتساعى بنيتى... سكنت وصبرت سنين طويلة عايشة فى غلب"

هدير وعالية بيصوا لبعض بتصعب على حالها
هدير "بس برضه الوضع مختلف... ده اتجوز عليها وهى بتحبه"
فاتن "الظروف والتفاصيل مختلفة... انما السبب فى الخوف من الطلاق واحد... انا مالناش حد غير
ربنا"

عالية "ونعم بالله"
فاتن "ارمى حمولك ع الله ومش هتنضامى ابدا يا عالية"
عالية "مليش غير ربنا بدعى فى كل صلاة يصبرنى"
فاتن "والله يا عالية جوزى دلوقتى اتغير خالص ولوحده من عند ربنا... انا معملتش حاجة غير انى كنت
مفوضة امرى لله"

هدير "اتغير ازاي... بقى بيصرف كويس؟"
فاتن "مش كده وبس... ده انا بقيت كل حاجة فى ايدى وكل فلوسه اللى مكنتش اعرف عنها
حاجة بقت قدامى وتحت تصرفى"
هدير "عقبال اما ربنا ينصفك يا عالية"
عالية "يارب"
فاتن "ياللا اقوم انا علشان اروح قبل ما ميار... هستناكى يا عالية يوم الخميس.. وانتي يا هدير لو تقدرى
تيجى ياريت"

هدير "لا صعب يا ابلة مش هقدر... مبروك وربنا يتمم لها بخير"

طه نام... مها بتقفل الباب عليه وهى بتتسحب
خرجت قعدت فى الانترنت... والموبايل فى ايدها
فتحته... واتصلت

"الو... بت يانرمين عاملة ايه"
"انتى ندلة اوى... تقفلوا التليفونات"
"ما تسيبينا يا اختى عايزة مننا ايه"

"عايزاكى تحكىلى"

"بعدين لما اشوفك... المهم ايه الجديد عندك"

"مفيش جديد ولا قديم...اللى ماتتسمى قاعدة عند صاحبته من يوم جوازكم"

مها بفرحة"سابت البيت"

"لا يا حبيبى دى لازقة"

"طب اسمعى اختك كانت عندنا"

"يووووه فاتن الرحمة"

"اه..يس انا ايه بقى...كيدتهالك ولسه... عزمتنا على خطوبة بنتها وانا اخرجتها وقلت لها تعزمكم"

ونروح كلنا"

"ودى نروح لها ليه واحنا لا بنطبقها وبتطبقنا"

"علشان اخوكى يا هانم هياخد اللى ماتتسمى ويروحوا"

"وانا مالى"

"هاتى طارق وتعالى...اهو نكيد الارشانتين اختك واللى ماتتسمى"

"طيب ماشى"

مها خارجة من الحمام بتنشف شعرها

"قدامك قد ايه وتجهزى"

"ساعة بالكثير"

"التليفونات فى"

سكتت مها تفكر

"خلاص بقى...بقالنا ٥ ايام عرسان وقاعدين ف منفى...انام واصحى الايكي تقولى كلمتى ماما

ونرمين...متزوديهاش بقى"

"انا اتكلمت... هجيبه"

قامت على مضض... طلعت التليفونات من وسط قدميها

حذفت الموبايل على السرير

"خد اهو"

قعدت مبوزة وهى بتتسرح... بص لها طه

"في ايه؟"

"طريقتك معايا وحشة اوى ياطه"

"كل ده ووحشة... كل يوم اقول لنفسى معلش متزعلهاش حقها تتدلع شوية بس كفاية بقى"

كان بيكلمها وهو يفتح التليفون

"هتكلمها طبعاً"

"اه"

خرج م الاوضة... خرجت وراه

"انتى مش هتلبسى"

"عايزة اعرف هتقولها ايه"

اتصل طه بعالية

عالية وهى ف الشارع... رن موبايلها

اول ما شافت اسم طه... ردت بكل فرحة وشوق

"الو... طه ازيك"

"ازيك يا عالية... عامله ايه"

"الحمد لله يا حبيبى... انت عامل ايه وحشتنى اوى"

"انتى فى صوت دوشة"

"رائحة ع البيت"

"كنتى فى"

"كنت عند هدير"

"ليه انتى مش عارفة ان النهاردة خطوبة ميار"

"ايوه عارفة علشان كده رجعت النهاردة من عند هدير"

"النهاردة؟؟ ليه هو انتى عندها من امتى"

عالية بحزن "من يوم جوازك"

طه "ازاى يا عالية... قاعدة عند صاحبك ٥ ايام"

مها فرحانة وهى جنب طه بالشد اللى بينهم

ارتبكت عالية "ماهو اصل"

"اصل ايه..هو انا مش موجود تتصرفى بمزاجك"
"انا استأذنت من ماما وهى قالت هتقولك"
وافتكز طه ان التليفون كان مقفول
"خلاص خلاص...لما اشوفك نبقي نتكلم...هعدى عليكى اخذك"
"حاضر"
قفل معاها طه...وبص لها
"ماتقومى البسى بقى"
"الله... انت هتتفرز عليا انا ليه هو انا عملت لك حاجة"
وقامت مها دخلت الاوضة... وطلع طه البلكونة

عالية بتخبط ع الباب...فتحت لها نرمين... بعد ما القت السلام
دخلت عالية على اوضتها...على طول...وقفلت عليها
قعدت على السرير وهى مدهولة من طريقة طه معاها
اسلوبه وهو بيتكلم واول مكالمه بعد الفترة دى يكلمها كده
صعبت عليها نفسها...عيطت من تغيير طه السريع

مها خرجت من الاوضة...وطه قاعد لابس ومستنيها
اول ما شافها
"ايه ده اللي انتى عاملاه ف نفسك"
"ايه ف ايه؟؟"
"رقبتك باينة...ده حجاب ده؟"
"اه...سبانيش علشان الفرع"
"انا مالى سبانيش ولا بتاع...وال ١٠ كيلو الوان اللي ف وشك دى ازاي كده"
"ايه ياطه...هى تلاكيك ولا ايه"
"مش تلاكيك بس انا خارج مع مراتى مش مع رقاصة"
"والله دى طريقة لبرى ومش جديدة عليك"

"مليش دعوة بقبل كده...هتخففى اللى ف وشك وتغطى رقبتك ولا انزل انا"
"اااااااه...انت بتتلكك علشان تروح لها لوحده... ماشى يا طه... هعمل اللى انت عايزه ... اما
نشوف"

خرجت عالية من اوضتها...راحت اوضة نرمين
"هى ماما مش جاية معانا؟"
"لا"
"طه قال جاى ياخذنى...انتى جاية معانا صح؟"
"هو قال جاى؟ هكلمه واشوف"
واتصلت بطه وعالية واقفة
"الو.. ايه ياطه انتوا جاينين تاخذونا... قدامك قد ايه؟؟ طيب هنكون جاهزين...سلام"
"جاى امى"
مردتش عليها نرمين...واتصلت بطارق
"الو...انت جاى؟؟ خليك هنعدى عليك احنا...سلام"
"هو طه جاى امى"
"ف السكة...لما يوصل هيرن علينا"

طه قاعد ف العرية...مها جنبه
ظهرت نرمين وعالية خارجين من العمارة
فتح طه الباب وقبل ما يتزل
"نازل ليه"
"اسلم عليهم"
حضنته نرمين اول ما شافته
"مبروك يا طه"
بيحضنها وعينه على عالية...الى شاف الحزن ف عينيه رغم ابتسامتها الباهتة
نرمين بتسلم على مها...الى مركزة نظرها عليهم

طه سلم على عالية وباسها من خدها
مها بتبص لهم شذرا
نرمين وهى بتركب
"طه هنعدى على طارق ناخده"
ركبت مها تانى جنب طه... وركبت عالية جنب نرمين

طول الطريق وعينين عالية وطه بتنطق بالاشتياق وهما بيتبادلوا النظرات ف المראה
مها ملاحظة... بتحاول تتكلم مع نرمين وكل ما تكلم طه يرد باختصار

وصلوا القاعة... وطالعين السلم
مها ماسكة ف ذراع طه
ونرمين ف ذراع طارق
وعالية ماشية لوحدها وهى مكسوفة

طارق مال على نرمين
"اخو كى فاجر وقادر"
"لم لسانك ع المسا"
"مش بيقولوا جوز الاتنين يا فاجر يا قادر... ايه رأيك بقى ان اخو كى ده برنس"
"اشمعى"
"شوفى واحدة ف ايده والثانية وراه... يابخته"
"هتستعبط... ده انت يوم ماتفكر اولع فيك وفيها"
"ليه يعنى ما اخو كى اهو ومتدلع اخر دلع"
"يا حبيبى انا مش عالية... هى ساكتة وراضية انما انا لأ... بس اطمئن مش هتستحمل كثير وهتزيحها
من طريقنا"
"عملتوا عصابة يعنى"
"بذمتك دى لياقتنا ولا شبهنا"

بص وراه بطرف عينه...لمح عالية وهى بتمسح دموعها بطرف منديل قبل ما تنزل...رجع بص
لنرمين

"لا فعلا مش شبهكم ولا زيكم خالص"

دخلوا القاعة... شافتهم فاتن
سلمت ببرود عليهم كلهم ماعدا عالية سلمت عليها بترحاب شديد

قعدوا كلهم على ترايزة دائرية
طه بين عالية ومها وقدامهم طارق ونرمين
مها طول ماهى قاعدة ماسكة فى ايد طه وبتتدلع وتهمز معاها
طه ساكت...وعالية متحكمة لاقصى درجة ف اعصابها

نرمين"البت ميار المعفنة يتعملها خطوبة هنا"
مها"ابحات يا بنى"
نرمين"اذا كانت القاعة بس كده او مال الشبكة هتبقى شكلها ايه"
مها"يمكن ولا شبكة ولا حاجة وعاملين خطوبة يتمنظروا بيها وخلاص"
نرمين"اما نشوف"
ومالت على طارق
"شايف"

"نعم... ما انا قتلتك نستنى انتى اللى كنتى مسروعة ع الخطوبة"
سكتت نرمين وهى بتبص لمها واللاتين بيحقدوا على ميار اللى لسه موصلتش القاعة

فاتن كل شوية تبص عليهم وهى بتستقبل الناس
حست بقهرة عالية...راحت لهم
فاتن"ما تقومى يا عالية تقعدى معايا شوية...بعد اذنكم"
قامت معاها عالية..وقعدت معاها على نفس الترايزة

لما وصلوا العروسين... وبدأ الفرع

نرمين"مها... طرحتك اتفكت"

مها بتمسك طرحتها

"فين... معاكى مراية"

طه"مراية ايه هتعدلى هنا... قومى روحى الحمام"

مها"تعالى معايا يانرمين"

قاموا مها ونرمين... راحوا الحمام

طه وطارق قاعدين مفيش بينهم كلام

طه وعالية بيتبادلوا نظرات صامته

طارق بيتفرج عليهم من باب الفضول والتعجب

قام طه فجأة... راح ناحية عالية

عالية وهى شايفة طه جاى ناحيتها... خايفة منه ومن سكوته طول الوقت من ساعة ما كلمها بجفاء

ف التليفون

قرب منها... اخذ ايدها

"قومى معايا"

"فى ايه يا طه؟؟"

"ياللا بس"

قامت معاه وهو ماشى بخطوات سريعة وهى بتمد تحضله وكأنه بيجرها

نزلوا ع السلم... بخطوات اهدا

"مالك ياطه... انا عملت حاجة زعلتك؟"

طلع طه تليفونه وقفله... وحط ايدها ف ذراعه وهما نازلين

"وحشتينى اوى وعائز اقعد اتكلم معاكى كتير اوى... عايز نبقى انا وانتى وبس... بحبك اوى

ياعالية"

عالية من الفرحة حسست ان الدنيا كلها بترقص قدامها

مها ونرمين راجعين من الحمام

(۲۴)

[illegible]

طه وعالية ف العربية... ماشيين وفاتحين الكاسيت بيسمعوا موسيقى

"عايزة تروحي فين"

"مش مهم فين... المهم اننا مع بعض"

"وحشتیں اوی"

"بجد؟"

"طبعاً... عندك شك ف كده"

"بصراحة... حسيت انك ناسيتي طول الفترة اللي فاتت ولا كلمتني ولا سألت عليا"

طه واتغيرت نبرة صوته لكسوف منها

"متزعليش... انا محبتش اعمل مشاكل بس... انما والله كنتي على بالي وف قلي... اوعى تشكى لحظة

ف حي ليكي يا عالية"

عالية مبسوطة وحاسة انما ملكت الدنيا كلها

"عارفة يا حبيبي... ربنا ما يحرمني منك"

"ومتزعليش اني اتعرفت عليك ف التليفون... حسيت ان غياي خلاني مليش كلمة ولا اعتبار وده

ضايقي اوى"

"والله يومها قلت لماما وافتكركما قالتلك"

"خلاص مش مهم... المهم اني مبحسش بالسعادة غير واحنا مع بعض... اسمعي يا عالية يومين

وهجيك اقعد معاكي"

عالية باستغراب وفرحة

"بجد؟"

"اه طبعاً... كفاية اسبوع... ونمشيها بعد كده اسبوع واسبوع علشان مش هينفع يوم ويوم

هتشحطط"

"والله يا طه انا كل اللي يهمني انك تفضل تحبني وتفضل فاكرني"

"انتي روحي"

خلصت الموسيقى... وبدأت ام كلثوم تغني

وطه يغني معاها وهو ماسك ايد عالية وهو سايق

يا حبيبي .. الليل وسماه..

ونجومه وقمره .. قمره وسهره

وانت وأنا.. يا حبيبي أنا .. يا حياتي أنا..

كلنا .. كلنا.. في الحب سوا..

والهوى آه منه الهوى

سهران الهوى يسقينا الهنا .. ويقول بالهنا .. يا حبيبي
يا لا نعيش في عيون الليل
ونقول للشمس تعالى تعالى بعد سنه .. مش قبل سنه
دي ليلة حب حلوه بألف ليلة وليله..
بكل العمر .. هو العمر إيه غير ليلة زي الليلة

مها بتدخل شقتها بعصبية...بتفتح النور وتجرى على اوضة النوم
بتفتحها فجأة ... شافتها مطفية وكل حاجة زى ما سابتها

وقفت تفكر...وتجرب تتصل تاني بطه
"قافله برضه...ليلتك طين...انا تعمل فيا كده والله لاوريك"
بتفكر

"معقول يكون اخدها عند امه!!؟... نرmin اللي هتعرف"

واتصلت بنرmin

"الو...انتي فين...لسه موصلتيش البيت يعني ايه... قدامك قد ايه طيب... قربتي ولا بعيد... خلاص
يا نرmin مش لسه هستناكي لما تتلکعي مع سى طارق...انا هروح اشوفهم بنفسى وخلينى اولع وانتي
عمالة تتمشى ولا على بالك"

قفلت معاها وراحت ع الباب وخرجت

مها بتخبط ع الباب بعصبية عند نرجس
نرجس بتكون لسه راجعة وهدومها ملحققتش تغير
راحت تفتح...اتفاجئت بمها داخلية بعصبية
"هما فين؟؟"

نرجس باستغراب

"هما مين...مش كلکم كنتم ف الفرخ"
"البیه ابنك خلاني ف الحمام وخذ الزفنة بتاعته ومشى"

قالتها وهى بتهجم على اوضة عالية تفتحها
ملقتش حد والنور مطفى
نرجس قعدت برود... ساكتة...مها بتسألها بعصبية
"لا راحوا البيت ولا هنا...هيكونوا راحوا فين"
نرجس برود"الله اعلم"
"يعنى عاجبك اللى بيعمله ده... يعمل فيا كده ويقفل التلفون...والله العظيم ما هعديها"
"ماهى متكلمتش لما قفل تلفونه الـ ٥ ايام اللى فاتوا...وانتوا لسه كنتوا مع بعض من ساعتين"
"يعنى ايه...يعنى المفروض اسكت مثلاً"
نرجس وهى قايلة
"انا قايلة اغير هدومى...وفهمتك قبل كده مش من مصلحتك تعاندى مع طه"
وقفت مها متغاظة وهى شايفة نفسها لوحدها
وجربت تالى تتصل بطه

طه وعالية قاعدين بعد ما خلصوا عشا
طه بيطلب الحساب
"ياللا علشان نلحقهم قبل الفرح ما يخلص"
عالية بسعادة بتهاز راسها

عالية وطه خارجين من المطعم... ايدها ف ايده
بايده الثانية طلع التلفون...واول ما فتحه...رن
"الو... ايوه يامها... مع عالية... هنجيلكم...مشيتوا؟؟ هوصلها واجي البيت...بعدين
يامها...سلام"
حست عالية انه بيتكلم معاها بجدية... مقدرتش تمنع الفرحة الداخلية اللى حست بيها انها معاها ومها
هى اللى بعيد ويبكلمها بنفس الاسلوب اللى كلمها بيه ف التلفون قبل ما ترجع البيت
فجأة حست بغيرة... هتعرف منين بعد ما يروح معاها هيتكلموا ازاي ... هيصالحها ويقولها انه
بيحبها هى وانه بيكون سعيد معاها هى مش عالية... معقول يكون طه كده فعلا

يقول نفس الكلام لكل واحدة فيهم من ورا الثانية

وصلوا لباب العربية

"عالية...مالك سرحانة كده"

عالية وقلبها موجوع من التفكير اللي فكرت فيه

"مفيش... تخيل ان النهاردة اول ليلة هباتها لوحدي من غيرك بعد جوازك"

سكت طه معرفش يرد عليها

حست انها بتتكلم بمنطق تاني غير اللي كانت بتتعامل بيه قبل كده

استغربت نفسها...ايه اللي اتغير وخلا احساسها يتغير كده

مشاعر طه ليها استفزت مشاعرها واطهرت الغيرة؟؟

مكنش فيه وقت تفكر...ركبت العربية بعد ما فتح لها الباب

وهي بتحاول ترجع لاحساس اللحظات اللي فاتت قبل مكالمه مها اللي حسستها بالشك ف مشاعر

طه ناحيتها

حاولت ترجع تفكر بعقلها تاني...مقدرتش...شكها كان اقوى من تفكيرها

وهما ف الطريق

"مالك يا عالية...ايه اللي حصل خلاكي اتغيرتي كده"

"مفيش"

"لا فيه... مش انتي اللي كانت بتضحك مبسوطة من شوية"

"علشان بس حسيت ان السعادة اللي انا فيها دي كلها لحظات...وهتوصلني وتروح لغيري"

طه ساكت...معندوش مبررات يقولها

وصلوا وهما ساكتين...وقف قدام البيت

نزل معاها... وصلها لحد السلم من جوه العمارة

"مش عايزة حاجة؟"

"شكرا"

حضنها سريعا وباسها من خدها

"هبقى اكلملك ويومين واحي اقعد معاكي"

"ماشى"

ابتسمت عالية بحزن وهى طالعة السلم وبتشاور له

طه يفتح الباب وداخل...وقبل ما يقفل

سمع مها بتصرخ فيه

"انت ازاي تعمل كده...بتخونني ف اول اسبوع جواز"

قفل الباب بسرعة

"اخونك... انتي هتخرفي؟"

"روحوا فين.... لا هنا ولا فبيت مامتك... اخدتها فين؟؟... مش مالية عينك انا... فيها ايه احسن

منى"

"بطلي كلام مالوش لازمة... اخدتها وخرجنا شوية"

"كذاب... الطريقة اللي اخدتها بيها تقول انما مش خروجة عادية"

"ولنفرض... هي مش مراتي زيك بالطبط؟"

وصرخت اكر

"انت معندكش دم ولا احساس... انت بتغيظني اكر"

وبرق طه من اسلوها

"ايه اسلوب الرداحين ده... فيه ست محترمة تكلم جوزها كده"

"رداحين... هوريك اسلوب الرداحين ياطه يجد لو روت لها تاني"

لحظات واقف طه مصدوم

"تمام... انا هروح لها فعلا... ووريني اسلوب الرداحين وانا اوريكي اسلوب الرجالة المحترمة"

مها بقلق وصوت واطى وهى بتلحقه ع الباب

"اخص عليك يا طه... عايز تتزل وتسييني"

طه ببيعدها عن طريقه "اوعى يامها"

"خلاص... انا اسفة كنت متنرفة بس... انا بغير عليك غصب عني"

"معتزضتش على غيرتك... انما تردى عليا وتشتميني ده مقبلوش ابد"

"انا اسفة والله... خلاص يا طه... مكنتش اقصد"

"انا مضحككش عليكى وقتلتك هبقى جوزك لوحك... انتي عارفة وراضية بوجود عالية م الاول"

"بس انا بحبك واى واحدة عايزة جوزها ليها لوحدها"

"عالية قبلت بوجودك"
مها وهي بتزقق
"متقارنيش بيها"
"وطى صوتك"
"حاضر... بس متزعلش مني ومتسبنيش"
"اعملى حسابك بعد يومين هبتدى ابقى اسبوع هنا واسبوع هناك"
"لا... مش ممكن ابدا"
"هو ايه اللي مش ممكن"
"عايز تسييني من اول اسبوع"
"حق ربنا... العدل"
"والعدل ان انت تقعد معاها لوحدها ييجى ٦ سنين ومستخسر فيا حتى ٦ شهور"
"لما اتجوزها مكنش فيه غيرها... يومين وهروح لها"
"يرضيك طيب اهلى ومعارفى لما ييجوا يياركولى ابقى لوحدى... عروسة من غير عريس... اسبوع
كمان يا طه... اسبوعين معايا مش خسارة فيا"
طه وهو داخل الاوضة
"هفكر"

عالية على سريرها قاعدة بتفكر
"معقول الحال يتغير وابقى مخنوقة كده وانا هنا... يعنى وجودى ف بيت هدير كان مخفف عنى... ع
الاقل مكنتش لاحقة اقعد افكر كثير كده... ياترى بتعمل ايه يا طه... بتقولها نفس اللي كنت
بتقولها... بتحسسها انها الوحيدة اللي ف قلبك وانى عبء عليك... ايه يا عالية... انتى كنتى راضية
بحالك ايه اللي حصل... الشيطان مش سايبك وعمال يوسوس لك... استغفر الله العظيم"
قامت راحت الحمام... اتوضت ورجعت تصلى وتدعى ربنا

نرمين ف اوضتها... بتلبس
عالية قاعدة ف الانتريه... الباب يخطط تقوم تفتح
تلاقى طارق... تبعد علشان ميسلمش عليها

تيجي نرمين وهى لسه مش جاهزة للخروج

تسلم على طارق

"حبيى دقايق ومخلص"

والنفدت لعالية

"انتى مش جاية معانا سبوع مها وطه"

عالية بحزن "لا"

نرمين "خلى روحك رياضية ومتقلقيش مش علشان هى احلى واشيك منك معناها ان طه

هيسيك...متخافيش انتى صعبانة عليه ومش هيرجعك الملجأ تانى"

قالتها وهى رايحة الاوضة...وفرحانة انها اخرجت عالية وغازتها

اتجمدت عالية مكانها...الدموع ملت عينيها من الجرح والاهانة...طارق شايفها واتضايق من اسلوب

نرمين المستفز

جت تقوم تدخل اوضتها... كلمها طارق بصوت واطى

"متزعليش...هى نرمين كده مبتفهمش ف الذوق"

كلامه وملاحظته اهانتها من نرمين وجعتها اكتر وكأنا اتعرت قدام غريب

نزلت دموعها غصب عنها

"على فكرة انتى احسن من مها ١٠٠ مرة..وانتى اجمل منها كمان...هما سطحيين مبيصوش غير

على الجمال الخارجى بس"

ردت عليه وهى رايحة اوضتها "شكرا"

لما عدت من جنبه فاجئها ومسح دموعها

اول ما حسست بايديه على خدها...انتفضت ورجعت لورا

"فى ايه..خلاص انا مش زعلانة...بعد اذنك"

جريت بسرعة على اوضتها وقفلت عليها

عالية ف اوضتها قاعدة تفكر ف طه

لقيت طه بيتصل بيها...ردت بلهفة

"حبييتى عامله ايه"

"الحمد لله يا حبيى...انت عامل ايه"

"بخير... مال صوتك"

"ابدا... مفيش..ده انا حتى فرحانة انك جاى بكرة وبفكر هطبخ ايه اول يوم هترجع فيه"

سكت طه متردد

"عالية...عايز اقولك حاجة"

"قول...مالك؟...انت كويس؟"

"اه كويس... بس اوعديني متزعليش"

عالية بدأت الافكار تيجي ف دماغها وكلها اسوأ من بعض

"قول يا طه... في ايه؟"

"مش هينفع اجي زى ما اتفقنا...انتي عارفة يعني الناس بتيجي البيت ومينفعش اسببها لوحدها

تستقبل الناس"

عالية بحزن "صح...معاك حق"

"علشان خاطري متزعليش... اسبوع بس والله وهجيلك اقعد معاكي"

"مفيش حاجة ياطه... كل الحكاية بس انك بتوحشني اوى"

"انا راجع الشغل بكرة...هبقى استأذن ساعتين كده واجيلك ونقعد مع بعض شوية"

عالية بلامبالاة"ربنا يسهل"

"انتي مش فرحانة اني جاى لك"

"لا فرحانة... بس خايفة افرح واحط امل انك جاى ومتجيش"

(٢٥)

عالية بتروق البيت الصبح وكل شوية تبص ف الساعة
خلصت ودخلت تحضر الغدا
حست انها مالهش نفس تطبخ حاجة وهتطبخ لمن؟
خرجت تاني من المطبخ بملل وبصت ف الساعة كانت ١٢
دخلت اوضتها والموبايل جنبها...بتفكر تتصل بظه ولا لأ
نص ساعة قعدتها مترددة... ف الاخر قالت لنفسها
"لا...الانتظار صعب كده... انا اتصل واعرف منه جاى ولا لأ بدل القلق اللي انا فيه ده"
مسكت الموبايل بتاعها...واتصلت وهى مترددة وتدعى انها تفرح ومتتصدمش...اتصلت...رن
الجرس...رد طه
"الو..ازيك ياطه"
"الحمدلله يا عالية...عاملة ايه"
"كويسة الحمدلله...رجعت الشغل مش كده؟"
"اه انا ف الشغل اهو"
"شكلك عندك شغل كثير"
"فعلا يا حبيبتى معلش معرفتش استأذن...انتى بتعملى ايه دلوقتى"
"مفيش حاجة قاعدة اهو هتفرج ع التليفزيون شوية"
"طيب يا حبيبتى...مش عايزة حاجة"
"شكرا...ابقى كلمنى ياطه"
"حاضر... مع السلامة"
"الله يسلمك"
قفلت معاه وهى حاسة بكسرة نفس

طه قفل معاه وهو بيضحك... وبيركن العربية تحت البيت
طلع ومعاه شنطة لاب على كتفه...وصل عند باب الشقة

فتح بشوئش...وقفل الباب وراه من غير صوت
دخل يتسحب...البيت هادى وساكت
بص ع المطبخ...ملقاش حد
بص على ابواب الاوض...كل باب مقفول ففهم ان كل واحدة ف اوضتها...نرمين اكيد نائمة
وعالية زى ما قالت له بتتفرج ع التلفزيون...راح على باب الاوضة...وفتح الباب فجأة

عالية قاعدة...سمعت الباب بيتفتح عليها فجأة
اتخضت....شهقت...اول ما شافت طه بيضحك
نطت بسرعة من ع السرير على حضنه
"مش مصدقة ... انت هنا بجد"
طه بيضحك وهو بيحضنها
"حلوة المفاجئة"
"اخص عليك ياطه..ليه مقلتليش انك جاي"
"علشان اخد الحضن الحلو ده"
حط شنطة اللاب على السرير وقعد وقعدا جنبه وهو حاطط ايده على كتفها
"انت كنت واحشنى اوى"
"وانتى اكتر... احكى لى عاملة ايه"
"لما بشوفك بنسى اى حاجة ممكن تضايقنى... حتى خوفي بنساه"
"خوفك...من ايه؟"
"انك تبطل تحبني"
"والله العظيم يا عالية لولا كلام الناس وان ميصحش اسببها بسرعة كده كنت جيت قعدت معاكى
من تانى يوم...انا مبحشش بالراحة الا جنبك"
"ربنا يريح قلبك...عارف يا طه...انا بقى مبحشش بأنى عايشة غير وانا جنبك...وانت بعيد عني
.عموت"
حضنها اوى... كلامها وصوتها الصادق وجع قلبه
"انا جيت لك هدية"
رجعت عالية لورا...وبصت له
"هدية ايه"

التفت على الشنطة اللى ع السرير
"لاب توب... هو اه مش جديد بس حالته كويسة اوى بتاع واحد زميلى"
"ليه تكلف نفسك بس... انا عارفة ظروفك كويس"
"حسيت انه لقطة... وعاز حاجة تسليكى مش عايزك تزهقى انا عارف ان نرمن قاعدة ليل ونهار
ع الكمبيوتر وماما ف المحل وانتي طول الوقت لوحدك"
"ربنا يخليك ليا"
قام طه وفتح الدولاب... وبدأ يغير هدومه

نرمن قائمة من النوم الساعة ٣
سامعة صوت ف المطبخ...عرفت ان عالية اكيد بتعمل الغدا
دخلت الحمام...وهى بتغسل سناها لاحظت ف المراية سبت الغسيل وفيه مع المهدوم...هدوم طه
...استغربت
"السبت ده كان كان فاضى اول امبارح...هدوم طه ايه اللى حطها هنا؟؟"

خرجت من الحمام...وراحت المطبخ وقفت على الباب وعالية مش شايفها... شافت عالية واقفة
بتغنى بصوت واطى وهى بتطبخ
"دي ليلة حب حلوه بألف ليله وليله.. بكل العمر.. هو العمر إيه غير ليله زي الليله...زى
الليله...الليلة"

"ده ايه الروقان ده كله"
انخفضت عالية وسكنت
"هتغدا ايه النهاردة"
"هعمل مكرونة وفراخ بانيه"
"مش عوايدك تبدأى الاكل متأخر"
ارتبكت عالية ودورت وشها
"ما هو لما بعمله بدرى بيبرد"
"وكل يوم بتسخنيه...مالك النهاردة مش طبيعية"
"مالى بس ما انا كويسة اهو"

"شكلك مبسوطه وبتضحكى وبتغنى... الحمد لله غيرتى البوز اللى ضرباه ف وشى طول النهار"
"انا بضرب بوز... الله يسامحك"
"انتى ليه عايشة ف دور الغلبانة كده على طول... ودايما مكشرة لا بتضحكى ولا بتهزرى... كتيبة كده"

اتضايقت عالية من كلام نرمين... بس حسست انه الى حد ما صح
"ابدا... اصل كل فرحتى بتكون ف وجود طه... وطه بمقاش معايا فطبيعى ان تروح منى ضحكى وميقاش ليا نفس اهزر"
خرجت عالية من المطبخ وسابت نرمين لوحدها

مها قاعدة بتتكلم ف التليفون
"ومسألتيهاش وش ليه"
"اتكسفت يامها"
"ما انتى بتقولى هدومه ف الغسيل... ايه اللى هيجيب هدومه عندكم وهو قاعد هنا... اكيد كان موجود واننى نايمة ومحسيتيش"
"متهيألى كده... اصلها عمالة تغنى ومبسوطه حتى بعد ما خرجت م المطبخ وشها متغير مش نفس الكآبة والتكشيرة اللى كانت فيها الايام اللى فاتت"
سمعت مها صوت الباب بيتفتح
"هقفل معاكى دلوقتى... طه جه"
"اوعى تعملى مشكلة واتخط انا ف النص"
"طيب ماشى... مع السلامة"
دخل طه وهى لسه مقفلتش... قعد
"سلامو عليكو"
قفلت ورد السلام
"وعليكو"
"كنتى بتكلمى مين"
"ليه؟"
"هو ايه اللى ليه؟ بسأل"

"نرمين... انا مبعملش حاجة واداريها"
"كل ده علشان سألتك بتكلمى مين؟ انا بسالك يعنى ماما ولا مامتك ولا نرمين ولا حد من
صحابك... مش محتاج اسمع دفاع"
قام دخل يغير هدومه... وقبل ما يدخل الاوضة
"حضرى الغدا"
"لسه مخلصش"
رجع لها تانى
"مخلصش ازاي... الساعة ٣ ونص"
"ما انا صحيت متأخر وبدأت متأخر ولسه مخلصش... وانت مقلتلش انك عايز تتغدا بدرى"
"هو كده بدرى؟... انا هدخل انام شوية ولما تخلصى صحين... بس ياريت لو تكرمتى يعنى بعد كده
ارجع الاقى الغدا خالص"
"شكلك بتتريق عليا"
"اه... انتى بتتلككى وانا مليش نفس اتخانق"
دخل الاوضة ورزع الباب وراه

طه ومها قاعدين بيتغدوا
طه بيمضغ الاكل ووشه مقلوب
"ايد ده يامها... الاكل طعمه ايه"
"ايه؟"
"طعمه غريب... زى... مش عارف... زى مايكون محروق"
"لا مش محروق... كان هيتحرق ولحقته"
سكت طه وهو بيكمل اكل بقرف
"انت روحت فين النهاردة"
"الشغل"
"بس؟"
"ليه؟"
"بسأل؟"

"لا روح بعد الشغل للميكانيكى"

"احلف؟"

"نعم؟"

"احلف انك روح للميكانيكى ومروحش للزفة"

"انتى بتسألينى علشان كده؟؟ وبعدين لما تتكلمى عنها تقولى باسمها مش تشتميه"

"ضايقتك اوى الزفة... طب زفة وهابة ودى مش شتيمه ده صفة"

"ماشى... بعد كده لو جابت سيرتك هقولها متقوليش مها... قولى زفة وهابة... المساواة ف الظلم"

"عدل"

"انت بتشتمنى"

"دى مش شتيمه دى صفة... وعلى فكرة اكلك يقرف"

"قام من ع الاكل... دخل الاوضة وهى عمالة ماشية وراه وتكلم وتزعق... حس انها بتتنرفز اكرر"

بعد الرد... فقرر يستفزها

بدأ يلبس

"انت فاكرنى بتهدد... كل شوية هتلبس وتروح لها"

"ملكيش دعوة"

"مفيش نزول يا طه"

ضحك وهو بيكمل لبس

"طيب خلاص متزعلش"

يلبس ومش بيرد عليها... بدأت تتحایل وتتودد له

"دى مش طريقة ابدأ انك تتقمص كل شوية وتهددنى بيها... احنا مش اتفقنا الاسبوع ده"

عندى... علشان خاطرى متكسفتيش قدام الناس اللى هتيجى... خالى جاية بالليل تباركلنى"

"ماشى هاجى قبل ما ييجوا"

"هتزل ليه طيب... خليك قاعد"

"هروح المحل شوية... اتخنقت م البيت"

عالية بتقوم من النوم... على صوت الموبايل

"الو.. ازيك انت يا حبيبي... اه كنت نائمة احنا الساعة كام... ٨ ياااااه ده انا نائمة من ٥... لا احنا
كويسين الحمد لله... لا مش سامعة صوت بره يمكن نرمين نائمة... انت ف المحل... حاضر وانت
خلي بالك من نفسك... مع السلامة يا حبيبي"
قفلت معاه وهى بتبلع ريقها بصعوبة... من العطش
قامت من السرير وهى بتلم شعرها بايدها وتعدل ديل الحصان اللى اتفك من النوم

من شدة عطشها مقدرتش تستنى تدخل الحمام الاول فراحت تشرب
وهى رايحة ع الانترية... اتفاجئت بطارق ونرمين يبعدوا عن بعض اول ما شافوها... هى اتخضت
من وجودهم لان مكش فيه صوت خالص... شهقت ورجعت بسرعة وهى بتغطى شعرها بايدها
دخلت اوضتها وهى بتفتكر اللحظة اللى شافتهم فيها على الكنبه مع بعض... تقلب وشها باشمزاز

تسمع صوت الباب... وتلاقى نرمين داخله عليها الاوضة
"بصى... اوعى تفهمى غلط"
"انتى هاجمتينى لما قتلتك وجوده هنا لو حدنا غلط ولما لقيت ماما ساكنة سكنت"
"مش اللى فداغك ده والله"
"انتوا مخطوبين يا نرمين يعنى حتى لو مسك ايديكى حرام... انتى كده بتسمحيله بحاجات كثير
وغلط"
"انا عارفة الصبح م الغلط وبحافظ على نفسى كويس"
"لا اللى بتعمله ده غلط وحرام"
"ملكيش دعوة بيا... احنا بنحب بعض... ولا هو حلال ليكم وحرام على غيركم"
"قصداك ايه"
"طه لما يجيلك متسحب الصبح وانا نائمة وف الايام اللى المفروض يكون فيها عند مها... يبقى حلو"
"انتى بتقارنى ازاي... طه جوزى"
"وطارق خطيبي... وفيه حدود مبنتهدهاش"
"بلاش كده يا نرمين"
"انتى هتدينى اوامر"
"انا خايفة عليكى"

"لا متخافيش"

"طيب بصى... اتجوزوا... او اكتبوا الكتاب ع الاقل"

"ان شاء الله... هتقولى لحد؟"

"لأ... بس ارجوكى بلاش تحطى مامتك واخو كى ف موقف وحش... بلاش"

خرجت نرمين وهى حاطة راسها ف الارض

طه قاعد ف المحل... حاطط ايده على خده

نرجس بتبص له

"طه"

ينتبه لها

"نعم؟"

"مالك؟"

"مفيش"

"لا انت بقالك فترة كده مش مبسوط... هو لسه برضه؟"

طه بتساؤل حقيقى

"لسه ايه؟"

"لسه محبلىتش... بقالكم ٣ شهور ومفيش حاجة"

"اه لسه... الحمد لله"

"يا بنى مالك... ماتقولى فى ايه"

"ندمان... الندم بيقتلى... اتسرعت بجوازي من مها"

"ليه؟"

"مش مرتاح معاها خالص... مبقتش طايق هيافتها ولساها الطويل وقلة عقلها"

"ايه اللى حصل"

"لو اتخانقنا الاقى اسلوب غيى ونفضل نتخانق ولما تلاقينى هلبس وانزل تعلق وتبقى كويسة... طيب

ليه من الاول... ده غير عدم احساسها بالمسئولية ولا بتقدر ظروفى سواء ف فلوس ولا تعب ...

وعايزانى كل شوية اخرجها وانا مش فاضى انا برجع مهدود ويوم الجمعة ببقى عايز ارتاح فيه... دى

ابدأ... غير عالية اللى حاطاها ف دماغها وكل شوية تتكلم عنها بطريقة تضايقنى... انا بقيت بكره

الايام اللي بكون فيها عندها واحسب هيخلصوا امتي علشان اروح لعالية... انا اتسرت وغلطت
ياماما ولازم الغلط يتصلح"

"يتصلح ازاي يعني؟"

"اطلقها... الحمد لله اني مخلفتش منها... كفاية اوى كده انا محببتش ولا هحب غير عالية... منكش
اني نفسي ف طفل... هموت وابقى اب بس ربنا مبيتعاندش... انا تعبت اوى الـ ٣ شهور اللي فاتوا
وعايز ارتاح"

نرجس بفرع

"طلاق؟؟ طلاق ليه بس... اعوذ بالله متخليش الشيطان يخرب لك بيتك"

"بيت ايه؟؟ بيتي انا خربتة فعلا لما اتجوزت على عالية وطلعتها م البيت... ماما.. انا مش مرتاح وتعبان

مع مها جدا واللي غلط لازم يصلح غلطه"

"وهي عارفة الكلام ده؟؟؟ طلبته يعني؟"

"لا طبعا"

"وهتطلقها ازاي"

"هو مش انا الراجل واقدر اطلقها"

"اه... بس عارف انت هتدفع قد ايه لو طلقتها"

"ايه؟"

"لأنها مطلبتش يبقى كل حقوقها هتاخذها... مؤخر ومتعة وعفش... معاك تدفع؟"

سكت طه يفكر... لانه مفكرش ف الفلوس

"هااا... معاك تدفع... ولا زي كل مرة انا اللي المفروض ادفع كل حاجة"

"انا مطلبتش منك حاجة ياماما... انتي اللي اختارتني مها وانتي اللي اتفقتي معاها على كل حاجة...

غلطتي اني سكت على كل ده... منكش اني كنت مطنش علشان نفسي اخلف بس انا كنت
فاكرها هتبقى كويسة... والله لو كانت كويسة مكنتش فكرت اطلقها وقلت ده نصيب وحصل
وخلاص حتى لو طلعت زي عالية ومخلفتش... انما انا لا حبيتها ولا هي كويسة معايا ولا بتحترم
ظروف عالية ولا حي ليها"

"يا طه انت بتتكلم ف ايه... انت عايز واحدة تحب ضررها"

"مقلتش تحبها... وحتى لو بتكرها متفضلش تتكلم عنها وحش قدامي احتراميا ليا على الاقل... ما

عالية اهي ياماما... سمعتها مرة بتشتم ف مها ولا بتتكلم عنها باسلوب وحش؟؟ واكيد مش

بتحبها"

سكتت نرجس... وسكت طه
"وبعدين... انا اتهريت مصاريف عليك يا طه وعلى جوازاتك"
"عارف وكفاية اوى كده... هحاول اتصرف"
"متزعش منى علشان الفلوس... وبعدين انا مش معاك ف حكاية الطلاق دى... اصبر شوية يمكن
تخلف"
"انا مش عايز استنى علشان مش عايز منها عيال... مش عايز حاجة تربطنى بيها اكتر من كده"
"لدرجة دى؟؟"
"ايوه... انا بعاملها بالمقولة... ان احبها اكرمها وان لم يحبها لم يظلمها... مش هظلمها ولا اظلم
نفسى واظلم عالية وافضل معاها"
"والخلفة... ان مكنتش ارتحت مع مها نشوف واحدة تانية"
رد بحزم "مامااا... لا تانية ولا تالته كفاية اللى انا فيه... هستفيد بياه لو خلقت عيل ومُت وملحقتش
اربيه"
"كفى الله الشر انت بتقول ايه"
"ماهو حرق الدم اللى انا فيها من مها ممكن اوى تموتنى"
"خلاص ياطه... انت حر واعمل اللى انت عايزه"
"ممكن نرمين متعرفش حاجة من اللى قلناها دى علشان لسانها طويل وهتروح تقول لمها"
"طيب ولو انى الحركة دى ممكن تقطع علاقتهم بيعض"
"خايفة على صحوبيتهم ومش مهم عيشتى معاها"
"لا خلاص... راحتك تهمنى"

هل يشفع الحب ؟ ←

(٢٦)

عالية وطه بيتغدوا... ونرمين معاهم
نرمين... خلصت وقامت
طه وهو قائم "تسلم ايدك يا عالية... مبحسش بطعم الاكل غير من ايدك"
عالية "الف هنا وشفا... اعملك شاي دلوقتي ولا لما تقوم م النوم"
طه بصوت واطى
"متعمليش حاجة عايز اتكلم معاكي"
"حاضر هلم الغدا لحد ماتغسل ايدك واحصلك"

عالية داخله الاوضة... وطه قاعد على السرير
عالية بتقفل باب الاوضة وهى داخله
"خير ياطه... صوتك قلقتني"
قعدت جنبه... مسك ايدها وباسها
"سامحيني على كل اللي حصل الفترة اللي فاتت... كل حاجة هتتصلح قريب ان شاء الله"
طبطبت عليه
"اسامحك على ايه... انا مزعلتش منك علشان اسامحك... انا مقدرة ظروفك... كفاية انك مفرطتش
فيا"
"افرط فيكى... يا عالية انتى مش عارفة قيمتك عندى ايه... انتى روحى وحياتى لما يبعد عنك مبحسش
بالحياة"
"يا حبيبى ربنا يخليك ليا"
"انا خلاص.. هصلح كل اللي حصل واطلق مها"
اتفاجئت عالية... فرحت لحظة وفكرت لحظات
"مالك يا عالية... مش ده رد الفعل المتوقع منك"

"تطلقها ليه؟"

"علشان مش مرتاح معاها"

"هى طلبت الطلاق؟"

"لا ومتعرفش حاجة"

"عايز تغدر بيها يا طه.... حرام"

"انتى هتجنينى... انا عايز اطلقها علشان ابقى معاكى لوحدك... انتى مش عايزانى معاكى؟"

"ازاى... عايزاك طبعاً... بس انا لما فكرت انى ممكن كنت ابقى اللى مكافا... حسيت انها غدر"

"ربنا حلل الطلاق"

"لما يكون فيه سبب"

"اخر حاجة كنت اتوقعها انك انتى اللى تدافعى عن مها... مها اللى انا متأكد انك مبتحبهاش وهى

كمان مبتحبكيش... واى موقف بيجمعكم بيتعمد تضايقك... يبقى ازاى كلامك ده"

"انا مبدافعش عن مها... انا مش عايزاك تظلمها... بس"

"خايفة انها تتظلم.... ومش خايفة انا احنا ال ٣ نبقى مظلومين"

سكنت عالية... فرحانة بكلام طه وف نفس الوقت بتحط نفسها مكان مها... تتضايق

"خلاص يا عالية انا فكرت وقررت واتكلمت مع ماما كمان"

"مامتك عرفت؟؟"

"ايوه"

"وقالت ايه"

"عادى... قالت استنى شوية ولما قتلها انى خلاص مش ظايقها سكنت... بس اللى قابلتني دلوقتى

مشكلة تانية"

"خير"

"طلاق مها هيكلفنى كثير وزى ما انتى عارفة مفيش فلوس وماما شالت ايدها"

"والعمل؟"

"بفكر ابيع العربية"

"ازاى... انت بتسافر بيها علشان تجيب بضاعة للمحل... وكمان بتنفعك ف مشاويرك... هتقدر

تستغنى عنها ازاى"

"مش عارف... ما انا كمان معنديش تصرف تانى"

"مش عارفة ياطه... ربنا يفرجها"

وفجأة خطرت على بال طه فكرة

"جت لي فكرة ثانية"

"ايه"

"ابيع الشقة... ونجيب شقة ثانية بس نطلع فرق... ادفع لمها مؤخرها ونرجع نبدأ العلاج من اول

وجديد وان شاءالله ربنا يكرمنا"

عيطت عالية من الفرحة... حضنت طه

"ياااه... انا بحبك اوى يا طه... ربنا يخليك ليا"

"ويخليكي ليا يا حبيبتي"

طه في المحل مع نرجس

يرن موبايله

"ايوه يامها... كويس... انتي كويسة؟؟ لما مش النهاردة... بكرة بالليل هاجي لك... اه عايزة ايه مش

سايب لك مصروف البيت... بلاش حجج يامها الاسبوع اللي عند عالية مخلصش ومش هاجي

البيت الا بكرة بالليل... ماشي روحى لمامتك لو عايزة تباتي عندها وترجعي بكرة براحتك... مع

السلامة"

قفل مع مها... نرجس كانت سامعاه

"ماهي كويسة اهي يا طه... ماتشيل الفكرة دي من دماغك"

"هتتغري بمكالمة تليفون... العيشة معاها صعبة اوى ولساها طويل... بتتصل بتتججج انها عايزة فلوس

وانا قبل ما اروح لعالية بسيب لها اللي يكفيها وزيادة"

"وتهعمل ايه ف الفلوس"

"كلمت سمسار يشوف مشتري للشقة وابقى اشوف شقة اقل شوية واحد الفرق"

"والعفش"

"على مهلي ابقى اجيب واحدة واحدة... ماهي برضه مش هتاخذ العفش كله... اللي هيتبقى هبقى

اكمله"

"وتهبيع الشقة ازاي وهي مش عارفة... اى مشتري هيبقى عايز يتفرج عليها"

"هقولها... لما اروح لها هقولها... كده كده ايامي عندها بتبقى عكننة فمفيش حاجة هتختلف لما

تعرف"

"ربنا یستر"

طه وعالية ونرجس ونرمين قاعدین بیتعشوا

رن جرس الباب

قام طه يشوف مين... اول ما فتح الباب

"مها!!!...ايه اللي جابك الساعة دي"

اول ما سمعوا اسم مها... نزمین قامت تجری تسلیم علیہا

وعالية قلبها اتقبض... ونرجس فضلت مكانها

مها حضرت طه

"حبیبی عندی لیک مفاجئہ"

نرمین وہی بتسلم علیہا" ادخلی طیب"

دخلت وسأها طه

"الساعة ١٢ يامها...ايه اللي مخليكي ف الشارع لحد دلوقتي"

مها بعد ما سلمت على نرجس... وتجاهلت وجود عالية

"مش قلتلك رايحة مع ماما مشوار"

طہ "ایوہ کل دہ مشوار؟"

مها"مش تعرف المفاجأة الاول"

سکتے لحظات محدث اتکلم... وکملت بفرح

"انا حaaaaaaaaاامل"

لحظة صادمة لكل الا نرmin ... اجبرتم على السكوت لتقبل واستيعاب الكلمة...لاظهار رد الفعل

المناسب

نرمین بتبار کلها بفرحة... نرجس قامت سلامت علیها وبارکت لها وبارکت لطفه

طه اول ما سمع انما حامل... بدأ الامل يصحاف خياله من اول وجديد... بقى يتخيل ابنه وهو

بیشیله... وهو يحضنه... وهو يقول يا بابا... وهو ييكر وف المدرسة... وهو كبير ويتخرج

صور متتالية جت ف خيال طه... اجبرته على الابتسام بفرحة

اول ما ابتسم بفرحة...انسحبت عالية بسرعة ودخلت اوضتها
مها بتبص عليها وهي داخلة اوضتها
"شايف...بدل ما تقولنا مبروك جريت ازاي...غلاوية اوى"
طه يقول لمامته
"شايفة...شايفة الطريقة اللي بتتكلم بيها"
مها"وانا قلت حاجة غلط...انت مش شايف"
نرجس"خلاص بقى...هى كمان معذورة...سيبيها"
نرمين"عايزين بقى بنت ولا ولد؟"
مها"نفسك ف ايه ياطه"
طه بأمل"اى حاجة...اللى يجيبه ربنا خير"
مها بتقرب منه وبتقف قصاده
"مش هتغير هدومك علشان نروح"
طه بيرجع لورا
"مش اتفقنا بكرة بالليل"
مها"افرض تعبت وانا لوحدى...يرضيك ابقى لوحدى وعلى فكرة الدكتور قالى مش كويس عليا
حرق الدم وممكن يسقطنى...لو مش مصدقنى تعالى معايا وسأله"
نرجس"ربنا يكملك على خير...اوعى ترعلى نفسك ف اى حاجة ابدأ...وترتاحى يامها"
مها"حاضر"
بيتص لطفها"ها...ياللا بقى..ده انا من امبارح نفسى ف بيترا وشامة ريحتها"
نرجس"ده وحى...جيلها ياطه اللي بتتوحم عليه اوعى متجيلهاش"
مها"ياللا بقى يا حبيبى...ابنك نفسه ف بيترا"

عالية ف اوضتها بتعيط بصوت واطى
طه داخل الاوضة...شافها بتعيط
هرب الكلام من على لسانه
"طيب قوليلى اعمل ايه؟؟ انا كنت خلاص هطلقها...مش عارف اقولك ايه...حقك ترعلى زى ما
انا زعلت ان ابني مش منك انتي"

دمعت عيون طه وهو يبأخذها ف حضنه
"مش هعرف افرح وانتي زعلانة... انا مبقاش ف ايدى حاجة يا عالية... مش هقدر اطلقها بعد ما
الحلم قرب يتحقق... فكرة وجود طفل يبقى ابني... مجرد ما تخيلتها فرحت مابالك لما يبقى حقيقة"
بيتكلم وهو زعلان علشان عالية وفرحان بأمل الطفل
"انا مش زعلانة منك... انا كمان كان نفسى يبقى لى طفل منك بس هعمل ايه... غصب عنى
معرفتش احقق لك الحلم ده"
"ياحبيبتى انا عارف انه غصب عنك... وبقي غصب عنى انما هتفضل معايا"
"وانا مطلبتش منك تطلقها"
"عارف... متعيطيش يا عالية علشان خاطرى"
مسحت دموعها
"حاضر"
قام وقف وهو مرتبك
"انا... اصل الدكتور قالها... هى جت علشان تقولى ان مش هتقدر تقعد لوحدها لتتعب"
هزت راسها
"طبعا... انا مجربة وعارفة... روح معاها يا طه"
قعد جنبها تانى
"انا ميرتاحش غير معاكى"
"هنعمل ايه بقى ف نصيينا... قوم وامتشيلش همى... مبروك ياطه"

عالية قاعدة عند هدير... وماسكة ابن هدير
هدير بتقدم لها طبق كيك
عالية "كل سنة وهو طيب.... عقبال ١٠٠ سنة"
هدير "وانتى طيبة يا عالية... احكى لى المنيلة ولدت ولا لسه"
عالية "لسه... بس قربت"
هدير "الهى تفضس وهى بتخلفهم"
عالية "يا شيخه حرام عليكى... ربنا يقومها لولادها بالسلامة"

"ايه دى البت دى راجل زى الفل واول ما اتجوزت حملت ف توأم... صحيح الحظ لما يأتى يخلى

الاعمى ساعاتى"

عالية بتضحك"ضحكتينى يا هدير والله ومن زمان مضحكش كده"

"ياخى اضحكى اضحكى...قوليلى وطه عامل ايه معاكى"

"كويس الحمد لله"

"مرجعش لنظامه القديم تانى"

"هه...رجع ايه بس...ده لو جالى وناوى يبات يوم التليفونات تشتغل واشى تعبانة اشى ودينى

للدكتور اشى معرفش ايه"

"ومبتروحش عند امها ليه وتريننا"

"متحججة بجوز امها وانها مش هترتاح الا ف بيتها"

"وطه يعنى مش شايف"

"شايف بس هيعمل ايه...بيكلمنى كل يوم وكل شوية بس طبعا مش قدامها...علشان متعملش

مشاكل"

"وطبعا بعد ماتخلف الوضع مش هيتغير كثير هتتحجج بالعيال"

"اكيد"

"مش عارفة اقولك ايه"

"قوليلى ربنا يصبرنى.. وخصوصا الزفت طارق ده مش عارفة اعمل معاه ايه"

"عمل ايه تانى... مش فضل ميحيش شوية بعد ما شفتيهم"

"شوية ورجع ييجى تانى ف غيابهم ونرمين مقوياته طبعا... بعد ما كان مزودها اوى فحركاته ونظراته

.. دلوقتى بقى كلامه كمان ومعرفش جاب رقمى ازاي واتصل بيا بيقولى عايز اقابلك بره من غير

ماحد يعرف"

"وعملت ايه"

"قفلت ف وشه طبعا وبعدها قفلت التليفون ساعة كده وبعدين فتحت"

"هو انتى ليكى ف كل خرابة عفريت"

"شفتى!!"

"بت يا عالية... طارق ده مش كان معاهم ف الكلية"

"اه"

"يعنى صاحب ربا وسكينة اوى... ليكونوا مسلطينه عليكى علشان يوقعوا بينك وبين طه ولا بعد

الشر يخلوه يطلقك"

عالية باستغراب

"معقول؟؟؟"

"ليه لأ... نرمين علشان تبعدك عنها وتبقى براحتها والتانية طبعا علشان طه"

"يعنى اعمل ايه؟؟ واتصرف ازاي؟؟ خوفتي"

"جوزك لازم يعرف"

"يعرف ايه... ا قوله انه بيعجى وانى شفتهم"

"لازم يعرف كل حاجة وان الزفت ده بيعاكسك"

"اخاف... انتى متخيلة ممكن يحصل ايه"

"يحصل اللى يحصل... تضمنى منين انما مش خطة عليكى"

"وهيعملوا عليا خطة ليه... انا مبعملش حاجة لحد"

"بس وجودك مضايقتهم... كلهم عارفين طه بيعبك قد ايه... وانى عارفة غيرة الضراير"

"بس انا مهما غيرت مش ممكن اضرها"

"مش قصدى عليكى... انتى حتى مبتبينيش غيرتك... هى غيرك يا عالية... خلى بالك"

سكتت عالية تفكر فى كلام هدير

"انا هستنى شوية... لو حصل جديد هبقى اقول لظه لما اشوفه"

(٢٧)

مها قاعدة على السرير... بتكلم طه ف التليفون

"الو... انت جاي امتي ياطه"

"انا لسه ف المحل"

"انا تعبانة اوى"

"حاسة بايه"

"ضهرى بيوجعنى"

"اتصلتى بالدكتور"

"لما تيجى انت كلمه"

"ماتكلميه لحد ما اجى"

"افرض قالى تعالى ولا طلعت بولد اعمل ايه... مش لازم تقعد ف المحل للاخر... انا تعبانة وانت

سايينى لوحدى... مش خايف يحصل حاجه وانا لوحدى"

"خلاص يامها... شوية وجاى"

"متأخرش... جعانة ومش قادرة اقوم اعمل حاجه آكلها"

"طيب متتعيش نفسك... اجييلك حاجه وانا جاي"

"هفكر واكلمك تانى"

"ماشى... مع السلامة"

"مع السلامة"

قفلت مها معاه... ومسكت بطنها المنفوخة وهى بتكلم ولادها

"تعبتوني حرام عليكم"

فاتن جاية من المطبخ بصينية حاجه ساقعة

ايمن وميار قاعدين... ومامته وباباه وعبد الحميد

فاتن بتقدم لهم

"منورين يا جماعة والله... ومنور مصر كلها يا ايمن"

ايمن "ربنا يخليكى يا طنط"
ام ايمن "ده من يوم ماجه والفرحة مش سيعانى... ولا لما قال انه مش هيحدد تانى... طرت م
الفرحة... والبركة فيكم لولا انه جاى علشان يتجوز كان زمانه بيحدد تانى"
فاتن "تغور الغربة... هو فيه زى بلدنا"
ام ايمن "اه والله معاكى حق"
ابو ايمن "عايزين نفرح بالعيال يا حاج"
عبد الحميد "ربنا يفرحنا بيهم.. انا عن نفسى وقت ما تقولوا يالا.. احنا جاهزين... مش كده يافاتن؟"
فاتن "اه... ان شاءالله وقت ما تجهزوا هنكمل اللي ناقص"
ابو ايمن "احنا السنة اللي فاتت خلصنا الشقة وبقت جاهزة... بنقول نكتب الكتاب ونحجز للفرح ف
اقرب وقت"
بصت فاتن لميار اللي شافت نظرات الفرحة ف عينيها
فاتن "ايه رأيك يا عبده"
عبد الحميد "اللى تشوفيه... انا عايز افرح بيها النهاردة قبل بكرة"
فاتن "الف مبروك يا ولاد... شوف يا ايمن هتكتب الكتاب امى وفيه وفرح مش قبل شهر علشان
نلحق نكمل حاجتنا ونفرش"
رد ايمن بسرعة "شهر ايه... كثير"
ضحكوا كلهم بفرحة
ردت عليه فاتن "شوف بس حجز القاعات وربنا يسهل ان شاءالله"

طه ف الشغل الصبح... واقف بره المكتب.. بيتكلم ف التلفون
"صباح الخير يا حبيبتي... لسه نائمة"
"صباح النور... لا صحيت من شوية"
"وعاملة ايه؟"
"الحمد لله كويسة"
"رجعتى امى امبارح"
"على ١٠ كده"
"١٠ يا عالية... ليه اتأخرتى كده... انتى مش عارفة انى بقلق عليكى"

"معلش ياطه كنت قاعدة مع هدير والوقت اخدنا...متقلقش عليا...طمنى بس عليك انت عامل ايه"

"انا...كويس"

"لا صوتك مش كويس؟"

"مفيش حاجة...كويس والايام شبه بعضها"

"فى ايه بجد؟"

"مفيش متشغليش بالك انتى بس...قوللى هتتغدوا ايه النهاردة"

"محشى...وعاملة تشكيلة"

"ماتعزمينى علشان اكلك وحشنى"

"ياريت يا طه...تعالى اتغدا معانا"

"كلى انتى مكانى بقى"

"لا تعالى انت كل بنفسك"

"مش هينفع يا عالية معلش..والله نفسى اجى بس لو جيت هدخل ف متاهات دكتور وعيا وعلاج"

واقعد جنبى علشان تعبانة وانا ما بصدق انزل اصلا...دى كانت امنية وراحت لحالها...المهم انتى

مش عايزة حاجة...ثوانى يا عالية معايا ويتنج"

"طيب ابقى كلمنى"

"حاضر...سلام"

قفل معاها ورد على المكالمه

"الو ازيك يافاتن...فينك من زمان"

"ازيك يا طه عامل ايه"

"الحمدلله...انتى عاملة ايه"

"الحمدلله...بقولك ايه كتب كتاب ميار الجمعة الجاية والفرح كمان اسبوعين ان شاءالله"

"الف مبروك يا فاتن ربنا يتمم لها بخير...هتكبرك بسرعة"

"خليها تكبرنى بس افرح بيها...هستناكم يا طه...وهبعت كارت لابله نرجس واكلم عالية"

"لا بلاش"

"بلاش ايه"

"متبعتيش حاجة لحد...انتى نسيتى عملوا ايه يوم الخطوبة"

"ما انا هعمل ايه...علشانك والله"

"متقوليش انتى حاجة لحد وهاجى لك انا وعالية ان شاءالله"

"ان شاء الله...تنوروا وهستناكم"

عالية لابسة وخارجة من اوضتها

نرجس قاعدة"انتى نازلة؟"

"اه ياماما...رايحة لهدير"

"طه عارف؟"

"اه"

"طيب مع السلامة"

نزلت عالية...وهى ع السلم قابلت طارق طالع

"عالية!!"

ارتبكت... وخافت... تماسكت

"سلامو عليكو... مستنينك فوق"

نزلت بسرعة من جنبه... نزل وراها بسرعة شدها من ايدها

وزقها ف الحيط ووقف قصاها وهو ساند ايديه الاتين ع الحيط وهى ف النص ومقرب منها اوى

"انتى بتتهربى منى ليه"

من الخوف بدأت ترتعش وتعيط

"انت عايز منى ايه...انا عملت لك حاجة "

"وانتى خايفة كده ليه"

سابها ورجع لورا اشفاقا على خوفها

كانت بتعيط

"متخافيش انا مش هعملك حاجة...بس رد فعلك غريب اوى"

"حرام عليك... انا عمر ما حد مسكنى كده الا جوزى...سيبنى ف حالى الله يخليك انا كل اللى

بترجاه م الدنيا الستر"

"انتى غريبة اوى...جوزك سايبك وععيش حياته مع واحدة تانية وانتى مجرد ما قربت منك من غير ما

المسك عملتى كده"

ردت وهى نازلة تجرى

"مش انا اللى غريبة...اللى بيستحل الحرام هو اللى غريب"

نزلت تجرى وسابته واقف مكانه

طه قاعد ف العربية... في شارع جانبي قريب من البيت

شاف عالية جاية من بعيد... فرح لما شافها... نزل من العربية

لما قربت وشافها معيطة

"مالك؟؟"

"مفيش حاجة يالا بس نمشى من هنا"

ركبت وركب طه ومشى بالعربية

"ايه يا عالية مالك؟"

"مفيش ياطه... افكرت حاجات ضايقتني"

"هو انا مش عارفك... حاجات ايه اللي هتعيطك كده... حد زعلك؟؟ ماما ولا نرمين حد ضايقتك"

"مفيش حاجة من دى والله"

"ماتقولى فى ايه"

عالية وهى بتحاول تمدا

"هقولك بعد كتب الكتاب... ممكن"

"وليه مش دلوقتى"

"علشان نعرف نروح نبارك للناس واحنا كويسين"

"ليه انتى هتقولى ايه"

"بعد كتب الكتاب"

طه وعالية قاعدين جنب بعض... وبعد كتب الكتاب ما خلص

قاموا سلموا على العروسين... وبعدين باركوا لفاتن

فاتن لاحظت تغيير على عالية... خدتها على جنب

"توانى ياطه عايزة عالية اسألها على حاجة لمبار"

طه "طيب خدوا راحتكم... هستناكى يا عالية ف العربية"

مشى طه وسألها فاتن

"شكلك مش طبيعي كده ليه....هما عملوا لك حاجة؟"
"لا يا ابلة مفيش حاجة"
"هو انا مش عارفاهم"
"مش هما"
"او مال مين"
"مش وقته شوفي ضيوفك وهبقى اكلمك"
"ضيوفى بيتصوروا مع العروسة والعريس...انتى فيكى ايه"
"خطيب نرمين...مش سايبينى ف حالى"
"نعم...وده عايز منك ايه"
"معرفش بس وانا نازلة قابلته طالع واتجم عليا ع السلم من ساعتها وجسمى كله بيتنفض"
"وايه اللى مسكتك"
"خافه...وف نفس الوقت هدير قائلنى ليكون متسلط عليا علشان يخلوا طه يطلقنى"
"احتمال والله"
"يعنى اقول لظه"
"اه طبعا قوليله...ابعدى نفسك عن البلخ بتاعهم خالص"
"حاضر يا ابلة...معلش دوشتك ارجعى لضيوفك...الف مبروك"
"الله يبارك فيكى...هكلمك بكرة اطمن عليكى"

عالية وطه ف العربية
"هاا قوليلى بقى مالك؟"
"هقولك بس اوعدى ياطه انك متسرعش ف اى تصرف"
"ليه؟؟ فى ايه؟"
"احلف انك هتتصرف بعقل"
"اخلىصى يا عالية...فى ايه"
"الحكاية بقاها سنة تقريبا...لما روجت قعدت عند مامتك...لقيت ان طارق متعود يروح عادى
ومامتك مش ف البيت"
"لنرمين لوحدها"

"مش لوحدها خالص... يعني قبل ما اروح كانت بتبقى مها ف البيت ولما روجت بقيت اكون
موجودة"

واتنرفز طه

"وكل ده ساكتة ليه"

"مامتك قالت لي ملكيش دعوة وهو بيعجى وانتي ف البيت وكأنك انا وخلاص... المهم بعد كده
شفتهم مرة..."

طه بيرق "شفتي ايه"

"لا مش زى ما فهمت... بس يعني وضع كده معجبنيش... ميليش بمخطوبين... واتكلمت مع
نرمين وبطلوا شوية بعدها"

"شوية... هما رجعوا تاني؟"

"الزيارات بقي تتكرر بس انا مكنتش بسببهم لوحدهم او لو سبتهم مش بتأخر كده يعني... بس
طارق بقاله فترة كبيرة بيضايقي"

"بيضايقك ازاى"

"نظراته... حركاته... من كام يوم كلمني ع التليفون والنهاردة وانا نازلة قابلته ع السلم اتجم
عليها... بس والله ما لحق حتى يلمنى انا سبته ونزلت"

وطلع طه بالعريية بسرعة جنونية

نرمين وطارق قاعدين... ونرجس معاهم

اتفتح الباب بالمفتاح..دخل طه وعالية معاه

شافهم طارق قام وقف وعينه مركزة على طه

طه راح ناحيته باندفاع...وضربه ف وشه

صرخت نرمين واتفاجئت نرجس وهى بتزق لظه

"في ايه"

طارق بيهجم على طه يضربه... طه كانت عصبته اكبر ومحدث قادر يسيطر على عصبته

نرمين "قلتي لي ايه قلبتيه كده"

طه "اطلع بره والبيت ده متعبوش تاني"

نرجس وهى بتقف بينهم

"اهدأ يا طه...اقعد ياطارق...صلوا ع النى يا ولاد"
وبصت لعالية اللى واقفة بعيد وهى خايقة وكملت
"ده شيطان ودخل بينكم"
طارق "اقعد ايه بعد ما اتطردت...انا مش داخل هنا تانى"
نرمين بتمسك فيه "لا ياطارق متمشيش...محدث له دعوة بينا"
طه "ده واحد غير امين عليكى ولا بيحافظ على شرف البيت اللى دخله"
طارق "يا عم المحموق اوى... حوش حوش بتطردين م الجنة انا ميشرفنيش اناسبكم"
نرمين بتصرخ "لا ياطارق متمشيش...استنى ياطارق"
خرج طارق ورزع الباب وراه
نرمين بتعيط وتصرخ
"انتى قلتي له ايه... منك لله يا شيخة... الغيرة عامياكى ...عايزة كل الناس تبقى زيكَ كده... انتى
قاعدة معانا ليه... غورى ارجعى الشارع اللى جيتي منه"
ومقدرش طه يسكت اكثر من كده على نرمين
ضربها بالقلم
"اخرسى... انتى ايه مش لاقية اللى يلحك"
نرجس "هى حصلت يا طه... هتضرب اختك كمان... الشيطانة دى قالت لك ايه قلبتك على الكل
كده...وانا اللى فاكرها طيبة"
عالية "انا معمלתش حاجة... مكذبتش ف حاجة"
نرجس وهى بتحضر نرمين اللى عمالة تعيط
"اسكتي بقى مش عايزة اسمع صوتك...ولا عايزاكى ف بيتي"
طه وهو بيزعق لعالية
"لى هدومك يالا وتعالى معايا"
وقفت عالية مش عارفة تتصرف...زعق
"يالالالالالالال"

(٢٨)

عالية وطه ف العربية.... بيسوق بنفس العصبية
"انت قتلتي مش هتتصرف بعصبية...ليه عملت كده"
"كنتي عايزاني ادخل اخده بالحضن...عالية مش عايز كلام تاني ف الموضوع ده بيفور دمي"
"دلوقتي مامتك ونرمين يقولوا عليا ايه... اتسرعت ياطه كنت تجوزهم مش تفسخ خطوبتهم"
"اجوزهم...واحد مصانش البيت اللي دخله هيصون احتى؟"
سكت شوية...وبص لها بقلق
"انتي تعرفي حاجة مقلتيهاش"
"والله ابدا...حاجة ايه؟"
"علاقتهم وصلت لفين"
قالها طه ووشه احمر من الغيظ
"اطمن هي اكدت لي ان محصلش بينهم حاجة تخوف...مفيش غير اللي قتلتك عليه بس"
سكتوا الاتنين...وبصت عالية ف الطريق
"انا هروح فين دلوقتي"
"البيت طبعا"
"بيت مين؟"
"بيتنا"
"وبكل حزم" لا ياطه"
بص لها باستغراب
"لا ايه؟؟"
"مش هروح عند مها...مش هينقع ولا هقدر"
"او مال هتروحي فين...هنروح فين يعني"
"مش عارفة...بس مش هقدر ابقى ضيفة عندها...وضيفة ثقيلة كمان"
"طيب خلاص حاضر"
"هنروح فين"

"توانى"

واتصل بمها

"الو...ايوه يامها...انا هتأخر النهاردة...هتأخر اوى...بعدين...روحى عند مامتك او هاتيها

عندك...خلاص بقى مش وقته"

وقفل ف وشها وبعدين قفل التليفون

"دى لسه هترغى...انا ناقص"

عالية ف العريية... طه بيفتح المحل... دخل اخد فلوس من الدرج... وقفل المحل تانى وركب جنبها

"هنعمل ايه"

"هنشوف اوضة ف اى فندق لحد بكرة ربنا يحلها"

"اخاف اقعد ف فندق لوحدى يا طه"

"متخافيش انا معاكى"

"ومها"

"مش هتاكلها القطة لو باتت ليلة لوحدها...سيبك منها... كفاية علينا اللى حصل النهاردة"

نرمين بتعيط ونرجس بتجيب لها عصير

"الحرباية خربت لى حياتى... اوعى تدخلها هنا تانى... وطه ازاى يطرد طارق... اسمعى انا بحبه

ومش هتجوز غيره"

"لما افهم الاول ايه اللى حصل"

"بتسألينى انا ما تسألها هي"

"انا اتصلت بأخوكى تليفونه مقفول"

"طيب والله لا طربقها على دماغهم الاتنين"

ومسكت الموبايل ونرجس بتسألها بتعمل ايه مبتردش عليها

"ايوه يامها... جوزك اخد الهانم بتاعته ونزلوا...وقافل تليفونه"

صوت مها بتزقق

"نعم...يعني لما كلمني كان معاها...يومه اسود بس لما اشوفه...يخربيتك ياطه يا حارق دمي...كان
يوم اسود لما اتجوزتك"
وكملت نرمين وهي بتصرخ
"معرفش قالت له ايه خلته جه ضرب طارق وطرده"
"وديني لاريبها السوسة دي...ضربت اسفين ف الكل علشان يبقى لها لوحدها..طيب هنشوف انا
ولا هي"
"شوفي انا ف ايه وانتي ف ايه"
"انتي ف ايه...طارق ده يدوب خطيبك انما طه ده جوزي وابو ولادي وانا احق بيه منها"
"انتي مش همك الا نفسك...كل واحد مش هامه الا نفسه... انا كمان مش هيهمني حد منكم
وهتجوز اللي بحبه غصب عن عين اي حد"
قفلت نرمين مع مها...ونرجس بتبص لها
"غصب عن مين يا بت"
"سى طه..ولا هو كلمته خلاص انزلت"
"لما افهم ايه اللي حصل وليه عمل كده...واصلا يعني انتي مخطوبة بقالك سنة ونص...عمل ايه سى
طارق بتاعك ده...اللي ماجاب شبكة ولا شفناله شقة"
"ظروفه كده وانا راضية بيها انتوا زعلانين ليه"

طه وعالية داخلين الاوضة...عالية بتحط شنطة هدومها على السرير
"طه...انت هتنام ازاي"
"بهدومي وخلاص"
"مش عندك شغل الصبح"
"هبقى اروح اغير قبل الشغل"
"وهتسييني لوحدي؟"
"هعمل ايه يا عالية...انا لازم اروح الشغل واروح المحل واشوف مها كمان متنشيش انها على وش
ولادة"
"طيب وانا؟"

"مش عارف... لما يطلع النهار يبقى ربنا يحلها من عنده... الفندق هنا غالى ومش هقدر اقعدك فيه
كثير"

سكنت عالية وهى مش لاقية اى اقتراح لمكان تروح فيه

مها سمعت صوت الباب قامت مندفعة... مقدرتش وغصب عنها قامت ببطء... كان طه وصل

الاولضة وقف قدام الدولاب بيطلع هدوم

"انت كنت معاها فين"

طه ساكت

"تسيبنى هنا طول الليل وقافل تليفونك ورايح تقضى معاها وقت لطيف وتروقوا مزاحكوا وانا هنا

يتحرق دمي"

طه خلص تغيير هدومه وراح ع الباب

"استنى هنا فهمنى"

"افهمك ايه...ايوه كنت معاها... بس علشان اتطردت من البيت هناك مش علشان نقضى وقت مع

بعض... كنت معاها علشان رفضت تيجى هنا"

"تيجى فين... انت كنت عايز تجيها الى هنا"

"شكلك نسييتى انه كان بيتها"

"كاااااا... فعل ماضى... دلوقتي بقى بيتي وبيت ولادى"

"وعايزة ايه دلوقتي؟"

"متسيبنيش تانى... افرض كنت هولد كنت تسيبنى اموت انا وولادك"

"الحمد لله انتى كويسة اهو"

"رايح فين"

"عندى شغل يامها... هتأخر"

"وهى فين"

"ف فندق... انا هتأخر سلام"

"متقفلش تليفونك تانى... انا كنت خايفة اتعب وانا لوحدى"

عالية قاعدة فى الاوضة...خايفة تخرج

كل ماتسمع صوت خطوات تجرى تقف ورا الباب وتسمع لحد ما صوت الخطوات يبعد

رن تليفونها...اتخضت...جريت ترد وهى متوقعة طه

"الو... ازيك يا ابلة... اه حكيت له... هحكيلك"

طه ف العربية وجنبه عالية...واقفين تحت بيت فاتن

"انا هترل بقى"

"عالية...بجد فاتن هى اللى مسكت فيكى"

"اه والله... هى قالتلى ان الوقت ضيق وهى وميار لوحدهم ف الفرش وعازانى معاهم"

"انتى متضايقه؟... لو مش عايزة تقعدى عندها متعمليش حاجة غصب عنك وقوليلى وانا هتصرف

ف مكان"

"انت عارف انا بحب ابلة فاتن وميار قد ايه...متقلقش عليا انا مش متضايقه"

"معلش ان شاءالله كل حاجة هتتحل قريب"

"ان شاءالله...متشيلش انت بس فوق طاقتك...متخلينش اقلق عليك"

طبطب عليها"متقلقيش انا كويس.. هكلمك ولو فيه اى حاجة ابقى كلمينى"

"حاضر"

نزلت عالية من العربية...واحدت شنطتها من الكنبه اللى ورا ودخلت العمارة...وطه واقف لحد ما

اختفت ف السلم

نرمين قاعدة بتعيط قدام الكمبيوتر وماسكة تليفونها

بتبعث رسالة لطارق ع الفيس

"رد عليا...مرة واحدة بس متسيينيش كده"

واتصلت تانى...رد عليها

"عايزة ايه؟"

"انت هتاخذنى بذنب طه ليه...انا عملتلك ايه"

"خلاص يانرمين ... انتهينا من الموضوع ده بقى"

"انتهينا يعني ايه... والسنين دى كلها كانت ايه"
"مش اول ولا اخر اتنين قعدوا يحبوا بعض وف الاخر متجوزوش"
"اهون عليك تسييني ياتارق وانا بجبك"
"بكرة تلاقى الاحسن منى... انا مش مستعد لجواز خالص"
"انت ماصدقت بقى علشان تبقى براحتك مع الزبالة اللى تعرفهم"
"مبقاش يخصك... مع السلامة... لا قبل ما أقفل... متتصليش بيا تانى علشان مهما عملتى انتى خلاص"
متنفعينيش

وقفل التليفون ف وشها... اتصلت بيه تانى مردش عليها
جت تبعتله رسالة تانى... لقيته عملها بلوك
صرخت وعيطت وهى بتقول
"ف ٦٠ داهية"
وقعدت تعيط بحرقة وهى لوحدها

طه داخل المحل... نرجس واقفة مع زباين
قعد لحد ما مشيوا.. راحت قعدت قصاده
"قافل تليفونك ليه"
"فتحته الصبح"
"ايه اللى حصل امبارح خلاك تعمل كده... بتطرد خطيب اختك م البيت"
"انتى زعلانة انى طردته وفسخت الخطوبة"
"ان جيت للحق هو م الاول مش على مزاجى... بس الدخلة اللى دخلتها امبارح مش طبيعية"
"انا هحكىلك كل اللى حصل واحكىمى بالحق"

مها قاعدة بتتكلم ف التليفون
"قاعدة ياماما اهو... محروق دمي من امبارح... دى ايامها سودة ان شاءالله بس اقوم بالسلامة
وافوق لها... ولا نرمين دى كمان اللى هتشكىلى وتعيط لى على خطيبها وانا كنت هموت من الغيظ
...لا مش هكلمها انا مش قادرة وفيا اللى مكفينى"

وفجأة مسكت بطنها
"ماما...جالي مغص جامد"
اتنهدت بالراحة
"لا خلاص راح...ما تيجي شوية"

نرجس وطه قاعدين بعد ما حكى لها
"وانت ايش ضمنك ان كلامها صح"
"وهي هتكذب ليه"
"معرفش...يمكن غيرانة من اختك"
"والغيرة دي هتظهر فجأة...انتى مش عارفة عالية...الاولى انها تغير من مها مش من نرمين ومع ذلك
مبتجيش سيرتها خالص"
نرجس ساكتة

"ماما...عالية مالهش حد غيرنا...هنسيها متلظمة كده"
"مش وديتها لفاتن...خلى فاتن تملها من ناحيتنا"
"عالية بتحبكم وحتى لو فاتن اتكلمت هي مش هتسمع لها"
"عايز ايه يعنى"

"عايز اصالحكم على بعض وترجع البيت"
"لما الامور قدما مش دلوقتي...اختك دلوقتي شايطة"
رن موبايل طه...رد...سمع مها بتصرخ وبتقوله
"ألحقني يا طه...انا تعبانة اوى"

مها على السرير....وطه قاعد جنبها
"حمدالله ع السلامة"
"هما فين؟؟ كويسين"
"اه الحمدلله"
"ولدين؟؟"
"لا ولد وبنت الحمدلله"

"مبروك يا حبيبي"

"الله يبارك فيكي ... ومبروك عليكى انتى كمان"

"شفت ولدت ازاي بسبب حرقه الدم بتاعة امبارح ... متزعزعينش تاني علشان خاطر ولادك"

"حاضر"

"هما فين عايزة اشوفهم"

قام طه اخذ واحد من نرجس وخلاها مسكته

وراح جاب البنت من مامه مها

"هااا... نسميهم ايه"

عالية واقفة ف المطبخ ف شقة منار... بترتب دولاب المطبخ

دخلت لها فاتن

"خلصتى يا عالية"

"قربت اهو"

"هكمل معاكى... احنا كده خلصنا الحمد لله نبقي نيجي نفرش السجاد ليلة الفرح"

"ربنا يتمم لها بخير ويسعدها يارب"

"احنا تعبناكى معانا اوى يا عالية"

"بالعكس والله... ده مفيش حاجة بتهون عليا غير وجودى معاكم... انا اللي تقلت عليكم... بقالى

١٠ ايام قاعدة عندكم وطه ولا قالى هيوديني فين"

"اخص عليكى... انتى منوراني"

"ربنا يخليكى يا ابلة... انا عارفة انه اتلبخ بولاده ربنا يخليهومله يارب"

"عقبالك... انتى وقفى العلاج؟"

"ايوه"

"ماترجعى للعلاج تاني"

"مينفعش يا ابلة"

"مينفعش ليه"

"اى واحدة بتتعالج علشان الخلفة... لازم يكون جوزها معاها... انما انا طه مش معايا ومن زمان"

"وليه ساكنة... ده جوزك وليكى حقوق عنده"

"فيه حاجات مينفعش تتطلب... ان مكنتش بتيجى تلقائية مش هيبقى لها قيمة... وانا بحب طه
ومقدرة ظروفه.. مش زعلانة منه"

نرجس مع نرمين ف البيت... داخله لها اوضتها

"مش هتقومى تيجى معايا سبوع ولاد اخوكى"

"لا"

"ليه"

"مش عايزة اشوف مها ولا طه ولا ليا نفس افرح"

"بقولك ايه... انتى مش اول واحدة تفسخ خطوبتها... او مال لو كان عدل"

"كنت بحبه... هو ليه محدش حاسس بيا"

"لو بيحبك مكنتش بص لغيرك حتى مرات اخوكى... ده واطى"

"انا غلطانة انى حكيت لك"

"ياريتك حكيتى م الاول... جاية تقولى دلوقتى انه بتاع نسوان ولسه ماسكة فيه... انتى ايه"

يابت... انتى كنتى عارفة وساكتة"

"كلها حاجات عابرة بس كان بيحبني انا"

"اه ما هو باين"

"انتى بتقطينى كده ليه... مش فسختوا الخطوبة... بلاش ازعل"

"زعلتى خلاص... اعملى حسابك عالية هترجع البيت"

"مش هيحصل ياماما"

(٢٩)

عالية قاعدة ف القاعة... ف فرح ميار وايم... مع هدير وولادها
كل الموجودين فرحانين بالعروسين وهما بيرقصوا بحب وفرحة
عالية قاعدة وعينها ع الباب كل لحظة
والموبايل ف ايديها كل شوية تبص فيه
لحد ما بدأت تفقد الامل لما الساعة عدت ١١ ونص
فاتن رغم كل الموجودين الا انها كل شوية تقعد مع عالية وتقوم وترجع تقعد معاها وهكذا

عالية قاعدة مبتسمة وقلبها حزين
خائفة بيان عليها الحزن ف الفرحة
هدير "انا هقوم يا عالية يدوب ألحق اروح بالعيال"
عالية "طيب يا حبيبتي خلى بالك منهم"
هدير "هستناكى يا عالية تيجى بكرة او بعده... تعالى اقعدى معايا"
عالية "ما انا عند ابلة فاتن اهو"
هدير "ابلة فاتن مش اقرب لك منى... انتى اختى وبيتى هو بيتك.. وانتى خلاص وقفتى معاها ف جواز
ميار... كفاية"

عالية بترد بكسرة نفس
"هشوف يا هدير واقولك... لازم استأذن طه"
همت هدير انها تتكلم بعصبية... رجعت مسكت نفسها
"مظننش هيقولك لأ لانه مش مهتم... ماعلينا انا قايمة هسلم عليهم وامشى"
قامت هدير سلمت على فاتن وميار وشاورت لعالية وخرجت من القاعة

قعدت عالية مستنية الفرحة يخلص... حسست بحد ييمسكها من كتفها
التفتت... فرحت لما شافت طه
"طه... تأخرت اوى كده ليه"
"معلش يا عالية كنت عند الدكتور بالعيال"

"ماهم؟"

"عندهم برد بس الحمد لله"

"سلامتهم... انا قلت مش جاي"

"انا وعدتك انى جاي... وعندى ليكى خير كويس"

عالية ف اوضة ميار... بتحط هدومها ف الشنطة

وفاتن قاعدة على السرير

"يا عالية ما انتى كنتى منورانا... مستعجلة تمشى من عندنا"

"ربنا يخليكى يا ابلة... انا مش عارفة اقولكم ايه ع المقابلة وحسن الضيافة... سواء انتى ولا الحاج

عبد الحميد ولا ميار... حسستونى انى وسط عيلتى"

"يا خير يا عالية... ليه هو احنا غرب... ده والله عبد الحميد كان معتبرك زى ميار"

"ربنا يكرمكم ويسعدنا يارب"

"يارب ويسعدك انتى كمان... مقلتلش انتى ماشية من هنا على اى اساس"

"هرجع البيت تانى... ماما هى اللى قالت لطفه"

"ونرمين؟"

"قالى انهم مش عايزينا تتعامل مع بعض خالص لحد الامور ماقدنا وترجع المياه لمجاريها"

"وطه؟"

"ماله؟"

"مسألتيهوش عن حقك ف وجوده معاكى زيها بالظبط؟"

ردت عالية بانكسار

"ماليش عين اقارن نفسى بيها... هى دلوقتى ليها الاهتمام الاكبر... متنسش انها لسه والدته قريب

واتنين يعنى محتاجة وجوده جنبها"

"انتى هتشيلى همها... شيلى هم نفسك"

طفه بيفتح الباب بالمفتاح... بيدخل وهو ماسك شنطة الهدوم

بيسمع صوت نرمين بتتكلم ف التليفون ف اوضتها

"تعالى يا عالية... ادخلي"

دخلت وراه... دخل على الاوضة... وهى ماشية وراه

حط الشنطة على الارض... وقعد على السرير ووشه ف الارض

حست عالية انه مش طبعى... قعدت جنبه

"مالك ياطه؟؟ شكلك متغير... ولا مخي حاجة؟؟"

مسك ايدها وباسها

"سامحيني يا عالية... انا بهدلتك اوى معايا"

شافت لمعة دموع ف عينيه... طبطبت عليه

"ليه بتقول كده.. انا كفاية عليا انى ابقى معاك"

"انا حاسس انى بقيت مُسير... بفكر كثير انا ايه اللي خلاى اتسرع واتجوزت مها... ده لا فيه

حب بيننا ولا تفاهم ولا اى نوع من الاحترام... انا كل يوم بندم انى اتجوزتها"

"ايه اللي حصل بس لكل ده"

"مش مرتاح... وف نفس الوقت لما يبص ف وش ولادى بنسى تعبى معاها... انا ساعات بسرح

واتخيل انك انتى امهم... واقول ياريتهم كانوا ولادنا"

ردت ودموعها نازلة

"نصيب يا طه... مش مكتوب لى اكون ام... انت تعرف انى ساعات بتخيل واقول ياترى شكلهم

ايه... شبه مين فيكم... نفسى اشوفهم بس مش من حقى اطلب اشوفهم وانا بشوفك انت بالعافية"

مسح طه دموعه... وطلع تليفونه

"اهم... انا مصورهم صور كثير اوى... قلبى واتفرجى"

اخذت عالية الموبايل وفضلت تتفرج على الصور

بتبص لهم بكل حب واشتياق لتحقيق حلم الامومة ودموع

"حلوين اوى يا طه... ربنا يخليهم ملك"

"هبقى اجيبهم تشوفهم اكيد... لما هتشوفهم هتحسى باحساس تانى خالص غير الصور"

لاحظت عالية تغيير نبرة صوته لما بيتكلم عن ولاده... ونظرته ليهم اللي بتبين قد ايه بيعجبهم ومجرد

سيرتهم بتفرحه

عالية قاعدة فى اوضتها... دخلت عليها نرجس

"صاحبة؟"

"ايوه ياماما اتفضللى"

دخلت نرجس وقعدت

"حصل حاجة بينك وبين نرمين؟"

"لا... انا اسفة والله ما كذبت على طه واللى قلته كله حصل"

"خلاص الموضوع ده انتهى... بصى انا وافقت انك ترجعى البيت علشان ده برضه بيتك...وف

نفس الوقت بيت نرمين... انا مش عايزة مشاكل خالص...نرمين مجروحة من اللى حصل

وعايزاكى لو اتكلمت معاكى ولا ضايقتك استحمليلها"

"حاضر"

"ولما مها تشد حيلها هبقى اعزمهم هنا كل جمعة علشان اشوف العيال واقعد معاهم...وانتى براحتك

لو عايزة تبقى موجودة او لو عايزة اليوم ده تقضيه بره براحتك"

"ياماما انا والله بحبكم وبحب ولاد طه من قبل ما اشوفهم...وجودهم مش هيضايقنى انما انتم لو مش

عايزينى اكون موجودة قوليلى"

"انا لو مش عايزاكى مكنتش رجعتك يا عالية...انتى اصيلة وبتحى طه بجد"

"ربنا اللى عالم انى بحبه وبحب اشوفه سعيد حتى لو مش جنى"

عالية ف المطبخ... دخلت لها نرجس

"خلصتى يا عالية"

"خلصت اهو ياماما"

"طيب تعالى حضرى معايا السفرة لاحسن كلمتهم قالوا جاين ف السكة"

"هتصحى نرمين تتغدا معنا ولا ايه؟"

"اه لما يبقوا ييجوا"

طه ومها ونرمين ونرجس وعالية قاعدين على السفرة بيتغدوا

يسمعوا صوت حد من الاطفال بيعيط

مها"اففف...اهو لاعارفة انام ولا اكل ولا اشرب...قومى يانرمين شوفيهم"

نرمين "وانا هرضعهم... ماتشوفى انتى ولادك"
مها "شايفة ياماما... من ساعة ما اتجوزت طه ونرمين بقت غلاوية اوى وبتغير منى"
نرمين "هغير منك على ايه يامها ماتلمى نفسك شوية... وانت ياطه ساكت لها كده"
طه "هتتخايقوا ومفيش واحدة فيكم هتشوف اللى بيعيط ده"
يسمعوا صوت الاتنين بيعيطوا
عالية "هقوم اشوف... كملوا انتوا اكل لحد ما اسكتهم"
تزعق مها وعالية قايلة
"لأ... انتى لأ"
تقف عالية مكانها محرجة
طه "لأ ليه؟"
مها "المره اللى فاتت روحنا من هنا العيال عيوا... معرفش اتحسدوا ولا حد كان تعبنا اتعمد
يعديهم؟"
سكتت عالية مش عارفة ترد
ردت نرمين
"معاكى حق... اللى تخرب بين اتنين ممكن تعمل اى حاجة... الحقد وحش خلى بالك على
عيالك... قومى شوفيهم انتى"
قامت مها لولادها
دخلت عالية اوضتها بتعيط... دخل طه وراها
"متزعليش يا عالية حقك عليا"
طه... انا الـ ٦ شهور اللى فاتت دى كنت بفكر... انا قاعدة هنا طول الوقت ونرمين مش طايقانى
وبتسمعننى كلام صعب كل شوية وانا ساكنة مبتكلمش... الجمعة اللى بشوفك فيها مها بتسمعننى
كلام اسوأ من نرمين... انت ناسينى خالص وغصب عنك انا عارفة... انا بقيت عبء عليك
ياطه... وكفاية كده"
"انتى بتقولى ايه؟؟ انا مقدرش استغنى عنك"
"لا انت قدرت فعلا... انا مبنامش الليل من التفكير يعنى متفتكرش ان كلامى ده من موقف
النهاردة... انا بفكر بقالى كثير... انا مبقاش ليا وجود ف حياتك غير بمكالمة تليفون... اه بنتكلم كل
يوم واكثر من مرة وبس... ده كل اللى بيربطنا يا طه... مش عايزة افضل اتعذب واعذبك معايا"
"لا يا عالية متقوليش كده... انتى حبيبتي... ده وجودك اللى بيهون عليا حياتى"

"وانا مین یهون علیا حیاتی... انا تعبت یاطه... خلاص مبقاش عندی ای قدرة استحمل حد"

وعیظت وہی بتکمل

"طلقني يا طه"

اخذها ف حضنه وهي بتعيط

"مقدرش اطلقك... انتي حبيبتى يا عالىة ومقدرش استغنى عنك"

دخلت عليهم مها فجأة

"یا سلااااااااااا... عینی عینک کده... انتم ایه مفیش عندکم دم"

طہ "اخر سی یامہا"

قامت عالية وهي بتعيط...وبدأت تحط هدموها ف الشنطة

مها"ایوه یا بت اعمالیهم علیا...طب هو عبیط ویخیل علیه حرکاتک دی انما انا فاهماکی

کویس... قال یعنی ہتمشی بجد"

عالية لطفه "طلقني ياطه"

نرجس و نرمن واقفين ع الباب.. نرمن بتبتسم بشماتة

نرجس مستغربة اللي ييحصل

طه بيزعق "اخرسی يامها و متکلميش تانی"

طه بيشد الشنطة من عالية

"مش هطلقك يا عالية"

مها" ماتسيبها تغور ف ٦٠ داهية"

طه "لولا ولادی کنتی انتی الی غورتی من زمان"

مها"بقی کده"

طه "ايوه كده... انا مبحبش الا عالية... سامعة"

مها وہی بتجری علی ولادھا

"طیب یا طه... یبقی مش هتشف ولادک تانی... ولا بیته ویت عیالی تدخله... انت فاهم"

جریت نرجس وراہا

"استنی یامها... متخلیش الشیطان یدخل بینکم"

طه قعد وهو ماسك شنطة الهدوم علشان متاخدهاش عالية

"مش هتمشي يا عالية ومش هطلقك"

عالية"مش هقدر اقعد خلاص ياطه...انا كرهت عيشتي هنا...وروح لها لانك مش هتقدر تستغنى
عن ولادك انا عارفة"

طه"ايوه بحبهم وبحبك انتي كمان"
عالية"هما اولي بيك منى...روح ألحقها انا لازم امشى...سيبنى امشى ارجوك"
غيرت هدومها بسرعة واخذت شنطتها وخرجت

كانت مها قاعدة تعيط ونرجس جنبها بتهديها
مشيت عالية من غير ما حد يقولها استنى

طه قاعد ف الاوضة زى ماهو
دخلت نرجس عليه بابنه ...حطته ف حجره
"ملكش الا مراتك وعيالك يا طه... عيالك اللى كنت بتترجاهم م الدنيا مش بعد ما ربنا رزقك
بيهم تكفر بنعمته"
"وعالية؟"

"انت مسبتهاش... طالما هى اللى طلبت الطلاق سيبها وخليك مع مراتك وعيالك...قوم راضى مها
وهى هتراضى بكلمتين... قوم علشان خاطر ولادك"

طه بالليل صاحى...ومها نايمة والاطفال ف سريرهم
قام طه يبص عليهم... ودموعه نازلة وهو بيفتكر كل ايامه مع عالية وراحته معاها وسعاده اللى مش
حاسس بيها دلوقتى

عالية فى السرير وجنبها هنا... دموعها نازلة وهى بتفتكر ايامها مع طه قبل جوازه...وصبرها
وسكوتها على الذل اللى شافته بعد جوازه
دخلت هدير تتسحب
"انتى صاحية"
مسحت عالية دموعها بسرعة
"اه"

"وبعدين بقى... هتفضللى مقهورة كده... مش انتى مقتنعة باللى طلبتية"
"اه طبعاً... مشكلتى انى لسه بحبه... بس هو فين؟؟ مبقاش معايا"
"معلش يا عالية... مسيرك ربنا يعوضك خير"
"ربنا كريم... قومى نامى وانا شوية وهنام"
"طيب تصبى على خير"

عالية بتلبس... خرجت من الاوضة كان عصام وهدير قاعدين بيظفروا
عصام "رايحة فين ع الصبح كده يا عالية"
عالية "انتى مقولتيلوش يا هدير"
هدير "نسيت معلش... عالية شافت اعلان عن وظائف ف مدرسة خاصة فرايحة تقدم"
عصام "خير بس عالية هتشتغل ايه ف المدرسة"
عالية "هما طالبين مؤهلات كتير دبلومات وبكالوريوسات وكل حاجة"
عصام "ربنا يوفقك... تيجى اوصلك ف طريقى"
عالية "لا روح انت هركب واروح متقلقش"
قام عصام ونزل... وسألته هدير
"هتقولى لظه؟"
"لا... وطول الاسبوع اللى فات بيكلمنى وانا مبردش... خايفة اضعف.. مش خايفة... انا متأكدة لو
سمعت صوته هضعف وارجع له"
"وبعدين... ماهو انتوا لازم تتكلموا"
"مش دلوقتى... على الاقل لما احس انى قويت شوية واقدر اتمسك بالطلاق"

عالية واقفة ف زحمة... ناس كتير جاينين يقدموا
والتقديم معاه انترفيو ف نفس الوقت... سمعت حد بيكلمها
"عالية؟؟"
التفتت اتفاجئت بطارق... ارتبكت مش عارفة ترد ولا تعمل ايه
"ازيك يا عالية عاملة ايه؟"

ردت باقتضاب

"الحمد لله"

مشيت خطوات بعيد عنه... راح وراها

"انا عايز اعتذرلك عن كل اللي حصل منى... بس طمنيني عليكى"

"حصل خير... انا كويسة الحمد لله شكرا"

بعدت خطوات ... راح وراها

"انا عايز اتكلم معاكي يا عالية... حاولت ادور على رقمك اللي كان معايا ملقيتوش خالص... لازم

اتكلم معاكي"

"اسفة معلش مفيش كلام بيننا... مش هقدر اتدخل بينك وبين نرمين لاني سبت البيت هناك... لو

عايز تصالحها تقدر تروح المحل لما متها واخوها"

سألها بفرحة

"انتى سبتى طه؟"

استغربت فرحته ومردتش... كمل كلامه

"انا مش عايز اتكلم على نرمين.. انا عندي كلام يخصك انتى وفرحتينى لما قلتلى انك سبتى طه"

"معلش بس ... يفرحك او يزعلك ف ايه؟"

"انا عايز اتجوزك على سنة الله ورسوله يا عالية... انا كنت عارف ان وضعك هناك مش هيستمر

كثير ومسيرك تزهقى"

"انت ايه اللي بتقوله ده... انا متجوزة... انا لسه على ذمة طه"

"لسه على ذمته وسايين بعض ولا عايشين مع بعض؟؟"

ردت بانكسار

"سايين بعض"

"خلاص... يبقى تطلقى وتجوز"

عالية متفاجئة من كلامه... كمل كلامه

"انا عارف انك شايفانى راجل معندوش اخلاق... بس انا عايزك تفهمى انى اتغيرت والله اتغيرت"

ردت باستنكار

"غريبة"

"انا بعترف انى كنت مش كويس وليا علاقات كتير... وحاولت معاكي لمجرد علاقة عابرة ووقت

اقضيه معاكي وقلت هتبقى سهلة علشان جوزك متجوز وبعيد عنك وفاهم ممكن تحسى بيايه

ومشاعرك هتكون محتاجة حد يهتم بيكى... بس اتفاجئت بقوتك وصدك ليا... انا حتى مزعلتش انك
قلتي لجوزك... انا اناكدت ان لسه فيه ناس محترمة ... يا عالية انتى اللى ابقى مطمئن انى أأمنها على
اسمى وشرقى ... انتى جوهرة نادرة مش اى حد يعرف قيمتك"
عالية متفاجئة من كل كلام طارق.... اول حاجة جت على بالها
"انت عايز تتجوزنى وانت عارف انى صعب اخلف؟"
"ايوه طبعا عارف... بس هعمل ايه بعيال تكون امهم مش عارفة تربيههم... وبعدين محدش عارف
النصيب يمكن لما نتجوز ربنا يدينا... ناس كتير الدكاترة غلبت معاهم وخلفوا... الحكاية دى مش
شاغلانى لدرجة انى افرط ف واحدة زيك"
عالية ساكتة ومش عارفة تتكلم... كمل طارق كلامه
"انا اتغيرت... والله ما عملت اى حاجة غلط من يوم ما سبت نرمين انا كمان قربت من ربنا
والتزمت بالصلاة... وحاسس ان ربنا قبل توبى علشان كده قابلتك النهاردة"
"اه صحيح انت هنا ليه؟"
"جاي مع واحد صاحى... شفنى الصدفة"
جه عليها الدور ف التقديم... واتنادى على اسمها
"هستناكى يا عالية... عايز اكمل كلام معاكى"

عالية وهدير قاعدين مع بعض

"هى اه حاجة غريبة بس بتحصل... ربنا غفور رحيم.. مترفضيش طارق طالما متقدملك وراضى

بكل ظروفك"

"وطه؟"

"طه خلاص صفحة واتقفلت بقى... انسيه وعيشى حياتك مع حد يقدرك... فكرى يا عالية...

فكرى بعقلك بس"

طه ع السریر...نایم صاحی
 مها بتحط ایدها علیه تصحیه فاکراه نایم...یتنفض من لمستها
 "یا سلااااااااااا...ایه قرصتک عقربه علشان تتنفض کده"

بص ف الساعة...سأبها وقام دخل الحمام

وهي ماشية وراه

"هو ايه النكد اللي احنا فيه ده من يوم ست زفته ما مشيت... طلقها وخلصنا انت مستنى ايه"

خرج من الحمام ودخل يلبس

"هى مشيت وسابت لى عفريتها ينكد عليا... طلقها وخلصنا من اى حاجة تربطها بيك... طلقها

وريجنى"

رد بعصبية

"مش هطلقها... سامعة مش هطلقها"

"لا بقى تطلقها... يا تطلقنى انا وملكش عيال عندى"

"انتى بتلوى دراعى علشان عارفة انى متعلق بيهم"

"احسبها زى ما تحسبها"

كمل لبس...ونزل من غير ما يرد عليها

طه قاعد مع نرجس ف المحل

"قوليلى دلوقتى اتصرف ازاى... مش كنتى بتفضلى تقوليلى اتجوز علشان تخلف... ادينى خلفت

...فين الراحة والسعادة اللي كنت عايشها مع عالية... عالية مش بترد عليا واساسا مش عارف

هقولها ايه لو ردت... انا فعلا قصرت معاها كثير... والثانية اللي بتخيرنى بين عالية والعيال... اعمل

ايه"

"طلق عالية يا طه ده الحل الوحيد"

ونزلت دموعه وهو مخنوق وبيتكلم

"مش هقدر... انا بحبها... وهتفضل على ذمتى لحد ما اموت"

"بعد الشر عليك"

"شر... هو فيه اكر من كده شر... انا بموت بالبطي... انا كنت ممكن مشوفهاش بالايام بس كنت

بكلمها واحكى لها وتحكى لى... هى الحظن الوحيدى اللي كنت بحس فيه بطعم الراحة"

"ومها... هتعمل ايه معاها لو صممت على كلامها"

"مش عارف... انا مش عارف حاجة خالص بس اللي متأكد منه انى مش هطلق عالية ابدًا"

بعد شهرين
عالية خارجة من المدرسة...لقيت طارق قدامها
"ازيك يا عالية"
"الحمد لله...جيت ليه؟"
"دى مقابلة برضه؟"
"معلش اصل شكلى كده يعنى"
"شكلك ايه... وحشتيني وحببت اشوفك.... مش هنفضل كده كثير يا عالية"
"اعمل ايه طيب"
"اديني كلمة...بقالك شهرين كل ما اكلمك تقوليلي بفكر"
"مينفعش افكر ف جواز وانا على ذمة راجل"
"وهنفضل كده...افرضي مطلقش هنفضل متعلقين كده"
"انا كنت ناوية اطلب منه الطلاق فعلا بس بقاله فترة مبيتصلش خالص"
"خلاص اتصلى بيه انتى واطلبى الطلاق لو رفض ارفعى قضية خلع"
"ربنا يسهل..معلش يطارق لازم امشى وبلاش تجيلى هنا تانى"
"انا كنت فاكرك هتفرحى لما تشوفيني"
"معلش كل وقت وله اذان...سلام"

مها بتتصل بنرجس فى المحل...المغرب
"الو... هو فين طه...مقموص؟"
"مقموص ايه؟؟ طه لسه مجاش؟"
"مجاش ازاي...او مال راح فين؟"
"معرفش انا مرضيتش اتصل بيه اشوف اتاخر عليا ليه قلت يمكن نايم شوية"
"طه نزل الصبح ف معاد الشغل عادى ومجاش انا قلت جالك"
"ومتصلتيش بيه ليه يامها"
"بتصل الموبايل مقفول"
"انتى هتقلقينى ليه؟"

"لا متقلقيش ... حركة قفل الموبايل دى لما بيكون مع الزفنة بتاعته... والله العظيم ماهسكت له تانى"

"انا هتصل بيها واشوف... انتى قلقتي... مع السلامة"

"ابقى عرفيني لما تكلميه"

عالية قاعدة مع عالية الصغيرة بيكتبوا الواجب

رن موبايلها... بصت لمدير

"دى ام طه"

"ردى عليها شوفى عايزة ايه وخليكى قوية اوعى تسكتى لها على اى حاجة"

ردت عالية"الو.. الحمدلله... طه؟؟؟ لا معرفش انا مشفتوش من يوم ما سبت البيت... ولا كلمنى ولا

كلمته... مع السلامة"

هدير بتسأل عالية بفضول

"فى ايه"

عالية بترد بقلق"بتسأل على طه... من ساعة ما نزل من بيته الصبح مرجعش لا البيت ولا المحل... ربنا

يستر"

عالية ف المدرسة... بتبص ف الساعة ١٠ الصبح

قلقانة على طه غصب عنها من ساعة اتصال نرجس... اتصلت بنرجس

مها الصبح قاعدة ومعاها نرجس... الاتنين بيعيطوا

رن موبايل نرجس... ردت بلهفة

"ايوه يا عالية... عرفتى حاجة؟"

"لا... انا كنت عايزة اطمئن بس... طه بخير؟؟"

نرجس تعيط

"معرفش... لما روحت بالليل لقيت العربية مركونة تحت البيت وسألت نرmin قالت مجاش ولسه

راجعة من الشغل عنده كنت بسأل عليه قالوا مجاش"

عالية بتسأل ودموعها نازلة

"يعنى ايه؟؟ حصل له ايه؟"
"معرفش... معرفش حاجة وعمرها ما حصلت انه يختفى كده ومحدث يعرف"
مها بتعيط وبتقول لرجس
"حلفيها انما متعرفش؟؟؟ لو هي عارفة مكانه تقول بس ميكونش حصله حاجة"
سمعتها عالية... ردت قبل ما نرجس تسألها
"والله ما اعرف مكانه ولا شفته من اخر مرة كنت فيها ف البيت"
نرجس "يا حبيبي يا بنى... يكون عمل ف نفسه حاجة... انتوا الاتنين السبب... لو عمل ف نفسه
حاجة يبقى بسببكم كل واحدة فيكم مفكرتش الا ف نفسها بس وهو مبقاش عارف يرضى
مين... منكم لله"
مها بتعيط... وعالية بترد على نرجس
"لا طه اكيد ميغضبش ربنا ويأذى نفسه... انا خايفة يكون حصل له حاجة ومحدث عارف"
نرجس برعب
"قصداك ايه؟؟ هنتصرف ازاى... انا تفكيرى اتشل خلاص"
عالية "انا هروح ادور عليه... يارب يكون بخير"
نرجس "طيب انا جاية معاكي... انتي فين"
عالية "انا ف الشغل دلوقتي... بشتغل ف مدرسة مصر التجريبية... هستأذن واكلمك اقولك نتقابل
فين"
نرجس "طيب... ربنا يطمنا يارب"
قفلت نرجس مع عالية... وقامت
مها "هتعملوا ايه"
نرجس "هنروح ندور عليه"
مها "وهتسييني لوحدي كده محتاسة بالعيال وقلقانة"
نرجس "اتصلي بمامتك تيجي تقعد معاكي"
مها بصوت واطى
"اتصلت بيها بالليل تيجي تبات معايا قالت مش هينفع تيجي وتسبب بيتها"
نرجس بعد لحظات تفكير
"قومي لبسي العيال وتعالى اقعدى معانا لحد مانظمن"

(٣٠)

عالية ونرجس بيدوروا ف المستشفيات وبعد ما سألو عند فاتن ... بلغوا باختفاء طه
وبعد ما خلصوا واقفين مستنيين تاكسى
"انتى قاعدة فين من ساعة ما مشيتى"
"عند هدير"
"وايه حكاية الشغل ده... من امى؟"
"من شهرين... كان لازم ابتدئ افكر ف حياتى هتمشى ازاي بعد الطلاق"
"طه كانت نفسيته تعبانة اوى من بعد ما مشيتى... كان بيقول مش هيطلقك ابدا... يا حبيبى يابنى
اتاريه بيقاسى ومحدث حاسس بيه"
دمعت عالية وقلبها موجوع على طه
"ربنا يرجع هولنا بالسلامة"

مها قاعدة ماسكة احمد ونرمين ماسكة اروى
"عملتى فيه ايه يامها خليتيه يطفش"
"هعمل ايه يانرمين انتى اتجننتى"
"ايه اللي يخليه يسيينا كلنا كده ويختفى الا اذا كانت حصلت حاجة كبيرة"
"كبيرة ايه... مفيش حاجة كبيرة... مشا كلنا هي هي من اول ما اتجوزنا كلها عن الزفة اللي مش
قادر ولا راضى ينساها"
"اهي الزفة دى اللي كنا بتتريق عليها حظها احسن مننا احنا الاتنين"
"ازاي يا فالحة"
"انتى جوزك طفش وسابك وطول الوقت عارفة انه بيعبها اكر منك... وانا خطيى اللي بحبه سابى
ومن ساعتها لاعارفة احب ولا حد حاول يتقرب منى اصلا"
"اسكتى يانرمين بلا جواز بلا خيبة... عاجبك حالى... اتجوزت وانا فاكرة انى هفرح واعيش مبسوفة
واخلف واعوض احساس الاسرة اللي اتحرمت منه... كنت فاكرة هقدر اخليه ينساها... انما كنت

بحلم...انتى متعرفيش يعنى ايه جوزك يكون بيعحب غيرك وانتى عارفة وهو مش بينكر...حتى لما
بعدت هو مش بينساها ويبدأ يبين كرهه ليكى"
"ارحم م الوحدة والفراغ الللى انا فيهم...كل الللى حواليا اتجوزوا... انتى اتجوزتى واتغيرتى معايا...
بعد ما اتجوزتى اخويا كنت فاكراكى هتبقى اقرب لى م الاول بعدتى اكثر... البت المفوعة بنت
فاتن اتجوزت جوازة حلوة...كل اصحابنا اتجوزوا... مفيش غيرى الللى قاعدة زى ما انا"
"حسدوا الاعمى على وسع عينه"
"حسد... انا هحسدك؟؟... انا مش عارفة كان طه مستحمل طولة لسانك دى ازاي"
"لمى نفسك يانرمين وسيبى ف مصييتى...طه مش عارفة حصل له ايه وسابى بعيلين وانتى تقولى
اتجوزت واتغيرت وكلام خايب كده...ده انتى بقيتى لا تطاقى"
"دلوقتى لا اطاق... انما الاول كنت حلوة...خلصت حاجتى من عند جارتى خلاص"
اتفتح الباب ودخلت نرجس وهى بتزقق لهم
"ايه ده فى ايه؟.. صوتكوا واصل للشارع"
"مها"طمنينى الاول فيه جديد؟"
نرمين"لقيتوه؟؟"
نرجس وهى بتقعد
"ولا فيه جديد ولا لقيناه"
وبصت لاحمد واروى وعينيها دمعت

عالية بتعيط بالليل ف الاوضة...تدخل لها هدير
"لسه بتعيطى يا عالية...انا افتكرتك نتي"
"هتجنن ياهدير... هموت واطمن عليه... الايام بتعدى ومفيش لا حس ولا خبر ولا عارفة اذا كان
عائش ولا بعد الشر حصل له حاجة"
"ربنا يستر...للدرجة دى لسه بتحببه"
"ايوه بحبه...بحبه اوى ونفسى يرجع... حتى لو مش هشوفه خالص بس اعرف انه رجع وكويس
هرتاح...انما وانا مش عارفة حصل ايه كده حاسة انى هموت روحي بتتسحب منى وقلقانة"
"متخافيش...بدل مفيش اى خبر وحش يبقى متخافيش...يمكن بيأدهم شوية وهيرجع"
"يارب...ان شاءالله يكون كويس ويرجع بالسلامة"

"عالية... انتى خلاص نهيى مع طارق"
"طبعاً... انا اتأكدت انى بحب طه ومش ممكن هقدر ابقى مع راجل غيره... ممكن افضل لوحدى
انما مبقاش مع غيره ابدا"

ام مها عندها ف بيت نرجس
احمد واروى قاعدين بيلعبوا على الارض... بتبص عليهم ويتسألها
"كبروا ماشاء الله... نينتهم مش هتعملهم عيد ميلاد؟"
"عيد؟؟ نحتفل ازاي وابوهم منعرفلوش طريق"
"وانتى هتفضلى قاعدة كده... بقاله ٤ شهور لا حس ولا خبر وانتى ساكتة"
"ف ايدى ايه عمله"
"اطلبى الطلاق طبعاً... انتى لسه صغيرة والف مين يتمناكى"
بصت لها مها باستغراب
"اتطلق؟؟!! سهل طبعاً انى اتطلق بس ولادى اجيبهم واقعد عندك... هتصرفى عليا وعليهم؟؟"
"تعالى اه وسيبهم اهل ابوهم اولى بيهم"
بصت لهم مها
"اسيبهم؟؟ عايزانى اسيبهم وهما ف السن ده ويبقوا من غير ام ولا اب... عايزاهم يتربوا زبي صح...
يكبروا وعمرهم ما حسوا بأمان البيت والاسرة"
مامتها ساكتة مش بترد عليها... كملت مها بحزم
"انا قاعدة هنا لما اشوف جوزى حصل له ايه؟"
"اش اش يا جوزك... من امى يا بت... انتى اتجوزتاه علشان مبسوط وهيعيشك عيشة كويسة
ويهنيكى... كل ده طلع ع الفاضى لا قاعدة ف شقتك ولا جوزك معاكى يبقى متمسكة بيه على
ايه"
"انا قاعدة هنا علشان مش هقدر اقعد بالعيال لوحدى... لا هعرف اراعيهم لوحدى ولا اصرف
عليهم.. والشقة موجودة ومقفولة هتفيدنى بأيه وجوزى مش معايا"
"وضرتك؟"
"مالها؟"
"مش خايفة تاخذ منك الشقة؟"

ضحكت مها بسخرية

"دى طلعت غير ما كنت فاكرة خالص... هى سابت لى كل حاجة... الشقة وطه وهنا... وكل
اللى هى سابتها انا مش قادرة اتخلى بيه... ياريتها كانت احدث الشقة وقاسمتنى ف طه بس فضل بيننا

مش سابنا احنا الاتنين"

قامت الام وهى ماشية

"طيب... انا ماشية مش عايزة حاجة؟"

"لا شكرا"

راحت وصلتها ع الباب ورجعت لقت نرمين قدامها

"مها"

"نعم"

"هقولك حاجة بس مش قصدى حاجة وحشة والله"

"قولى"

"امك واطية اوى"

لسه مها هترد عليها... لقت نفسها بتضحك

نرمين" طب وحياتك امك لنعملهم عيد ميلاد بالعند فيها... غاظتنى اوى"

"بس بقى يا نرمين... دى امى برضه"

"بس قوليلى انتى طلعتى بتجى طه اوى كده"

مها بانكسار" مش جوزى وابو ولادى... لما هتخلفى هتعرفى ان جوزك قبل ما يبقى ابو ولادك حاجة

ولما يبقى ابو ولادك حاجة تانية خالص"

نرمين بانكسار" اتجوز!! انا قربت افقد الامل خلاص"

عالية ف المطبخ عند هدير... سمعت صوت الموبايل ف الاوضة

راحت ترد... بصت ع الرقم... رقم غريب... ردت

"الو"

وسمعت صوت طه

"وحشتينى يا عالية"

صرخت وهى مش مصدقة

"طه.... حبيبي انت فين؟ كده تعمل فينا كده؟؟ انت كويس؟؟؟ انت وحشتني اوى"
"انتى وحشتيني اوى يا حبيبتى... عاملة ايه طمنيني عليكى... بتشوفى ماما واحد واروى ونرمين"
"ايوه يا طه... بشوفهم وكلهم كويسين... كلنا هنتجنن عليك انت فين طمنى"
"اطمنى... اسمعى الكلام اللى هقولوك ده... افهميه ونفذه بالحرف الواحد"
"خير؟؟"

عالية ماشية ف مطار الكويت بعد ما وصلت
بتدور بعينها على طه... اول ما شافها جرى عليها وجريت عليه
حضنوا بعض بكل شوق وحب وحنين
"وحشتيني اوى يا حبيبتى... اوى"
"حبيبي انا مش مصدقة انى شفتك تانى"
كانت بتعيط من فرحتها... حسست ان الناس منتبهه لهم
"طه الناس بتتفرج علينا"
بص طه حواليه كان فيه ناس بتبتسم وناس مكسوفة
"احم... ايه الاحراج ده... اعمل ايه نسييتيني الدنيا"
"فهمنى بس انت بتعمل ايه هنا وجيت امى"
"انتى قلتي لحد انك جاية؟"
"لا هدير وابلة فاتن بس زى ما قتلتي... بس حرام يا طه كلهم هيتجننوا عليك مامتك ومها ونرمين"
"متجيبيليش سيرتها يا عالية"
"حرام يا طه... دى اتكسرت خالص والله وبقت واحدة تانية"
"مش مصدق... يالا بينا بس ونكمل كلامنا ف البيت"

طه بيفتح باب شقة... ويسبق عالية
"اتفضلى... بيتنا اللى بعيد عن الناس كلها"
دخلت عالية... وهى بتبص حوالها

"سيبك من البيت اى حته معاك تبقى جنة بالنسبة لى... احكيلى انت اختفيت فين كل ده وازاى
قدرت تبعد عننا كده وبالطريقة دى"

دخلوا وقعدوا... وبدأ يحكى لها

"لما حسيت انك فعلا مش عايزانى ومش راضية تردى عليا وف نفس الوقت مها بتضغط عليا
بولادى كرهت الدنيا وعيشتى وكنت بتمنى الموت كل لحظة... قابلت واحد صاحى بيشتغل ف
مكتب سفريات ولقيت انه عنده عقود عمل مضمونة هنا ف الكويت... مشيت ف الحكاية دى
واستلفت فلوس ودفعتله حق العقد واخذت اجازة بدون مرتب ومقلتش لحد خالص وجيت...

جيت وانا مقرر انى هجيبك نعيش هنا بعيد عن كل حاجة فرقتنا"

"وولادك يا طه؟؟ هانوا عليك تبعد عنهم"

رد بوجع "اه... علشان اتعود لما اطلق مها على بعدهم عنى"

"تطلقها؟؟"

"ايوه؟"

"لا ياطه... المرة دى لاء"

"لا ليه"

"علشان ولادك مالمش ذنب ف حاجة خالص"

"انا عايزك انتى بس... انا سألت هنا على دكتور كويس وكنت مستنى لما تيجى واحجزلك عنده..."

انا عايز عيال منك انتى يا عالية... ولو مجوش يكفى راحتى معاكى"

"بس عيالك اللى جم فعلا دول متاخدهمش بذنب امهم"

"اعمل ايه؟؟"

"اول حاجة لازم تظمنهم عليك... وبعد كده نبقى نشوف الحياة بيننا كلنا هتمشى ازاى"

مها فى اوضة عالية ف بيت نرجس

ولادها جنبها نايمين وهى بتعيط

تدخل عليها نرجس... تبص لها وتقعده قصادها على طرف السرير

تطبطب عليها

"الحمد لله انا اتظمننا عليه"

مها بتعيط بحرقة

"مش عايزة اضايقك زيادة بس انا قبل جوازك بيوم قلت لك اى مقارنة معاها هيختارها هي... انتى مسمعتيش الكلام وعاندتى وخيرتية وقارنتى...وصلتية انه سابنا كلنا واخذها هي بس معاها"
"هو غلط انى اكون عايزة جوزى ليا لوحدى"
"محدث كذب عليكى... انتى اتجوزتية وكنتى عارفة كل حاجة"
"انتى مش حاسة بالنار اللى جوايا... انا قاعدة هنا وهى معاها هناك"
"يا مها...هى كمان كانت بتبقى هنا وهو معاكى وكنتى مانعاه يجيها"
"قصداك انى بشرب من نفس الكاس... شمتانة فيا"
"لا اله الا الله...هشمت فيكى ليه بس ده انا شايلاكى انتى والعيال ف عينيا"
مها بتعيط بحرقة... طبطبت عليها نرجس تانى
"هو قالك ايه عامل فيكى كده؟"
"قالى انى لو عايزة اطلق هيطلقنى... ولو مش عايزة مخليين هنا وهى هتبقى معاها هناك وهيتزل اجازة كل سنة شهرين"
"انتى عايزة تطلقى؟"
ردت مها وهى بتعيط "لا مش عايزة"
"خلاص امسحى دموعك واحمدى ربنا انه بخير... ومهما غاب مسيره يرجع ان شاءالله"

عالية وطه قاعدين ف عيادة دكتور
الاتنين متوترين والدكتور بيص ف الورق اللى قدامه
الدكتور"التحليل متمنعش اننا نجرب العملية تانى"
عالية بقلق"هى ممكن تفشل تانى؟"
الدكتور"وممكن تنجح...خليكى متفائلة"
طه"يعنى يادكتور اى نسبة اكثر...النجاح ولا الفشل"
الدكتور"والله مفيش حاجة تبين انها ممكن تفشل ومع ذلك دى حاجة منقدرش نجزم بيها...لو موافقين نعمل العملية وربنا يبسر ان شاءالله"
طه وهو بيص لعالية
"نعمل العملية ونتوكل على الله"

عالية على السرير.. وجنبها طه... عالية بتتكلم ف التلفون
"الحمد لله يا ابلة... طه شايلني ف عينيه والله وخصوصا بعد العملية... اه تعبانة شوية بس مبتحركش
من السرير الا بسيط... ميار عاملة ايه هتولد امتي؟؟ لا هي هتسبقي ان شاءالله... ابلة عايزة اقولك
على حاجة... قولي لظه انزل اولد ف مصر... هو مش عايز يتزل اول اجازة علشان زعلان منهم...
اهو معاكى"

ناولت طه التلفون

"ايوه يافاتن ازياك... الحمد لله كويسين... ماتولد هنا وخلص... اه بكلمهم كلهم بس مش عايز
انزل علشان عارف اني هرجع للمشاكل تاني... ربنا يسهل هبقى اعرفك طبعاً... مع السلامة"

بعد ما قفل سألته عالية

"اقنعتك ولا لسه؟"

"الحكاية مش اقتناع... انا ما صدقت بعدنا عن المشاكل"

"حرام ياطه... مامتك واختك نفسهم يشوفوك... وولادك كبروا من غير ما يعرفوك... ومها برضه

ليها حق عليك"

"يا سبحان الله... ده انتي المفروض تخلصي حقك منها"

"يعني اساعدك ع الظلم؟؟ انا بحبك ومش عايزاك تظلم خالص ياطه... نزل اجازة اولد هناك ونقعد

كلنا مع بعض نحدد نظام حياتنا باللى يرضينا كلنا"

طه وعالية خارجين من المطار... عالية بطنها كبيرة

نرجس ونرمين ومها مستنيينهم... وماسكين احمد واروى ف ايديهم

اول ما شافوهم جريت نرجس على طه وحضنته وهي بتعيط

نرمين سلمت عليه وحضنته... شاف ولاده

نرجس قالت لهم "سلموا على بابا"

حضنهم طه وهما ساكتين لانهم مش عارفينه

مها واقفة مكانها.... قربت منه على استحياء تسلم عليه

سلم عليها... عيطت... حضنها وهو بيطببطب عليها

في بيت نرجس...قاعدين كلهم
طه اخذ ولاده على حجره
مها ونرمين بيحضروا السفرة
طه نادى على مها...راحت له
طه"اقعدى يامها... عاملة ايه؟"
مها"الحمدلله...حمدالله على سلامتكم"
طه"الله يسلمك... جهزى هدومك وهدوم احمد واروى علشان هنروح النهاردة"
بصت له مها وبصت لعالية...حست انها مش فاهمة حاجة
طه"حاليا ... ف الاجازة هنقعد ف بيتنا وعالية هتقعد هنا عند ماما ...عالية هتسافر معايا ولو حابة
تسافرى معانا ماشى وهتبقى كل واحدة فيكم ف شقة مش عايزة خليكى هنا والاجازة هبقى
معاكى... لحد ما العقد بتاعى يخلص وهنستقر هنا وكل واحدة فيكم تقعد ف شقة بولادها"
مها"ولادها؟"
طه"اه...اصل عالية حامل ف ٣ توائم...تقريبا انا تخصص توائم يا اما انتم متفقين عليا"
عالية"الحمدلله يا طه انا مكنتش طائلة ضفر عيل"
طه"الحمدلله...وان شاءالله الاخوات يتربوا وهما قرييين من بعض... هااا يا مها قلتي ايه؟؟ تسافرى
معانا ولا تقعدى هنا لحد العقد ما يخلص"
مها بتردد"مش عارفة"
طه"طيب فكرى براحتك ولسه قدامنا وقت"
نرجس تنادى عليهم
"ياللا ياولاد... الغدا جاهز"

..... تمت